

Archief van de Graven van Blois

Nationaal Archief, Den Haag, nummer toegang 3.19.10

Inv. nr.1: 1348-1380

transcriptie door

H.A.Verhoef

Betreft afschriften van akten opgemaakt in verband met het bestuur van alle goederen in Holland, Zeeland en Utrecht.

Tevens akten van het hof van Jan van Henegouwen, heer van Beaumont.

Verder schenkingen aan die genen die hem hebben bijgestaan met het besturen van zijn goederen en de dagelijkse zaken in zijn hofhouding.

Genoemde folionummers hebben betrekking op de nummering van het origineel.

Incl. namenindex.

f.1.

Wi Jan van Henegouwen heer van Byaumont maken cont allen luyden dat wi ghegeven ende gheven meyster Aernde van der Hokelen onsen lyeven clerck ende cyrurgijn om menighen trouwen en dankeliken dyenste dien hi ons ghedaen heeft t'lant des ons een deel van Aleyt Rasschen hier voor tijts anghecomem is gheleghen voer 28 morghen bi der nyer wateringhe streckende mythen enen eynde an sbiscops weyde en mitter andere eynde ander rijndijc meyster Aernde ende sinen nacomelinghen van ons ende van onser nacomelinghe te houden t'enen lene in manyeren alsoe hier na bescreven staet dat is te weten dat dese voerscr. 28 morghen lands comen sullen na meyster Aernds live voerscr. sijn oudste kijnt ist soen of dochter ende ghebrake des kijnds daert eerste van meyster Aernde of comen waren ende hi der meer dan een hadde so sal dat voerscr. lant comen op meyster Aernds kijnt dat daer na t'oudste is. Ende alsoe voert van kijnde te kijnde dat is te verstane dat dit voerscr. lant ons noch onse nacomelinghe nyet weder ane comen en mach noch op besterven en sal alsoe langhe alsoe enich van meyster Aernds kijnderen van wittachtigh gheboorte in live is Ende die welke van sinen kijnderen daer dese voerscr. 28 marghen lands lest op comen dat salse van ons en van onse nacomelinghen houden t'ene rechte lene. Oec so hebben wi gheconsenteert dat meijster Aernt bi sinen live ene van sinen kijnderen welc hi wille goeden mach an dit lant voerscr. mit sinen opene brieve ende welc huere dat ons sinen opene brief daer of toent dat kijnt sullen houden in dat voerscr. goet in desen manieren storven t'kijnt dat meyster Aernt an dit goet mit sinen opene brieve bewijst hadde ende van dien kijnde een soen bleve so soude dit goet voerscr. comen op dien soen in allen manyeren alsoe voerscr. is mer storve meyster Aernts kijnt dat an dit voerscr. lant ghegoet ware sonder soen of die soen daert voert op comen waren storve sonder soen na hem te laten ende meyster Aernds kijnde enich van in live waren so sullen dese voerscr. 28 marghen lands weder comen op meyster Aernds oudste kijnt dat dan van wettachtighe gheboorte in live is te houden an gherechte lene alsoe voerscr. is. Ende waert sake dat ghene wittachtighe gheboorte van meyster Aernde ... bleven wi ende verlijen Wendelmoede die meyster Aernde wijf nu is ende Willam Heyns dochter was dese 28 marghen lands voerscr. te behouden en te ghebruken alsoe langhe alsoe si leven sal tot huere rechten lihftochte. Voerts hebben wi gheloeft ende gheloven meyster Aernde in dat voerscr. lant te houden vrintlijc ende te waren allen comende ende aen ..ael af te doen

f.1v.

van verledene tiden tot desen daghe toe. Ende gheviel meyster Aernde of sinen nacomelinghen hier in enich scoet so dat hem yemand rechts vermate in dit voerscr. lant dat souden wi en onse nacomelinghen af doen en verandwoerden buten meyster Aernds scade eb sinen nacomelinghen. Ende om dat wi willen dat alle dese voerwaerden voerscr. van ons en van onsen nacomelinghen sonder arghelist vast ende stade ghehouden worden meyster Aernde en sinen nacomelinghen so hebben wi desen brief opene beseghelt mit onse seghele ghegheven tot Gymeryes in Haynaut int jaer ons heren mccc xlc111 op sinte Jansdach te middesoemer jussu dns. De Bellemonde dns. De Barbenchon enz.

f.2.

...est copia meus supra venditoe.. in dreiscuer deditpene ...est forma
vendica.....

Coenradus de Oesterwijk	65 mensuras
Item Aloudus Johannes	50 mensuras
Item Laurentius Johannes	24 mensuras
Item Jacobus Janitor	24 mensuras
Item Y...Blyec	20 mensuras
Item Hermanus Barbencon	24 mensuras
Item Johannes Hughonis	20 mensuras.

Om..... .. venditoris .. est tenor.

Wii Jan van Baymont heer van byaumont maken cont allen luyden dat wi vercoft hebben elken van desen also vele lands alse voerscr. Is ghelegghen in Dreyscyer in zeelant mit alsulken dike en anderen saken alse daer toe behoert welc lant elc sijn aendeel ons vol en al betaelt heeft den lesten penninc mit den eersten also dat wi voor ons en voor onse nacomelinghe si en huere nacomelinghe daer in gheloven te houden en te waren ghelijc en ewelijc ene vrijen eyghendoem te gheven mit desen openen bryeve beseghelt mit onsen seghele alle poynten te verstaen sonder arghelist en naden rechte van den lande, ghegheven ,
(niet gedateerd).

f.2v.

Symon Petrus Hallinxsoen.

Jan van Baymont maken cont allen luden dat wij voer ons en voer onsen nacomelinghen ghegheven hebben en gheven Symon Petrus Hallinxsoen vive pont swarten tourn. Of payment dat daer voer ghane is t'omtfanghen jaerlix op sente martijns dach in den winter ombegrepen van onsen rentmeyster in zeelant die nu ter tijt is of namaels wesen sal hem en sinen nacomelinghen te houden t'enen rechte leene ende ontbyeden onsen rentmeyster voerscr. Dat hi hem dat ghelt voerscr. Jaerlix utreyken en betale op den termijn die voerscr. is. In oerconde ghegheven ter Tolne die michilis anno 48.

Peter Kuyinxsone.

Jan van Baymont maken cont allen luden dat wi verleyt hebben en ghegheven Peter Kuyinxsone, Willam Oem Hughen ende Hallinc sinen brueder alsulc ambocht alse ons anbestorven is in Duvelant van (Storm) hueren brueder van ons te houden t'eenre rechte leene. Voert so hebben wi ghegheven en gheven den vyeren voerscr. Zessen vijftich ghemete ambochts die ons alre eerst ane comen sullen ende besturve in Duvelant hem en hueren nacomelinghe van ons en van onsen nacomelinghe te houden eenen rechte leene welc ambocht wi hem gheloven hebben en gheloven in versettinghen van den ambochte dat men hem van onsen wegghen bewijst soude hebben in duyflant ende des nyet also vele ghe.... en ... alse wijs hem wouden doen bewisen. In oerconde datum ter Tolne vigi..galli anno 48.

Jan van Baymont maken cont dat wi ghegheven hebben heer Raessen van cruninghe vyer ghemeten lands luttel min of meer ghelegghen in die hille.... die ons ane comen waren van eenre joncfrou die men hiet Lise.. ...dochter van ons te houden eene leene van welke alse hi ons daerhem d'eenre helfte af ont..... .. waer om wi hem gheoerloeft hebben en oerloven dander helfte te vercoopen ghelijc of sijn eyghen ware want hi ons ghelooft heeft van sinen eyghene erve also vele weder op te draghen.

Ende des heeft Aloud sinen openen bryef van der bewisinghe.

f.3.

Jan van Baymont maken cont dat heer Raesse van Cruninghe ridder onse ghetrouwe ridder opghedraghen heeft voer t'lant dat hi van ons te houden plach liggghende in Walcheren gheheten in dat wi hem gheoerbaert hebbencopen twee ghemete lands liggghende in die prochye van nyelant binnen desen moerlande an die zuutside t'oudorp an westside die heerwech an die noertside t'nyedorp aent oesteynde welke twe ghemete voernoemt ende daer toe zes ghemete en drye vyerdeel lands ghelegghen in Dreyschier die wi hem daer sullen doen bewisen wi hem weder verlyet hebben ende verlyen van ons en van onsen nacomelinghen hem en sinen nacomelinghen te houden.(verder niet).

Egmonde.

Jan van Baymont maken cont want wi oever een ghedraghen sijn mit enen eersamen vader in goede Willam abt ende mit den ghemeynen convente van Egmonde alsoe van den lande van Dreyschier daer si hem af vermaren alle die tyenden van dien lande groet ende cleyne huer te wesen van welken tyenden wi mit den abt en convente voerscr. overeen ghedraghen sijn dat si ons en onse nacomelinghe die tyenden verlyet hebben tot enen ewelike erfpacht en nyet te versumen om (twintach) lb.tournoys siaer die wi hem betalen sullen viertyendaghe na vyt gaende meye naest comende en alsoe voeren alle jare mit alsulke paymente alsoe onse rentmeyster van dien lande jaerlix van onsen reynten t'ontfanghen pleghe en namaels sal Ende want wi willen dat dese voerscr. dinghen anno 48.

Egmonde.

Jan van Baumont maken cond want wi ende eersamen vader in goeden wille abt en de ghemenen convente van Egmonde gheloven hebben en sculdich sijn 20 lb. Toutnoys van den tyenden in Dreyschier die wi van hem hebben ter eenre ewelike erfpacht des si onse opene brieve hebben te betalen jaerlix binnen 14 daghe na inghaende meye naest comende en daerna altoes voert van jare welke 20 lb. Wi hem bewijst hebben om haers ghenoghes wille en bewise an onsen rentmeyster in noert hollant ontbyeden wi onse rentmeyster voerscr. die daer nu ter tijd is of namaels wesen sal dat hi den abt ende convente voerscr. of haren gh3waerden bode sonder enich ander ghebot daer af van ons te hebben dese 20 lb. Voerscr. jaerlix uytreyken en betalen op de termijn die voerscr. is Ende daer af hueren bryef van quitantye te nemen voer ons mede te rekenen waerbi wi hem alsoe vele sullen in rekeninghe In oerkonde datum supra dominus de Yselsteyn joh. De Blonde.

f.3v.

Wi Willam abt ende ghemene convent van Egmonde maken cont allen luden want een edel maghende aen onse lyeve heer Jan van Haynaut heer van Baumont heeft doen diken een lant gheheyten Dreyschier gheleghen jeghen Duvelant en jeghens Scoude in Zeelant so is hi mit ons oevereen ghedraghen dat wi alle den tyenden van dien lande groet en cleine verlyet hebben en overlyen hem en sinen nacomelinghen om enen ewelike erfpacht en nyet te versumen om 20 lb.tournoys alle jaer te betalen binnen 14 daghe na uytghaende meye naestcomende daer na altoes voert van jare te jare in alsulcke payment alsoe onse lyeve here voerscr. jaerlix van sinen rente t'ontfanghen pleghe of namaels sal in dien lande. Ende om dat wi willen daer of dat.. uts....

Beckevoert.

f.3v.

Wij Jan van Henegouwen, heer van Byaumont maken cont allen luden dat voer ons quam ende voer onse mannen Jan Wissensoen van Hardinxvelt ende droech ons op een stuc lands van sinen borchlene dat hi te houden plach van ons ende van onser borch tot Scoenhoven gheleghen bi Wilghenkerke daer boven gheleghen is die kerclane van Wilgherkerk ende beneden ons selfs lant gheheten die Nesse.

Welc lant wi weder verlyet hebben Willem van Beckevoert van ons ende van onsen nacomelinghe hem ende sinen nacomelinghen te houden t'enen rechten borchlene. Ende waert sake dat Willem voerscr. storve sonder wittachtighe gheboorte van hem te bliven so hebben wij hem gracy ghedaen sodat wij ghegheven hebben ende gheven dat voerz. lant te comen op Willam sinen oudsten keessoen dien hi had bi Aleyden, van ons ende van onsen nacomelinghen te houden t'enen rechten borchleen in allen manieren oft sijn ghetruwede soen ware behoudelijc ons alsulx rechts ende dyensts van hem alsoe ons anders onse borchlude verleent van ons ende van onser borch tot Scoenhoven voerz. sculdich sijn te done. Hier waren oever onse truwe mannen alsoe Dyc van Senselles, heer Jan die Muelnaer, heer Coen

van Oesterwijn, ridders, Gherijt Alewijnsoen, knapen, ende anders goede luden omdat wi willen dat dit vast ende ghestade blive ende ghehoude worden van ons ende van onsen nacomelingen Willem voerscr. ende sinen nacomelingen in den maniere dat voerscr. is so hebben wi desen brief open daer op beseghelt mit onsen seghele ghegheven op onse borch tot Scoenhoven s'donredaghes na sente Lucasdach ewanghelist int jaer ons heren M CCC acht ende veertich.

f.4.

Wouter Edelinck.

Wi Jan van Haunaut heer van Beaumont maken cont allen luden dat wi voor ons en voor onse nacomelinghe ghegheven hebben en gheven Wouter Edelincksoen tot enen eweliken erfpachte te comen op sine kinder die hi heeft bi sinen wive die nu ter tijt is naden rechte vanden lande t'lant gheheten t'veerstallant houdende acht merghen ende zestehalf hont ende den waelvyertel houdende vier morghen gheleghen in Gouderake mit alsulken dijk alse daer toe behoert te houden ende te bewaren op sijns selfs cost, anxt ende arbeyt ende daer heeft hi onder ghe(h)at ene halve hoeve lants gheleghen in Gouderake tusschen Boudijn Spaken ende Katerinen Jonghe Dyrxlant welc lant hi ende sinen erfname bruken sullen om tyen pont holl. siaers sulx payment alse onse rentmeyster aldaer van onse rente t'ontfanghen pleghen te betalen jaerlix op bamisse of binnen viertyen daghen daer na, in deser maniere wter sake dat anden dike ten voerscr. lande behorende enich ghebrecquame so soude die halve hoeve lands die Wouter voerscr. daer onder gheset heeft daer in ghaen om weder mede te maken. Oec wt sake dat dit voerscr. ghelt binnen den voerscr. termine nyet betaelt en worde altoes ... al openen dach so waer dit voerscr. lant ons of onsen nacomelingen vrij ende los weder ane ghecomen ende daer toe die halve hoeve voerscr. die onder den dijk gheset is. Voert so gheven wi dit lant voerscr. te comen na Wouters doet altoes op een lijf van sinen erfnamen in al der manieren dat voerscr. is te verstante sonder arghelist. In oerconde desen bryeve beseghelt mit onsen seghele, ghegheven op onse borch tot Scoenhoven s'woensdaghes na die octave van sinte martijnsdach in den wijnter int jaer ons heren mccc, acht ende veertich.

f.4v.

Jan van der Goude.

Jan van Haynaut heer van Beaumont maken cont allen luden dat wi ghegheven hebben en gheven voer ons en voer onse nacomelinghe heer Janne van der Goude onsen trouwen ridder van ons te houden te lene al dat goet dat Jan Aertssoen sijn vader van ons te lene hilt doe hi lest in leve was in alsulken manieren ist dat heer Jan voerscr. sterft sonder wittachtighen soen na hem te laten so sal al dat selve goet comen op sinen oudste dochter wittachtich van ons te houden te lene. In oerconde dese dinghe so hebben wi hem dese opene bryef daer op ghegheven beseghelt mit onsen seghele. Ghegheven op onse borch tot Scoenhoven vridaghes na sinte lucas dach ewanghelist. Int jaer ons heren mccc acht en veertich.

f.4v.

Die spike te dijken. (dit stuk is doorgedaan).

Jan van Haynaut heer van Byamont maken cont allen luden dat wi gheoerlovet hebben en ghegheven Hanne Cryoen te dijken tot scoenre scape alse tot ons oerbaer en ter sijnre een landkijn dat gheheyten is die Spijc gheleghen in Tessel mitten westside an paterswael ende mitter oestside an zuderhasselder dijc vytghaande zuytwaert an meersdiep ende metten noertsijde an die Ee van noerthasselo. In dese manieren dat ons Hanne voerscr. daer afgheven sal hondert gouden scilde of payment also goet dat daer voer gaet te betalen op midwinter naest comende. Ende daer boven vonden wi dat dit lant betaelt ware so soude ons Hanne voerscr. gheven daer af also vele meer alse ons redelijc dochte ende wi daer op setten woude

of onse lude also heer Dyr heer van Senzellis ende Janne den Blonden en wanneer hi dit lant mit dijken also veere ghebracht heeft daerre die dijgrave mitten heemraet lovet om t'lant daer mede bewaert te wesen so mach hi hant slaen anden ouden dijc dien hi begopen heeft mitten nyen ende ghebrukens tot sijnre oerbaer ghelijc den anderen lande in die spijs. Ende (winnen) behoudelic ons onsen tyende daer of sn anderen dyenst en hebben ghelijc onsen anderen landen in Tessel sonder argelist. In oerconde datum anno 49.

f.5.

heer Jan, heer Jan van Henegouwen bastaert zone.

Jan van Haynaut heer van Byaumont maken cont allen luden dat wi voer ons en voer onse nacomelinghe ghelooft hebben ende gheloven Janne den bastaert onsen soen ridder, te bewisen twehondert pont holl. siaers bi gherechten prijse so waer wi willen in hollant binnen onsen lande daer hi der seker si. Welke 200 lb.holl. siaers Jan die bastaert voerscr. en sinen nacomelinghe na onser doet op heffen sullen jaerlix erflijc en ewelijc hem en sinen nacomelinghen het si soen of dochter van ons en van onsen nacomelinghen te houden t'enen erfene. Ende om dese bewisinghe te doen also voerscr. is so verbijnden wi ons en onse goed onse nacomelinghe en huer goed dat inden voerscr. lande ghelegghen is sonder argelist ende om dat wi willen dat dese gheloefde vast ende sonder ghebrec ghehouden werde so hebben wi desen openen bryef t'eenre oerconde daer af beseghelt mit onsen groeten seghelen. Ghegheven tot Eymer... of enen dagh na sacramentsdach int jaer ons heren mccc neghen en veertich.

f.5.

Texel.

Jan van Haynaut heer van Byaumont maken cont allen luden dat wi voer ons en voer onse nacomelinghe gheoerlooft hebben en ghegheven onsen lyeven luden ghemeynlic in onsen lande van Tessel te bediken tot onsen oerbaer en ten hueren een lant dat daer te bedyken is ghelegghen binnen onsen voerscr. lande van Tessel tusschen die twe nye coghen die daer bedijct sijn. In deser manyere dat wij en onse nacomelinghe inde voerscr. lande hebben sullen onse tyende jaerlix also van den anderen dat daer ghelegghen is behoudelijc ons oec daer in alre heerlicheyt, rechte, reynten ende baten die wi of onsen raet onse nacomelinghe of huer raet bi onsen of bi hueren goetdenken daer op setten willen ende also wi besceyden hebben in onsen anderen bryeve dien wi hun ghegheven hebben van den lande dat si voertijts bi onsen oerlove oec bedijct hebben. Ende in desen voerscr. lande willen wi behouden een achtendeel onsen vryen wille mede te doen

vervolg f.5v.

het si selver te behouden het si te vercopen of te gheven welc achtendeel wi selven willen doen bedijken op ons selfs cost ghelijc dar ment maer sal bedijken. Oec so is ons meringhe dat men rechtevoert binnen desen d.. voirseide lant anevaerde te bedijken vyt ghem..re hant also dat wi ten naeste jare onser tyenden en si huerre baten daer af wachtende moghen also verre alst god voorsiet maer waert sake dat si versumende dit voirsch. lant nu te bedijken also dat ons ten naesten jare ghene bate vander tyende comen en mochte soe wouden wi nochtan dair een verset hebben also groet also dan af billijc comen soude oft bedijct en besayt ware en bi gheliken dat van den anderen lande coemt dat besant wesen sal ende wouden si dit lant alst bedijct is al of eens deels te weiden en onbesant hoghen laten so woude wi nochtans daer af aen onse tyende sulc verset hebben en bate also ons of onsen raet onsen nacomelinghen of huerre raet altoes redelijc denken soude. Ende dit voirsch. lant gheven wi onsen voernoemde luden te ghebruken erflijc en ewelijc tot huere oerbaer in allen manieren die voerscreven sijn. Ende al sonder argelist in kennisse ende oerconde der waerheyt deser voerscrevenre dinghen die wi vast ende scade houde sullen en ghehouden willen hebben soe

hebben wi desen openen brief daer af beseghelt mit onsen seghele ghegheven inden casteel van (Eymeries) op den heylighen pijnster avont int jaer ons heren dusent driehondert neghen en veertich.

f.5v.

van den huse ter Huel.

Wij Jan van Heynegouwen heer van Byaumont maken cont allen luden dat wi om menighen trouwen dienst die ons heer Coene van Oysterwijn onse ridder dicke ghedaen heeft ende noch doen sal hebben hem ghegheven en gheven mit desen brieve te comen op Agnyese ziere dochter die hi nu heft bi varen Ade sine wive of hi en gheenene zone en creghe dat huus ter Hoele ende dat erve dat dan toebehoert in allen manieren als sinen brieve spreken die wi hem daer te voeren of ghegheven hebben. In oerconde desen brieve bezeghelt mit onse seghel ghegheven tot Scoenhoven op sinte cesilien avont.

Van den huse ter Huel.

Wi Jan van Henegouwen heer van Byaumont maken cont allen luden dat wi verliet hebben en verlyen mit desen brieve veren Aden die nu heer Coene van Oeterwijn is haere lijftochte anden huse ter Hoele ende an t'lant dat dair toebehoert ter tijt toe dat Agniese haer dochter die si nu heeft bi heer Coenen voerscr. twalef jaer oud wort of si also langhe levet, uytghesceyden allen qrgelist. In oerconde desen brieve beseghelt mit onsen seghele ghegheven op onse borch tot Scoenhoven op sente cecilien dach int jaer ons heren dusent driehondert neghen ende veertich.

f.6.

Gherit Borchman

Jan van Henegouwen heer van Byaumont maken cont allen luden dat wij verleyt hebben ende verlyen Gherit den borchman enen halven viertel lands dien d...peterssone te voren van ons te houden plach ende ons opghedraghen heeft tot Gherit Borchmans behoef voerscr. welke halve viertel lands ghelegghen is binnen desen palen en lantghe..... also hier na volghen, also mythen oesten egghe int weer daer Jutte peters nu in woent, an die oesterside Hillen Willams Tonijssoons lant, an die westside Clays Benten land, streckende mit den oeversten eynde an den nyen Cadijck ende mythen nedersten eynde streckende anden afterdijck vytghaende an t'vlisterlant. Ende dit voernoemde lant verlyen wi Gherijt voerscr. van ons ende van onsen nacomelinghen hem ende sinen nacomelinghen te houden tot enen erflene. Ende men salt verheerghewaden mit eenre jaerreynte die van den selven lande coemt sonder arghelist. Dit ghescyede op onse borch tot Scoenhoven daer bi ende over waren onse ghetruwe mannen also heer Jan die Muelnaer, heer Dyeric van senzellis, heer Jan van der Goude ridderen ende anderen goede lude. In oerconde desen brieve beseghelt mit onse seghele die ghegheven was ter stede voernoemt op sinte martijnsdach in den wynter int jaer ons heren mccc neghen ende veertich. Jo.Blonde.
(dit stuk is doorgedaan).

f.6.

Texel.

Wie den ghenen cont doen wi manne scepen ende ghemne lant van Tessel te verstaen mit kennisse der waerheyt want een edel vermoghende man onse wael lyeve ende gheduchte heer, heer Jan van Haynaut heer van Byaumont ons gheoorloeft en ghegheven heeft te bedijken een lant ghelegghen binnen Tessel tusschen die twee coghen die nyelijck daer bedijck sijn in manieren dat die brief spreckt dien wi van onsen lyeven heer voerscr. daer op hebben onder sinen seghel so gheloven wi en verbijnden ons in goeder trouwen mit desen openen brieve daer af tot sinen

wille te wesen of sijns raets sijne nacomelinghe of huers raets ende wat van dien lande sijne heerlicheyt toe behoren mach of so wat rechte renten en baten hi daer of of sijn raet setten wille dat sullen wi altoes willichlijc ghedoghen en gheerne voldoen in alle manieren dat besceiden is in sinen opene brieve dien wi daer op hebben en al sonder arghelis. In oerconde desen brief.

f.6v.

Texel.

Jan van Henegouwen heer van Byaumont maken cont allen luden want onsen goede van Tessel ghemeynlic bi oerlove en consente van ons een nye lant bedijct hebben dat ghegheven is in onsen lande van Tessel ende gheheyten die middelste coghe wt welke lande wi een recht achtendeel behouden hebben onsen vrijen wille mede te doen alsoe die brieve begrepen die nu daer af onse luden voernoemt oever ghegheven hebben en alsoe si beide mit huere brieven en oec mit boden bi hueren vrijen wille ons bekent hebben, soe hebben wi om den meerre oerbaer ende wael beraden dat rechte achtendeel van den voerscr. lande alsoe groet ende alsoe goet alst ons mit allen sinen toebehoren bi gherechte mate ghebueren mach vercoft Jan van den Hoevel onsen knaep en foryer om vierhondert goede goudene scilden die hi ons vol en al betaelt heeft alsoe dat wi ons daer af wael ghepayt houden ende dat wi voer ons en voer onse nacomelinghe beleyt hebben en belyen dat voerscr. achtendeel lants jans weis en sijne nacomelinghe te wesen hueren vryen wille mede te doen alsoe mit huere vrijen (gegheven) goede. Ende al sijn onse lude van Tessel voerscr. mit huere brieve ieghen ons verbonden om dat wi hem dat voernoemde lant al heel wilden laten bedijken te gheven en te betalen soe wat baten cijnsse of scatinghe die wi tot onse behoef en na onse goedenken daer op sullen willen setten, soe willen wi nochtan dat Jan voerscr. daer af voer dit voerscr. achtendeel om dat hijt bi enen coep heeft overdraghen si behoudelijc ons onsen tyende daer af en anderen dienst die wi van onsen anderen oude lande in Tessel te hebben pleghen. Ende wi hebben Jan voerscr. oeverghegheven al dat selven voerdeel van dijc die daer toe behoeren mach dat ons onse lude van Tessel ghedaen hebben in dien dat sijt ons buten onsen cost bedijct hebben. Ende van desen voernoemde sctendeel lants hebben wi ghegheven en gheven Jan voerscr. enen vrijen eyghendom en gheloevet voer ons en voer onsen nacomelinghe hem en sinen nacomelinghe sonder arghelis te ghewaren erfelic en ewelic mit desen opene brieve beseghelt mit onsen seghele. Ghegheven tot Berghen in Henegouwen des saterdaghes na derthiendach int jaer ons heren dusest drie hondert neghen en veertich.

f.7.

Jan van Haynaut heer van Byaumont maken cont allen luden dat wi gheoeloft hebben ende ghegheven onsen lyeven luden in Tessel den ghenen alleen die woenachtich sijn binnen Oest gheest binnen Westgheest binne der halle ende binnen Wittincgheest, wael te bedijken t' onse oerbaer en den huere t' lant dat gheleghen is tusschen tyarkijs hoeve en lyorccoech streckende buten an meersdyep behoudelijc ons daer in onser heerlicheyt tyende en anderen recht alsoe wi op die andre nyelande die in Tessel voertijds bi onsen oerlove bedijct sijn besceyden en besprken hebben mit onsen bryeve die daer af sijn, dats te verstaen dat wi of onsen nacomelinghe daer op setten en maken moghen alsulke bate recht en reynte alsoe ons of onsen raet onsen nacomelinghen of huere raet redenlijc denken sal. Ende wanneer die nyedijc van den voern. Lande alsoe verre bracht is datten die balyu mitte heemraet van onsen lande van Tessel lovet soe moghen onse veerlude des ouden dijx die nu ten voern. Lande behoert ghebruken tot hueren oerbaer ghelijc den anderen lude. Ende dit voern. lant hebben wi voer ons en voer onsen nacomelinghen ghegheven en gheven onsen voersluden en hueren nacomelinghen te ghebruken erflijc en ewelijc tot hueren orbaer in alle der manieren dat voerscr. ia sonder arghelist in oerconde der waerheyt van desen dinghen die wi vast en

stadelijc houden willen so hebben wi desen openen bryef daer op ghegheven beseghelt mit onsen seghelen. Ghegheven tot Sinte Gheerdenberghe op sint marienmagdalenen avont int jaer ons heren mccc en vijftich.

Jussu dns bell..

Presentibus dns Jo Muelnaer ..de Sensellis Jan de Goude et Gherit van Oesterwijn Jo Blonde.

f.7v.

Jan van Henegouwen heer van Byaumont maken cond allen luden dat Jan Hughensoen onsen man worden is van 4 ghemeten lands ligghende in Dreyschier die 2 anden noerdijc en 2 anden oostdijc op die havene welke 4 ghemete hi ons op droech die wi hem weder verleyt hebben tot enen erflene en daer toe soe hebben wi hem ghegheven ende gheven t'scoerken tusschen bellaerde en bigghe sluyse van ons te houden t'ene rechte leene ende daer waren oever alse onse manne die heer van Sensellis en Aloud Janssone. In oerconde desen brief beseghelt mit onsen seghele ter Tholne woensdaghes na sint martijns dach in den wynter int jaer ons heren mccc enen vijftich.

(later bijgeschreven)

Ende wi Guy van Chastillon grave Bloys hebben verlijt Willem oem Janssoen die helft van den 4 ghemete lands voirsr. na ingehandt des briefs voirn. Daer waren als mannen Jan Huygensoon, Adriaen Willemssoen, Looy claessoon en Alout Huyghensoon gedaen t'Scoenhoven 25 daghe in junio int jaer 89 presentibus dns de Montfoerde de Gouda.

f.7v.

Wissenwijn vuten Poel.

Jan van Henegouwen heer van Byaumont maken cond allen luden dat wi ghegheven hebben Welyserde die Wissen wijf uten pole was en huere kynderen die si bi Wisse voersr. hadde die 400 roeden lands die wi an 3 stucken mit hem ghemene hadden ende die hi van ons in pachte te houden plach daer t'ene stuc af hytet'werf ende t'voerhof t'ander brandshof ende t'derde die boemghaert. In deser manyere dat wi quytseide die 400 roeden lands voern. tot huere behoef in enen panghel alsoe dat si onsen reyntmeyster in zeelant daer oever t'onsen behoef bewisen sal van den huere alsoe vele lands ligghende in die selve gherechte ende dat alsoe goet is. In oerconde ghegheven ter tolne die martis p... martini anno domino (53).

f.8.

Gherit die Wilde.

Notandum Gheraerdus Wilde .. pro Ingura adsuam sita libertaten oppr.. de Gouda int.. ..ditate que est dns Johannis de Goudeque est henria de lakeman est anno 47 viti in

Presentibus dns Coenrade de Oesterwijn et Gherardo eius fre....

f.8.

Pieter Valkenaer.

Petrus falckenarius

f.8v.

Jacob Duerwairder.

Jan van Haynaut heer van Byaumont maken cont allen luden want Jacop doerwaerder onse knaep ghecoft heeft jeghen Wessel van Codijc die veertich scillinghe holl. siaers die hi van ons had tot sine live also dat Wessel Jacop voersr. den brief dien hi daer op van ons hadde oeverghegheven heeft soe gheven wi en verlyen Jacop voersr. die selve veertich scillinghe siaers. Ende om dienst aen ons dien ons Jacop ghedaen heeft ende noch doen mach, soe

gheven wi hem daer toe veertic scillinghe holl. siaers welke veertich scillinghe ieghen Wessel ghecoft ende veertich scillinghe die wi hem daer toe ghegheven hebben hi ontfanghen sal jaerlix op bamisse vyt onser tolne tot Sparendamme van ons ende van onsen nacomelinghen te houden in leene also langhe alse hi leven sal ende onse man daer af te wesen. Ende ombyeden onsen reyntmeyster die daer nu is of namaels wesen sal dat hi Jacop voerscr. dat voerscreven ghelt betalen en vytreyken op den voernoemde termijn sonder anderen gheboeds daer af van ons beyden ende neme weder sinen bryef van quitanchen voer ons mede te rekenen mer waert dat in onser tolne voernoemt so vele niet en quame dat Jacop voerscr. van den vyer ponden holl. siaers voerscr. jaerlix vol en al betaelt mochte wesen soe willen wi ende ontbyeden onsen reyntmeister aldaer dat hi hem van onsen anderen reynten daer af voldoen sonder wedersegghen op den voernoemden terminen al sonder arghelist. Ende want wi willen dat Jacop voerscr. hier in bewaert is ende hem voldoen werde van sinen voerscr. leene in der manieren dat voerscr. is so hebben wi hem daer op ghegheven desen openen brief beseghelt mit onsen seghelen. Ghegheven tot Beamont op st. lamberts dach int jaer ons heren mccc neghen ende veertich.

Dns bellemonde, dns Sensellis, Jo Blonde

f.9.

Texel Jan Tricen de dijk den spijck

Jan van Haynaut heer van Beaumont maken cont allen luden dat wi voer ons en voer onsen nacomelinghe ghegheven hebben gheven en oerloven Jan Tricen te bediken tot scoenre scape also tot onser oerbaer en ter sijnre een landkijn dat gheheten is die Spijc gheleghen in Tessel mitter wester side an peters wael mitter oesterside an zuder hasseld dijc vytghaende zuytwaert an meersdyep ende noertwert an die Ee van noerthasselt. Welc lant wi hem ghegheven hebben om hondert goede guldenre scilde die hi ons daer voer al gherede betaelt heeft also dat hi en sine nacomelinghe des voerscr. lands ghebruken moghen tot huerre oerbaer en hueren vryen wille daer mede doen. Ende wanneer Jan voerscr. dit voernoemde lant mit dijk also verre ghebruikt heeft dat die dijgrave mitte heemraet van den lande dien dijc loven en dat tlant daer mede bewaert mach wesen so mach Jan voerscr. of sine nacomelinghen hant slaen anden ouden dijc dien hi mit sinen nyen dijc begrepen heeft en ghebrukens tot sijnre oerbaer ghelijc den anderen lande van Spijc dat wi hem ghegheven hebben, behoudelijc onser heerlicheyt also tyende en dyenst also wi te hebben pleghen van onsen anderen lande in Tessel ende want wi willen dat Jan voerscr. hier in bewaert si en ghehouden wesen in alle manieren also voerscr. is so hebben wi hem daer op t'eenre oerconde desen openen brieve ghegheven beseghelt mit onsen seghele. Ghegheven op onsen borch tot Scoenhoven op sinte wilbrords dach int jaer ons heren mccc neghen en veertich.

Presentibus dns. De Sansellis, Coen de Oesterwijn, Gherit de Oesterwijn, Jo Blonde.

f.9v.

Noert hollant Huge van Zaenden.

Jan van Haynaut heer van Beaumont maken cont allen luden dat wi herleyt hebben en verlyen voer ons en voer onse nacomelinghe Hughen van Zaenden aldussulc lant en goet also hier na volghet sijn dats te verstane 58 made lands liggende op hoernsloet also groet en also cleine also Willem sijn vader dat selve lant van ons te houden plach. Item ene (hoec) gh..sten uten tyende van wermer. Item den tyende beyde groet en clene ende die tolne van zaender damme welc lant en goede voerscr. Hughe voerscr. van ons en van onsen nacomelinghe hout en houden sal t'ene rechten lene. Voert so hebben wi den voerscr. Hughen (gratye) ghedaen en hebben verleyt en verleyen Hilde Ghedden die nu ter tijt sijn ghetruwede wijf is van allen desen voernoemde goeden die ene helfte als men se naest gheraken mach tot huerre rechte lijftochte daer wise in gheloven te houden naden rechte en costume van den lande daer dese

goede ghelegghen sijn, alle arghelist vytghesceden. Dit ghesceyde op onsen borch tot Scoenhoven daer bi en over waren onse ghetruwe mannen alsoe heer Dyeric heer van Sensellis, heer Jan van der Goude, Willem Beck, Willem die Witte en anderen goede lude. Ende omdat wi willen dat dese dinghe vast en stadelic ghehouden worden so hebben wi t'eenre oerconde daer af desen openen bryef beseghelt mit onsen segghel die ghegheven wert op onse borch voernoemt s'vridaghes na die octave van st. martijns dach in den wynter. Int jaer ons heren mccc neghen en veertich.

f.10.

Wouter van Rijnen.

Wij heer van Byaumont maken cont want Jan Botterman, Gherijt Lillensoen ieghen ons verboert heeft sijn lijf en al sijn goet. Ende daer voir ons mit scepen vonnisse van onser poerteren van Scoenhoven verwonnen is mit allen rechte dat onse scepenen voerz. wijsde dat recht was en is Zo hebben wi vercoft Wouter van Rijnen tot enen vrijen eyghen al goet dat Jan Botterman hadde op die tijt doen hi t'shechtelijc hadde jehghens Janne den scriver ende sijn kinderen ende al goet dat hem doe of zeder ane bestorven is van Gheerlof Lille sinen vader of van anders yemanne ist husinghe hofstede of ander erve roerende of onroerende hoe dat het ghenoeft of naer dattet ghelegghen is binnen onsen poerten of landen.

Ende al dat voern. goet zullen wi Wouter voern. ghewaren ende hem dair in houden jehghens elken mensche mair dat Wouter alle witteliken scout betalen of van niden zal in alle rechte alsoe wi selven souden jof wi dat voerscr. goet selve behouden hadden sonder ons van enighe scout enighen cost of scade te eyschen in alre manieren alsoe voerscr. is.

Ende ontbieden onsen baliu van Scoenhoven ende van der Goude die nu is iof namaels wesen sal dat hi Wouter voerz. of wien hijt vercoeft of gheeft in dien goede houde ende bescermen vilic jehghens elken mensche ende waer yemant die die Wouter of den ghenen die hi dit goet vercofte of gave enighen hinder of onghebruuc dade an desen goet voerscr. die wille wi dat onse bayliu voern. anetaste ende hantere alsoe den ghene die ons onse recht ende heerlycheit benemen wilde Ende wat onse bayliu voerz. hier toe doet des sullen wi hem volstaen ende wtdraghen. In orconde, datum aput Scoenhoven t'woensdaghes na st Maertijn.

f.10v.

Gemeyn lant van Steyne

Jan van Haynaut heer van Byamont maken cont allen luden dat wi om beden wille en versoec onser lyeven en goeder lude vyt onsen lande van Steyne hem luden voernoemt ghemeynlic ghegheven hebben en gheven alsulx rechts te pleghen en te ghebruken als hadden voermaels bi s'heren tijden van Steyne dats te verstane alsulc recht te hebben alsoe men inde lande van Woerden voertijts te houden en te hanteren plach bi ons lyefs heren en brueders en ons lyefs neve sijns soens tijden voermaels grave te hollant dien god ghenadich si, vytghenomen allen sake daer men bider greven tijden voernoemt naden rechte van noerthollant lijf mede verbueren mochte welke saken men berechten sal in den lande van Steyne voernoemt naden voerscr. noerthollantsche rechte sonder brant ende vuytghenomen onse scouwe van dike en van waterscape die men daer houden en hanteren sal alsoe men tot noch gheplogghen heeft.

Ende oec dat men onse lude uter lande van Steyne voerscr. in ghene borchtochte van doetslaghe noch van vredebrake winnen en mach, alle poynten te verstane sonder arghelist. Ende om dat wi willen dat onse lude voerscr. en huere nacominghe van ons en van onsen nacominghe sonder verbrec en wedersegghen ghehouden werden in alsulken rechte alsoe voerscr. is so hebben wi hem ghegheven daer op t'eenre oerconde desen openen bryef beseghelt mit onsen seghele ghegheven te Dordrecht op sente jacopsdach int jaer ons heren mccc en vijftich.

Presentibus dns Jo Muelner, Sensellis, Goude, Willem Witte, Pouwels Tolnaer.

f.11.

Symon van Zaenden.

Jan van Heynegouwen maken cont allen luden dat wi verleyt hebben en verlyen om beden wille en versoec Symons van Zaenden Margareta sinen wive tot huerre lijftochte d'ene helfte van 8 lb. holl. siaers die hi houdende is van ons ten rechten leen en die hem bewijst sijn t'ontfanghe iaerlix op zaenderhoerne. In oerconde deser brief beseghelt mit onsen seghele ghegheven t'Dordrecht swoensdaghes na st.jacops dach int jaer 50.

Item f.11.

Lijftocht.

Item verlyede mijn heer onlanghe daer na bi Hilleghem enen poerter van Haerlem die Dullaerts oem is een deel lands tot sijns wijfs lijftochte inde selve iaere.

f.11v.

Wissen wijf van den Poel.

Jan van Henegouwen maken cont dat wi overghegheven hebben en gheven Wolmarden die Wissen wijf was uten Poel en den kijnderen die si bi Wissen hadde die 400 roeden lands die Wisse mit ons ghemene ligghende hadde en van ons in pachte te houden en laghen an 3 stucken daer tene af hiet t'werf ende t'noerhof tander Willam hadden soens hofste ende terde Jans berenhof. In dese manyeren dat wi die 400 roeden lands voern. die wi t'onsen deel daer an te hebben plaghen quijtselden in enen panghel also dat si onsen rentmeyster in zeelant daer oever bewisen sal t'onser behoef anderswaers binnen der prochy daer die voern. lant gheleghen is also veel erves dat also goet is sonder arghelist in oerconde datum ter Tolne omtrent st martens misse in den winter anno 50.

f.11v.

caden

Op die selve tijt ghaf mijn heer Woluyarde voirsch. enen openen bryef daer hi si en huere kijnderen mede quytscout van der scout die Wisse voern. minen heer sculdich mochte wesen also van der tijt dat hi in mijns heren dyenste was ter Goes oevermids 5 lb. groten die si doe alrede betaelde int jaer 50.

f.11v.

Jan Hugenzoen.

Item op die selve tijt gaf mijn heer Jan Hughensoen een stucke lands in Dreyschier daer hi mijns heren man af waert tot sinen live, int jaer 50.

f.11v.

Aloud Jansz.

Item onlanghe daer na gaf mijn heer Aloud Janssone een deel lands heet die boemghaert ter Goes gheleghen daer hi mijns heren man af waert tot sinen live, int selve jaer van 50.

f.12.

Gielis van Windelsnesse.

Jan van Henegouwen maken cont allen luden dat Gelijs van Windelsnesse die heer Willamssone van Windelsnesse ridder was ons bi sinen vryen wille opghedraghen heeft en enen vryen eyghendom ghegheven van alsulken goede en erve also hier na bescreven is te verstante 13 merghen lands die gheleghen sijn in Clays Oemssoens ambochte in tiselens waert streckende van der heren lande van st.petrus t'Utrecht ten misslote toe mit alsulker tymmeringhe also daer op staet en toebehoert. Ende 7 merghen lands die gheleghen sijn int oudelant in paepheynren ambochte streckende van den voerscr. misslote tot inder maese van

welken goede en erve Gelijs voerscr. onse borchman worden is. Ende dit selve goet en erve hebben wi hem verleyt en verleyen van ons en van onsen nacomelinghen hem en sinen nacomelinghen te houden tot enen rechte onversterflichen lene van onser borch tot Scoenhoven, sonder arghelist. Hier waren bi en oever alse Iyve en ghetrauwen mannen heer Floris van Byamont, heer Jan die bastaert onse soen ridders, Jan van der Ghiseele, onse proest van Byamont, Copkijn Lisensoen onse doerwaerder en anderen. In oerconde des brieve beseghelt ghegheven en ghedaen in onsen cameren tot Byaumont in crastienst.pauli anno 50

f.12v.

Der abdissen ondersaten van Reynsborch tot Middelburch.

Jan van Haynaut heer van Byaumont maken cond allen luden die desen bryef sullen syen of horen lesen dat wi ghegheven hebben en gheven den goeden luden van Middelborch ende der abdissen lant van Reynsborch en den lande dat men heyt zudijc dat heer Dirx uten weerde is en den lande van Randenborch al gheleghen an die oestside van der Goude enen waterganc doer onse land van Blomendale ende doer den broec voert van Willams Witten gheer doer die oude Goude voer bi den nuwenbroex wech vytghaende doer onse lant van Steyne gheheyten die Wilnesse in die naeste veyrtel die Wouters Witten was, an die oestside van der zijtwe tot der halven ysele toe inghaende van Herbarens ambovhte van Foreest doer t'noert eynde van blomendale opghaende voer t'oesteynde van blomendale zuytwert bider ree vijf roeden breed waterghanghe en opstal, voert dese voerghenoemde waterghanc al omme dicht te houden nyeman daer in noch te wateren, het onse bi ons ende bi den voerghenoemde bueren voert soe sal Herbarens van Foreest of sinen nacomelinghe of sijn ghewaerde rechteren desen voerghenoemde waterghanc scouwen vuytganc ende inghanc mit den heemraeds die in dit voerghenoemde lant hoeren vytgheset onse dijcrecht wech ende weynde onse scouwe daer op te voeren alse recht is, voert waert sake dat ons en onsen luden van desen voerghenoemde waterghanc enigherhande scade quame dat kenlijc ware dien te betalen bi onsen heemraet ende recht van onse lande. Ende waer dat sijs nyet en daden soe soude onse rechteren mit den ghesworen van onsen lande den voerghenoemde waterghanc toeslaen ende alst ons en onsen luden ghebetert ware weder opslaen en te ghane alse voerscr. is (onverseyt) van nyemant mer waer in allen of menighe van desen voerscr. poynten yet te verbeteren dat soude staen tot onser verclaringhe sonder arghelist. Ende om dat wi willen dat dit vast en stade blive ghehouden van ons en van onsen nacomelinghen soe hebben wi daer op desen voerscr. bryef beseghelt mit onsen seghele ghegheven tot Byaumont s'donredaghes na onser vrouwen dach in meerte int jaer ons heren m ccc 51.

f.13.

Philips Rotairts. (deze brief was doorgedaan).

Jan v.Henegouwen heer v.Byaumont maken cond allen dat wi voer ons ende voir onse nacomelinghe ghegheven hebben ende gheven Philips Rotartssone om dienste die hi ons ghedaen heeft ende noch doen sal ene halve hoeve lands gheleghen in den gherechte van Jaervelt ende gheheten Blakenborch daer t'suyt eynde af strecket in de Lecke ende t'noerteynde int gherechte van Lopic ende beleghen heeft mit erve anden oeveren egghe Peter Emmeresoen ende anden nedere egghen Jans kijnde van Zanten van ons ende van onse nacomelinghen te houden t'enen rechte lene Ende den dijc die daer toebehoert sal hi bewaren op sine cost ende anxt alse dat recht van de lande wijst daer hi ondergheset heeft al sijn goet ghewonnen ende onghewonnen dat hi heeft of hebben sal. Ende Philips voerz. heeft ons van sinen eygheliken erve opghedraghen eene halven viertel lands gheleghen int gherechte van Lopic streckende mit den zuyteynde an Jaersvelder

gherechte ende mitte noerdeynde an Benscoper landsceydinghe dat beleggen heeft an den overen egghe Gherijt Hughensoen ende anden nederen egghen Greyte Hughen mit hueren kijnderen welke halven viertel wij hem weder verleyt hebben daer hi onse man of worden is van ons ende van onse nacomelinghen te houden in leene in der manieren dat van den anderen lande voerscr. is alle poynten te verstane sonder arghelist.

Dit ghescyde op onse borch tot Scoenhoven daer oever waren onse ghetrouwe manne Dyr heer van Senselles, her Jan van der Goude, ridderen, Gilys van Wyndelsnesse, Gherijt van Oesterwijn, Gherijt die Burgher ende anderen. In oerconde des briefs beseghelt mit onse seghelen ghegheven tot Byaumont int jaer ons heren M CCC twe ende vijftich.

f.13v.

Hertoghe Willem van Beyeren greve van hollant van zeelant, heer van vrieslant en verbeider der greeflicheit van Henegouwen maken cond allen luden dat wi om beden wille onser liever vrouwen en moeder der grave van Henegouwen ons liefs oems heer Jans van Henegouwen heer van Byamont en ons liefs neven heer Walraven van Luxemborch heer van (linx) verleit hebben verliet en wilkoren mit desen jeghenwordighen breyve onsen lieven neve Janne s'grave Lodewijx soon van Bloys of sinen naesten erfname van ons liefs oems voerscr. live comende alle goede poerten vesten dorpe heerlicheide hoghe en leghe lant ende waerre renten vervalle sekeren en onsekeren hoe si ghenen of waer dat si gheleghen sijn binnen onse landen van hollant van zeelant van kenemerlant ende van vrieslant mit alle sinen toebehoren hem en sinen nacomelinghen of sinen naesten erfnamen van ons liefs oems voerscr. live comende van ons en van onsen nacomelinghe grave van holl. te houden in alsulker vormen ende in allen manieren alst onse lieve oem voerscr. tesen daghe toe ghehouden heeft ende hielt doe dese brief ghescreven was in vaderlic ende moederlic bewisinghe ende in rechte bruederlighe. Ende wanneer onse lieve oem voerscr. van live ter doet comen sal wesen op dat Jan van Bloys onsen neve voern. hem overleeft so willen wi Jan voerscr. of sinen naesten erfname van ons liefs oem voerden live comende te manne ontfanghen sonder enich wedersegghen in alle den goede die voerscr. sijn die van ons en van onse nacomelinghen te houden t'enen rechten erflene en alle dese voerscr. dinghen te verstane sonder arghelist. Ende om dat wij Willem hertogh van Beyeren ter wille dat alle dese overscreven sake bliven vast ghestade en wel ghehouden en allen manieren dat voerscr. is soe hebben wi desen openen brieve gheseghelt mit onsen seghelen in kennisse der waerheit, ghedaen en ghegheven tot Valenchijn des saterdaghes na jaersdach anno 54.

f.14.

(brief in latijn)

vervolg f.14v.

f.15.

Texel.

Jehan van Haynaut heer van Byaumont maken cond allen luyden want wij an ons en an onsen erfname behouden hebben dat wi of si onsen of huere raet setten moghen na onse ghenoghe of naden huere op die 3 coghen die onse goede lude van Tessel bi oerlove van ons bedijkt hebben binnen onse voerscr. lande int oghe soe wat baten of reynten wi willen tot onser behoef alsoe die bryeve begrepen die daer af sijn aneghesyen t'ongheval ende verlyes dat onse voerscr. lude ghehad hebben in vele manieren hebben hem hier af gratye ghedaen ende setten van nu rechtevoert die voern. in coghe tot sulken rechte alsoe tander oudelant aldaer steet, dats den elften scoef van allen dat daer op wasset jaerlix te tyenden te gheven. Ende daer medesal dit voern. nyelant voertane wesen van allen dat wi of onse nacomelinghe voertijts daer op gheset mochten hebben naden van den bryeven voerscr. In oerconde deser dinghe soe

hebben wi desen bryef daer op t'ene ghetughe beseghelt mit onsen seghele. Ghegheven tot Byaumont 15 daghe in aprille anno domini m ccc 53.

f.15.

Idem.

(2 kleine oorconden in het latijn)

f.15v.

Jacob Scriver.

Jan van Henegouwen heer van Byaumont maken cond allen luden dat wij om beden wille goeder lude onser vreynde Jacop den scriver weder gheven hebben Thuys daer hi in te wonen plach in onse stede van Scoenhoven staende op die oestside van de havene aldaer dat hi mit vechtelyc ieghen ons verbuert hadde. Ende daer toe scelden wij quyt al dat wij an dat voerz. huys hadden bi die verbuernisse voerscr. uytghesceyden die vijf pond holl. siaers die te reynten jaerlix daer op ghesceyt sijn bi onse scepene vonnisse aldaer die wij an ons behouden. In oerconde des briefs beseghelt mit onse seghele ghegheven tot Byaumont XV die april anno LIII.

f.15v.

Item.

Op den selven dach gaf mijn heer den selven Jacob weder 3 hofsteden liggende buten Beckenoerts poerte die hi mit Willem Oudevaders wive ende hueren kinderen ghemene hadde die oec verbuert waren mer hi sal se van minen heer in leene houden alsoe hi te voren dade. Presentibus dominus de Barbenchon, Sensellus, J.Blonde.

f.15v.

Jan van der Goude eygen.

Jan van Henegouwen heer van Byaumont maken cond allen luden dat wi om beden wille ons liefs ende getruwen ridder heer Jan van der Goude hem ghewilkoert hebben ende ghegheven.....XL merghen lands die hi van ons in leen waren hout tot sinen scoensten alsoe vryeyghen erve. In oerconde desen brief beseghelt mit onsen seghelen. Ghegheven tot Byaumont XV diemense aprillus sub anno domino LIII. Presentibus Barbenchon,Sanselles ende Joh.Blonde.

f.16.

Jan van Henegouwen heer van Byaumont maken cond allen luden dat wi voer ons en voer onse nacomelinghen oeverghegheven hebben en vercoft onsen lyeve en ghetrouwen luden van der goude ende huere nacomelinghe erflic en ewelic den wijnt en die wintmolen van onser voerscr. stede van der Goude alsoe verre alsoe huere vrijheyt ghaet Om 50 lb. holl. siaers sulx payments als men aldaer van onsen reynten te nemen plach. Te betalen onsen reynten aldaer of onser nacomelinghe die die nu is of namaels wesen sal binnen die 4 heylighen daghen van pinxteren naestcomende ende alsoe voert van jare te jare alsoe dat onse lude voerscr. voert meer setten moghen het si binnen die veste of buten alsoe verre alsoe die vryheyt strecket daer si willen alsoe menighe moelen alsoe hen goet dunct ter stede oerbaer op dat si ghenoech doen van der moelne stat den ghenen dies terve wesen sal. Ende wi noch onse erfname ne sullen voertane ghene moelne setten noch doen setten binnen der vryheyt voerscr. waert oec dat wi of onse nacomelinghe namaels erghent binnen die heerscappe van der Goude moelne wouden doen setten nochtan mochte elc mensch uter poerte sijn malen soeken daert hem lest ghenoeghen soude. Ende binnen dese coep sullen onse 2 wijntmolene sie nu ter Goude staen mit allen huere toebehoren onser voerscr. lude wesen huere wille mede te doen mer die

moelen die op den borchwal staet sullen si af doen iaers naden datum des bryefs te setten anderswaer daer si willen. Ende overmids desen voerwaarden sullen onse lude voerscr. des wijnds en der moelne ghebruken erflic en ewelijc tot huerre ghenoghe alse voerscr. is. Te verstane sonder alrehande archelist ende want wi willen dat dit vast ende stade bliven. Apud Scoenhoven datum anno 53.

Presentibus dns de Randerode, Jann v.d.Goude. Jan de bastaert, Gherit Oesterwijn, Paulis Tolnaer.

f.16v.

t'Clooster ter Leede.

Jan van Henegouwen heer van Byaumont maken cond allen luden want wi Janen onsen dochter die nonne is ter Lee ghegheven hebben ende bewijst 5 lb.holl. tot hueren live die na huerre doot weder an ons of an onse nacomelinghen comen souden alse onse oude brief spreckt daer dese doer ghesteken is soe is onse wille dat onse voerscr. dochter der voerscr. rente ghebruken na den teneur van onsen voerscr.bryeve mer na huerre doet soe hebben wi ghegheven ende gheven dese voerz. 5 lb.

holl. erflic ende ewelic te bliven den ghemene goedshuse van der Lee. In deser manieren dat men voertane daer om doen sal voer ons alsoe langhe alse wi leven jaerlix ene misse van den heylighen gheest te beghinnen binnen VIIJ daghe na den datum van dese brieve ende alsoe voert jaerlix Ende na onser doet onse beghanghenisse alse men pleghet aldaer op onse jaerghetide van vighelyen ende misse Ende dan sal men dese voerscr. 5 lb. angheriden ghelde deylen onder die personen van der kerke die ieghenwoerdich sijn ende den dienst van mossen ende van vaghelijc deen welke reynte wij bewijst hebben ende bewisen an sulken paymente te sulken termine ende tot sulker stede jaerlix te heffen alse onse ande bryef begrijpt daer dese doer ghestoken is. In oerconde dese ghegheven tot Scoenhoven anno LIIJ mens...may.

f.15v.

Gherijt Borchman.

Eerste deel in latijn.

..... enen halven vyertel lands gheleghen voer Claes Aelbertssoens dore te dike waerts streckende mit den eenen eynde in die Lecke an die oestside Radewijn an die westside Gherijt die Burgher selve.

aput Scoenhoven anno LIIJ

f.17.

Dreysschier.

Jan van Henegouwen heer van Byaumont maken cond allen luden want wi van alle den lande dat onder ons in Dreyscier gheleghen is hebben sullen elc iaers 6d. tournoys te iaerscote t'onser behoef van elke ghemete ende die 4 ghemete van alle den lande voernoemt t'vijfte altoes quythouden sullen van allen coste die daer op comen mach, soe hebben wi af ghelaten en laten af voer ons en voer onse nacomelinghe dat die 4 ghemete nyet ghelden en sullen voer t'vijfte van den jaerscote van 6d. voerscr. duerende tot eweliken daghe voert soe sullen ons onse lude van Dreyschier voern. in heervaerde dyenen mit enen cogghe volx van 25 mannen. Ende wi hebben an ons behouden om in onse bate te keren die 700 ghemeten van alle den lande voerscr. in allen dyesten die onse voerscr. lude doen sullen het si in heervaerde of in beden. Ende wanneer dat t'vrye in zeelant in bede of dyensten mede ghaet sone sulle onse luden voerscr. van hueren lande nyet ghelden mer alse t'vrye nyet mede en gaet soe sullen si an den 700 ghemeten voerscr. ghelden alse men van anderen landen in zeelant deet, sonder alrehande arghelis. In oerconde , ghegheven ter Tolne op st bonifacij anno 53.

Losse brief.

Idem.

Jan van Bloys doen cond allen luden dat wi verleyt hebben en verlyen onsen lieve neve heer Arnde van Randerode die 100 oude scilde t'siaers tot sinen live die hem en oudevader mijn heer Jan van Henegouwen heer van Byaumont des god ghedenke ghegheven heeft. In allen manieren dat sinen briefinhouden en begripen die hi daer van onsen lieve heer en oudervader voim. Daer ons jeghenwoerdighe brief doir ghesteken is, welke hondert scilde t'siaers voirsch. hi van ons houden sat te ... so langhe als hi levet daer hi oec onse man of worden is. In oorconde desen brief beseghelt mit onsen seghele ghegheven t'Scoonhoven 10 daghe in julio int jaer ons heren m ccc lxii

Jussu dns Jo de blonde

Presentibus dns Hughe de Barbenchon, Jan van Langhraec, dns de Goude.

Ghisebrecht Stomme, Jannes Tolnaer.

f.17v.

heer Aernt van Randerode.

Jan van Henegouwen heer van Byaumont maken cond allen luyden dat wi voer ons en voer onse nacomelinghe ghegheven hebben en gheven onsen lyeve neve heer Aernde van Randerode, ridder om menighen dyenst die hi ons ghedaen hevet en hier namaels ons en onsen nacomelinghen doen mach 100 oude scilde goet van goude en van ghewichte syaers of payment daer voer alsoe goet daer hi onse man af worden es die van ons en van onsen nacomelinghen te houden in leene tot sinen live. Daer toe hebben wine onthouden (mit 5 paerde) daghelix van onser herberghe te wesene. Ende sinen cost tot sinen huysse over te varen en weder bi ons te keren, salmen hem doen van onsen weghe alse redenlijc es. Welke somme van ghelde wi hem bewijst hebben en bewisen op onse gruyte ter Goude t'ontfane jaerlix alsoe langhe alse hi leven sal op onsen vrouwen misse in september die men heyt natinitas. Ende ombyeden onsen reyntmeyster die nu es of namaels wesen sal dat hi heer Aernde voern. of sinen ghewaerde bode dit voersch. ghelt uytreyken en betalen alle jare sijn leven lanc op den termijn voersch. sonder anders gheboeds daer af te wachten wedernemende sinen brief van quitanchen mede te rekenen. Ende overmids dese bewisinghe soe heeft heer Aernd voern. gheloeft in goeden trouwen ons en onsen nacomelinghen te dyenen alse een goet ghetrouwe man sinen heren sculdich es te dane alsonder arghelist. Ende want wi dese vorwaerden vast en ghestade houden willen in alre manieren alse voersch. es soe hebben wi daer op t'eenre oerconde ghegheven desen openen bryef beseghelt mit onsen seghele, ghegheven tot Byaumont op sente stephanis dach anno 53.

f.18.

Gherit Arntszoen.

Jan van Henegouwen heer van Byaumont maken cond allen luden want wi ter waerheyt bi opene bryeven vernomen hebben dat een knaep hiet Gherit Aerndssoen niet en was eyghen der abts noch des gods huys van Egmonde soe scelde wi quyt sulc recht als ons toe behoert soude hebben aen t'goet dat onse ons in Tessel van hem after bleef ende nu besitten Hemine Mannesone, Boelman Herinc en dode Teebbenssone. Soe dat wi hem noch huere nacomelinghen van der voersch. eyghenscappe om des goeds wille dat des voernoemde Gherits was niet eysschen en sullen over dat ons toe behoert soude hebben of hi des abts en godshuys eyghen gheweest hadde en alsoe verre als hem die abt en sijn convent voern. mit huere openen bryeve vryghevent hebben. Soe stelden wi hem en sijn aftersaet oec quyt inder manieren voersch. mit desen opene bryevebeseghelt mit onsen seghele te verstane sonder alrehande archeyt ghegheven tot Byaumont des saterdaghes na onser vrouwen dach in merte int jaer ons heren m ccc liii

f.18.

Olbout Mennensoen.

Jan van Henegouwen heer van Byaumont maken cont allen luden dat voer ons quam en voer onse mannen Olbout Mennensoen en drouch ons op dryehonden lands of daer omtrent ghelegghen op der (crijnde) in onsen lande van Tessel daer bi ghelegghen is op die zuutside Leen Lewwekijns soens land ende op die noertside t'land dat Olbouts op der (trinde) was daer hi onse man af worden is welc land wi hem weder verliet hebben voer ons en voer onse nacomelinghe hem en sinen nacomelinghen van ons te houden tot enen onversterflichen erflene en wi hem ghewilkoert dat dit voerscr. lant is sinen live comen sal op Th.arc sinen sone van ons in lene te houden alse voerscr. is. Mer waert dat Th.arc voern. storve eer sinen vader Olbout voern. soe soude van hem dir voerscr. lant comen op sinen naesten erfname en alsoe voert altoes te houden van ons in lene alse voerscr. is. Hier waren oever onse ghetrouwen manne heer Aernd van Randerode ridder onse neve, heer Dirc heer van Sensellis ridder, Robbrecht van (Glijnde) Gielis van Windelsnesse knapen en anderen goede lude, ghedaen en ghegheven tot Byaumont onder onsen seghelen des saterdaghes na onser vrouwen dach in merte int jaer ons heren m ccc liii.

f.18v.

Boelman Herinc.

Jan van Henegouwen heer van Byaumont maken cont allen luden dat voer ons quam en voer onse mannen Boelman Herinc en droech ons op t'land dat gheheten is twelrens coghe ligghende in elmerbuieren in onse lande van Tessele daer bi ghelegghen es aen die oestside Meynse Costers wijf ende op die westside Volpart Addensoen. Waer af hi onsen man worden is welc land wi hem weder verliet hebben en verliet van ons en van onsen nacomelinghen van ons te houden tot enen onsterfliche erflene. Hier waren oever onse ghetrouwen mannen her Aernd van Randerode onse neve, her Dirc heer van Sensellis, ridders, Robbrecht van Glynde, Gelys van Windelsnesse knapen en anderen goede lude. In oerconde desen bryeve beseghelt mit onsen seghele ghedaen en ghegheven tot Byaumont in onse camere des saterdaghes na onser vrouwen dach in meerte int jaer ons heren m ccc liii.

f.18v.

Colijn Jansz.

Jan van Henegouwen heer van Byaumont maken cond allen luden dat wi ghegheven hebben en gheven Coline Jans sone (tmalen) van eenre ieghenheit die men noemt tbroec ghelegghen int oestende van zuytbevelant also verre alse wi daer in gheambocht sijn ende ons toebehoert daer hi onse man worden is soe dat hi en sine nacomelinghe tmalen van der voerscr. ieghenheit dat ons toebehoert van ons en van onsen nacomelinghen houden sal tot enen rechten leenen. Ende daer oever sal Colijn voern. of sijn erfname diet van ons houden sal jaerlix betalen altoes op st. jansmisse midden somer een pont groten sulx payments alse men anders van onsen reynten in zeelant ontfanct. In oerconde des briefs beseghelt mit onsen seghele ghegheven tot Berghen in Henegouwen op st.niclaes avont int jaer ons heren m ccc vijftich ende vieren.

f.19.

Coen van Oesterwijck.

Jan v.Henegouwen heer van Byaumont maken cond allen luden dat wi voer ons en voer onse nacomelinghen ghegheven hebben ende gheven Coenen van Oesterwijck onse knape doer menighe dienst die hi ons ghedaen heeft ende noch doen mach Ene halve hove lands ghelegghen int gherecht van Jaarsvelt die men heit Blakenborch streckende mit den zuyteinde in die Lecke ende mit den noerteinde ant'gherecht van Lopic ende belegghen heeft mit erve

anden d'ene egghe Peter Emmeric ende anderen nederen egghe Jans kinderen van Zantten welc land Philips Rotards sonen te voeren van ons hadde te rechte leene.

Voert soe hebben wi Coenen voerz. ghegheven ende gheven in der selve manieren enen halven viertel lands die ons van Philips voern. mede anecomem is omdat hise ons van sinen eyghenen erve opghedraghen hadde ende weder van ons ontfangen in rechte leene welke halve viertel lands gheleghen is int gherechte van Lopic streckende mit den zuyteinde an Jaersvelder gherechte ende met den noerteynde an Benscoper landsceidinghe dat beleggen heeft mit erve an den oversten Gherijt Hughensoen ende anderen nederste egghe Griete Hughen mit huere kinderten van welken landen ende erve Coene voern. onse man worden is ende dat wi hem weder verliet hebben van ons ende van onsen nacomelinghen hem ende sinen nacomelinghen te houden in rechten leene Ende Coene voerz. heeft ons hier toe opghedraghen enen halven viertel lands dien hi coft ieghen Poertenen Jorianssone gheleghen in Lopic daer naest ghelant is anden eenen egghen Jacop van den Damme ende anden nederen egghe Ghise Vrijer ende Dyrsc Scotelvoet welken halven viertel wi Coenen voerz. weder verliet hebben ende verliet van ons te houden in leene in der selve manieren dat van den anderen lande hier voerscr. is dats te verstaene te rechte leene. Ende allen den dijc die ten voerscr. lande behoert sal Coene voern. ende sine nacomelinghen op sine cost ende anst naden rechte van den lande daer hi gheleghen is daer hi onder gheset heeft al sijn goet dat hi heeft of hebben sal ghewonnen ende onghewonnen. te verstane al sonder arghelist. Dit gheschiede in onse woninghe tot Byaumont daer bij ende een waren onse ghetrouwen mannen alsoe die borchgrave van Berghen heer van Haverech, heer Aernt van Bandem..heer Dyrsc van Senselles, her Moele heer van Spinout ende anderen Ende omdat wi willen vast en stadelic sonder verbrec of enich wedersegghen houden ende voldoen alsoe voerscr. is soe hebben wi Coene voerscr. daer op desen openen brief ghegheven beseghelt mit onse segghelen tot eene oerconde. Ghedaen ende ghegheven tot Byaumont des sonnendaghes na kersdach int jaer ons heren M CCC vier ende vijftich.

f.19v.en 20.

Gelis van Windelsnesse.

Jan van Henegouwen heer van Byaumont maken cond allen luden dat wi voor ons en voer onse nacomelinghen ghegheven hebben en gheven Gelis van Windelsnesse onsen knape en nuter tijt bailliu in onsen lande van Tessele om menighen dienst die hi ons ghedaen heeft en noch doen sal een vytlant dat gheleghen is tusschen die noertside van den ouden lande van Tessele en den oude coech, streckende mit den westeynde ander dune ende mit den oesteynde anden dijc, des hi ghebruken mach tot sijn oerbaer alsoe sijn vrij eighen erve overmids dat hi daer af sulken scout betalen sulken dyenst doen ende te sulken rechte staen sal alsamen daer inden lande pleghet ende anders ghemene buerlude doen van huere lande aldaer gheleghen. Ende wanneer die nyedijc van den voerscr. lande alsoe verre bracht is datten die dijcgrave mitten heemraden van den lande loven soe mach Gelijs voerscr. mitten ouden dijc die daer binnen begrepen is sine oerbaer doen. Ende die ghene die deel hebben anden oude dijc voerscr. sullen dan mede vyt tasten anden nyen elc nader groten dat hi hadde anden ouden dijc om dien te houden en te bewaren naden rechte van den lande te verstane al sonder arghelist. In oerconde des briefs beseghelt mit onsen segghelen. Ghegheven tot Berghen in Henegouwen omtrijnt st. barbaren int jaer liiii.

f.20v.

heer Jan van Barbenchon.

Jan van Bloys heer van Scoenhoven en van der Goude doen cond en kenlic allen luden dat wi bi rade en goetdenken ons liefs heer en neve hertogh Aelbrecht van Beyeren op die tijt ruwaerd en beleyder van Henegouwen en van hollant ons lyefs heer en broeder s'grave van Bloys en anders ons ghemeine raede ghegheven hebben ende gheven onsen lieven neve heer

Janne van Barbenchon om menighe goede ende ghetruwen dienst die hi ons ghedaen heeft bi ons en in onsen saken dicke te sorghen ende te arbeyden en als hi noch doen sal vierhondert scilde van Goude van s'graven slaghe van vlaenderen of vier ende twintich grote van den selven munte voer de scilt die in zeelant ghemeenlic ghinghe en ghane wesen sullen alle jare t'onfane alsoe langhe als hi leven sal daer hi onse man af worden is. Welke somme van ghelde wi bewijst hebben en bewisen onsen lieve neve voern. op alle onse goede ende renten van onsen lande van der Tolne ende van Dreyschier in zeelant. Déne helfte binnen viertiendaghe na vytghaende meye ende dander helfte binnen viertiendaghe na vytghaende maerte daer die eerste dach af wesen sal te maerte nu naestcomende ende die ander dach te meye daer naest volghende. Ende alsoe voert van jare te jare alsoe langhe alsoe onse voerscr. neve leven sal. Ende ombieden onsen renttemeyster in zeelant die nu is of namaels wesen sal dat hi van onsen wegghen onsen lieve neve voerscr. of sinen ghewaerden bode dit voerscr. ghelt jaerlijcs vytreken ende betalen in alre manieren alsoe voerscr. is sonder enich anders ghebod daer af van ons te hebben. Ende weder neme ons neven brieve van quitanchen van elken termine voer ons mede te rekenen. Ende waert sake dat onse lieve neve voern. Hadde dese voerscr. somme van ghelde bewijst op sekeren stuccke en ghenomde steden daer hise van sijns selves wegghen ende bi sijns selves lude mochte heffen jaerlijcs en ontfaen dat gheloven wi hem te doen bi gheliken prise ende in goede trouwe alle poynste te verstaen sonder arghelist. Hier over waren onse ghetrouwen mannen als heer Jan van Langhrak, heer Jan van der goude, ridders, Gherit van Oesterwyc, Jan van Buren, Dirc van der Goude, Gherit Borchman en anderen. Ende want wi willen dat dese ghifte en gheloofde voldaan en ghehouden worde sonder enich verbrec in allen manieren alsoe voerscr. is soe hebben wi onsen lieve neve voern. daer op t'eenre oerconde en in kennisse der waerheyde ghegheven desen opene brief beseghelt mit onsen seghele. Ghedaen en ghegheven op onsen borch t'Scoenhoven des dinxsdaghes na beloken pinxteren achtien daghe in junio int jaer ons heren m ccc neghen en vijftich.

f.21.

Janne den clerc van der Goude.

Jan van Bloys heer van Scoenhoven en van der Goude doen cond allen luden dat wi machtich ghemaect hebben en maken mit desen brieve Dirc van der Goude onsen knape van onsen wegghen te gheven Janne den clerc van der Goude enen vryen eyghendom van eenre hofstede mit hore toebehoren alsoe als si ghelegghen is ander westside van der havene in onse stede ter Goude als die brieve daer of in houden en begripen die wi Janne voerscr. daer af ghegheven hebben ende alsoe recht en costume van den lande is sonder arghelis. In oerconde desen brief beseghelt mit onsen seghele ghegheven t'Scoenhoven 11 daghe in julio int jaer ons heren m ccc lxii

Presentibus dns. Hughe van Barbenchon, dns. Jan van Langherak, ridders, Dirc v.d.Goude, Jan van Buren.

f.21.

idem

Jan van Bloys heer van Scoenhoven en van der Goude maken cond allen luden want ons Jan die clerc van der Goude over ghegheven heeft dat gheerken ghelegghen binnen onsen stede van der Goude dat sijn vader en hi van onsen lieven heer en oudevader meinen heer Janne van Henegouwen heer van Byaumont des god ghedenken en van ons te houden plaghen die vryheyt des mit allen sinen toebehoeren. Soe hebben wi ghegheven en gheven den voern. Janne die hofstede die ghelegghen is ande westside van den havene mit haren toebehoeren tot enen vryen eyghen alsoe als si ghelegghen is tusschen ghedden vryen en Joyer den cuper die hi van ons en van onsen lieve heer en oudevader voern, te houden plach soe dat hi en sinen nacomelinghe inde vourscr. Hofstede ende mit dat daer toe behoert doen moghen

horen vryen wille als mit haren eyghenen goede en al sonder arghelist. In oerconde desen brief beseghelt mit onsen seghele ghegheven t'Scoenhoven 11 daghe in julio int jaer ons heren m ccc lxii.

Presentibus dns.Hughe van Barbenchon, Jan van Langherak, milis, Dirc van der Goude, Jan van Bueren.

f.21v.

Janne den clerc van der Goude.

Jan van Bloys heer van Scoenhoven ende van der Goude doen cond allen luden dat wi ghegheven hebben en verlye Janne den clerc van der Goude een campken lands dat hi van ons plach te hebben in erfpachte alsoe alst ghelegghen is tusschen den tyendwech bi der Goude ende des gasthuus lant aldaer en als hijt plach te bruken te houden van ons en van onsen nacomelinghe hem en sinen nacomelinghe tot enen rechten lene ende te bruken tot horen beste sonder arghelist en dat selven verheergewade alst ghevalle mit twee goede capoenen. Hier waren over alsoe mannen heer Jan van Langherak ridder, Dirc van der Goude en Jan van Bueren knapen. In oerconde hier of hebben wi desen openen brief ghegheven beseghelt mit onsen seghele, ghegheven tot Scoenhoven 11 daghe in julio int jaer ons heren m ccc lxii.

f.22.

latijns stuk van 8 regels.

f.22v.

Jan van Bloys heer van Scoenhoven ende van der Goude doen cont allen luden want wi den gheselschap van den scutten in onsen dorpe ter Gois meynen voert te setten ende te samen te houden op dat si te reeder ende te willighen hun te dienen. So hebben wi hun ghegheven ende gheven die makelarien van torve van zeelant ende van assche die men an onsen dorpe ter Gois voert aen vercopen zal ende hebben gheset ende setten op elc last torfs enen enghelsen op elke cupe sels enen enghelsen ende op elke cupe aschen 4 miten welc ghelt die vercopper betalen zal den ghenen die de voerscr. scutte bi rade ons rentmeyster ende baliuwes ter Gois die nu zijn of namaels wezen sullen daertoe setten sullen ende daer toe hebben onse lude vander Gois den voerscr. scutten ghewilkoert 20d.groten elcs jaers hair gheselschap mede te hantieren also langhe als zi hun te samen houden inden scut ambochte voerscr.. Ende dese gracie vanden makelarien voerscr. die wi hun ghedaen hebben en zal niet langher duren dan tot onsen wedersegghen. Ende tot eenre orkonde hier of hebben wi hun ghegheven desen openen brief bezeghelt met onsen zeghele in kennissen der waerhey. Ghegheven ter Gois op sinte magdalenen dach int jaer ons heren m ccc ende t'sestich.

Presentibus dns.de Barbenchon, dns.Allaert de Meerte, Aloude Janszone, Dirc v.d.Goude. Ghisebrecht Stomme.

n s'dinxdaghes na st.gheertruden dach int jaer ons heren m ccc acht en vijftich.

f.23.

Henric Hughenzoon van Scakersloo.

Jan van Bloys heer van Scoenhoven ende van der goude doen cont allen luden dat wi om rechte gunsten die wi draghen tot Henric Hughensone van Scakersloe onsen man om der trouwen wille ende vrienescap die hi onsen luden in onsen zaken dicke bewijst heeft ende noch bewisen zal hem t'leen dat hi van ons hout verbetert hebben ende hebben him ghegheven ende gheven tot zinen lene voerscr. 1 ½ ghemet lants ligghe ande procye van Scakersloe die Diric Lauwaert te voren van ons te houden plach welc lant Henric voerscr. van ons houden zal in lene tot zine live ende na hem te comen op ons of onsen nacomelinghen. Hier waeren over

onse ghetrouwen manne als her Jan heer van Barbenchon, her Jan van Langherak, ridder, Henric de bastaert onse oem, Alout Janszoon, Melis van Valkenborghe ende andre. Ghegheven ter Tolne des woensdaghes na sinte jacopsdach int jaer ons heren m ccc enen tsestich.

f.23v.

Coene van Oesterwije.

Wi Jan van Henegouwen heer van Byaumont maken cont allen luden dat wi om menighe truwen dienst die haer Coene van Oesterwije onse ridder ons dicke ghedaen heeft ende noch doen sal Ende oec overmits menighe cost die hi voer ons ghedan heeft onner gouden him ende zinen nacomelinghen ghegheven hebben ende gheven van ons ende van onsen nacomelinghen in rechte lene te houden onse goet ende husinghe dat men heyt t'Huele mit alle de landerijen erve datter toebehorende is legghende binnen desen palen ende lant ghemarke die hier na volghe t'lant dat Hubrechts van Lopic was ant die oestzide Zweder Volprechts lants aen die westzide ende t'lant dat men heyt Cloesterlant op Leckervelt an die overzide also alst gheleghen is Ende dit voerz. huys zal onse ende onse nacomelinghen opene huys wesen tot allen tyden als wij ende onse nacomelinghen des te doen sullen hebben ten oerloghe of omme onse lant te bescrmen Ende omdat wi willen dat heer Coene ende zijn nacomelinghen ane dese voirsr. huse vast ende stade blive van ons ende van onsen nacomelinghe in alle manieren als voerz. is Sonder enich arghelist So hebben wi desen brief open beseghelt met onse seghele Ende omme die meere zekerhede so hebben wi ghebeden onsen lieven heer en neve den grave van Heynegouwen ende van Hollant dat hi desen brief mit ons bezeghelen willen Ende wi Willem Grave van Henegouwen van Hollant van Zeelandt ende heer van Vrieslant om bede wille ons liefs oems voerz. ende om dat wi wille houden Coenen voern. ende zine nacomelinghen in desen voirsr. goede sterken ende houden voer ons ende voer onse nacomelinghen So hebben wi desen brief bezeghelt met onsen zeghelen Ghegheven te Valenchennes des vridaghes na paesch daghe int jaer ons heren M CCC acht en dertich.

f.24.

Heinric Dirx zoens bastaerde.

Jan van Bloys heer van Scoenhoven en van der Goude maken cond en kenlic allen luden dat wi om bede wille Heynrix Dirxsoens en van gracies ghewilkoert hebben, wilkoeren ende concentreren dat hi Pieter Splinters Willemssoens soens bastaertsoen Jacop Dirxsoen zijns soens bastaertsoen ende Margrieten Peters zijns soens bastaert dochter goeden mach aen anderhalve viertel lants die gheleghen zijn in onse lande van Steyne bi der goude. Ende beleghen heeft Reynelt Heynen op die zeezijde en Willem Pieterssoen op die landzijde. Ende waert dese voersr. kinde of enich van hun storven sonder wittachtich gheboorte na hun te latern so soude dit voersr. erve en goet en eeneyghelix zendeel daer of wedercomen en erve op Heynrix Dirxsoen voern. hoeren onderzaten of op zijn gherechte erfname waert dat ..ts Ghebrake en al sonder arghelist. Om dat dit waer is so hebben wi desen brief beseghelt mit onsen zeghele tot eenre orkonde ende in kennisse der waerheyte. Ghegheven t'Scoenhoven des dinxdaghes xvii daghe in meye anno lxxii.

f.24v.

Jan Phillipsoen.

Jan van Bloys doen cond allen luden dat wij om dienste die ons Phillip Willemssoen die onse scout te Noertwije plach te wesen ghedaen heeft en ons Jan sijn soen noch doen mach ghegheven hebben en gheven den selven Janne Phillipsoen thien lb. holl. slechts ghelds t'siaers te sinen liven daer hi onsen man of wesen sal. Jaerlix te betalen te bamisse daer sijn eerst termijn of wesen sel te bamisse nu naestcomende en alsoe voirt van jare te jare alsoe

langhe als hi leven sal, die wij hem bewijst hebben en bewisen op onsen rentmeyster van der Wijc en van Noertwijc. En ombieden onsen rentmeyster van der Wijc en van Noertwijc die nu is en namaels wesen sal dat hi den voirscr. Janne of sinen ghewaerde bode jaerlix wtreyken en betale op sinen brief van quitanche voir ons mede te rekenen die voirscr. 10 lb. t'siaers ten en in der manieren voirscr. is sonder ghebot van ons daer of te hebben. In oerconde dese brief beseghelt mit onsen seghele ghegheven t'Scoenhoven xviii daghe in november int jaer ons heren m ccc drie en tsestich.

Presentibus dns. Hughe van Barbenchon, Jan van Langherak, Ghisebrecht Stomme, Jan van Bueren, Dirc van der Goude.

f.24v.

Symon Ockerssoen.

Jan van Bloys doen cond allen luden dat wi ghegheven hebben en gheven Symon Ockerssoen die onse scout was in de Wijc te sinen liven en niet langher een stuxkin erfs ghelegghen binnen onsen ambocht van der Wijc dat gheheten is die santsalle daer hi onse man of worden is en van ons te leene houden sal sijn leven lanc en niet langher, Welc erve voirscr. belegghen hebben an de noertside t'vlietvelt dat der stede van der Wijc en der ghemeenen aldaer toebehoert en ande westside t'laghelant dat Gherit binden van scoeten is. Hier over waren onse ghetrouwe mannen heer Jan van Langherak, heer Jan van der Goude, ridders, Jan van Bueren en Dirc van der Goude knapen. In oerconde desen brief beseghelt mit onsen seghele, ghegheven t'Scoenhoven xviii daghe in november int jaer drie en t'sestich.

f.25.

Zanders Borgers.

Jan van Bloys etc. doen cont allen luden want Gherit Borchman onsen man voer ons gheweest heeft ende mit zinen vryen wille quijtghescoude ende overghegheven heeft tot Zanders Borghers behoef zijns broeder ene viertel lants die hi van ons te houden plach ghelegghen binnen den ambocht van Stolwijc ende belegghen hebben mitter lande andie oestzide die heer van Arkel mit erve dat men van hem hout ende ande westzyde Zanders voerscr. selve mit erve strekkende mitten een ende an Stolwiker wech ende mitten anderen ende andie lantsceede van Beyersrode. So hebben wi die voerscr. viertel lants verleyt en verlyen Sanders voerscr. ende zinen nacomelinghen te houden van ons ende van onsen nacomelinghen alle der selver manieren dattet Gherit zijn broeder van ons te houden plach dat is te verstaen tot enen erfleen an welken lande Zyborch die nu Gherit Borchmans wijf is hoer lijftochte hadde die zi met horen vryen wille voer ons ende voer onse manne quijt ghesconde heeft. Ende dir voerscr. lant zalmen verherghewaden alst versterft ende mit eenre jaer rente en te verzoeken voer onse huus t'Scoenhoven ende al te verstaen sonder enigherhande argelist. Hier over waren onse ghetruwen manne her Jan van Langherak ridder, Jan van Buren en Dirc van der Goude knapen. Ende om dat wi willen dat alle voerscr. zaken vaste ende stade bliven van ons en van onsen nacomelinghen Zanders voerscr. ende zinen nacomelinghen zo hebben wi daer op desen openen brief bezeghelt mit onsen zeghel tot eenre orkonde. In kennisse der waerheit ghegheven t'Scoenhoven op st.clemens dach int jaer lxiii

f.25v.

Lijftocht Zanders wijf.

Jan van Bloys etc. doen cont allen luden dat wi om bede wille Sanders Borghers verlyet hebben ende verlyen Gheertruden zinen wive hoer lijftocht an een viertel lants die hi van ons hout in erfleene die ghelghen is in Stolwijc ende Gherit Borchman zijn broeder van ons te houden plach ende overghegheven heeft mit zinen vryen wille Zanders zinen broeder van ons te houden in alle der manieren dat so Gherit voerscr. hyelt welke viertel lants belegghen hebben

an die oestzyde die heer van Arkel mitten eyghendom ende ande westzide Zanders voerscr. selve mit erve. In orkonde deser brief bezeghelt mit onsen zeghele ghegheven t'Scoenhoven op st.clemens dach int jaer lxiii.

Presentibus dns Hughe van Barbenchon, Jan van Langherak, ridders.

f.26.

Roelof Duykint.

Jan van Bloys stedehouder ons liefs heren hertoghe Aelbrecht van Beyerens ruwaert van Henegouwen doen cont dat ons van ons liefs heren wegghen voerscr. opghedraghen heeft Barwoud van Stapel zeventhyen morghen ende een hontambocht in Zwijndrecht van den ambocht dat Barwout voerscr. in Zwijndrecht heeft waer of ghelegghen is twee morghen ende een hont ambochts in die zantdoekinghe ende vijftien morghen ambocht in die hoeve die Barwout toeplach te horen dat is te verstaen vijf morghen ambocht op die oestzyde van der hoeve voerscr. en 10 morghen ambocht op die westzide van der selver hoeve ende dese ambocht voerscr. mitten horen toebehoren hebben wi van ons liefs heren wegghen voerscr. verlyet Roelof Doekint om bedewille. In allen manieren alst Barwoud voerscr. van ons liefs heren wegghen en voer zinen manne ons opdroech ende alst die selve Barwout van onsen lieve heer voerscr. te houden plach. Hier over waren ons liefs heren mannen van hollant als Jan van der Halle, Henric van der Zydewinden ende andre manne. In kennisse der waerheyt hebben wi desen brief bezeghelt mit onsen aeghele ghegheven ende ghedaen in Papendrecht des manendaghes voer st martijns dach in den winter anno lxiii.

f.26v.

Aechte Gherit Hals weduwe.

Jan van Bloys doen cont allen luden dat wi Aechten die Gherijt Hals wijf was ende huer rechte erfnamen noch ter tijd kennen in de besitte van den hofstede ghelegghen bi Willige kercken ende anders nyement daer Gherijt voerz. op te wonen plach ende Achte zijn wijf voerz. van ons nu in pachte hout behoudelic ons altoes alsulcs rechts ende wedersegghen als wi daer an hebben mogen. In orkonde ghegheven t'Scoenhoven des dinxdaghes na onser vrouwendach conseptio int jaer LXIIJ.

Presentibus Hughe de Barbenchon, Aelbr. v.Meerten. Ghisebrecht Stomme.

f.27 , 27v, en 28.

Bodegraven, Cortehoeve, Oudencoop, waterganc.

Jan van Bloys doen cont allen luden dat wi vercoft hebben also veer alst an ons comt den goeden luden van Bodegraven op die zuytzide van den Rijn den goeden luden van den Cortenhoeven ende den goeden luden van Oudencoop elken also zi ghelegghen zijn enen vryen waterghanc daer wi ons af belyen van hem ontfanghen te hebben den eersten penninc mitten lesten welken waterganc voerscr. die goede lude die nu inden voerscr. landen ghelant zijn of namaels in ghelant zullen worden leyden zullen ende erflic ende ewelic tot horen orbaer ghebrucken ende behouden zullen in dusdanighe manieren als hier na bescreven staet. Inden eersten so zullen zi ende moghen desen waterghanc leyden ende tot horen scoensten hebben ende brucken tot horen orbaer mit wateringhe ende mit waterkeringhe doer onsen lande van den Steyne sonder anders yemant te veronrechten voert so belyen wi ons desen waterghanc voerscr. vercoft te hebben den goeden luden van den lande voern. die nu zijn of namaels wesen ende daer ghelant zijn also dat zi desen waterghanc en waterkeringhe altoes scouwe zullen onse lant doer dat gheheyten is tlant van Steyne mit horen scouten en mit horen hyemraden die daer toe ghecoren ende gheeed zullen wesen also zedelic en ghewoenlic is in horen lande. Voert so hebben wi den goede luden voerscr. overghegheven ende gheven dat si

scouwen moghen mit horen scouten ende heemraden van den lande voerscr. hore wateringhe ende hore walle tot horen scoensten ende daer hem hoer orbaer an leyt ende daer nyemant ghene scouwe anders op te hebben. Voert verlyen wi hem dat zi ene sluze hebben zullen doer onsen dijc durende te halven dyepe van der Ysele onverzeyt van ons ende van onsen nacomelinghen desen voerscr. lande ende dese voerscr. sluze ende dijc te houden onder enen ban biden dijcgrave ende den hiemraden voert so wanneer zi ghebrec hebben an hoir sluze so sellen si den dijc op doen ende her sluze beteren bi onsen dijcgrave ende bi onsen heemraders van onsen lande van den Steyne also redenlic wesen zal. Voert so zullen zi van desen voerscr. waterghanc hoer water binnen horen wallen houden ende deden zi dat niet dat souden zi beteren bi onsen dijcgrave ende hiemraders of horen waterghanc toe te slaen het en quame bi onghewalle toe van eenre ghemeene vloet ende wanneer dat zijt dan ghebetert hebben so mochten zi dan horen waterghanc op doen onverseyt van yemant. Voert so hebben wi daer legghen 9 viertel lants die zullen wi daer in wateren tot onsen scoensten sonder yements wedersegghen. Ende alle dese voerscr. poynten te verstaen sonder enigherhande argelist ende behouden enen ygheliken zijns rechts ende brieve ende want wi willen dat alle dese voerscr. voerwaerde vaste ende stadelic ghehouden bliven ende onverbrekelic tot ewighe daghe den goeden luden uten landen voern. ende horen nacomelinghen tot mans live ende lantsleghe So hebben wi des tot eenre orkonde voer ons ende voer onse nacomelinghen ghegheven desen openen brief bezeghelt mit onsen zeghele ende in kennisse der waerheyt. Ghegheven t'Scoenhoven des anderen daghes na kersdach int jaer ons heren m ccc lxxiii. Presentibus dns.de Harler, dns.Hughe van Barbenchon, Jan van langherak, ridders, Aelbertus de Meerten, Ghisebrecht Stomme, Jan van Bueren.

f.28v.

Dirc Jacobsz.

Jan v.Bloys enz.enz. hebben verliet ende verlieten Dirc Jacobssoen ende sinen nacomelinghen neghen merghen lands ghelegghen in Lopic boven der kerke also alsi ghelegghen zijn ende beleghen hebben mit erve an den onderen egghe Loef Heinric Buytssoen Ende an den nederen egghe Daem Ghisekijnssoen van welken neghen merghen lands voirz. Dirc ons manscap ghedaen heeft ende hi ende sine nacomelinghe houden sellen van ons ende van onsen nacomelinghen tot eenen onversterflike erfleene te verheerghewaden alst valt mit eene jaerrente. Hier over waren onse ghetruwen manne also heer Jan van Langherak ende Jan van Bueren. In orconde desen brief bezeghelt mit onsen zeghele ghegheven tot Scoenhoven des anderen daghes na st Agnietendach int jaer ons heren M CCC LXIIIJ. Jussu dns Johannes de Blesis.

f.28v.

Clare Dirx voerscr. wijf lijftocht.

Jan van Bloys enz. doen cond allen luden dat wij om bede wille Dirc Jacopssoens verleyt hebben en verlyen Claren sinen wive hoir lijftochte an die minre helfte van den neghen morghen lands ghelegghen in Lopic boven der kerke die Dirc voirn. Van ons hout tot eenen erflene dat is te verstane an die vier morghen ende twee honds lands van den voirn. Neghen morghen lands welke neghen morghen lands beleghen hebben an den overen egghe mit erve loof heinric buyes soen. En an den nederste egghe daem ghisekijnssoen. In orconde desen brief beseghelt mit onsen zeghele ghegheven t'Scoenhoven den anderen daghe na st.agnieten dach int jaer ons heren m ccc lxxiii.

Presentibus dns de harlaer, Hughe van Barbenchon, Jan van Langherak,ridders, Aelbrecht van Meerten, Jan van Bueren.

f.29.

Wijck op de zee, en om die goede gunste die wi tot hem draghen.

Jan van Bloys etc. doen cond allen luden dat wi ghegheven hebben en gheven onsen lieven en ghetruwen luden van der Wijc op die Zee om trouwe dienst die si ons ghedaen hebben en noch doen sellen dat nyemant wonen en sel in onsen dorpe van der Wijc op die Zee die daer enigher poerterscap ghenieten sel oec waer dat hi poerter si mer sel buerrechts pleghen ghelijc anders onsen bueren aldaer. Ende ombieden onsen baeliu aldaer die nu is en namaels wesen sel dat hi onse voirsch. lude van der Wijc op die Zee houde en den voirsch. rechte dat ghedueren sel tonsen wedersegghen. In orconde desen brief beseghelt mit onsen seghel ghegheven t'Scoenhoven 3 daghe in meye anno m ccc zes en tsestich.

Present, dns van Putten, Jan van langherak, jan van Bueren.

f.29v.

Jan van Poelgheest.

Jan van Bloys etc. doen cont allen luden dat wi om dienste die ons Jan van Poelgheest onse knape ghedaen heeft ende noch doen zal hem ghegheven hebben ende gheven 16 lb. holl. slechts ghelts tsiaers die wi hem bewijzen voor ons ende onse nacomelinghen also langhe als hi levet jaerlix t'ontfanc an onsen renten van Scoenhoven ende van Goude. Ende zijn eerste termijn of wesen zal tot st pieters daghe in zullenaistcomende ende also voert van jare te jare daer hi onse man of worden is ende van ons in lene ontfanghen heeft. Ende ombieden onsen rentemeyster van Scoenhoven ende van der Goude voersch. die nu is of namaels wesen zal dat hi t'voersch. ghelt van onsen wegghen Janne voern. of zinen bode tot zynre behoef jaerlix ten voersch. terminen wtreyken ende betale sonder anders enich ghebot of beveelnisse daer of te hebben mer daer of neme zinen brief van quitanchen alle jare voer ons mede te rekenen. Hier over waren onse ghertouwe manne, Jan van Bueren, Lubbrecht van Rykle ende andre. Ende om dat wi willen dat Janne van Poelgheest voersch. dit wael ende vaste ghehouden blive van ons ende onsen nacomelinghe inder manieren voersch. so hebben wi hem daer op desen brief ghegheven t'Scoenhoven op onser vrouwen dach ter lichtmisse anno lxxiii.

Presentibus Hughe van Barbenchon, Aelbrecht van Meerten, Ghisebrecht Stomme.

f.30.

heer Jan van Herlaer heer van de Ameide.

Jan van Bloys heer van Scoenhoven ende Goude doen cond allen luden dat wi voer ons ende voer onse nacomelinghen ghegheven hebben ende gheven heer Janne van Haerlaer heer van den Ameyde onsen gheminden gheselle om goede diensten die hi ons ghedaen heeft ende noch doen sal ende om goede gonste die wi hem toedraghen 200 gulden 20 vlaemsche groten voer enen gulden gherekent of ander payment alsoe goet daervoer jaerlix alsoe langhe als hi leven sal. Te ontfanen die een helfte op st Jansdach te middezomer naestcomende ende d'ander helfte te kersavont daernaest volghende of binnen vierthien daghe na elken termine onbegrepen ende alsoe voert van jare te jare. Welke 200 gulden voersch. wi ghegheven hebben heer Janne van Haerlaer voernoemt te houde alsoe lang als hi leeft van ons te lene Ende hi is onse man daer of gheworden die wi hem bewijst hebben ende bewisen op onse renten van Scoenhoven ende van der Goude. Ende ombieden onsen rentemeester die daer nu is ende namaels wesen sal dat hi heer Janne van Haerlaer voern. of sinen ghewaerde bode dit voersch. ghelt jaerlix wt reyken ende betalen op die termine ende in sulken manieren sla hier voer ghescreven staet sonder daerof enich anders gheboeds van ons te wachten met onse rentemeester diet is of wesen sal...altoes tot elken termine sinen brief van quitanchen weder nemen voer ons mede te rekenen ende al sonder arghelist.

Hier over waren onse ghetruwe mannen alse Jan van Langherak, ridder, Jan van Bueren knaep, ende anderen. Ende tiste weten dat wi dese voirsch. renten heer Janne van Haerlaer

voerscr. ghegheven hadde ende gheven een jaer voer die date van dese brieve ende voer dat hi onse man daer of waren soe dat hem daer of voer die date van dese brieve een jaerrente verschenen was Ende want wi willen dat dit vaste ende ghestade bliven ende wel ghehouden worden in alre manieren dat voerscr. staet Soe hebben wi daer op desen openen brief ghegheven beseghelt mit onsen seghele tot eenre oerconde ende in kennisse der waerheyt ghegheven op onse borch t'Scoenhoven des sonnendaghes na st.Valentinusdach 18 daghe in februaryo anno LXIII

Jussu dno Johannes de Blesis.

Presentibus dns.Hughe de Barbenchon, Aelbrecht v.Meerten,Ghisebrecht Stomme.

f.30v. ledig.

f.31 en 31v.

Een zegghe van dootslagen.

Dit is segghen mijns heren shertoghe heer Jans van Bloys heer van Scoenhoven ende van der Goude. Ende des heren van Waterlande als van dode Jacop Hillenssoon ende Jan Pieter Heynensoen ende Pieter Enkebiens. Ende van allen scille ende twiste die daer of roert nader waerheyt die daer of gheseten is ende ondervonden.

Inden eersten zullen stuver zinen broeder Symon Jacopssoen ende haer maghe ende helpers ende Claes Boykinssoen ende zine maghe ende helpers ghelden Jan Pieter Heynen 90 lb. Ende den bailiu 10 lb. Mer Pieter Heynensoen ende zinen kinderen en zullen niet met hem ghelden ende dese selve voerscr. zullen ghelden Pieter Enkebier 90 lb. Ende den bailiu 10 lb. Item so zullen die scepene van Waterland die ghene die t'vones wijsden ende volghenden ghelden Jacob Jan Hykensoen 90 lb. Den bailiu 10 lb. Alsoe Dirc Hannekensoen scepene in pormer Jan Clais Symonssoen in Lantsmeer Coppert Hanne Loydensoen scepen in Scellingwoude Pouwels Jacobssoen scepen aldaer Symon Claissoen scepen aldaer Caems Jacobssoen Jacob Hanne Demanssoen scepen in Sosendorp Pieter Roelofssoen Clais die Brune Clais Gheritssoen scepen in Raendorpe Jan Appelijn Clais die Grebber Jacop Hildebrant coppensoen scepene in Broeke Jacob Hildebrantssoen Dirc Coppelmanssoen Dirc Willemssoen Jan Clais Walensoen scepene in Zootwoude. Ende dese voerscr. scepene zullen gheven den heren voerscr. overmits dat men ghevonden heeft dat zi een onrecht vonnes ghewijst hebben elc 150 mottoen ende nimmermeer an rechte te wesen noch scependoem voeren. Ende so selt men die ander scepene quijt om dat si recht wijsden. Item so zal Clais Symonssoen die onder bailiu gheven overmids alsulke broke als hi misdaen mach hebben en inder waerheyt of bevonden is 500 mottoen ende nimmermeer bailiu noch rechter te wesen ende voert so zal Clais voerscr. bedevaert varen totte Halle tot onser vrouwen in die ere van onser vrouwen inde ere van den scepenen van Yedam om dat hi op hun ghesproken heeft tusschen dit en meydaghe naist comende. Ende men vint die scepenen van Yedam quite overmids dat si deden dat zi scoudich waren te doen . Item so zullen Stuver ende zijn brueder Symon Jacobszoen ende anderen Jacobs erfnamen ende huer maghe ende helperen en Clays Boekensoen en sinen maghe en helperen gheven den hem van horen broken eerst Stuber en Jan sijn broeder 100 lb.. Item Jacops erfnamen en sijn wijf 100 lb. Item Clays boykensoen 100 lb.

Item zoe zel Aellaert Pieterssoen gheven overmids dat hi Jacob sijn hoeft of sloech boven zoene 200 mottoen ende om dat hi Jacop mede thuis zochte ende den dode 1000 zielmissen twisken dit en kersdach. Item caems jacopszoon zeit men wt den lande tot ewighe daghe om dat hi te ghisel gheboden was en daer niet en doer nimmermeer in den lande te comen ten zie bi den drien heren. Item caems (groenter) Reynaer Pieterszoen en Jacop Crauwel zeit men tot ewighen daghe uten lande om dat si roef ghedaen hebben in den lande ende dat se nyemant en huse noch en hove op sijn lijf en op sijn goet ende dit voerscr. Segghen zo willen die heren ghehouden hebben op eene pene van 6000 mottoen ende dit ghelt en dese zoene te betalen tot

pinxteren nu naistcomende die ene helfte ende tot bamisse daer naist comende die ander helfte. Item zo zullen Melis Claes Morael Hanne Teding Rukebierszoen Jan Claes Walenzoen Jacop Hanne Trudemanszoen en hoer maghen en helpers die mede an den velde waren daer men die kerke belach ende smeecte en om dat si die ghevanghen vreesden daer si in den stoc zaten ende om datter zom waren die zeiden dat men hem rechten zoude jof si soudem hem zelven rechten zo zullen si gheven den heren 6000 mottoen ende die heren zullen die kerke van Yedam weder doen (leyen) op horen coste ende dit voirsr. Ghelt zullen si betalen op eenre pene van 12000 mottoen die ene helft tot pinxteren nu naist comende en die ander helft tot bamisse daer naist comende tot elken termijn binnen haer ... Ende dit ghelt voirsr. Sullen die heren voirsien op dese bi voirsr. Ende op elken al of sijns van yemanden in ghebreke waren.

f.32.ledig

f.32v.

Brunaert Grietenz.

Jan v. Bloys enz. doen cond alle luden want Brunart Grietensoen ons bi sinen vryen moedwille op ghedraghen heeft van sinen eigheliken goede 2½ mergen lands ende sulke husinghe als daer op staet gheleghen in Lopik ende belegen hebben mit erve heer Ghisebrecht heer van Vyanen an den overen egghe ende Gherijt Janssoen Brunarts broeder voerz. an den neder egghe ende wi vynden voirz. lande en husinghe alsoe alst gheleghen is enen vryen eyghendom hebben. Soe hebben wi dat selve lant mitten husinghe verleyt ende verleyen Brunarde voirn. die onse man daer of gheworden is hem ende sinen nacomelinghen te houden van ons ende van onse nacomelinghen tot ene onversterfelijke erfleene te verheerghewaden alst verstarft mit eenre jaerrente. Hier waren over onse ghetruwe mannen Daem Mattensoen ende Ponciaen van Lakervelt. Ghedaen na jaersdach 3 daghe in januario int jaer ons heren M CCC ses en tsestich.

f.32v.

Goes tollenvrij. (in latijn gesteld)

f.33

Goes.

Wi Jan bi der gracies ons heren hertoghe van lettrike, van btabant en van lymborch maken cont allen luden den ghenen die dese lettren sellen sien of horen lesen, dat wi om bede en om liefde ons ghetrouwes mans Florens van Bersele gheven voer ons en voer onse erfnamen alle den lieden die wonachtich sijn of namaels wonachtich sellen sijn en die behoren tot den dorpe dat men heet die Goes quite te sijn van horen goede van allen tolle die men ons sculdich is te gheven al over al in onsen lande en in onsen heerscape. In orconde van desen dinghen hebben wi onsen seghel ghehanghen an dese teghewoerdighe lettren die waren ghegheven int jaer ons heren m cc sesse ende tneghentich des woensdaghes na alreheyli ghen daghe.

f.33.

Goes. (in latijn gesteld).

f.33v.

Westzanen.

Jan van henegouwen heer van Byaumont maken cont allen luden dat wij om bede wille en vergoed onser goeder lude van westzaenden voer ons en voer onsen nacomelinghen hem luden en hueren nacomelinghen ghewilkoert hebben en ghegheven dat alle die ghenen die voertane van buten sullen comen inder wone in onsen dorpe tot westzaende voern. also vry

wesen sullen die wile dat si daer bliven mitter wone van ons en van onse nacomelinghe alsoe die ghene die daer nu wonen en van ouds ghewoent hebben. In oerconde dese bryeve beseghelt mit onsen seghel ghegheven te Byaumont omtrent st.marien magdalenen misse int jaer liiii

Item.

Jan van Henegouwen enz. maken cond allen luden dat wi onsen goeden luden van westzaenden ghegheven hebben en gheven soe wie in onsen voern. dorpe woenachtich is dat hi alle onse lant doer tollenvrij varen ende keren moghe alsoe vere alst ons aneghaen mach dat ghedueren sal tot onsen wedersegghen. In oerconde desen brief. Ghegheven tot Supi...

f.34.

moenbrief

Jan van Haynaut heer van Byaumont onsen lyeven en goeden vrient den rentemeyster van zuythollant saluyt . Wi ontbyeden u dat ghi al tghelt dat in coemt ten Tolne in hollant die binnen uwen bedrive sijn houden doet t'onsen behoef in minresse der scoud die onse lyeve vrouwe en nichte gravinne van hollant haer ter ons sculdich is want si ons op den Tolne voerscr. betalinghe bewijst heeft mit hueren openen bryeven alsoe ghi wit. Oec so beghe... wi dat ghi mit opheffen des ghelds uten Tolne nyemant meer voer ons en laet wesen ter tijt dat wi betaelt sijn na dien dat onse bryeve van der bewisinghe houden. Ende wat van dien ghelde t'onsen behoef ontfanghen wert daer sullen wi u onse bryeve van acquitantyen of weder gheven mede te rekenen alsoe daer toe behoert. In oerconde des bryefs, ghegheven Eymerien int jaer van xlviij.

f.34.

Tolne.

Jan van Haynaut heer van Byaumont maken cond allen luyden ende namelijc onsen lyeven en goeden luyden binnen der baeluyscap van Scakersloe ende Tolne in Zeelant want om (aennemen) dat sulke luyde binnen onse baliuscap voerscr. den balyuwe aldaer somwile smanisse en lelicheyt mit quaden en onhoeschen woerden inder vyerscaren die sonder reden sijn en quaet te verdraghen des wi oec nyet ghedoghen en willen so setten wi daer op ene boete van 10 lb. tournoys t'onser behoef, den balyw en elken scepen elken 5 scellingh tournoys. Ende ontbyeden onsen balyu die nu ter tijt is of wesen sel soe wyen dat hi bi den scepenen vijnt dat hy verbuert heeft of verbueren sal inder manyeren voerscr. dat hi nemen en vytpande sulke boete alsoe wi daer opgheset hebben en voerscr. is. Ende des maken wi hem machtich mit onsen openen bryeve beseghelt mit onsen seghele durende t'onsen oversegghen. Ghegheven tot Henoyt anno xlviij .

f.34v.

Schoenhoven.

Jan van Haynaut heer van Byaumont onsen lyeven en goeden ghetrouwen luyden ghemeynlic binnen onser baliuscappe van Scoen hoven en van der Goude saluyt. Wi seynden an u heer Jan van der Goude onsen lyeven en ghetrouwe ridder gheladen en gheinformeert van onsen boedscappen waer om wi ontbyeden u allen vyt poerten en vyt dorpe binnen der baluyscappe voerscr.en elken bisonder dat ghi heer Jan voerscr. gheloeft in dien dat hi u van onsen wegghen segghen alsoe van dyenste te doen onsen lyeve heer en neve hertogh Willam van Beyeren jegghens den bisscop en die van Utrecht. Ende daer toe wilt alsoe willich wesen ende alsoe vele doen dats onse lyeve heer en neve voerscr. sculdich is mit de ghoden te ghedenken en dat wijs u oec bedanken moghen. In oerconde des bryefs beseghelt mit onsen seghele ghegheven tot Eymerien des saterdaghes na sente peters dach inghaende oest (geen datum)

f.34v.

Tolne.

Jan van Henegouwen heer van Byaumont onsen lyeve en goeden luyden scoute en scepenen van der Tolne saluyt. Wi vernemen dat sulke onser luyden van der Tolne huer coern te malen seynden tot anderen moelners mit anderen voeders en paerden dan heur selfs dat jeghen die die onse rentemeyster aldaer mit u luyden ghemaect heeft inder verhueringhe der muelners voerscr. welke ordinatie is alsoe wi verstaen dat elc man aldaer onder ons ghes..... sijn coern wael seynde moeste ter eenre van onsen muelners indyen dat hijt dede mit sijns selfs boden en paerde en nyet mit anderre luyde ende want wi nyet en willen dat goede ordinatyen ghebroken worden die onse ambochtsluyden mit goede voersyene t' onser oerbaer maken. So ontbyeden wi dat ghi tot ons balyuus vermaninghe aldaer daer toe wijst ende daer oever staet dat men den ghenen die dese voerscr. ordinantien ter waerheyt ghebroken hebben of breken sullen sulken boeten af winnen ende uytlande mitten rechte alsoe daer op staen. Ende so wye van u des nyet deen en wilde dat soude jeghen ons wesen ende wi soudert an hem houden alsoe inden ghenen die onse heerlich vermindren Ende onse best nyet en meynt. In oerconde datum Eymerien anno xlviij.

f.35.

Scoenhoven.

Jan van Haynaut heer van Beaumont maken cont allen luden dat wi bevolen hebben en bevelen Gelijs van Windelsnesse onse borch tot Scoenhoven te bewaren en te houden t' onser ere en oerbaer in deser manyeren dat hi sijn lijf ere en al sijn goet waer datter ghelegghen is daer onder ghesat heeft ons dit voerscr. huys te leveren tot onser vermaninghe. Ende waert dat onser ghebrake so sal hijt leveren onser lyever dochter der graven van Bloys ende van Namen of haren gherechte mombaer, waert oec dat onser en onser dochter voerscr. ghebrake so sal Gelijs onse voerscr. borch hoeden en leveren den oudsten zoen dien dan onse dochte voerscr. haer ghelaten sal hebben of tot sijnre behoef houden. Ende waert sake dat Gelijs voerscr. ons of onsen gherechte erfnamen die voerscr. sijn dese voerscr. borch nyet en leveren of den ghenen dies hem mit onsen of mit haren opene bryeve vermaende so had hi verbuert sijn lijf, ere en al sijn goet waer dattet ghelegghen waren. Ende daer mochten wi of onse gherechte erfname voernoemt onsen vrijen wille mede doen so waer dat wi hem selven of des sijns yet (bewaren) mochten. Ende waert sake dat Gelijs voerscr. om dese borch te houden en te dane alsoe voerscr. is doet bleve of ghevanghen worden en si mit ghewelde ghewonnen worden sone souden wi sinen erfnamen van desen voerscr. voerwaarden nyet eyschen. Oec waert sake dat hi in node van oerloghe of om kenlike sake van anxte cost of scade lede om dese borch voerscr. te houden alsoe voerscr. is dien gheloven wi hem te versetten alsoe redenlijc wesen sal. Alle voerscr. poynten te verstane sonder arghelist. In oerconde deser dinghe so hebben wi desen bryef beseghelt mit onsen seghele die ghedueren sal tot onsen wedersegghen, ghegheven op onsen borch voernoemt smanendaghes na st.martijns dach in den wijnter int jaer ons heren m ccc neghen ende veertich.

Presentibus dns de Sensellis. Jan Muelner, Co de Oesterwijn, Jan van der Goude, Jan de bastaert, Jan Blonde.

f.35v.

Schoenhoven.

Ic Gelijs van Windelsnesse, knaep make cont allen luden dat ic ontfaen hebbe van minen lyeven heer heer Jan van Haynaut heer van Beaumont sine borch tot Scoenhoven die ic ghelovet hebbe ende ghelove voer mi en voer minen nacomelinghe op mine trouwe sekerheit, lijf, ere ende op al mijn goet waer dattet ghelegghen is te bewaren ende te houden tot sijnre eren ende orbaer, hem of den ghenen dies mi mit sinen openen bryeve vermanen sal te leveren.

Ende waert dat mijns lyefs heren voerscr. ghebrake des god verbeyden moet so sal ic die borch van Scoenhoven voerscr. leveren mer lyeven vrouwen sijnre dochter gravinne van Bloys en van Namen of haren gherechten mombaer. Waert oec dat mijns lyefs heren ende mer lyefs vrouwe sijn dochter voernoemt ghebrake des god verbyede so sal ic dese voerscr. borch leveren den oudste zoen dien mijn lyeve vrouwe voernoemt dan after haer ghelaten sal hebben of tot sijnre behoef houden. Ende waert dat ix nyet en leverde minen lyeve heer op sinen erfnamen voerscr. of den ghenen dies mi vermanen sal mit huere brieven open so had ic verbuert mine sekerheyt, trouwe, lijf, eer ende al mijn goed in wat lande dattet ghelegghen ware. Ende daer so mochte mijn lyeve here of sine erfnamen voernoemt dan hueren vrijen wille mede doen waer of in wat lande dat si mi of des mijns yet bevaren mochten. Ende waert sake dat ic om dese voerscr. borch te houden en te doen alsoe voerscr. is doet bleve of ghevanghen worde ende si mit ghewelde ghewonnen worden so soude men minen erfnamen nyet eyschen van den verwaerden voerscr.. Oec waert sake dat ic in node van oerloghe of om kenlijke sake van anxe cost of scade lede om dese voerscr. borch te houden alsoe voerscr. is dien sal men mi versetten bi redenlike scane. Alle voerscr. poynten sonder arghelis te verstane ende want ic Gelijs voerscr. minen lyeven heer en sinen erfnamen voernoemt ghelovet hebbe ende wil houden alle dese vorwaerden inder manyeren voerscr. soe heb ic desen openen bryef daer op mit goeden voersyene minen lyeven heer voerscr. ghegheven beseghelt mit minen seghelen. Ghegheven int jaer ons heren m ccc xlix smanendaghes na st martijnsdach.

f.36.

Goude (oprise)

Jan van haynaut heer van Byaumont maken cond allen luden dat wi onse consent ghedaen hebben en doen tot alsulken assise alsoe onse goede luyde ghemeynlic van der Goude bi rade heer Jans van der Goude ons trouwen ridder balyou aldaer setten sullen op alrehande comanscappe ende (pennincwerde) alsamen aldaer nu ter tijt ghebruyct en henteert en namaels doen sal ons in onser ghemeinren goede voern. oerbaer te keren, het si an vesten of an anderen saken dat wi hem ghewilkoert hebben en willekoren tot vyer jaren toe naestvolghende naden datum van desen btyeve. Ende daer en teynde duerende tot onsen wedersegghen. In oerconde desen bryeve beseghelt mit onsen seghelen ghegheven tot Byaumont 9 daghe in meerte int jaer ons heren m ccc twee en vijftich.

Presentibus dns. De Bar, Sensellis en Jo Blonde.

f.36v.

Hannekijn van der Meer.

Jan van Henegouwen heer van Byaumont maken cond allen luden dat wi ghegheven hebben en gheven Hannekijn van der Meer clerc die costerie van der kerke en prochi van Beverwijk te verwaren van sulken dienste en mit sulken vervalle ende baten te heffen alsoe daer toe behoert. Ende ombieden allen onsen luden van onser stede en prochie voern. dat si den voerscr. Hannekine of sinen ghewaerden bode te behoerliken tiden andwoerden ende voldoen alsamen voertijts anderen costers aldaer gheploocken heeft ende mit rechte sculdich is te doen. In orconde desen brie beseghelt mit onsen seghele ghegheven tot Byaumont op st. clements dach int jaer ons heren m ccc lii.

Jussi dns Bellimont, de Sensellis, Burch. Jo den Blonde. Aelbr. Van Meerten.

f.37.

Texel.

Jan van Henegouwen heer van Byaumont maken cond allen luden dat wi om bede wille en versoec onser lyeve en goede lude van Tessel en om grote nutscap en ruste die hen daer aen ligghen mach ghewilkoert hebben dese poynten die hier na ghescreven sijn. In den eersten soe

wie van onsen luden voernoemt voere meer enighe beeste die sijns buermans waren in sinen scade doetslaghe op dat die beeste niet beter en waren dan tweenviertich scellingh of beneden dat hi daer ane jehghens ons niet meer verbueren sal dan tweenviertich scellingh. Mer waer die beeste beter dan alse voerscr. is soe soude hi daer ane verbueren die bate die van ouds daer op ghestaen heeft, voert soe mach onse bailou of scoutte van Tessel vrede nemen van enen edele manne mit twee buermans alse van enen huysmanne, voert soe willen wi dat elc poerter die rechts begherende is van enighe buerman in Tessel hem verbuerde en verwillkore te voren onsen voerscr. luden die slechte buermans sien aldaer altoes weder te rechte te stane alse sijs begheren op en woude die poerters des niet doen soe willen wi des ghelics weder recht ontseyt hebben van ansen luden van Tessel voern. Voert soe en willen wi niet dat men den papen in tessel ander payment betalen van renten of van dienste die hen toe behoeren dan als men hueren vorders papen al daer te gheven plach en si oec hueren plate gheven oever dat si huer sculdich sijn. Alle dese voerscr. poynten staen altoes toet onsen verbeteren sonder arghelist tr verstane en sullen gheduren niet langher dan tot onser weder segghen. In oerconde dese bryeve beseghelt mit onsen seghele. Ghegheven tot Byaumont des saterdaghes na onser vrouwendach in meerte int jaer ons heren m ccc liii.

f.37v.

Gielis van Windesnesse.

Allen den ghenen die desen brief sien sullen of horen lesen ghevic Gelijs van Windelsnesse knapen te verstane want mijn lieven en gheduchte heer mijn heer Jan van Henegouwen heer van Byaumont mi ghegheven heeft in der manieren dat sine opene brieve spreken die ic des van hem hebbe een vyttel gheleghen in Tessele tusschen die noertside van den oude lande van Tessele en den ouden coech steckende mit den westeynde ander dunen en mit den oesteynde anden dijc sie hebic hem weder ghelovet en ghelove bi mer sekerheit en trouwe altoes voer mi en voer minen nacomelinghe van den voerscr. lande sulke scout te betalen sulke dienst te doene en tot sulken rechte te stane alse men daer inden lande pleghet ende anderen ghemene buerlude doen van huere lande dat aldaer gheleghen is. Voert so salic dit voerscr. lant havene en beghaden op sijn scoenste ende mijn lieve heer voern. of sijn ghewaerde raet mach altoes binnen 2 jaren naest volghende den datum van desen brieve tot sinen besten ghenoghe dit voern. lant weder an hem nemen sinen vryen wille mede te done overmids dat hi mi weder doe gheven sulken cost alsic mit minen ede houde wille dat ic daer ane gheleit sal hebben om t'voerscr. lant te diken ende te behouden naden zede van den lande al sonder arghelist. In oerconde des brief beseghelt mit minen seghele. Ghegheven tot Berghen in Henegouwen omtrent sente barberen int jaer liiii.

f.38.

Texel.

Jan van Henegouwen heer van Byaumont ombieden allen onsen luden van Tessele die dae nu wonachtich sijn of namaels comen sullen dat nyeman gheens poerters goet noch erve ne ghebruken dat in onsen voerscr. lande van Tessele gheleghen is noch hem gheenrehande dyenst noch arbeit en doen op ene boete van 42 sc. holl. Ende ombieden onsen bailliu van tessele die nu is of hier na wesen sal of yeman van onsen voerscr. luden den poerters enighen dyenst dede huers goods of erfs te ghebruken mit eren of mit zayen of menighen anderen manieren dat hi hem af nemen also dicke alse hijt doet sonder verdrach die boeten van 42 sc. voerscr. tot onser behoef duerende tot onsen wedersegghen. In oerconde beseghelt, ghegheven omtrent barberen int jaer liiii.

f.38.

Janne den Blonde.

Jan van henegouwen heer van Byaumont maken cond allen luden dat wi ghegheven hebben ende gheven mit desen ieghenwoerdighen brieve onsen trouwe knaep Janne den Blonden om goede dienste die hi ons en onsen kinderen van Bloys ghedaen heeft 50 lb. tournoys siaers alsulx payment also wi selve nemen sullen van onsen renten te heffen en t'ontfanghen hem of sinen ghewaerde bode uyt onsen goede en renten ter Tolne in st. peters daghe inghaende oeste naestcomende en also voert van jare te jare tot elken st. peters daghe also langhe also die voerscr. Jan die Blonde leven sal. Ende ombieden en bevelen onsen rentmeyster die daer nu is of namaels wesen sal dat hi sonder vertrec of enich ander ghebod van ons te hebben gheven en betalen den voerscr. Jan of sinen ghewaerde bode tot sulken daghe en in sulke payment also voerscr. is die voern. 50 lb. nemende sinen brief van quitanche voer ons mede te rekenen. Ter stonde toe dat wi den voerscr. Jan bewijst hebben in sekre stede die voerscr. 50 lb. te heffen bi sijns selfs hant. Ende daer af is die voerscr. Jan onse man worden ende heeft ghelovet man te worden of hi ons verleeft Jans van Bloys ons soens of des gheens die na ons heer van der Tolne wesen sal al sonder arghelist. Daer over waren onse ghetrouwe manne also die castellein van Berghen, heer van Ham... Die heer van Senselles, die heer van Sp..... en anderen. In oerconde der waerheyte van desen dinghen beseghelt mit onsen seghelen. Ghegheven tot Byaumont des sacraments daghe na st.ponciaens dach int jaer liiii.

f.38v.

Jan van der Goude, ridder.

Jan van henegouwen, ridder. Maken cond allen luden dat wi voer ons ende voer onse nacomelinghen ghegheven hebben onsen trouwe ridder heer Janne van der Goude om menighe dyenst die hi ons ghedaen heeft en noch doen sal sulc lant also hier na bescreven is dat hi van ons in rechten leenen te houden plach tot enen vryen eyghen hem en sinen nacomelinghen des te ghebrucken en hueren vryen wille mede te doen also mit hueren vryen eyghenen erven goede. In den eersten xi morghen lands int land van haistrecht an die ysele die belegghen hebben an beden ziden die heren van st. marten t'Utrecht mit erven en mit eyghen. Item 20 morghen an die vliste op die oestside die belegghen heeft an die zuytside Splinters 4 kinderen van der vliederhoeve ende an die noertside Roetart die nisman mit erve en mit eyghen. Item 8 morghen an die westside van der vlist die belegghen heeft an die zuytside Floris Vranken sone en an die noertside Jan Zontlant mit erve en mit eyghen. Ende opdat dit vast en ghestade blive sonder enich verbrec soe hebben wi daer af desen openen brief beseghelt mit onsen seghele ghegheven en gheven tot Berghen in henegouwen s'woensdaghes na st bonifacius dach int jaer lv.

Presentibus dns de Barbenchon, Sensellis en anderen. Jo Blonde.

f.39.

Die vrouwe van Rijsoerde.

Jan van Bloys doen cond allen luden dat wi ombede wille heer Asewijn van Rijsoerde ons mans verliet hebben en verlyen vrouwe Beatrisen sinen wive heer Floris dochter van der Merwede was tot hoire lijftochte die minre helfte van eenre zate lands ghelegghen tot Alfenre hoerne houdende omtrent 26 morghen daer nu Wveraet Dirxsoen op sit. Item die minder helfte van 11 ponde siaers goetghelt. Item die minder helfte van 60 hoeren die heer Alewijn voirsr. jaerlix heeft in onser stede ter Goude an 6 erfzate en an onse thiende in Bloendael. Welke goede voirsr. her Alewijn voirn. Van ons te leene hout. Ende gheloven vrouwe Beatrisen voirn. Ander voirsr. lijftochte te houden als sede is en costume van den lande. Hier waren over als manne her Jan van langherak, ridder, en Jan van Bueren, knape. In orconde desen brief beseghelt mit onsen seghele ghegheven t'Scoenhoven des manendaghes na st.martijndach in den winter int jaer ons heren m ccc lxii.

Jussu dom.Sensellis. Presentibus Hughe de Barbenchon., Ghisebrecht Stomme

f.39v.

Yewe Beenensoen.

Jan van Bloys enz. doen cond allen luden dat wi Yewe Beenensoen quijt ghesconden hebben alsulken yeghendom als hi ons op ghedraghen hadde en hi onse man of worden was alse van ene huse staende in onsen lande van Texel en gheven hem oerlof daer mede sinen vrijen wille te doen daer voir hi ons weder opghedraghen heeft den eyghendom van enen stücke lands liggende b'oesten der borch in Texel gheheten (kenipsdale) groet wesende 600 roeden of daer omtrent. Dit belant heeft Sasscher barbier ande zuutside en Spaerman an de noertside. En noch enen camp lands liggende beneden wisdree elinghe hofstede die hout vier hondert roeden die belant heeft Dader koet an de noertside en Aelbrecht die witbacker an de zuutside daer Yewe voirsr. weder onse man of worden is. Ende hebbent voir ons en onsen nacomelinghen hem en sinen nacomelinghen voirt ver... Te houden tot enen onversterflichen erfleen. Hier over waren onse ghetrouwe manne heer Jan van Langherak en heer Jan van der Goude. In orconde enz. Ghegheven t'Scoenhoven des manendaghes na mauricij int jaer m ccc drie en tsestich.

Jussu Jo de Blonde. Prsentibus Hughe de Barbenchon, Aelbrecht van Meerten.

Ende her Jan van der Goude hadde enen plackaert daerne mijn heer machtich an makede den eyghendom van den voirsr. lande te ontfaen en dat weder te verlyen na den rechte van den lande.

f.40, 40v. 41.

Seggen tussen Langheraeck ende Liesvelt.

Dit is segghen mijns heren Jans van Bloys, heer van Scoenhoven ende van der Goude van alle tweye ghescille ende scout die her Jan van Langherak ende heer Harbaren van Liesvelt onderlinghe ghehadt hebben tot desen daghe toe Des heren voerz. an beyde ziden bi haer vrijen wille ghebleven zijn alinghe mit horen knechte ende hulpen.

In den eersten van den deel thienden van Ghelkenesse dat her Harbaren van heer Janne in leen hout Is mijns heren segghen dat her Harbaren dat houden zal mit zijns eede ende twee goede knapen mit hem dat hi Thonys Willemssoen bad tijds ghenoech an heer Janne te gaen ende te bidden dat hi hun zijns goids verlijen woude daer heer Harbaren gheen andwoerde off en hadde voert dat heer Harbaren nye en quam voer thuus te Langherak om enich arch tot heer Janne of ten zijnen of yement die hi mit hem brochte dan om zijn goet van heer Janne t'ontsc. hadde hine ghevonden ende zijn goet te verzoeken voert dat Harbaren zijn goet verzocht binnen zulken tijd ende also dat hij niet verzw...rt en heeft na zinen vijf zonen naden recht ende heer Harbaren zal heer Janne beyde voern. rechtevoert manscap doen voert van heer Harbaren vriende die Wouters kinderen van Langherak jagheden van snoeke van Danekin zinen zoen ende van Clais Ponciaenssoen. Is mijns heeren segghen dat heer Jan ghans selve vergheven zal heer Harbaren vrienden dat zi daer in jeghens hem mesdaen mogen hebben Ende heer Harbaren des ghelijxs zal vergheven heer Jans vrienden des si jeghens hem mesdaen mogen hebben. Mijn heer wil hore beyder broke an him selven behouden ende daer zulke beteringhe voer zetten te doen als daer toebehoeren zal ende alst him tijd denken zal voert van alsulken ghelde als heer Harbaren van Lyesvelt die oude sculdich bleef heer Harbaren erfname van Ryede zal heer Harbaren die nu is heer Janne voersr. voldoen tussen nu ende Pieters misse naestcomende van also veel verlenen ter waerheyt vinden mach dat heer Janne voerz. mit rechte van besterste daer of toebehoren mach om ghevoechs wille ende niet van rechts wegghen Voert van den thiende van der Cortenlande van alsulke ghescille als hi daer off hebben mogen als van afterstallige ghelde des zulle hore beyden rentemeysteren te samen comen tussen nu ende st.Pietersmisse naestcomende Ende wes heer Jan daer of inden aftersten

wesen nach na den seggen dat die heer van Brederode daer of voertijds gheseyt heeft dat zal men heer Janne voerz. oprechten ende wtreycken binnen der voerscr. tijd voert van Harbaren Jacobsz. van Hughen van Vloeten ende van Bastyaen die smit zaliger hore lijf enen man toe kyessen op die te zoenen ende en konden zis niet eens ghewesen dat zouden zi an mijnen heer brengen Ende hi soude hun enen overman setten die voerscr. zake te verlyke voerclaren alsulken rycht als heer Harbaren heer Janne beyde voern. thiende is van enighe aenbrengen roerende der heerlicheyt van hollant of minen heer selve kent mijn heer heer Janne voerz onschuldich dat hi daer in anders yet ghedaen heeft dan hi sculdich was te doen Ende mit desen voerscr. poynten seyjt mijn heer de voerz partye alinghe verzoent ende goede vriende op ene pene van 100 lb.groten te keren daers mijne heer ghenoecht ende sonder verdrach te nemen van den ghenen die se mijn heer dinken sal verboert te hebben. Ende die twee heergewaden die voirsr. sijn van den voirsr. thienden van heer Herbaren voirsr. doet ende sijnre dochter wil mijn heer in sijn hant hebben binnen 14 daghe rocke mede te coepen daer se mijn heer gheven wil. Ende al te verstaen sonder archelist Ende viel in eenich van desen poynten namaels eenich scoot dat wil mijn heer hem behouden altoes tot sinen verclaren. Dit zegghen was gheraemt ende gheset t'Scoenhoven in mijns heren cameran Daer bi waren die heer van Arkel, Ghisebrecht van Vyanen ende van mijns heren rade die heer van Herlaer, her Hughen van Barbenchon ende anders veel goeder luden Ende want mijn heer wil dat dit vaste ende stade ghehouden bliven soo heeft hi sinen seghel tot eene ghetughe op dese cedula ghedrukt des dinxdaghes op st.Cecilienavond int jaer ons heren M CCC LXIII

f.41v, 42, 42v.

Bede voor het ridderschap Jan van Bloys.

Dit is dat mijns heren lude heer Jans van Bloys hem ghegheven ende ghewilkoert hebben ter bede van zijnre ridderscap int jaer lxiii.

Inden eersten die stede van Scoenhoven 1000 lb. holl. Item den ghesinde van mijns heren herberghe 25 lb. holl.

Item die stede van der Goude 800 lb. holl.

Item die van Berchambacht ende van Stolwijn vander marghen 20 gr. te gheven also alst dijt ende damt. Ende so wie meer erven heeft dan haven die zal gheven vander erve ende niet van der have. Ende so wie meer haven heeft dan erven die zal van der haven gheven ende niet van der erven. Daer toe zullen die voern. gheven van horen lande dat zi onder hen liggende hebben gheliken wijs dat zi vanden lande gheven dat onder minen heer gheleggen is.

Item die van Beyersrode van den marghen 16 gr. inder manieren dat die van Berchambacht ende van Stolwijn voerscr. doen.

Item die van Beyerse Gouderac van der marghen 16 gr. Inder manieren voerscr.

Item die vander lande van Steyne van der marghen 16 gr. te gheven also alst dijt ende damt. Ende daer toe zullen zi gheven van hore ghereeder have nader wide van horen erve.

Item die van Bloemendael van den marghen 8 gr. also als die van den lande van Steyne gheven.

Item die van Benthusen 100 scilde facit 80 lb. holl.

Item die van Cabau 50 scilde facit 40 lb. holl.

Item die van Texel hebben minen heer ghegheven t'sijnre ridderscap te betalen tot st jans misse mid zomer anno lxxxx 600 scilde den scilt gherekent voor 24 vlaemsche groten. Item inder selver manieren hebben die van Vlielant minen heer ghegheven 25 scilde.

f.42v.

Geerloff Lillenz.

Wi Jan van Henegouwen heer van Byaumont maken kont allen den ghenen die desen bryef sullen sien of horen lesen daer voer ons quam Bryen Bryensoen en voer onse manne ghenoech en droech ons op al sulc borchleen als hi van ons hyelt ende legghende is in Langherake dat roerende is van den huse t'Scoenhoven welc borchleen voerghenoemt wi weder verlyen Gheerlof Lillen van ons te houdene wi en onse nacomelinghe. In alle manieren alset Bryen van ons helt ende andere manne van ons houden die van al sulcke goede van ons verleent sijn, voert soe verlyen wi Janne Boterman sinen sone die naeste hant na Gheerlofs live voerscr. Ende waer dat zake dat Janne Botermans voorgenoemt verbrake sonder wittelike boert dat borchleen voert te ghaen op Gheerlofs kinder die hi bi Wendelmoede sine wive hevet als recht ware om dat dit waer is ende stade bliven sal hebben wi desen bryef beseghelt mit onsen seghele. Ghegheven t'Scoenhoven int jaer ons heren duysent ccc ende xxxiii des saterdaghes na beliken paesschen.

f.43.

Idem

Jan van Bloys heer van Scoenhoven en van der Goude doen cont allen luden want Gheerlof Lille voir en Jan Boterman na van onsen lieven heer en oudevader minen heer Janne van Henegouwen heer van Byaumont des god ghedenke en van ons te lene hilden alsulc lant en borchleen als die bryef begrijpt daer onse ieghenwoerdighen bryef doer ghesteke is soe hebben wi dat selve loon en lant verlyet en verlyen Wendelmoeden Jacop Botermans dochter mit Gherit den Wilden horen man en voecht, dat Wendelmoet ende hoer nacomelinghe dat houden sullen van ons ende van onsen nacomelinghen in der selver manieren dattet Gheerlof Lille en Jan Boterman hielden sonder arghelist, hier waren over onse ghetrouwe manne heer Jan van Langherak, Goodscalc van Brakel en Ghisebrecht Moelnerssoen. In oerconde desen brieve beseghelt mit onsen seghele. Ghegheven t'Scoenhoven 4 daghe in november int jaer ons heren m ccc een ende tseventich.

f.43v.

Gielis van Windelsnesse leen.

Jan van Henegouwen heer van Byaumont maken cont allen luden dat Gyelis van Windelsnesse heer Willemssoen van Wendelsnesse was ons bi zinen vryen wille opghedraghen ende enen vryen eyghendom ghegheven heeft van alsulken goede ende erve als hier na bescreven is te verstane 13 morghen lands die ghelegghen sijn in Claes Oem, Claes oems soens ambocht in vijsclenis waert, streckende van den heren lande van st.pieters t'Utrecht tot den misslote toe mit alsulken timmeringhe als daer op staet ende toebehoert. Ende 7 morghen lants die ghelegghen sijn in t'oudelant in paephoynen ambocht streckende van den voerscr. missloete tot inden mazen, van welke goede ende erve Gillis voern. onse borchman worden is ende wi hebben him dit selve goet ende erve weder verlyet ende verlyen van ons ende van onsen nacomelinghen hem ende zine nacomelinghen te houden tot enen rechten onversterflichen leene van onser borch tot Scoenhoven sonder allen arghelist. Hier waren bi ende over onse lieve ende ghetrouwe manne als her Floris van Byaumont, heer Jan die bastaert onse soon, ridders, Jan van der Gasonle onse proest van Byaumont, Copkin Lysensoen onse dor..der ende andere lude. In orconde ghegheven in onser camer tot Byaumont op st.pouwels avonds conversio int jaer m ccc ende vijftich.

Jussu dns Bellemont

f.44.

Willem van Windesnesse.

Dit voorz.leen ontfeuc Gilles Robbrecht alse mombaer voor Willem van Windelsnesse Gillessoen voerscr. op den vijde dach in september int jaer 63 t'sente Gheerdenberge van Janne van Bloys daer bi waren heer Jan van Langherak, Jan van Bueren, Dirc van der Goude ende andre.

Op den eerste dach in maerte int jaer 76 omtrent ontving Jan v.Bueren Janssoen zijn goet van mijn heer van Bloys t'Scoenhoven dat Jan van Bueren zijn vader van mijn heer te houden plach in zulken manieren als die open brieven inhouden die hi van minen heer daer of hadde ende noch hout, hier over waren onse ghetruwen manne her Jan v.Langherak, ridder, Dirc van der Goude, Dirc Beynken ende anderen.

f.44v.

Heer Wouter van Ysendoorn.

Jans van Bloys enz. doen cond allen luden dat wi ghegheven hebben ende gheven mit desen openen brieve heer Wouter van Ysendoorn, ridder, alsulc recht en toe segghen als wi hebben an twalef morghen lands die gheleghen sijn in onsen lande in Papencoep ende ons aencomen is van Jan Byensoens dode na den rechte ende costume van onsen lande want hi een bastaert was. Enden ghebieden allen onsen scouten dat si hem ghehulpeelick sijn in onsen rechte te voerderen daer hijs begheert ende te doene hebben mach anden voerscr. lande. In oerconde desen brief beseghelt mit onsen seghele. Ghegheven t'Scoenhoven op st.martijns dach anno lxiii.

Jussu dns Jo de Blonde. Presentibus dns Hughe de Barbenchon, Jan van langherak, ridders, Albrecht van Meerten, Jan van Bueren.

f.44v.

Idem.

Jan van Bloys enz. doem cond allen luden dat voer ons ghecomen is heer Wouter van Ysendoorn, ridder, en heeft ons bi sinen vryen wille op ghedraghen ene viertel lands houdende vierdalf morghen lands gheleghen inden kerspel van Linscoten bi den huse tot Huelensteyne ende beleghen hebben mit erve boven ande oestzide die heren van st.pieters t'Utrecht ende belendende an die westzide heer Wouter voerscr. selve mit erve ghemenghed voer van welken lande voerscr. Roelof Jansz op die tijt onse scout in Gouderaec ene eyghendom na tot onsen behoef. Ende hebben voer ons en onse nacomelinghen heer Wouter voerscr. en sine nacomelinghen die viertel lands voerscr. weder verlyet en verlyen te houden tot eenen onversterflichen erflene te verheergewaden mit ene roeden sperwaer ende daer ons heer Wouter voerscr. dit voerscr. landt op droech en manschap dede waren over alse onse ghetrouwen manne Coene van Oesterwijc onse knaep, Benout Faiguaert, Lubbrecht van Rikele onse camerlinghenen anderen. In oerconde desen brief beseghelt mit onsen seghele. Ghegheven tot Scoenhoven op st.mathijs dach anno lxiii.

Jussu Jo den Blonde.

f.45.

Die vrouwe van Huelesteyn.

Jan van Bloys enz. doen cond allen luden dat wi om bede wille heer Wouter van Ysendoorn ons mans verlyet hebben en verlyen vrouwe Hase van Montfoert, vrouwe van Ysendoorn en van Huelesteyne sijnre ghesellinne hore rechte lijftochte an die vierdalf morghen lands die

heer Wouter voerscr. van ons te lene hout ghelegghen bi den huse tot Huelesteyn in den kerspel van Linscoten en belegghen hebben mit erve boven an die oestzide de heren van st.peters t'Utrecht en beneden andie westzide heer Wouter voerscr. selve mit erve ghemenghed voer ende gheloven vrouwe Hasen in die voerscr. lijftochte te houden als wi sculdich sijn te doene na lijftochte rechte. In oerconde desen brief beseghelt mit onsen seghele ghegheven tot Scoenhoven op st.mathijs dach anno lxiii.

Jussu Jo den Blonde. Presentibus dns.Hughe van Barbenchon. Jan Tolnaer

f.45v.

Foyken Willemsz.

Jan van Bloys (bider ghenade goods hertoghe van Ghelre grave van zootphen) (doorgedaan) doen cenlic allen luden dat wi om goede dienste die ons Foukin Willemssoen onse knape ghedaen heeft en noch doen sal him ghegheven hebben overgheven onse husinghe die wi hebben in den Haghe die Jacop Lizensoens ons knapen plaghen te wesen die hi te bewonen plach ende die husinghe die daer jehens over staen mit allen horen toebehoren daer Feukin voirsch. onse man of worden is ende van ons houden sal tot eene erfleen soe dat hi se bewonen mach ende sinen nacomelinghen tot alle hore behoeve behoudelic dat wi en onse nacomelinghen en onse ghesinde altoes een open herberghe daer an behouden en hebben sullen tot alle onsen ghevoeghe en dat wi van mer tymmeringhe daer an maken moghen des ons ghenuecht ende onse provanchen daer doen comen en houden moghen alst ons oerbaerlic dunken sal en dese voirsch. husinghe sal men verheerghewaden mit enen roeden sperwaer of mit 5 lb. holl. Ende Foukin voirsch. heeft Willem den camerlinc en sijn erfghenamen die dese voirsch. husinghe na Jacop Lizensoen s' doet voer noet beseten souden hebben na den brieven die si daer of hadden van ons of ghelossent soe dat si hoor recht en brieve die si daer of hadden overghegheven hebben Foykin ende wi behouden an de voirsch. husinghe sulc recht en toesegghen als voirsch. is. In oerconde desen brieve beseghelt mit onsen zeghele ghegheven t'Scoenhoven des sondaghes na st peters dach ingaende oest int jaer ons heren m ccc neghen en tsestich. Hier over waren onse ghetrouwe manne her Jan van harlaer, heer van der Ameide, her Jan van Langherak en anderen.

f.46.

heer Arnout van IJselsteyne.

Jan van Bloys heer van Scoenhoven ende van der Goude doen cond allen luden dat wi voer ons en voer onsen nacomelinghen ghegheven hebben en gheven onsen lieve gheminden zwagher heer Arnoude heer van Yselsteyne om menighe gunste en vrienncappe die hi ons bewijst en ghedaen heeft en namaels of god wille bewisen en doen sal hondert oude scilde siaers goet van goude en van ghewichte tot sine live daer hi onse man of warden is welke somme van ghelde of payment alsoe goet daer voer wi hem bewijst hebben ende bewisen op alle onse renten die wi hebben binnen onser stede van der Goude t'ontfaen jaerlix alsoe langhe als hi leven sal d'ene helfte op midde winter naestcomende en ander helfte op sinte jansmisse te middensomer, daer na naest comende en alsoe voert van jare te jare alsoe langhe als hi leven sal. Ende ombieden onsen rentemeyster van der Goude die nu is en namaels wesen sal dat hi den voersch. heer van Yselsteyne of sinen ghewaerde bode dese voersch. somme van ghelde uyt reyken en betalen in alre manieren alse voersch. is sonder enich andere ghebods daer af van ons te verbeyden soe der nemende sinen brief van quitanchen voer ons mede te rekenen. Hier over waren onse ghetrouwenmanne alse her Jan van der Goude, ridder, Gheraet van Oesterwyc knape en anderen. Om dat dit waer is en vast en ghestade houden willen in alre manieren alse voersch. es soe hebben wi daer op t'eenre oerconde desen opene brief beseghelt mit onsen seghele ghedaen en ghegheven tot sente Gheerdenberghe op der elfdusent magheden dach int jaer ons heren m ccc ses en vijftich.

f.46v.

Jan van Buyren.

Jan van Bloys heer van Scoenhoven en van der goude doen cond allen luden dat wi voer ons en voer onse nacomelinghen ghegheven hebben en gheven Janne van Bueren om goede jonste die wi tot hem draghen en om dienste die hi ons namaels doen sal of mach vijftich oude scilde goet van goude en van ghewichte syaers tot sine live daer hi onse man af worden is welke somme van ghelde of payment alsoe goet daer voer wi hem bewijst hebben en bewisen op onsen rentemeyster van Scoenhoven t'ontfane jaerlix alse langhe als hi leve sal d'ene helfte op middewinter naest comende ende dander helfte op sinte jansmisse te midde somer daer naest comende ende alsoe voert van jare te jare alsoe langhe als hi leven sal. Ende ombieden onsen rentemeyster van Scoenhoven voern. die nu is of namaels wesen sal dat hi den voerscr. Janne van Bueren of sinen ghewaerde bode dit voerscr. ghelt vytreyken en betalen in alle manieren alse voerscr. is sonder anders ghebod van ons daer af te wachten wedernemende sinen brief van quitanchen voer ons mede te rekenen . Hier over waren onse ghetrouwe mannen alse heer Jan van der Goude, ridder, Gherit van oesterwijn knape en andere. Om dat dit waer is en wijt vast en ghestade houden willen in alre manieren alse voerscr. is soe hebben wi daer op t'eenre oerconde dese openen brieve beseghelt met onse seghele ghedaen en ghegheven tot sente Gheerdenberghe des saterdaghes na der elfdusent maghede dach int jaer ons heren m ccc ses ende vijftich.

f.47.

Die grave van Bloys quytet den grave van hollant van alre scult.

Jan van Bloys heer van Scoenhoven en van der Goude doe cond allen luden dat ic quyt ghesconden hebbe en quytscelde minen lieve en gheduchten heer minen heer den grave van Henegouwen van Hollant van Zeelant en heer van Vriesland van alre scout die hi van verledene tijden sculdich wesen mochte minen lieven heer en oudevader minen heer Janne van Henegouwen heer van Byaumont des god die ziel hebben moet ende daer af soe ghelove ic minen lieven en gheduchte here voernoemt scadeloos te houden mit desen openen brieve beseghelt mit minen seghele, ghegheven tot Scoenhoven op sinte severijns dach int jaer ons heren m ccc ses ende vijftich.

f.47v.

Jan van Bloys heer van Scoenhoven en van der Goude doen cond en kenlic allen luden dat voer ons ghecomen is Pieter Hayken en heeft ons bi sinen vryen wille opghedraghen zeven gaerden lants en 1 halve die gheleghen sijn in yselmonde in ...ambocht van cralinghen dat an die oestzide nu ter tijd mit lande belegghen heeft Alijd Hoefthaerts an die westside wi selven mit 12 ghaerden lands die tweederdendele van den voerscr. lande sijn die men ten rechten leene van onsen ouders te houden plach ende ons nu aenbestorven sijn en daer Trude Aernt Belyen soens dochter haer lijstochte an heeft streckende mitten overen ende in die merwede ende mitten utersten ende an die lantsceydinghe van Barendrecht welc lant Pieter voerscr. van ons te houden plach ten rechte leene ende wi nu verleyt hebben en verlyen Daem Mattensoen van ons te houden oec ten rechten leene. Mer van soe hebben wi Daem voerscr. ghewilkoert. Waert sake dat Daem voerscr. gheen soen van ghetrouweden bedde after hem en laeten soe soude dit voerscr. lant na hem comen op sinen dochter of op haer outste kint mer die dochter of hoer kint daer dit voerscr.lant op quame die sullent houden van ons en van onsen nacomelinghe tot eenen rechten leene in allen manieren als voerscr.is . Ende is te verstane dat dit voerscr. lant bi eenre doet niet versterven en sal ten ware of Daem voerscr. noch kint noch kints kint daert op comen mochte soude in rechte leene te houden als voerscr. is maer en lyet hi noch kint noch kijnts kijnt van sinen live en van ghetrouwen bedde soe soude na Daems live voern. comen an ons of an onsen nacomelinghen sonder middel of

wedersegghen ende al te verstane sonder arghelist. Hier waren over onse ghetrouwe mannen alsoe heer Jan van Langherak, ridder, Gherit van Oesterwijn, Jan van Bueren, Dirc van der Goude, Gherit die Borgher knapen en anderen. In kennisse der waerheyt van dat hier voirsr. is dat wi vaste en ghestade houden wille soe hebben wi daer op t'eenre orconde desen openen brief ghegheven beseghelt mit onsen seghele. Ghedaen en ghegheven op onse borch t'Scoenhove

Jan van Bloys heer van Scoenhoven en van der Goude doen cond en kenlic allen luden dat voer ons quam Daem Mattensoen en droech ons op bi sinen vryen wille vier morggen lants van sinen vryen eyghenen erve die ghelegghen sijn in den ambocht van Bercoude dat belegghen heeft mit erve nu ter tijd an die oestside Henric Overwael an die westside Haer Tichman Janssoen coerbiscop t'Utrecht streckende mitten overen ende an bercouder noch ende mitten utersten yende an die grave van welken lande Daem voirsr. onse man gheworden is ende wi hebben hem dat selve lant weder verleyt en verleyen voer ons en voer onse nacomelinghen van ons te houden tot enen onversterflichen erfleene. Ende men salt verheerghewaden mit eenre jaerrenten die van dien lande coemt en al sonder arghelist. Hier waren over als onse manne heer Jan van Langherak, ridder, Gherit van Oesterwijn, Jan van Bueren, Dirc van der Goude, Gherit die Borgher, knapen en anderen. In kennisse der waerheyt soe hebben wi desen opene brief beseghelt mit onsen seghele, ghegheven en ghegheven op onsen borch t'Scoenhoven s'dinxdaghes na st.gheertruden dach int jaer ons heren m cclxiii. (later bijgeschreven).

Dit voirsr. lant dat in Bercoude leyt heeft Daem vercoft bi consente van minen heer en minen heer ander lant wederghegheven in der selver manieren ghelegghen in den zuurbroec.

f.48.

Jan v.Bloys enz.enz. maken cond ende kenlic allen luden want ons Gherijt van Oesterwijn onse knaep die achte merghen lants gheheyten die hof hoeve legghende bi onser poerte van Scoenhoven die hem onse heer ende oude vader mijn heer Jan van Henegouwen heer van Byaumont des God ghedenke ghegheven hadde daer hi sijn ende onse man of was bi sijnen vryen wille op ghedreaghen heeft ende overghegheven Welc lant wi om bede wille van Gherijt voern. voert ghegheven hebbe ende verleyt Gherijt de Borgher tot enen vryen eyghen sinen vryen wille mede te doen als mit eyghenen erve soe heeft ons Gherijt die Borgher voirsr. weder opghedraghen een weer lands ghelegghen an die heerscap van Scoenhoven tot Ammerswaert daer Aernt Mathijssoen steenoven te staen plach streckende mitten oversten ende in die Lecke ende mitten utersten ende an ons selfs lant dat belegghen heeft an die oesterside mit erve Gherijt Thedemanssoen wijf ende hoer kinderen ende an die westzide Ane Aernt Veimbrechtssoens wijf ende hoer kinderen Des Gherijts die Borgher voirsr. enen halven viertel te voren van ons helt Ende dat hi ons veroersaet heeft mitten erve daer nu sijn huys op staet bi onser poerte van Scoenhoven soe dat hi ons van dien voersr. weer lands enen vryen eyghendom ghegheven heeft welc weer wi voer ons ende voer onse nacomelinghe Gherijt van Oesterwijn voern.voert verleyt hebben te houden tot enen rechten leene in alsulke manieren als hi die hof hoeve voersr.te voren van ons te houden plach daer toe heeft Gherijt van Oesterwijn voirsr. in goeden (manieren) die neghen lb.groten die hem Gherijt die Borgher voern. gheven sal toten voersr.lande overmids dat teen erve beter is dan t'ander te belegghen an erve soe hi alre eerste ende beste mach daer hi ons enen vryen eyghendom of gheven sal ende dat wi hem weder verleyen sullen van ons ten rechten leene te houden als van den anderen hier voirghescreven is te verstaen al sonder arghelist.

Hier waren over onse truwe mannen alsoe heer Jan van Langherak ridder, Jan v.Bueren, Dirc v.d.Goude knapen ende anderen Ende want alle dese voirsr. poynten waer sijn die wi vaste ende ghestade houden willen Soe hebben wi daer op desen openen brief ghegheven beseghelt mit onsen seghele t'eenre orconde ende in kennisse der waerheyt Ghedaen ende ghegheven op

onse borch t'Scoenhoven s'dinxdaghes na st.Gheertrudendach int jaer ons heren M CCC acht en vijftich.

f.48v.

Jan v.Bloys heer van Scoenhoven en van de Goude maken cond ende kenlic allen luden want Gherijt die Borgher den halven viertel lants daer Aernt Mathijs steenoven op te staen plach die hi van ons te leene helt bi onse oerlove ende goetdenken overghegheven heeft Gherijt van Oesterwijn onsen knaep die se weder van ons ontfaen heeft tot enen rechten leene Soe dat wi Gherijt den Borgher der manscap van der voerscr. halven viertel verdraghen hebben soe heeft ons die selve Gherijt die Borgher daer voer opghedraghen ende t'enen vrijen eyghendom gheven sijn huys en 2 morghen lants ende enen halven daer t'voerscr. huys op staet legghende bi onse poerte van Scoenhoven dat Gherijt die Borgher voerscr. nu ter tijd an beyden siden mit erve belegghen heeft daer hi onse man of is welc huys ende lant wi den selven Gherijt weder verleyt hebben ende verleyen van ons ende onsen nacomelinghen hem ende sinen nacomelinghen te houden tot enen onversterflike erflene in deser manieren dat dat voerscr. huys en lant na Gherijt live voerscr. comen sal op Ysebrant sinen soen die hi heeft bi Ziburghen sinen wive Dirc Witgherssoens dochter ende ghebrake Ysebrands voern. soe soudt comen op t'oudste kint dier naest dat hi heeft bi Ziburghen voerscr. alsoe recht is ende men salt verheerghewaden mit eenre jaerrente die daer of coemt te verstante.

Hier waren over onse ghetrouwe mannen alsoe heer Jan v.Langherak ridder, Jan v.Bueren, Dirc v.d.Goude knapen ende anderen.

Ende want wi willen dat dit vaste ende stade bliven in allen manieren alst voerscr. is soe hebben wi daer op teenre orconde desen openen brief besegelt mit onsen seghele in kennisse der waerheyt Ghedaen ende ghegheven op onse borch t'Scoenhoven s'dinxdaghes na sinte Gheertrudendach int jaer ons heren M CCC acht ende vijftich.

(ondergeschreven)

Dit lant dat voerscr. staet hout van minen heer an d'manieren voerscr. Willem van der Heule Borchmanssoen ende 5½ morgen daer toe int selve weer die die selve Willem minen heer opdroech van sinen eigheliken goeden ende hem mijn heer mitte 2½ morghen voerscr. weder verliede tot enen erflene.

2e die july anno LXVI.

f.49.

Jan van Bloys heer van Scoenhoven en van der Goude maken cond allen luden dat wi verleyt hebben en verlyen Gherit den Borgher enen viertel lants van ons te houden tot enen rechten erflene die ghelegghen is in Stolwijn beneden der kerke en belegghen heeft mit lande an die oestside die heer van Arkel ende an die westside Sanders die Borgher, streckende van Stolwiker weghe an beyersrode lantsceydinghe welken viertel lants Gherit voerscr. van sinen eyghenen lande op droech ende gaf t'enen vryen eyghendom onsen lieven heer ende oudevader minen jeer Janne van Henegouwen heer van Byaumont des god ghedenken voer den scout ende voer den heemraet van Stolwijn alsoe recht is van dien lande. Ende dit voerscr. lant sal na Gherit live voern. bi Wilkoer Koelmans sijns oudsten soens op die tijd die ons daer oec om bat comen op Jacop sinen soen dien hi heeft bi Ziburghen sinen wive, Dirc Witghers soens dochter. Ende ghebrake Jacobs voern. soe soude dit voerscr. lant comen op t'oudste kint daer naest dat hi hadde bi Ziburghen voern. alsoe recht is ende dit voerscr. land salmen verheerghewaden alst versterft mit eenre jaerrente ende versoeken voer onse huys t'Scoenhoven ter verstante al sonder arghelist. Hier over waren onse ghetrouwe manne alsoe heer Jan van Langherak, ridder, Gherit van Oesterwijn, Jan van Bueren, Dirc van der Goude, knapen ende anderen ende om dat wi willen dat alle dese voerscr. saken vaste ende stade bliven van ons en van onsen nacomelinghen Gherit den Borgher voerscr. en sinen

nacomelinghen soe hebben wi daer op desen openen brief beseghelt mit onsen seghele tot eenre orkonde ende in kennisse der waerheyt. Ghegheven ende ghegheven op onsen borch t'Scoenhoven s'dinxdaghes na st.gheertrudendach int jaer ons heren m ccc acht en vijftich.

f.50.

Texel.

Allen den ghenen die desen brief sullen sien of horen lesen doen wi manne scepen en ghemeyne buere van Texel te wetene dat wi mit onsen lieven en gheduchten heer heer Janne van Henegouwen heer van Byaumont eendrachtelic ghemaect hebben sulken wilkoer als hier na volghet. Te verstane dat van deser tijd voert nyemant die nu woent of namaels woenen sal int lant van Texel voirscr. nergens in gheenre vryer stede poerter en worden ten si dat hi al sijn goet dat hi daer heeft vercoopen ende daer vyten lande mitter woene en waer dat hi sijn goet vercofte op daghe soe mach hi of bode van sinen wegghen comen en varen in t'voirscr. lant om sinen scout te innen tot sulken daghen alse daer toe staen ende hi sal sijn goet vercoopen binnen 6 weken tot sinen ghenoeghen na dat hi poerter worden is. Mer alsoe vroe als hi poerter worden is soe ne mach hi van dier tijd voert gheenrehande neringhe doen in tlant van Texel voirscr. of en woude die ghene die poerter worden ware sijn land en goet niet vercoopen soe moste hi daer of scot ende scout gheven en selve tot sulken rechte staen alse ander ghemeene buerluden van den lande ende want wi desen wilkore mit goeden voersine en gansen berade over een ghedraghen hebben in alre manieren als voirscr. is soe hebben wi des desen openen brief beseghelt mit t'ghemeens lands seghele van Texel voirnoemt. Ende om die meere vestenisse daer of soe hebben wi ghebeden en verzocht onsen lieven en gheduchten heer voirscr. dat hi desen brief mede bezeghelen woude ende wi Jan van Henegouwen heer van Byaumont om bede wille en verzoec onser goede lude van Texel voirn. Aenghesien die ruste en orbaer die ons en hem daer in legghen mach hebben onsen segghel mitten horen an desen brief doen hanghen in kennissen der waerheyt. Ghegheven en ghedaen ter borch in Texel s'manendaghes na st.margrietendach int jaer ons heren m ccc vier en vijftich.

f.50.

Idem.

Jan van Henegouwen heer van Byaumont ombieden allen onsen luden van Texele die daer nu woenachtich sijn of namaels wesen sullen dat niemant gheens poerters goet of erve en ghebruken dat in onsen voirscr. lande van Teel ghelegghen is noch en gheenrehande dienst noch arbeyt en doen op eene boete van 42 sc. Holl. Ende ombieden onsen baeliu aldaer of hier namaels wesen sal of yeman van onsen voirscr. luden enighen poerter enigherhande dienst dede sine renten te innen sijns goeds of erves te ghebruken mit eren of mit sayen of in enigherhande ander manieren dat hi hem of name tot onser behoef sonder verdrach alsoe dicke als hijt doet die voerscr. boete van 42 sc. Dit sal dueren tonsen wedersegghen. In orconde desen brieve beseghelt mit onsen seghele. Ghegheven tot Berghen in Henegouwen op onser vrouwen dach concepcio int jaer ons heren m ccc vier ende vijftich.

f.50. los briefje

int jaer lxxvi

Op sinte jacopsdach verliede mijn heer Ysebut Sanders Borgherssoen tot enen erfleene. Een viertel lands ghelegghen in Stolwije daer hi brieve op hebbe en sijn vader te houde plach, daer bi waren als manne Dirc van der Goude, Vrederic van der Zevender, Dirc Beinkin en Gherit den Wilde.

f.51.

Jan van Bloys heer van Scoenhoven en van der Goude doen cond allen luden dat wi

ghegheven hebben en gheven verleent hebben en verlenen Janne van Bueren onsen knape om trouwen dienst die hi ons ghedaen heeft en noch doen sal alsulke heerlichede gherechte hoeghe en laghe en goederen mit allen horen toebehoeren also onsen lieven heer en oudevaderheer Janne van Henegouwen heer van Byaumont des god ghedenke aenbestarf van heer Herbaren van der Binchorst dat is te verstaen dat derdendeel van der heerlichede en gherechte hoeghe en laghe van Bloclant bi den vuylen damme en van of wegghen mit allen goeden die daer toebehoeren ende die her Herbaren voirn. in sinen live te houden plach van onsen lieven here en oudevader voirscr. In al sulker manieren dat Jan onse knape voirscr. en sine wittachtighe kinderen het si soen of dochter dese voirscr. heerlichede gherechte hoeghe en laghen en goederen mit allen horen toebehoeren houden sullen si en hoer nacomelinghen van ons en van onsen nacomelinghen tot eenen onversterflijken erfleene. Mer waert sake dat Jan van Bueren voirn. storve sonder wittachtighe gheboorte van hem te bliven soe souden dese voirscr. heerlichede gherechte hoeghe en laghe en goede mit allen horen toebehoeren weder comen an ons of an onsen nacomelinghen sonder yemants wedersegghen alle pointen te verstaen sonder energherhande arghelist. Ende dit voirscr. goet salmen altoes verheerghewaden mit eenen roeden havic. Hier waren over onse ghetrouwe manne also her Jan heer van Barbenchon, her Aernt heer van Yselsteyne, her Jan van Langherak ridder en Gherit van Oesterwijn knape. Ende want wi willen dat dit vaste en ghestade bliven sonder eenich verbrec ende wael ghehouden in alre manieren dat voirscr. is soe hebben wi daer op teenre orkonde en in kennisse der waerheyt ghegheven desen open brief beseghelt mit onsen seghele ghedaen en ghegheven tot Scoenhoven 6 daghe in maerte int jaer ons heren m ccc neghen en vijftich.

Jussu Johannes de Bless. Ghisebrecht Stomme, Albrecht van Meerten.

f.51v.

Jan van Bueren.

Jan van Bloys doen cond allen luden want wi ghegheven hebben en verleent Janne van Bueren onsen knape alsulke heerlichede rechte en laghe mitten goederen die daer toebehoeren also onsen lieven here en oudevader heer Janne van Henegouwen heer van Byaumont des god ghedenke anghecomen ende bestorven waren van heer Herbaren van der Binthorst. In alsulker manieren als onse brieve begripen en spreken die wi hem daer op ghegheven hebben. Soe heeft ons Jan voirscr. daer om weder opghedraghen en enen vryen eyghendom ghegheven van eenre halver hoeve lands mit alsulker husinghe als hi daer op tymmeren sal welke halve hoeve lands gheleghen is in Bloclant bi den vuylen damme op die langhe side an die kai jehghens Ottelant an die oestside ende an Jans van Bueren voirn. Alsoe alst begraven is an die westside. Ende dese selve halve hoeve lands mitter tymmeringhe voirscr. wi Janne van Bueren voirn. en sinen wittachtighen kinderen het si soen of dochter weder verleyt hebben en verlyen van ons en van onsen nacomelinghen te houden tot enen onversterflijken erflene. Mer waert sake dat Jan van Bueren voirn. storve sonder wittachtighe geboorte van sinen live na hem te laten soe soude dat voirscr. lant en tymmeringhe comen op Clayse van Bueren sinen broeder en op sine rechte erfname te houden van ons en van onsen nacomelinghen tot enen onversterflijken erflene als voirscr. is. Alle pointen te verstaen sonder arghelist, hier waren over onse ghetrouwen also her Jan heer van Barbenchon, her Aernt van Yselsteyn, her Jan van Langherak, ridders, en Gherit van Oesterwijn knape. Ende dit voirscr. lant ende timmeringhe salmen altoes verheerghewaden mit eenen roeden sperwaer. In kennisse der waerheyt van dese dinghen soe hebben wi desen open brief beseghelt mit onsen seghele ghedaen en ghegheven op den dach ter stede en in den jare voirscr.

f.52

Quarlet.

Jan v.Bloys doe cont allen luden dat wi ghegheven hebben ende gheven voir ons ende onse nacomelinghen Janne die men heyt Quarlet onse knecht en sinen nacomelinghen tot enen vrijen eyghen om menighen dienste dien hi onsen ouders ende ons ghedaen heeft ende ons noch doen sal Dat huus ende erve alst ons aen quam van Jacop Ryes streckende mitten noert ende t'havene waert ende mitte zutende op die Lecke ende beleghen hebben mit husinghe ende erve op die oestzide Voghel die cleedermaker ende op die westzide Wouter Wilkoc. Ende ghelove voir ons ende onse nacomelinghen Janne Quarlet voirz. ende sine nacomelinghen te houden te doen houden ende te waren tot ewelike daghen sulken eyghendom en ghiste als voirsch. is. In kennisse hier of ende tot eenen ghetughe hebben wi desen brief beseghelt mit onsen seghel ghegheven t'Scoenhoven des saterdaghes na st.Valentijn dach int jaer ons heren M CCC drie ende sestich.

Jussu dni Johannes de Blei

presentibus de heer de Herlaer, Hugo de Barbenchon. Albr.v.Meerten,
Ghisebrecht Stomme, Johannes Tolnaer.

f.52v.

Item Reynier Ghibendochter hout van minen heer een viertel lands gheleghen bi Loepic bi der Capellen te verheergewaden mit eenre jaerrenten ghegheven t'Scoenhoven int jaer van XL op den derthienden avond

f.52v.

Lieve ende gheduchte heer U wil ghenoeghen te wetene hoe dat ic eenen vrijen eyghen ontfaen hebbe van Jan van Scie in den ambochte van Moerdrecht van 4½ marghen lants tot uwer behoef aldaer Gherijt Elsbyensoen nu ter tijd op woent ende mit alsulker timmeringhe als daer op staet Ende dat dit was dat ic desen eyghen ontfinc voerz. dat was des donredaghes na onser vrouwendach natinitaten in den jare van LXIIIJ Ende waren over buerlide als Ludolf Zybrantssoen, Vriese Herberenssoen, Jan Wijnensoen, Daem Zybrecchtssoen ende Goeswijn Oomszoen van wilken lande voirsch. Jan van Scye voirsch. gheen ghebrec en kende op den lande voirz. Mer dat ic vernomen hebbe van anderen luden dat Jan van Scie gheseyt heeft dat t'voirsch. lant erven soude van Florens Janssoen alse recht ware van erfleen. Jan Diddensoen.

f.52v.

Van de Waellande bi Scoenhoven LXVIJ.

Jan v.Bloys etc. doen cond allen luden dat wi verleyt hebben ende verleyen Willem van der Heule Gherijt Borgherssoen 8 morghen lands dat die Wael heet mitten huse dat daer op staet te houden van ons ende van onsen nacomelinghen Willem voirz. ende sinen nacomelinghen tot ene onversterflichen erfene Welc lant voirz. beleghen hebben Mathijs Dirxsoen an die oestzide Ende an die westzide leit 1 weer lands dat Jutte Brunenweer heit streckende mitte overen ende an den Leckedijc Ende an Lycloes heffede mitte nederen ende hier waren over onse ghetruwe mannen heer Jan v.Haerler, heer van Ameide, heer Jan v.Langherak ridderen, Jan v.Bueren knape. In orconde enz. ghegheven t'Scoenhoven 2e july LXVIJ.

f.53.

Lijftocht van den waellande.

Jan van Bloys doen cond allen luden want Willem van der Heule Gherit Borghers soen van ons hout tot enen onversterflichen erfene 8 morghen lands dat die Wael heet mitten huse dat daer op staet en beleghen heeft Mathijs Dirxsoen mit erve an d'oestzide. Ende an die westside leit 1 weer lande dat Jutte Brunen weer heet streckende mitten overen ende an den leckedijc ende mitten nederen ende an Liclaes hofstede. Soe hebben wi om bede wille ende verzoec

Willems voirsch. en van gratien verlyet en verlyen Machtelde Heinric Stalkaerts dochter sinen wive hoir lijftochte an die 8 morghen lands mitten huse voirsch. daer wi se in gheloven te houden als zedelic en woentelic is sonder arghelist. Hier waren over onse ghetrouwe manne heer Jan van Haerler, heer van Ameide, heer Jan van Langherak, ridders, Ende Jan van Bueren knape. In orconde datum 2^e juli anno 66.

f.53.

Jan v.Blois enz. doen cond alle luden want Jan Boterman Gheerlofssoen van ons te leene hout vijftalf merghen lants ghelegghen in Langherak die belegghen hebben mit erve Coen Andriessoen an die oestzide ende Dirc Beyn ende sine stiefkinderen ghemengheder vore an die westzide Soe hebben wi om bede wille ende verzoec Jans voersch. ende van graciën verliet ende verlyen Margriete zinen wive hoer lijftochte an die mijnre helft van den vijftalf merghen lands voersch. daer wi se in ghelove te houden alsoe recht ende ghewoentelic is sonder arghelist.

Hier waren over onse ghetrouwe mannen heer Jan van Langherak ridder, Florens Claes Bentssoen ende Gherijt die Wilde die jonghe. Ghedaen t'Scoenhoven 18 daghe in julio int jaer M CCC ende t'seventich.

f.53v.

Jan van Blois doen cont allen luden dat wi om bede wille ende verzoecs Ysbrants van der Scuere ghewilkoert hebben ende ghesenteert jonfrou Katrinen Dirc Sayen dochter die nu zijn wijf is huer lijftocht ande minre helft van 8 morghen lants luttel myn of meer also als si ghelegghen zijn inden ambocht van Moerdrecht biden queldijc die Jan Bartouts soens waren die Ysbrant voersch. van ons te lene hout. Ende gheloven joncfrou Katrine voersch. te houden inden voern. lijftocht als zede ende custume is na den rechte van den lande. Ende want Ysbrant voern. ons aenbrocht heeft dat hi t'goet voersch. vercreghen heeft zeder dat Margriete zijn eerste wijf starf so hebben wi hun van graciën ghewilkoert dat na Katrinen doet die nu zijn wijf is die minre helfte lants comen zal op zinen oudsten soen die hi bi Katrinen voern. crighen mach die daer onse man of wesen zal ende van ons houden ten rechte leen. Ende al te verstaen sonder arghelist hier over waren onse ghetrouwen mannen heer Jan van Langherak, Floris van Adrichem ende anderen. In orconde ghegheven t'Scoenhoven des daghes na st.bartholomeeus dach anno lxxvi

f.54 ledig.

f.54v.

Dit zijn die ghene die dat lant belent hebben dat her Wouter van Hoemskerc opghedraghen heeft minen heer heer Janne van Blois. Ende des is 20 gherse vanden noirt westen in ghemeten des hebben belent an die noirtzide Claes Anensoens kinderen Pieter Florensoen ende Willem ende an die oestzide ende die zuutzide her Wouter selve ende an die westzide Ockers kinderen Symon ende Pieter ende Lambrecht van Roemonde, hier over waren als (louden) Gherit van Heemskerc Jan van Pruysen Henric van Lis Jan Maesdijc Lambrecht van Rumonde her Jan van Petten ende Jacob heer Wouters knecht. Hier of heeft mijn heer verlyet vrouwe Katrine van Aspen vrouwe van Eemskerc die een helft tot hoire lijftocht des zi brieve heeft van minen heer voirsch. Clais Mille Hughensoen heeft ontfanghen te leen van minen heer heer Janne van Blois Roedinx lant dat ghelegghen is in west zaenden ende is gheheten Roedinx seven made daer (lenden) of is Hughe Heyn Rodensoen van moenen venne op die zuut zide ende Jan Bercoutssoen op doe noertzide. Ende sevendalve gaerde en is gheten rodinxlant daer Vrederic Dirc Grawarts soen lenden of is op die zuutzide. Dit was ghedaen inde Wijc des donredaghes na alre zielen dach int jaer lx daer bi waren her Jan van Langherak Jacob van der Goude Lubbrecht van Rykleende anderen.

f.55.

Jacop Lisensoen.

Jan van Bloys heer van Scoenhoven en van der goude doen cont allen luden want ons Jacob Lisenzoon nu tertijt doerwaerder onser liever vrouwen der hertoghinne van Henegouwen en van Hollant vyt rechter dijnen als hi seyde die hi tot ons waert droech met sinen vryen willeop ghedraghen heeft zijn huus daer hi nu ter tijt in woent ende sijn ander huus dat daer jeghens overstaet an dander zide van der strate in den Haghe mitten erven en allen horen toebehoeren daer hi ons oec voor sgraven mannen van hollant voer scoutende ende scepene die doe waren in den Haghe enen vrien eyghendom af ghegheven heeft so dat wi en onsen nacomelinghen en onse ghesinde tot ewelike daghen daer altoes eene opene herberghe an hebben zellen. So hebben wi die husinghe voerscr. mitten erven en mit allen hoeren toe behoerenden voern. Jacob weder verliet tot sinen live van ons te houden in lene daer toe soe hebben wi om bede van Jacob voirsr. dese voirsr. huse mit den erven en alle hoeren toebehoren ghewilkoert en wilkoeren te comen na Jacob live op Willem sine neve die nu ter tijt es camerlinc onser liever nichte der vrouwe van Voerne of op sine rechte erfname ende die selve Willem op sine erfnamen sal dese voerscr. husinghe met horen toebehoren dan van ons houden tot eenen erfleene en sal Jacob sij leven langhen na hem Willem sijn neve voerscr. en sijn nacomelinghen dese voirsr. husinghe bewonen ende alle hoer ghevoech daer in hebben behoudelic dat wi en onsen nacomelinghen en onse ghesinde altoes eene opene herberghe daer in behouden tot alle onsen ghevoeghe en wi oec van nyer tymmeringhe daer an maken moghen en onse provanche daer doen comen en houden tot allen tyden in alre manieren dat ons orbaerlixte dunken sal al te verstaen sonder enigherhande argelist. Ende dese husinghe mit den erve voerscr. en hoeren toebehoren sal men verherghewaden alst ghevalt mit eenen roden spaerware of mit 8 scellinghe holl. daervoor ende om die opdracht van den husinghe voerscr. mit horen toebehoren so hebben wi Jacob voerscr. weder ghegheven tien pont groten die welke Willem die camerlinc voirsr. half betaelt heeft Ende om dat dit waer is en ghesiet in alre manieren voirsr. staet soe hebben wi daer op desen briefopen ghegheven bezeghelt mit onsen zeghel tot eenre orkonde en in kennisse der waerheyt ghedaen en ghegheven in den Haghe op st. katarine dach int jaer ons heren m ccc lxxii.

f.55v.

Wi Jan van Henegouwen heer van Byaumont maken cond allen luden dat wi ghegheven hebben en gheven Aernoud Nannekijn dat malen van onsen vrienden die woenachtich sijn of comen moghen boesten Yertzike in Zuytbevelant als in den broec in sceelvliet in hinbelen oerdt en in t'sheren pieters polre waer om wi ombieden onsen scoutende die nu over onse vriende daer is of namaels comen mach dat si onse vriende voirsr. daer toe ghebieden op eene boete van vijf sc. tornoys alzo dicke als si alwaer moelen alsoe verre als si niet betoeghen en mochte mit wittachtighen knapen dat men hem ongheliken scade dede meer tot der molen daer se Aernt wisen soude dan tot een ander. Ende van desen voerscr. boeten sal onse baeliu aldaer alle jaer onsen rentmeyster tot onsen behoef rekene en betalen. Dit sel ghedueren tot Aernds live voirsr. ten waer dat hij's wuerde mit alzo instaenden zaken dat ment hem billijc sculdich waer te wedersegghen en anders niet. In orconde van desen brief beseghelt mit onsen seghele ghegheven des vridaghes na sinte aechten dach int jaer ons heren m ccc en veertich.

f.55v.en 56.

Vyt den lande van Steyne.

Arnoud heer van Sreyne ridder maken cont allen luden die jeghenwoordich sien of toe comen sullen dat ic hebbe verlyet ende verlye nich Hughe vrouwe Agaten soene die houder is van desen brieve dat hi van mi hevet ontfanghen vijf ghaerden lands die gheleghen sien oestwaerts ane sinen lande andie vyt wateringhe vanne mi te houden en van minen nacomelinghen ten

rechter leen. Ware in voerwaerde wanneer dat sijns ghebrake te comen op Peter sinen soene alsoe verre als hi levende ware oec dat sake dat Peter die voerscr. is sijns ghebrake sonder witteliker bore te comen op Hughen outsten soene soe wie dat hem ware alsoe langhe alser enich levende ware t'sulcken rechte als recht ia van leen goede voert wanneer dat ghevalt dat dese voorn. Vijf ghaerde comen van den enen manne tote den anderen en dat mense sal verheerghewaden soe mach ic Arnoud heer van Steyne ridder voerghenoemd kiezen vanden drien jare die eerst comen enen rente van enen jare welc hoer dat is wille ende daer mede salt wesen verheerghewaert. Omme dat dit vaste en ghestade sal bliven soe hebbe ic Arnoud heer van Steyne ridder voerghenoemd dese brief beseghelt mit minen seghele en omme dat die vastet wesen sal en sal bliven soe hebbe ic Margriete vrouwe van Steyne heer Arnouds wijf van Steyne mit minen vryen wille desen brief beseghelt mit minen heer voerghenoemt mit minen seghelen ghegheven in die jare ons heren m ccc en viertiene des manendaghes voer pinxter dach.

Dit voirscr. leen ontfang Hughe Pieterssoen des donredaghes na laurencij 13 daghe in ougste int jaer lx en verheerghewaerdet met 5 nottoen die jonghe Jan selve ontfeng van heer Janne van Langherak.

Janne van Bueren als manne en anderen.

f.56v.

Jan van Bloys heer van Scoenhoven en van der Goude doen cond allen luden dat wi om bede wille ons ghetrouwe mans Bartholomeeus uter Wijc ghegheven hebbe en gheven Dircke van Dordrecht tot enen vryen eyghen alsulc lant ende erve als Bartholomeeus voirscr. van ons te leene plach te houden ligghende in den waert bi Spaernedamme welc voirscr. lant belegghen hebben mit erve an die noertzide die prochikerke van Haerlem, Jan van Hoesen en Willem van Scoten Willemssoen an die oestzide streckende van der Sparne an die loede. In oerconde desen brieve beseghelt mit onsen seghele. Ghegheven tot Scoenhoven des vridaghes na der octave st.martijns in de winter op den 20 sten dach van der maent van novembre int jaer ons heren m ccc en tsestich.

Presentibus dns de Barbenchon, Hughe van Barbenchon, Jan van Langherak, Jan van der Goude enz.

f.56v.

Jan van Bloys enz. doen cond en kenlic allen luden want ons aenghecomen sijn die vier en twintich morghen lands luttel min of meer alsoe als si ghelegghen sijn in den kerspel van Bodegraven an die nuwe weteringhe die meyster Aernts van Hokelen waren en hi in leene helt van onsen lieven heer en oudevader, minen heer Janne van Henegouwen heer van Byaumont des god ghedenke, en belegghen heeft wierinx sloet al langhes daer bi streckende an die oestside ende Dirc Boey mit erve an die westside. Soe hebben wi die voerscr. 24 morghen lands wittelic en wel vercoft Coppede Tidensoen Flansen en Dirc Boey sinen broeder en kennen ons van den achtien lb. jaerlixer renten die si ons daer voir bewisen souden in onsen lande van Scoenhoven en van der Goude al en wel voldoen en gheven voir ons en onsen nacomelinghen Coppede Tidensoen Flansen en Dirc voirscr. en horen nacomelinghen van den voirscr. 24 morghen lands mit horen toebehoren enen vryen eyghendom soe dat si en hore nacomelinghen des voirscr. lands tot ewighen daghe ghebruken moghen alse hoir vri eyghen goet en al sonder arghelest. Ende want wi willen dat dit vaste en stade blive en wel ghehouden werde in alre manieren dat voirscr. is soe hebben wi hem daer op ghegheven desen openen brief beseghelt mit onsen seghele tot eenre orconde en in kennisse der waerheit. Ghegheven t'Scoenhoven des dinxdaghes na st.martijnsdach 17 daghe in november int jaer ons heren m ccc en t'sestich.

Presentibus, Hughe van Barbenchon, Jan van Langherak, Gherit van Oesterwijk, Jan van

Bueren.

f.57.

Jan van Henegouwen maken cond allen luden dat ons Gherit van Scoeten opghedraghen heeft den halven veerdijc daer Dirc Florensoen t'wederdeel of heeft daer hi onse man of worden is en hi weder ontfaen heeft van ons en van onsen nacomelinghen hem en sinen nacomelinghen te houden te enen onversterflichen erfleene. En daer toe soe hebben wi den voirsch. Gheride ghegheven deene helfte van s'bloeten lande daer wi Janne Hughensoen t'wederdeel af ghegheven hebben alsoe groet en alsoe cleine alsoe Barthout Hasekinesoen in huere heeft dat an die noertside belegghen is mit scouwers lande en an die zuutside mit s'godshuuslande van Velsen oec van ons te houden in erfleene alsoe van den anderen voirsch.is. Hier waren over onse ghetrouwen manne alsoe her Aernt van Randerode, ridder, Bartholomeeus uter Wijc, Gherit die Borgher, knapen, en anderen goede lude. In kennisse der waerheyt soe hebben wi hem des desen open brief ghegheven beseghelt mit onsen seghele ghedaen en ghegheven an die Wijc des donredaghes na st.margriette dach int jaer ons heren m ccc vier en vijftich.

f.57.

Jan van Bloys heer van Scoenhoven en van der goude doen cond en kenlic allen luden dat wi verlyet hebben en verlyen Ysbrant van Scoten Gherijtssoen van Scoten was alsulc goet als Gherit voirsch. zijn vader van onsen lieve heer en oudevader minen her Janne van Henegouwen heer van Byaumont des god ghedenken en van ons te houden plach in alsulken manieren als die brief in hout daer dese onse jeghenwoerdighen brief dierghestoken is. Hier over waren onse ghetrouwe manne heer Jan van Langherak, ridder, Jan van Bueren, Dirc van der Goude, knapen, en andre. Om dat dit waer is hebben wi desen brief beseghelt mit onsen zeghele tot eenre orkonde en in kennisse der waerheyt ghedaen en ghegheven t'Scoenhoven des dinxdaghes 17 daghe in meye anno lxii

f.57v.

Jan van Bloys maken cond allen luden dat wi overghegheven hebben en overgheven alsulc toesegghen als wi ghehat hebben of noch hebben moghen tot Reynier Claessoens goede en alsulke rechte als onse lieve heer en neve hertogh Aelbrecht ons daer of ghewilkoert heeft mit sinen openen brieve daer dese doir ghesteken is, Clayse den Vischer en sinen ghesellen of horen rechten erfnamen overmids dat dese voirsch. betaelt en voldaan hebben van alsulken ghelde als si ons voir Reynaer voirsch. ghelevert hadden en hi ons sculdich was, waerom wi vriendelike bidden den baeliu van Keenmerlant die nu is of namaels wesen sal of den ghenen die in sinen stede is of wesen sal erghent daer Reynaer voirsch. in den voirsch. baeliuscap goet heeft dat si den voirghenoemden of horen ghewaerden bode die dese brieve brenghen sal alle die selve helpe doen die si ons selven of onsen ghewaerde bode doen souden an den tenent van ons liefs heren en neve brieve voirsch. In orkonde desen brief ghesteken doir den anderen en beseghelt mit onsen seghele ghegheven te (halkghijn) des dinxdaghes op st. urbaens avond int jaer ons heren m ccc lxii.

Presentibus, dns.Hughe de Barbenchon, Dirc van der Goude, Jan van Bueren.

f.58.

Jan van Bloys, enz, want wi onsen lieven gheminden neve heer Janne heer van Barbenchon ghegheven hebben tot sinen live om dienste die hi ons ghedaen heeft en noch doen mach vier hondert vranxe scilde siaers of payment dat daer voir goet is die wi hem bewijst hebben op onsen rentmeyster in zeelant ter tijt toe dat wi hem dit voirsch. ghelt op seker stede en stucke bewijsden daer hijt bi sijns selfs hant of bi sinen ghewaerde bode ontfanghen mochte als die brieve begripen die wi hem voir dese daer op ghegheven hebben en want wi willen dat onsen

lieve neve voirn. hier in te bet bewaert si en te .eeder betaelt worde soe hebben wi hem dese voirscr. somme van ghelde bewijst en bewisen op alle onse koeren thienden die wi hebben in onsen lande van der Tolne in deser manieren dat onsen rentmeyster die nu is of namaels of naemaels wesen sal die voirscr. thienden jaerlix vercoepen sal op al sulke daghen en in der manieren alse ghewoenlic is bi den ghenen die onse neve voirscr. sine saken hier in bevelen sal en die sal sulke sekerhede nemen van der voirscr. somme van vier hondert scilde daer hem dunct dat onse voirscr. neve mede bewaert mach wesen. Ende daerom willen wi dat hem en onse rentmeyster die alle die rescap en vordernisse die hi mach ende voert sake dat van desen voirscr. thienden alsoe veel niet en quame in enighe tiden also ons voirscr. neven ghelt beloept soe sal hem onse rentmeyster dat van den onse vervallen soe dat hi ymmer van der heelre somme die voirscr. is jaerlix betaelt worde en waert oec dat die voirscr. thienden meer gouden dan ons voirscr. neve ghelt beloept dat soude onse rentmeyster altoes ontfaen tot onsen behoef. Alle dese voirscr. poynten te verstande sonder arghelist. Ende want wi willen dat onse lieve neve voirscr. dese renten tot sinen live ghebruke en hem daer of altoes voldaan worden in alre manieren dat voirscr. is soe hebben wij hem daerop ghegheven desen openen brief beseghelt mit onsen seghele tot eenre orconde en in kennissen der waerheyt ghegheven ter Tolne in Zeelant.

f.58v.

Jan van Bloys enz. doen cont allen luden dat wi om goede gonste ende meyninghen die wi toedraghen meyster Willem sonderdanc onsen sireurgyen wonachtich ter Goude en om dienste die hi ons ghedaen heeft ende noch doen sal hem ghegheven hebben ende gheven xvi lb. holl. slechts ghelts t'siaers die wi him bewijsen voer ons en onse nacomelinghen also langhe als hi leeft jaerlix tontfane an onsen renten van Scoenhoven ende van der Goude, ende zijn eerste termijn of wesen zal te kersavonde nu naestcomende ende also voert van jare te jare daer hi onse man of worden is ende ons om dienen zal als wijt begheren ende ombieden onsen rentmeyster van Scoenhoven en van der Goude voerscr. die nu is of namaels wesen zal dat hi t'voerscr. ghelt van onser wegghen meyster Willem voerscr. of zinen bode tot zynre behoef jaerlix ten voern. terminen wtreyken ende betalen sonder anders enich ghebot of bevelnisse daer of te hebben mer daer of neme zinen brief van quitanchen alle jare voer ons mede te rekenen. Hier over waren als mannen heer Jan van langherak, Dyric van der Goude ende rade die heer van Herlaer en heer Hughe van barbenchon ridderen ende om dat wi willen dat meyster Willem voerscr. dit wael ende vaste ghehouden worde van ons en onse nacomelinghen so hebben wi hem daer op ghegheven desen openen brief bezeghelt mit onsen zegghelen tot eenre orconde en in kennisse der waerheyt ghedaen te Scoenhoven xii daghe in oest anno lxiii.

f.59.

Jan van Bloys doen cond allen luden dat wi om goeden gunste en meyninghen die wi toedraghen heer Rutgher Roitsen om dienste die hi ons ghedaen heeft en noch doen sal hem ghegheven hebben en gheven hondert guldene t'siaers of twintich vlaemsche groten voir elken gulden die wi hem bewisen voir ons en onsen nacomelinghen alsoe langhe als hi leeft jaerlix te ontfaen an onsen renten van Scoenhoven en van der Goude en sijn eerste termijn of wesen sal tot st.jans misse middenzomer naistcomende en alsoe voirt van jare ten jare daer hi onse man of worden is en ons om dienen sel als wijt begheren. Ende ombieden onsen rentmeyster van Scoenhoven en van der Goude voirscr. die daer nu is of namaels wesen sal dat hi t'voirscr. ghelt van ons wegghen heer Rutgher voirscr. of sinen ghewaerde bode tot sinen behoef jaerlix ten voirscr. termine wtreyke en betale sonder anders enich ghebrec of bevelnisse daer of te hebben mer daer of neme sinen brief van quitanchen alle jare voir ons mede te rekenen. Hier over waren onse ghetrouwe ridderen heer Jan van Haerler, heer van der

Ameyde, heer Hughe van barbenchon onse neve, Coene van Oesterwije ende Lubbrecht van Rikele onse manne. Ende om dat wi willen dat heer Rutgher voirsch. dit wel en vaste ghehouden worde van ons en onse nacomenlinghen soe hebben wi hem daer op ghegheven desen openen brief beseghelt mit onsen seghele tot eenre orconde en in kennisse der waerheit. Ghegheven te Coninxberghe in Pruyssen des saterdaghes na onser liever vrouwen dach die men heyt purificacio int jaer ons heren m ccc twee en tsestich.

f.59.

Inder voirsch. manieren gaf mijn heer Jacop van der Goude tot sinen live sijn man af te wesen 40 lb. holl. beursghelt siaers alle jare te betalen t'sinte pieters misse dat gheschiede des woensdaghes na katerine int jaer lxxi daer over waren heer Jan van Langherak, ridder, heer Aelbrecht van Meerten canonic t'Utrecht, Jan van Poelgheest, Dirc van der Goude en Vrederic van der Zevender, daer hi mijns heren brieve of heeft.

f.59v.

brief in de Franse taal.

f.60.

Jan van Bloys enz. doen cont allen luden dat voer ons ghecomen is Clais die Grebber Willemssoen ende heeft ons opghedraghen mit zinen vryen wille den derdendeel van xvii deymeden lants gheleghen opden Catwoude ende gheheyten zijn Willems Grubbers venne streckende anden ponmer van welken lande Jacob Jan Lyllensoen nu ter tijt onse scouten aldaer ontfaen heeft enen vryen eyghendom tot onser behoef naden rechte van den lande aldaer. Ende want Claes voersch. ons dit lant opghedraghen heeft van zinen vryen eyghenen goede ende bi zinen vryen wille als voersch. is. So hebben wi voer ons ende voer onse nacomelinghe him ende zinen nacomelinghen dit selve lant weder verleyt te houden van ons tot enen onversterflichen lene ende men zalt verheerghewaden mit eenre jaerrente. Dir gheschiede inden Haghe daer bi waren onse ghetruwe manne alsoe heer Jan heer van Barbenchon onse neve, heer Jan van Langherak, ridders, Jan van Bueren, Dirc van der Goude, knapen, ende andre. In orconde desen brief bezeghelt mit onsen zeghele ghegheven in die Haghe voersch. op sinte andries avont apostels int jaer ons heren m ccc ende t'sestich.

f.60v.

Jan v.Bloys enz. onbieden U heer Janne van Langheraec onsen ghetruwe ridder enden man onse baliu van Scoenhoven ende van der Goude Ende onsen ghemeynen gherechte van Scoenhoven dat ghi te samen onse segghen van Janne Eggherde die Wendelmoede Rondeels te wive hadde ende Clinckspoirs zuster was segt ende condich maect van onser wegghen in alre manieren dat dese cedule begrepen heeft. In den eerste want Jan Eggherde voerz. an ons ghebleven is van sulker misdaet dat hi enen brief ghevalscht soude hebben ende wi ter waerheit ondervonden hebben dat hi mit die ghevalsten brieve recht ghevordert heeft ende an de goede brieve daer mede afterwaert gheset zijn so is onse segghe dat Jan voersch. tussen dit ende sinte Jansmisse te middezomer naestcomende porren zal om mit zijns selfs live ene bedevaert te doen ten heylighe grave so hi eerste mach sonder arghelist ende niet weder in onse landen in hollant noch in zeelant te comen eer hi die voerz. bedevaert ghedaen zal hebben Ende daer of goede warachtighe brieve van betogheghebracht. Ende waert dat hi dese voerz. bedevaert niet en dede so soude hi verboort hebben jehghens ons 400 scilde die hi ons daer voer gheven soude of sine borghe die ons daer voer ghelooft hebben dit jehghenwoerdighe seggen te houden.

Ende want wi op desen zake raet ghehadt hebben mit sulken van ons liefs heren ende nemen hertogh Aelbrecht rade ende mit vele van de onsen so vinden ende enich ons die voerz.

misdaet also groet wesen dat Jan Eggherde voerz. voert aen nymmermeer in goitsknappen stede wesen en mach ende baliu gheweert wesen sal te doen yet dat om goeden knappen toebehoert. Ende dit voerz. segghe hebben wi mit sulke voorziene gher..te segghen dat wijt in dese cedule bescreven ende onse zeghel daer op ghedruct tot eenre orkonde Ghegheven ter Tolne in Zeelant op sinte Barbarendach int jaer ons heren M CCC ende t'sestich.

f.61.

Jan v.Bloys geeft aan Lubbrecht van Rikele onsen knecht van onse hernasche om dienst die hi ons ghedaen heeft en noch doen zal 20 lb.Troys van rente van Zeeland Ghedaen te Tolne in Zeeland op st.Niclaesdach int jaer M CCC ende t'sestich.

f.61v.

Jan van Bloys etc. doen cont allen luden dat voer ons en onse mannen ghecomen is Jan van der Goude ende heeft mit sinen vryen wille in die hant gheset Aleyden zijnre zuster die bruycweere van eenre hoeve lants als si ghelegghen is in Hoemxcoep die hi van ons te lene hout voer 50 scilde die zi gheleent heeft aen ghereden ghelde ende hoer of den ghenen die zijs machtich maect alle die renten ende baten die van dien lande comen moghen te ghebruken ende vrylic op te bueren ghelijc of hijt selve ware sonder enich wedersegghen van him of yemende dat van zijnre wegghen mochte ter tijt toe dat hi of zijn rechte leenvolghen ghebrake zijns hoor van die ghelde voldaan hebben. Ende desen brief ghelossent ende gheloven Aleyden voerscr. of den ghenen sie zijs machtich maect daer in te houden in desen manieren voerscr. behoudens ons ons rechts dat ons daer an vervallen mach. Ghegheven t'Scoenhoven des donredaghes na onser vrouwen dach assumpcio anno lxi. Presentibus, dns de Barbenchon, Jan van langherak, ridders, Dirc van der Goude en Jan van Bueren.

f.62.

Dit is segghen Jand van Bloys heer van Scoenhoven en van der Goude van Coppijn Hughen doet daer god die ziele of hebben moet daer Traveys Claysoen sculdich of ghevonden is overmids dat hijt dede doen over enen rechten vrede ende Godevaert sijn broeder als dat hi daer of wiste en daer bi was daer ment t'vete overdroech daer si hoer lijf an verboert hebben dat wi hem weder gheven van gracen en om bede van vrienden mer sulke betughen te doene als hier na volghet. In den eersten selle Traveys en Godevaert voirscr. cloester winninghe doen tusschen mase en zipe als sede en woente is de voirscr. Coppijn Hughen ziele te troesten en te ghenade, voirt sellen si winnen 300 zielmissen voir des voirscr. Coppijns ziele. Voort soe sellen si gheven te beteringhe 800 lb. zwarts des Traveys gheven sal 500 lb. en Godevaert sijn broeder 300 lb. Van desen voirscr. 800 ponden sullen Coppijn Hughen maghe hebben 250 lb.zwarten des sellen gaen 1 derdendeel ter voirzoene die men deilen sel bi onsen baliu en derdendeel ter erfzoene en 1 derdendeel ter maechzoene.En want om dese sake te vervolghen ende te berechten mit campe en in anderen manieren grote coste ghedaen is van onsen wegghen soe setten wi van den 550 lb. die van der voirscr. somme noch bliven in heer Jans hant van Langherak nu ter tijt ons baliu was van Scoenhoven en van der Goude te keeren dat hi wille 60 lb. zwarten ende onsen ghesinde van onser herberghe 80 lb. zwart. Ende die 410 lb. die daer dan overbliven behouden wi voir onsen costende die voirscr. somme van 800 lb. sellen si betalen een derdendeel daer of op den derthiendach naestcomende, ende derdendeel op den meydach naest comende en dat derde derdendeel op onser vrouwendach te halven oeste daer naest volghende. Welke betalinghe si doen sellen op die daghe voirscr.binnen onser stede van Scoenhoven bi onsen baliu aldaer of die in sine stede dan wesen sal. Voirt sellen si oerbeede kiezen ten middelsten daghe van den 3 terminen voirscr. van die sal men doen ten lesten daghe, voirt sal men voetval doen ten voirscr. lesten daghe mit 200 mannen en dan rechtevoirt

overgheven die brieve van cloester winninghe en van zielmissen als voirscr. is. Ende alle die ghene die den doeden naerre sijn dan den levenden sullen van der voirscr. zoene nemen en gheene gheven en die den levenden naerre sijn dan den doeden sullen gheven en niet nemen. Ende die hem beiden effen na sijn sullen gheven en nemen. Ende mit desen segghen voirscr. sellen claerlike verzoent wesen Traveys en Godevaert voirn.en alle hoer maghe van Coppijn Hughen doet en allen sinen maghen tot alre zoenen recht sonder enigherhande arghelist. Ende Hier in namaels enich (stoet) of in enich van den pointen voirscr. dat houden wi altoes tot onser verclaringhe of ons baeliuwes. Ende dese zoene en segghen voirscr. te houden en te voldoen wittelic en wale in allen manieren dat voirscr. is hebben verborcht van den eenre helfte van Traveys en Godevaerts maghen alse van der Goude en van Moerdrecht van hoers vader zide Hanneman Woutersz. Wouter Spierinxsoen, Jan Claesz, Spierinc Boudijnsz ende van den derden vierendeel van Traveys moeders weghe Boele Gherijtsz, Spierinc Boudijnsz ende van den vierden vierendeel van Traveys moeders weghe Traveys selve Willem Oemsz en Willem Hughensoen. Ende van den derden vierendeel van Godevaerts maghen van sijnre moeders weghe sijn borghen Gielis Lisensoen en Jan Meyerssoen. Ende van den vierden vierendeel van des voirscr. Godevaers maghen van sijnre moeders zide sijn borghen Jan sijn broeder, Godevaert Peterssoen en Godevaert Claessoen voirscr. selver. Ende Traveys en Godevaert sijn broeder voirnoemt en Jan sijn broeder hebben ghelevet alle dese anderen borghen voirscr. scadeloes te houden ende van Coppijn Hughen weghe hebben verborcht en ghelovet te houden dese voirscr. zoene, Willem sijn soen, Jacop Traveysensoen, Florens Traveysensoen, Voppe Vriesensoen, jacop die Iagher, Brune van Zoetermeer en Willem Bonne. Dit voirscr. segghen was gheseit tot Scoenhoven in onsen voirborche op st.barthelmeeus daghe int jaer ons heren m ccc lxi daer bi waren her Hughe van Barbenchon onse neve, heer Jan van Langhrak op die tijd onse baeliu van Scoenhoven en van der Goude ridderen, her Ghesebrecht, her Aelbrecht capellaen, Gherit van Oesterwijn, Jan van Bueren, Eggaert Veenman en Gherit die Borgher knape. En want wi Jan van Bloys heer van Scoenhoven en van der Goude voirn. dit segghen mit goeden voirziene en gansen berade gheseecht en gheut hebben en wijt oec voldoen en volbracht hebben willen in alre manieren dat hier voirscr. staet soe hebben wi onsen seghel op desen cedula dit voirscr. segghen begripende ghedruckt tot eenre orkonde en in kennisse der waerheit.

Los briefje.

Jan van Bloys heer van Scoenhoven ende van der goude doen cont allen luden dat wi om bede wille ende verzoec Lubbrechts van Rykele ons knechts van onsen haernasche die twinrich pont tornoyts tsaers die wi him ghegheven hebben tot zinen live en bewijst op onse rentmeister Met onsen openen brieve van gratien verleyt hebben en verlyen Katerine die nu sijn wijf is en Vignons dochter was van Byaumont tot hoere rechte lijftocht dats te verstaen of zi langher leeft dan Lubbrecht voern. dat zi die voirscr. 20 lb. hebben zal ende heffen also langhe als zi leven zal tot zulken termine als onse ander brieve begripen die Lubbrecht daer of heeft. In orkonde desen brieve bezeghelt mit onsen zeghele ghegheven tot Scoenhoven op des heylichs cruys avond in september int jaer ons heren m ccc twee ende tsestich. Presentibus, dns de Ameyde, Hughe de Barbenchon, Jan van Langherak.

f.63.

Jan van Henegouwen heer van Byaumont maken cond allen luden dat wi Janne bake ghegheven hebben en gheven eenen stal mit wanthuis in onser stede van der Wike an die noertside recht over jehens Dirc Gilen stal en tsaers 4 zwanen ute zaenden daer hi onse man of worden is van ons en van onsen nacomelinghen hem en sinen nacomelinghen te houden tot enen erfleene. Hier over waren onse mannen alse her Aernt van Randerode ridder, Barthelmeeus uter Wike, Hughe van Zaenden, Wouter Buys en andere lude. In orconde desen

briefe beseghelt mit onsen seghele ghedaen en ghegheven in die Wike des donredaghes na st.margrieten dach int jaer ons heren m ccc vier en vijftich.

Ende dit voirscr. leen versocht en ontfinc van minen joncher Janne van Bloys heer van Scoenhoven en van der Goude Gherit Jan Bakensoen voirscr. des vridaghes na bartholomei t'Scoenhoven int jaer lxi daer bi waren als manne Gherit van Oesterwijn, Jan van Bueren ende anderen.

f.63.

Jan van Bloys heer van Scoenhoven en van der Goude doen cond allen luden dat wi ghegheven hebben en gheven voir ons en voer onsen nacomelinghen meester Willem onsen sierurgijn wonende ter Goude om menighen trouwen dienst dien hi ons ghedaen heeft en noch doen sal en sinen nacomelinghen ene hofstede op onse erve ghelegghen binnen onser stede van der Goude voirscr. dat gheheten is t'hof. Welke hofstede streckt oestwaert an die straete beneden Jacops husinghe van der Goude daer hi nu ter tijt in woent ende westwaert ten watre toe dat men heet die vaert. Ende van der noertzide die op die selve vaert koert zootwaerts streckende 4 roeden luttel min of meer. Welke hofstede hi betimmeren en bewoenen mach in der maniere voirscr. om 3 capoene siaers altoes te betalen te st.martijns misse in den winter mer waert sake dat wi of onsen nacomelinghen die voirscr. hofstede namaels gheruimt hebben wouden om enich ghewaech dat ons daer ane laghe soe soude meyster Willem voirscr. of sine nacomelinghen die timmeringhen die daer dan op staen sal of wesen altoes of doen en die voirscr. hofstede rumen tot onsen of onser nacomelinghen vermanen mer dan soude men hem den scade die hi daer bi name altoes oprechten en verbeten bi onser scepene scatinghe die op die tijt ter Goude wesen sullen en al sonder arghelist. In orconde hier of hebben wi desen openen brief doen beseghelen mit onsen segghelen ghegheven op onser stede van der Goude den anderen dach in september int jaer m ccc lxi

Presentibus dns Hughe van Barbenchon, ridder, Aelbrecht van Meerten, Ghisebrecht Stomme.

f.63v.

Wij Jan v.Henegouwen enz. maken cond dat wij ghegheven hebben onsen barbier Hermanne onsen barbier tot sine live eene viertel lants die Nanne Vrouwijnsdochter van ons hadde ghelegghen te corte Bloemendael bij onse poorte van Goude. Ghegheven saterdaghes na Paeschen int jaer m ccc xlv.

f.63v.

Jan van Bloys heer van Scoenhoven en van der Goude doen cond allen luden want Herman den barbier onse gheminde knape ons opghedraghen heeft en alinghe over ghegheven ene viertel lants die hem onse lieve heer ende oudevader mijn heer Jan van Henegouwen heer van Byaumont was des god ghedenke ghegheven hadde tot sinen live also als zi ghelegghen is binnen onsen ambochte van corte bloemendale bi onser poorte van der Goude daer hi opene brief of hadde van onsen lieve heer en oudevader voerscr. die hi ons over ghelevert heeft ende quite ghescoude. So hebben wi hem voer die voern. viertel lants weder ghegheven om menighe trouwe dienst die hi onsen lieve heer en oudevader voerscr. en ons ghedaen heeft en noch doen zal sesse pont hollands slechts ghelts jaerlix also langhe als hi leven zal van ons te lene te houden ende daer hi onse man of worden is daer zijn eerste dach van betalinghe van den voirscr. zes ponden of wesen zal te kersavonde naistcomende ende also voert van jare te jare zijn leven lanc. Welke ses pont siaers wi hem bewijst hebben en beweyden op onsen coffere ende bevelen onsen (entmeyster) die nu is of namaels wesen zal dat hi Hermanne voerscr. of zine ghewaerde bode die voerscr. 6 pont jaerlix wtreyken en betalen ten daghe en inder maniere voerscr. sonder anders enich ghebot van ons daer of te hebben wedernemende

alle jare zine brief van quitanche voer ons mede te rekenen. En want wi wille dat Hermanne voerscr. dit ghescide en hem vaste en wel ghehoude blive inder manieren voerscr. so hebben wi hem des desen openen brief ghegeven bezeghelt mit onsen zeghele tot eenre orkonde en kennissen der waerheyt ghedaen en ghegheven t'Scoenhoven zes daghe in september anno lxi. Presentibus dns Hughe van Barbenchon, Jan van Langherak, ridders.

f.64.

Stuk in de Franse taal betreft Sarrasijn.

f.64v.

Cont zi allen luden dat ic Gielis van Windelsnesse knape ontfaen hebbe van heer Ghijsbrecht Stomme cappelaen mijns liefs en gheduchts joncheren Jans van Bloys heer van Scoenhoven en van der Goude die mi mijn lieve joncheren voerscr. sculdich was. Eerst van mijnre husinghe molene en erve en anders alle mijne goederen dat in Texel hadde en ic minen voerscr. joncheren vercoft hebbe xxxv lb. gr. Item van mijnre hofstede t'Scoenhoven die men heyt Jan Wissen soens hofstede ende ic minen voerscr. jonchere oec vercoft hebbe xv lb. gr. Item die mijn joncher voerscr. mi te hoescheden ghaf voer dienst en arbeyt die ic ghedaen hadde om te bedriven den coep jeghen den abt en t'convent van Ludenkerke alse vanden goede dat zi in Texel hadden v lb. gr. Ende van alle den ghelde voerscr. kenne ic mi vol en al betaelt en scelde voer mi en voer mine nacomelinghen minen lieven joncher voerscr. en zinen nacomelinghe daer of quite en vertye des voerscr. goets altemale tot eweliken daghen mit desen jeghenwoerdighen brieve bezeghelt mit minen zeghelen tot eenre orkonde en in kennisse der waerheyt ghegheven 10 daghe in september anno lxi.

f 65.

Wi Jan v.Henegouwen heer van Byaumont maken kenliken allen lude dat wi verleyt hebben ende verlyen met desen jeghenwoordige brieve Janne den Hazen van Scoenhoven dat lant dat Tentenborch heet dat ghelegen is ander Zevendaer tussen Ghijsbrecht Kevelaerts lande oestwaerts ende (Ponciaen) lande Poortenaerssone westwaerts streckende ander langhe van de weghe ter Zevendaer an Arnout Belienzoens hove te houden van ons ende van onsen nacomelinghen hi ende zine nacomelinghen ghevolchlike ten enen rechte erflene te verherghewaden tot elker doer met enen ponde hollantse met vorder te verzoeken dan tot onse huse t'Scoenhoven ende dat te verleyen sonder enich wedersegghen. Hier over hebben gheweest meyster Jan van Hemsberch, Henrik zijn broeder, Gherijt die roedragher onse manne ende anders een deel onser goede lude. Ende want Jan die Haze dit voerghesproken lant dat zijn vrij eyghen was ons opdroeck ende daer af ons ghaf enen vrije eyghendom sonder enigherhande noit of besware. So begheven wi dat hem ende sine nacomelinghen al dese voerscr. voerwaarden wettelike ende gonstelike ghehouden worden sonder arch hebben wi hem desen brief ghegheven ende beseghelt mit onsen zeghele Ghegheven int jaer ons heren M CCC ende dertich des dinxdaghes na onser vrouwendach midden oest.

f.65v.

Jan v.Bloys enz maken cond ende kenlic alle luden dat wi verleyt hebben ende verleyen Myen die Jans Hasen dochter was ende Wouter Willemsz. op die tijt haeren man als haren rechte mombaer t'lant dat Tentenborch heet ende haer vader ende oudevader die beyde Jan die Haze heyten van ons ende van onsen lieven heer ende oudevader mijne heer Janne v.Henegouwen heer van Byaumont des god ghedenke te houden plaghe. Ghegheven tot Scoenhoven op sinte Matheusavont int jaer M CCC LXJ.

(er onder geschreven)

Dit voorz. lant verliede mijn heer in alle der selver manieren dat voirz. is Mijnsen der voirz.

Myen dochter dat Ghisebrecht Kevelaer ontfinc ende manscap of dede als mombaer daer waren over als mannen Daen Mathijsz. Lubbrecht van Rikele ende Benoet des saterdaghes na de 11000 magheden dach int jaer LXV.

Oec waren daer bi Vrederic van der Zevendaer en Jan Breye.

f.66.

stuk in latijn.

f.66.

Jan van Bloys doen cond allen luden dat wi verlyet hebben en verlyen Dirc Willems Witten soen die halven hoeve lands die ghelegghen is in die oude Goude in eenre hoeven nader zijdwende te houden van ons en van onsen nacomelinghen tot enen rechten leene in alder manieren dattet sijn vader van onsen lieven heer en oudervader mijnen heer Janne van Henegouwen heer van Byaumont des god ghedenke en van ons te houden plach, hier waren over onsen ghetrouwen manne her Jan van Langherak, ridder, Dirc van der Goude en Jan van Bueren, knapen. In orconde desen brief beseghelt mit onsen seghele ghedaen en ghegheven t'Scoenhoven op st.peters avond ingaende oest int jaer ons heren m ccc lxi.

f.66v.

Ic Ghisebrecht van Yselsteyn doe cond allen luden dat ic verlijt hebbe en verleene vrouwe Kerstine mijnre zuster heer Willems wive van Thuyl neghen merghen land op den overen egghe van eenre zate lands ghelegghen op die noert zide van Benscoep. Ende ic houde van minen lieven joncher van Bloys daer boven naest ghelant is Dirc Noudensoen en sijn zuster ende beneden naest ghelant sijn die capellane mijns liefs en ghenads heer van Yselsteyn in mede gane tot hore hylke voir allen dat hoer tot desen daghe toe gheerft mach sijn of mit besterften aenghecomen. Welke 9 morghen lands si en hoer nacomelinghen van mi en van minen nacomelinghen houden sellen tot enen rechten leene mit sulken voirwaerden dattet niet versterven en mach alsoe langhe als enighe witteliken gheboorte leeft dat van haren live ghecomen is. Hierover waren mine manne alse Vrederic Zoude van den Rijn, Gherit van Worne en Hughe van Aemstel. In orconde des briefs beseghelt mit minen seghele ende om die meerre vestenisse hier af soe hebbic verzocht ende bidde minen lieven gheduchten joncheren Janne van Bloys heer van Scoenhoven en van der Goude die mijn heer is van desen voirsr. goede dit te confirmeren en mit sijnre hant te (scedighen) en sinen openen brief hier doer te steken. Ghegheven int jaer ons heren m ccc een en tsestich.

Jan van Bloys enz. doen cond allen luden dat wi om bede en verzoec Ghisebrecht van Yselsteyn ons neve alsulke mede gave en goedinghe als hi ghedaen heeft vrouwe Kerstine sijnre zuster die nu ghesellinne is heer Willems van Thuyl an die neghen morghen lands die Ghisebrecht voirn. van ons mit meer erves te leene hout in alle manieren dat dese brief inhoudt en begrepen heeft daer die onse doirsteken is alsoe voir alst ons aengaen mach

f.67.

Wi Jan v.Henegouwen enz. maken cond allen luden dat Dirc Heinrixsoen van Jutfaes ons opghedraghen heeft in rechte eyghendomme ene viertel lands ghelegghen in den Cabau in desen marke her Willam van Montfoerde an die nederzide ende Nelle Clonkaerts erfname an die overzide. Welke viertel lands voirz. wi Dircke voirz. weder verleyt hebben hem en zinen erfnamen van ons ende van onsen nacomelinghen te houden tot enen onversterflike leene. In oerconde enz. Ghegheven te Scoenhoven op den derthien avond int jaer M CCC ende veertich.`

Ende dit voirsr. land ontfinc Dirc des voirsr. Dirc Heinrixsoen van minen joncher Janne van

Bloys des vridaghes na symons en jude ter Goude int jaer lxi Daer bi waren als mannen heer Jan van Langherak en Herman die barbier.

f.67.

Wi Jan van Henegouwen heer van Byaumont maken cont allen luden dat wi hebben ghegheven en verlyen Janne onsen clerc van der Goude dat gheerkin also alst ofghedolven is van onsen erve mitter grafte op die westzide van onsen poorte van der Goude (t'oude) hofstede van der boomghert streckende dat noirt ende tende an die hofstede die opghaen van der Goude an onsen watersloet daer onse landt doer pleecht te wateren dat ander ende an die zoetslaghe van ons te houden en van onsen nacomelinghe ten rechte lene te bruken tsine besten behoude ons rechts en onser heerlichede en alse (vorst) arst te verzoeke an ons zijn wi binnen lants ende zijnre ware niet an die hofstede van der Goude ende te verheer ghewaden mit eenre jaer rente ende om dat wi willen dat dit vaste blive onverbroken so hebben wi desen brief beseghelt mit onsen zeghele ghegheven t'Scoenhoven des donredaghes voor palinen anno xxxiiii.

f.67v.

Jan van Bloys heer van Scoenhoven en van der Goude doen cont allen luden dat wi verlyet hebben en verlyen Jannes Jans Clercs soen van der Goude dat gheerkin landts mit zinen toebehoren dat Jan zijn vader voorn. van onsen lieve heer en oudervader mijnen heer Janne van Henegouwen heer van Byaumont des god ghedenke en van ons te houden plach te onser rechten lene welker gheerkin lants voerscr. Jannes voerscr. en zinen nacomelinghen houden zullen van ons en van onsen nacomelinghen te rechte leene en in allen manieren dattet zijn vader voerscr. te houden plach en die brieve begripen die hi daer of hadde van onsen lieven heer en oudevader voerscr. behouden ons rechts en onser heerlichede. Hier over waren onse ghetrouwe manne heer Jan van der Goude, Dirc van der Goude en Jan van Bueren. In orconde hier of hebben wi desen brief beseghelt mit onsen zeghelen ghegheven t'Scoenhoven des dinxdaghes 17 daghe in meye anno lxii.

f.68.

Enghebrecht van der Woude.

Jan van Bloys maken cond en kenlic allen luden want Enghebrecht van den Woude van sinen eyghene goede bi sinen vryen wille ons opghedraghen heeft eene viertel lands ghelegghen in onsen gherechte van Papencoep mit oude Jacop Coutmont ghemenghet voir en belegghen heeft mit erve an die zuutside Jacop die Veer en an die noertside Clays Ysacs kinderen, van welken viertel lands Enghebrecht voirsch. onse man gheworden is. Soe hebben wi voir ons en voir onse nacomelinghen Enghebrecht voirn. en sinen nacomelinghen die voirsch. viertel lands weder verleyt en verlyen van ons en van onsen nacomelinghen te houden tot eenen onversterflichen erflene te verheerghewaden mit eenre halver jaer rente die van den voirsch. lande comen sal en te verzoeken also valt an ons selve of voir onse borch t'Scoenhoven al sonde arghelist. Hier waren over onse ghetrouwe manne heer Jan van Langherak, ridder, Jan van Bueren en Dirc van der Goude knapen. In orconde deser brieve beseghelt mit onsen seghele en in kennisse der waerheyt ghegheven t'Scoenhoven ix daghe in die maent van october int jaer ons heren m ccc twee en tsestich

f.68.

Jan van Bloys doen cond en kenlic allen luden want Enghebrecht van der Woude onse man gheworden is van eenre viertel lands die hi ons van sinen eyghene goede op ghedragghen heeft en wi hem weder verleyt hebben mit onsen opene brief van ons te houden tot enen onversterfliche erfleene in der manieren dat onsen voirsch. brief inhoudt en begrijpt dien wi

Enghebrecht voirn. daer af ghegheven hebben en hebben wi om bede wille Enghebrecht voirn. Clays Riems dochter sinen wive verlyet en verlyen hore lijfrechte an die minre helfte van den lande voirscr. alsoe alst ghelegghen is. In orconde desen brief beseghelt mit onsen seghele ghegheven t'Scoenhoven 9 daghe in die maent october int jaer ons heren m ccc lxii Presentibus dns. Hughe de Barbenchon, Jan van langherak, ridders, Aelbrecht van Meerten, Gherit Doesteven, Jan van Bueren, Dirc van der Goude.

Die voerscr. viertel lands verlyede mijn heer de grave van Bloys Margriete Wermbouts dochter van den Woude Engbrechts zuster voerscr. des manendaghes na sinte aechten dach int jaer lxxv. Daer bi waren alsoe manne mijns heren Vrederic van der Zevender, Goodscalc van Brakel, Gherit den Wilden en anderen t'Scoenhoven ghedaen.

f.68v.

Jan van Bloys enz. doen cond allen luden want hem Coene van Oesterwijn onse knape verbonden heeft ons te dyenen voir ymande en aenghenomen onse baniere te draghen tallen tiden uter steden als wijs hem vermanen sellen of doen vermanen bi onsen boden. Soe hebben wi hem daer om ende om andere dyenste die hi ons ghedaen heeft en noch doen sal ghegheven ende gheven tot sinen live vijf en twintich pond holl. tsiaers slechts ghelds alsulx payments alsoe in holl. ghemeinlic ten tiden van betalinghen ghinghe ende ghane wesen sal die wy hem bewijst hebben ende bewisen op onse renten van Scoenhoven en van der Goude jaerlix te ontfane deene helfte op sinte jans misse te midden zomer en dander helfte op kerssavond daer d'eerste termijn of wesen sal te sinte jans misse te middenzomer naest comende en die ander termijn te kerssavond daer naest volghende ende alsoe voirt van jare te jare alsoe langhe als Coen voirscr. leven sal. Ende ombieden onsen rentmeester van Scoenhoven en van der Goude die nu is of namaels wesen sal dat hi Coenen voerscr. of sinen ghewaerde bode die vijf en twintich pont holl. voerscr. jaelix vytreiken en betalen ten termine voirn. sonder anders enich ghebot daer af van ons hebbende wedernemende tot elken termine sinen openen brief van quitanchen voir ons mede te rekenen. Ende om dat wy willen dat dit vaste en stade blive in der manieren dat voirscr. is soe hebben wy hem desen openen brief ghegheven beseghelt mit onsen seghele tot enen orconde en in kennisse der waerheyt. Ghegheven tot Scoenhoven ellef daghe in maerte int jaer ons heren m ccc twee ende tsestich.

Presentibus dns Hughe de Barbenchon, Jan van Langherak, Jan van der Goude, ridders, Aelbrecht van Meerten, kanunnik, Gherit van Oesterwijn, Dirk van der Goude, Jan van Bueren.

f.69.

Jan v. Bloys geeft an Coene van Oesterwijn een jaarrente van Vijf en twintich pond holl. s'jaers slecht ghelst.

Gegeven te Scoenhoven 8 daghe in october int jaer M CCC LXij.

f.69v.

Jan v. Bloys doen cont allen lude want Gherijt van Oesterwijn onse knape bi onsen oerlove vercoft heeft Yen Lambrechtsoen ene hoeve lants ghelegen in de gerechte van Jaersvelt die nu heyt Blakenborch streckende mitte zuytende in de Lecke ende mitten noirt ende ant gherecht van Lopic / welc lant Gherijt voerz. van onse te lene hyelt Daer hi hem of betaelt kent ende voldaan ende ons die manscap bi zijne vryen wille tot Yen behoef voerz. opghedraghen heeft enz. enz.

Ghegheven des anderen daghes na st. Pauwelsdach int jaer LXIII.

f.70.

Jan v. Bloys heer van Scoenhoven ende van der Goude doen cont allen luden want ons Eggaerd van der Vlyst met sinen vrijen wille opghedraghen heeft drye marghen lands die ghelegghen sijn bi Scoenhoven op den Vorenvlyet die wi belegghen hebben met lande an die westzide Beyne Roes sine kinderen ende Jan van den Bosche an den oestzide streckende dat een ende an die Zevender ende met den anderen ende an die sceydinghe van Boenrepas daer hi ons enen vrijen eyghendom af ghegheven heeft Soe hebben wi den voerz. Eggherde ende Feysen sinen wijve die Gherijts Jonghe dochter was die bruker waren van de voerz. lande weder verleyt ende overghegheven tot huerre beyder live Ende daer toe omdat die voerz. drye morghen lands na huerre beyder live ons ende onsen nacomelinghe ane comen sulle erflijc ende ewelike te besitten. Soe hebben wi ghegheven ende gheven Eggaerde ende Feysen voerscr. tien pond hollands siaers tot huerre beyder live sulx payments alsoe in onse stede van Scoenhoven ghemeenlic loepen sal Ende soe welc van Eggaerde ende Feysen voerz. lanxte leeft die sal dese drye merghen lands ende t'gelt voerz. hebben sijn leven lanc welc ghelt wi bewijst hebben ende bewisen Eggherde ende sinen wijve voerz. op onse rentmeester van Scoenhoven die nu is of namaels wesen sal te heffen d'eene helfte op sinte Jans misse te middezomer naestcomende ende d'ander helft op middewinter daer naest volghende. Ghegheven op onse borch te Scoenhoven des dinxdaghes na sinte Martijnsdach viertien daghen in november int jaer M CCC zeven en vijftich.
(ondergeschreven) t'lant voerz. dat Eggaert was heeft Quarlet ghecoft tot ene vrije eyghen ende welbetaelt.

f.70.

Jan van Bloys heer van Scoenhoven en van der Goude maken cond en kenlic allen luden dat wi voer ons en voer onse nacomelinghen ghegheven hebben en gheven Eggaerde Venemanne en sinen nacomelinghen tot enen ewelike erfpachte zeventien marghen lands luttel min of te meer alst ghelegghen is in den hoefslach in onsen Cabbau bi Scoenhoven ende belegghen hebben met erve an die oestzide Florens van Montfoerde en Alphaer van den Nesse, an die westzide die joncfrouwe Bey... Symons dochter van der Zevendaer met hueren gherechte streckende dat noerdende an den dijc van den Cabbau voerscr. vytghaende tot Langheraker landsceydinghe. Ende daer voer sal Egghaerde voern. of sine nacomelinghe besittere van des voerscr. lands gheven en betalen jaerlix onsen rentmeester van Scoenhoven die nu is of namaels wesen sal tot onsen behoef zestien pond holl. al sulks payments alsoe in onse stede van Scoenhoven voerscr. ten daghe van betalinghe ghenghe en gane wesen sal. Te betalen deene helft van den voerscr. ghelde op sinte martijns misse in den winter ende dander helft op sinte pieters misse die men heyt ad cathedram daer naest volghende of binnen viertien daghe na elken termijn voerscr. ombegrepen en sel deerste dach van betalinghe wesen op sinte martijns misse in den winter naest comende en dander op sinte pieters misse daer naest volghende en alsoe voert van jare te jare ewelic en erflyc. Daer waert sake dat dit voerscr. ghelt ten voern. daghe niet betaelt en worde soe mochte onse rentmeester voerscr. uyt panden of doen panden van onsen wegghen an twee scatte pande en die verloren te bliven binnen sonneschijne ende heeft Egghaerd voern. al sijn goet en al sijnre erfname goet ghewonnen ende onghewonnen verbonden ende daer onder gheset dit voerscr. ghelt vry te betalen ten daghen die voerscreven sijn en alle commer cost ofte last die op t'voerscr. land comen mochte af te doene ende te dragghen sonder onsen scade en sonder t'voerscr. ghelt dat wi jaerlix daer af hebben sullen yet te verminren en want wi desen voerwaarden vast en stadelijc houden willen in allen manieren alsoe voerscr. sijn. Soe hebben wi daer op teenre oerconde en in kennisse der waerheyt ghegheven desen openen brief beseghelt met onsen zeghele en al te verstane sonder enegherande arghelist ghedaen tot Scoenhoven des dynsdaghes na sinte martijns dach viertien daghe in november int jaer ons heren duysent dryehondert zeven en vijftich.

Presentibus dns de Barbenchon, Jan Blonde Aelbrect van Meerten.

f.71v.

Jan van Bloys heer van Scoenhoven en van der Goude doen cont en kenlic allen luden dat wi ghegheven hebben en gheven Beernde Gryete zoene nu tertijt onsen scout in Noertich om dyenst die hi ons ghedaen heeft en noch sal, den wint van eenre windmolen die hi in onsen ambochte van Noertich sette en maken sal in deser manieren dat hi onsen man daer af worden is en sal deene helfte van der moelen voerscr. na Beernde doet voern. comen op Volquin Willems sijns broeder zoene was die daer of oec onse man wesen sal. Voert ist dat Beernd voerscr. sterft eer sijn wijf die Fye van den Hoeke heet, soe sal si huere lijftochte hebben van der voerscr. moelen. Ende na deser dryer doet voern. alsoe Beernde, Volqijns en Fyen soe sal dese voerscr. moelen an ons of an onse nacomelinghen aelighe en gheheel comen die te besitte alsoe een vry eyghen goet, Voert soe heef Beernd voern. ghewilkoert ende ghelooft wanneer dese voerscr. moelene volmaektsal wesen dat wise hebben moghen oft ons ghenoecht om hem anderswaer soe vele te gheven en te bewijsen alsoe goeden luden die wi en hi daertoe raden sullen redenlijc denken sal ende te verstane sonder arghelist. Ende want wi willen dat dit ghestade blive en welghehouden in der manieren voerscr. Soe hebben wi desen opene bryef daer op beseghelt met onsen seghele t'eenre oerconde in kennisse der waerheyt ghedaen en ghegheven op onsen borch te Scoenhoven zestien daghe in november int jaer ons heren m ccc zeven en vijftich.

Presentibus, dns de Barbenchon, Jan van Langherak, Jan van der Goude, Jan Blonde.

f.72v.

Hertoghe Willem van Beyeren grave van Henegouwen van holland van zeeland en heer van vriesland doen cond allen luden dat wi verliet hebben en verliet mit desen brief onsen lieven ende gheminden neve Lodewijc den grave van Bloys alsulc goet alsoe onse lieve oem heer Janne van Henegouwen heer van Byaumont sine neve Janne van Bloys ende van onsen ghemaect heeft binnen onsen lande van zeelant van hollant van kenmaerlant en van vrieslant ende onsen lieve oem van Byaumont voerscr. van ons en van onsen voerwerders te houden plach welc goet wt Lodewijc verliet hebben alsoe enen voghet tot Jans behoef voerscr. in alre manieren ende vorme als die brieve begrepen die daer of ghemaect sijn. In oerconde desen brief beseghelt mit onsen seghele. Ghegheven te Valenchijn op st.dyonisius dach.

f.72v.

Jan van Bloys heer van Scoenhoven en van der Goude doen cond allen luden dat voer ons quamen Florens van der Boechorst en Ghisebrecht sijn brueder heer Florens kinderen van der Boechorst. Ende droeghen ons op mit horen vryen wille den eyghendom van der wintmolen staende binnen onsen ambochte van scoerewijc die hoers vaders plach te wesen, welke molen wi Florens en Ghisebrecht voerscr. weder verliet hebben en verliet van ons en van onsen nacomelinghen hen en horen nacomelinghen te houden tot enen onversterflichen leene behoudelijc dat wi des wijnts in onsen voerscr. ambochte ghebruken moghen na allen onsen ghenoege ende oec die ghene die bi onsen ouders of bi ons enich recht aldaer ten wijnte hebben of namaels crighen sullen, al sonder arghelist. Hier waren over alsoe manne onse lieve en ghetrouwe swagher die heer van Yselstein, Dirc van der Goude onse knaep ende Baernt Grietsoen nu ter tijt onse scout tot scoertwijc. In oerconde desen brief beseghelt mit onsen zeghele ghedaen en ghegheven t'Yselstein des daghes na dertiendach int jaer ons heren m ccc lvii

f.73.

Jan v.Bloys enz. doen cond allen luden want Jan van den Kovel onse knaep gheheten forier

van enighen heeft met eenen coepe jeghen Pieter den Valkenaer t'lant dat gheheten is die Magherhoeve ligghende voor ellef marghen bi onse stede van Scoenhoven in die prochi van Wilghen daer hi niet langher dan sijn lijf aen en hadde alst scijnt bi anderen brieven die hi daer op van ons heeft. Soe hebben wij van gratien aenghesien menighen truwen dienst die Jan voern. onse ouders ghedaen heeft ende ons ende oec noch doen sal hem dit voizr. land ghegheven voor ons ende voer onse nacomelinghen van ons te houden te enen rechten leene te verstane al sonder arghelist. Hier over waren onse gheminde neve die heer van Barbenchon ende onse truwe manne alse Jan van der Goude, ridder, Jan van Bueren, Gherijt van Oesterwijn ende Dirc van der Goude. Ghedaen ende ghegheven op onse borch t'Scoenhoven op onsen vrouwendach purificatio int jaer ons heren m.ccc.lviii.

f.73v.

Dirc van der Goude.

Jan van Bloys heer van Scoenhoven en van der Goude doen cond en kenlic allen luden want wi Dircke van der Goude onsen knaep om menighe goeden dienste die hi ons ghedaen heeft en namaels doen sal an ghereden ghelde ghegheven hebben twee hondert lb. holl. te belegghen an erve daer hi onse man of wesen soude ende van ons te leene houden des hi op die tijd gheene goede gadinghe en vant. Soe heeft ons Dirc voirscr. van sinen vryen eyghenen goede enen viertel lants op ghedraghen dat wi van gracen int goede nemen welke viertel lants ghelegghen is bi der goude in onsen lande van Steyne ende belegghen hebbe mit erve Jacop Hughe Boeys kint an die oestside die van Reewijn mit hore wateringhe an die westside, streckende mit den enen eynde an tsgraven broeke ende mit den andere eynde in die Ysele ende want ons Dirc voirscr. van desen viertel lants voirscr. enen vryen eyghendom op ghedraghen heeft soe hebben wi voir ons en voir onsen nacomelinghen Dircke voirscr. voer hem en voir sinen nacomelinghen dit selve lant weder verleyt en verlyen ende isser onsen man of gheworden van ons te houden tot enen onversterflike erfleene. Ende men sal dat voirscr. lant verheerghewaden mit enen roeden sperwaer. Daer toe heeft ons Dirc voirscr. opghedraghen vier lb. holl. buersghelts jaerlixer renten ewilike duerende die hi heeft op die tweedeel van der boemgaert viertel die Hughe Gheerlofs soens is legghende in den ambochte van der Wilnesse daer Dirc ende Brandekijn Hughen kinder dat ene derdendeel of behouden hebben mit horen vader voern. onderdeelt mit ghemengheder vore ende belegghen heeft mit erve Gherit Gheerlofs soen an die oestside en Willem Alaertssoen en Margriete Florens mit ghemengheder vore an die westside alle jare te betalen die een helft op sinte martijns dach in den winter ende dander helfte op st pieters dach in sulle of xiiii daghe na elken termijn ombegrepen welke vier lb. tsiaers wi weder verleyt hebben ende verlien Dircke voirn. van ons te houden t'eenen onversterflichen erfleene als van den lande hier voer ghescreven is. Voert soe hebben wi Dircke voern. van gracen ghewilkoert dat dese vier lb. tsiaers voirscr. na Dierxs live comen sullen op sinen oudsten soen sonder een die na hem bliven sal van ghetruweden bedde de welke dese voirscr. vier lb. tsiaers van ons houden sal teenen onversterflichen erfleene in der selver manieren dat se Dirc voirscr. nu ter tijd van ons houdende is, alle punten te verstaen sonder arghelist. Hier over waren onse gheminde neve die heer van Barbenchon ende onse trouwe manne alse Jan van der Goude, ridder, Jan van Zaveren en Gherit van Oesterwijn, knapen, ende anderen. Ende want dese dinghen waer sijn in alre manieren dat hier voerscr. staet soe hebben wi daer op tot eenre orconde desen openen brief ghegheven bezeghelt mit onsen seghele ghedaen en ghegheven op onsen borch t'Scoenhoven op onser vrouwen dach purificatio int jaer ons heren m ccc acht en vijftich.

f.74v.

Cond sy allen luden dat ic Dirc van der Goude knape mynen lieven en gheduchten joncheren Janne van Bloys heer van Scoenhoven en van der goude opghedraghen ende eenen vrien

eyghendom ghegheven hebbe vanre viertel lants gheleghen bi der Goude in den lande van Steyne ende beleghen hebben mit erve Jacop Hughe Boeys kint aen die oestzide die van Reewijc mit hore wateringhe aen die westzide streckende mit den eenen eynde an tsgraven broeke ende mit den anderen eynde in die Ysele. Daer toe hebbic op ghedraghen minen lieven joncheren voern. 4 lb. holl. buersghelts jaerlixen renten ewelike durende die ic hebbe op die tweedeel van der boemgaert viertel die Hughe Gheerlofs soens is legghende in den ambochte van der wylnessen daer Dyrck en Brandekijn Hughen kinder dat eene derdedeel of behouden hebben mit horen vader voern. onderdeelt mit ghemenghede vore ende beleghen hebben mit erve Gherijt Gheerlofssoen an die oestzide ende Willem Alaerds soen ende Margriete Florens mit ghemengheder vore aen die westzide. Alle jare te betalen die eene helfte op st martijns dach in den wynter ende dander helft op st pietersdach in zulle of 14 daghe na elken termijn onbegrepen, welke viertel lants ende vier pont t'siaers voerscr. mijn lieve joncheren nu weder verlyet heeft van hem te houden in alre manieren dat die brieve begrepen die ic van minen lieven jonchere voern. daer of hebbe. In oerconde hier of soe hebbic desen openen brief ghegheven beseghelt mit minen zeghele in kennissen der waerheit ghedaen en ghegheven t'Scoenhoven op onser vrouwen dach purificacio int jaer ons heren m ccc lviii.

Jan van Langherak.
f.75.

Jan v.Bloys heer van Scoenhoven enz. doen cond ende kenlic allen luden dat wi voer ons ende voir onse nacomelinghen ghegheven hebben ende gheven heer Janne van Langherak onsen gheminden ridder om goede dienste die hi ons ghedaen heeft ende hier namaels doen zal vijftich lb. holl.payments als in holl. ghemeenlic in buersen gaet jaerlix alsoe langhe als hi leven sal t'ontfaen die een helft op st Pieters misse in zulle naest comende ende d'ander helft op st Martijns misse in den winter daer naest volghende of binnen viertien daghen na elken termijn onbegrepen ende alzo voert van jare te jare welke 50 lb. wi heer Janne voerscr. ghegheven hebben te houden alzo langhe als hi leeft van ons te leene ende hi is onse man daer of gheworden die wi hem bewijst hebben en bewisen op onse renten van Scoenhoven en van der Goude. Ende ombieden onsen rentemeyster die daer nu is en namaels wesen sal dat hi heer Janne voern. of sinen ghewarden bode dit voirscr. ghelt vytreyken en betale jaerlix op die termine ende in sulker manieren als hier voer ghescreven staet sonder daer of eenichs anders gheboets van ons te wachten mer onse rentmeyster diet is of wesen sal sel altoes t'elken termine sinen brief van quitanchen wedernemen voer ons mede te rekenen. Hier over waren onse gheminde neve die heer van Barbenchon ende onse trouwe manne alse Gherit van Oesterwijc, Jan van Bueren, Dirc van der Goude en anderen. Ende want wi willen dat dit vaste ende ghestade bliven en wael ghehouden werde in alre manieren dat voirscr. staet soe hebben wi daer op desen open brief ghegheven beseghelt mit onsen zeghele teenre orconde ende in kennisse der waerheit. Ghedaen en ghegheven op onse borch t'Scoenhoven des vridaghes na st aechten dach int jaer ons heren m ccc acht en vijftich.
Presentibus scribus notatis Ghisebrecht Stomm kanunnic.

f.75v.

Jan v.Bloys doen cond alle luden dat wi om bedde wille ons ghetruwen ridder ende mijns heren Jans van Langherak ende van gracen ghegheven hebben ende gheven dat die 100 lb.zwarten die her Jan voirz. van ons hout in leene tot sine live na hem comen sellen op Ghisebrecht van Langherak sinen soen dien hi hadde bi s'heren zuster van Hueclem die sine ghesellinne was. Welke hondert lb. Ghisebrecht voirz. na sijns vaders live van ons houde sel in leene tot sine live in alsulcker manieren ende te sulken terminen te ontfaen alst nu sijn vader Jan voirz. hout ende alse onse brieve begripen daer dese doir ghesteken is ende al sonder seghel In oirconde enz. ghegheven t'Scoenhoven op st Nyclaes avond int jaer m ccc lxii.

Presentibus dns de Harler, Hughe de Barbenchon, ridders, Aelbrecht van Meerten kanunnic, Gherit van Oesterwijn, Jan van Bueren, Dirc van der Goude.

f.76.

Jan van Bloys heer van Scoenhoven ende van der Goude maken cont allen luden dat wi ghegheven hebben ende gheven den goeden luden van Alfen van den lande dat gheleghen is op die oestzide van der Goude tusschen den Rijndijc ende zootwaert op ghaende ander abdissen lande van Reynsborch dat beleggen heeft an die oestzide die heer van Broders de met zinen ambochte zwadenburghedamme ende Harbaren van Foreest mit sinen lande dat spoelwijn gheheyten is enen ghemenen waterghanc ende enen vryen durende wt eweliken daghen die inghaen zal in onsen lande in bloemendael in Pieter Russende soons weer ende in zijnre kinder dat beleggen heeft ande zootside des goitshuys weer ende ande noertzide Wolf Jan Aertsoen vijftalf roeden breed andie oude goude ende voert die oude goude zootwaert door te ghaen an Willems Witten gheer ende Willems Witten gheer al doer ghaende vijftalf roeden breed waterghanc ende opstal bloemendael zootwaert door te ghaen an Willems Witten gheer al door ghaende vijftalf roeden breed andie oude goude ende voert die oude goude doer te gaen an tlant van steyne vijftalf roeden breed ende uter oude goude over te ghaen inden lande van steyne inde viertel die Dirc Willemssoons was ende Jutten die Broekers wijf was van den nuwen broox weghe die ghaende ter halver yssel toe. Ende die voirseyde viertel sullen zi al gheheel hebben tot haren waterghanghe ende opstal also lanc ende also breed als zi is, welke viertel beleggen heeft Clais Wouterssoen ende Jutte die Broekers wijf was ende Haeskin Elyaes dochter met ghemengheder voer an die westzide. Ende an die westzide die goede lude van Middelburch, van boscoop, van Randenborch ende van Zuytwijn met horen ka ende opstal. Ende desen waterghanc voerscr. zullen de goede lude van Alfen diene becosten al omme dicht houden nyement daerin noch doer te wateren te zi bi ons ende biden voerghenoemden bueren van Alfen die den voerseyden waterghanc becosten. Voert zal die ghewaerde rechteren van Alfen desen voerscr. waterghanc scouwen wtghanc ende inghanc metten heemraders van Alfen voerscr. wtgheset onse dijcrecht wech ende wende onse scouwe daer op te voeren also recht is voert so moghen die goede lude van Alfen voerscr. den ysel dijc op ende toe doen hoer sluze daer wt ende in doen ende dat dammen ende dien dam op ende toe doen bi onsen heemraet ende dijgrave in onsen lande van Steyne also dicke als die sluze noet heeft ende mit ende orberlic is den goede luden van Alfen voerscr. Voert waer dat zake dat ons ende onsen lande van desen voerghenoemde waterghanghe enigherande scade quame dat kenlic ware dien te becoren bi onsen heemraet ende rechteren van onsen lande. Ende waer dat zi des niet en deden so soude onse rechteren metten ghesworen van onsen lande den voerghenoemden waterghanc toe slaen ende alst ons ende onsen luden ghebetert ware weder op slaen ende te ghane als voerscr. is onverzeyt van yemende ende in desen voerscr. waterghanc en zal nyement visschen ende wie daer in visschedeende ment him over betughen mochte met twee wittachtighen knapen of meer die verboerde jeghen ons drie pont ende zijn visch ghetouwe. Ende waer in alle of in eneghe van desen punten yet te verbeteren dat soude staen tot onser verclaringhe ende al sonder argelist ende omme dat wi willen dat dit vast ende ghestade blive ende wael ghehouden van ons en van onsen nacomelighen den goeden lude van Alfen voerscr. ende haren nacomelighen in alre manieren dat voerscr. is so hebben wi hen daer op desen openen brief ghegheven bezeghelt met onsen zeghele tot eenre orkonde ende in kennisse der waerheyt ghegheven ende ghedaen tot Scoenhoven op onser vrouwe avond in oeste die men heyt assumpcio int jaer ons heren m ccc ende tsestich.

Presentibus dns Jan van langherak, ridder, Gherit van Oesterwijn, Jan van Bueren. Dirc van der Goude.

f.77.

Wi clarisse van scenghen bi der ghenade goods abdisse van Reynsborch, Dieric heer van Brederode, Harbaren van Foreest en Willem Mabelie joncfrou uten Waerder maken en doen cond allen luden dat wi ghegheven hebben ende gheven desen openen brief den goeden luden van Alfen die wonachtich sijn of gheervet tusschen die oestside van der Goude en den ambochte van wadenburchdamme van den rijdijc daeren tusschen utenghaende an den biesen ende an spoelwijn enen wissel van onser wateringhe van pater rissen soens weer ende sijnre kinderen totten lande van steyne toe luttel min of meer ombegrepen behoudelic mids ons rechts ende mids onser lantvesten die wi hebben van onsen lieven heer van Byaumont dien god ghenadich si alsoe verre alst onse lieve jonchere Jan van Bloys heer van Scoenhoven en van der Goude hem dat consenteert ende oirlof gheeft. In orconde desen brief beseghelt mit onsen zeghele. Ghegheven des vridaghes na onser vrouwen dach assumpcio int jaer ons heren m ccc en tsestich.

f.77v.

d'Abdisse van Reynsborch en die van Alfen.

Jan van Bloys doen cond allen luden dat wi alsulcke wissel als die abdisse van Reynsborch die heer van Brederode, Harbaren van Foreest ende Willem Mibelie joncfrou uten warde ghedaen hebben van enen wateringhe gaende van Peter Russende soen weer ende sijnre kinderen totten lan de van Steyne toe luttel min of meer jeghen den goede luden van Alfen die woenachtich sijn of gheervet tusschen die oestside van der Goude ende den ambochte van wadenburchdamme om enen anderen waterganc van den Rijndijc daer en tusschen ute ghaende an den biesen ende an spoelwijn ghewilkoert hebben wilkoeren en gheven voir ons en voir onsen nacomelinghen hem en horen nacomelinghen behouden ene yghelike sijns rechts en brieven die si daer of van onsen lieven heer en oudevader mijnen heer Janne van Henegouwen heer van Byaumont des god ghedenke en van ons hebben sonder arghelist. In orconde hier of hebben wi desen openen brief ghegheven beseghelt mit onsen seghele en in kennisse der waerheyt. Ghedaen en ghegheven t'Scoenhoven op sinte jans dach decollacio int jaer ons heren m ccc en tsestich.

f.77v.

Moordrecht.

Jan van Bloys hertoghe doen kenlic alle luden dat wi verliet hebben en verliet Symon van der Scuur Ysebrant soon alsulc goet als Ysebrant sijn vader van ons hielt en Symon voirscr. nu van ons houdende is na brieve die daer of zijn behoudelic enen ygheliken sijns rechts en sonder enighe arghelist hier over waren onse ghetrouwe manne her Zweeder heer van Montfoert, Barthelmeeus uter Wijc, Jan Breye, Foykin Willemssoen en anderen. In oerconde desen brieve ghegheven in de Haghe des vridaghe na lucie int jaer ons heren m ccc twee en tseventich

f.78.

Moordrecht.

Jan van Bloys hertoghe doen cond alle luden dat wi van gracen verleyt hebben en verliet Vranken Dirc Fays soen van der Scuur alsulc goet als die voirscr. Ysebrant van ons te leene hilt ende hi ghemaect hadde Katerinen sinen wive ter lijftocht te comen op Dirc sinen soen voern. als die brieve begrepen die hi daer of van ons heeft dese voirscr. verlijnghe hebben wi Vranke voern. ghedaen inder voirscr. manieren behoudelic enen ygheliken sijns rechts en sonder enighen arghelist. Daer bi en over waren onse ghetrouwe manne die heer van Montfoert, heer Floris van Adrichem, Fouke, Jan Breye, Barthelmeeus uter Wijc en anderen. In oerconde ghegheven in den Haghe des woensdaghes na lucie int jaer ons heren m ccc twee

en tseventich.

f.78v.

Mechtelt van der Zevender heer Symons dochter van der Sevender doe cond allen luden dat ic mit Zweders hant van Zuylen mijns mans Ende gherechts monbaers verleyt hebben ende verlije Vrederike van der Sevender minen oem die hem van sijns vader doet ghebraken ende in rechter ernfisse ane quamen xxxii lb. swarte siaers ute tien saten in Bloemendael die ic houde van minen lieven Joncher Janne van Bloys heer van Scoenhoven ende van der Goude ende die heerlicheyt van der opdracht van den selven saten voer xvii sc. ende 4d. swarte siaers Ende ene halve hoeve lants gheleghen in den Rogghebroec die Claes Zuetmont bruyckt voer xvii lb. 2 sc. ende 8d. swarte siaers die ic houde van minen lieven heer die grave van Hollant. Dit coemt te samen 50 lb. swarte siaers die welke ic hem ende sinen nacomelinghen verleent hebbe ende verlene van mijn ende minen nacomelinghen te houdene tot enen onversterflicken lene.

Hier over waren minen mannen alse Claes Bent, Gheerlof Lillensoen, Dirc Jacobssoen in Lopic Ende Ghisebrecht die Hase ende anders vele goeder lude. In oerconde desen brieve beseghelt mit mine seghele ende Zweders mijns mans seghele ende want ic Sweder van Sulen voerscr. dese dinghe gheconsenteert hebbe ende mit mijnre hant ende wille ghemaect sijn soe hebben ic desen brief voer beseghelt mit minen seghele Ghegheven int jaer ons heren m ccclix op st. Valentijns avont.

f.78v.

Jan van Bloys heer van Scoenhoven ende van der Goude doen cond allen luden dat wi alsulke bewisinghen alse Joncfrou Machtelt van der Sevendaer, dochter heer Symons van der Zevendaer was ghedaen heeft Vredericke van der Zevendaer horen oem die hem ghebrac van sijre rechter vaderliker ernfisse daer die somme of loept xxxii lb. xvii sc. iiii d. swart jaerlixer renten die men van ons te leen hout gheleghen in Bloemendael confirmeren ende lenen alsoe verre alse ons aengaet in alsulcke manieren als die brieve sprekende die Vrederic voirsr. daer of heeft van joncfrau Machtelden voern. onder horen ende Sweders van Zulen hoers mans seghelen ende al sonder arghelist.

In orconde desen brief besegelt mit onse seghele ghegheven t'Scoenhoven des saterdaghes na st. Valentijns dach xvi daghen in februari int jaer ons heren m ccc lviii.

Jussu Joh. de Zale pro consilium dmn. de Barbenchon.

Presentibus Gherijt van Oesterwijn, Johanne v. Bueren ... de Goude, Aelbr. v. Meerten. Ghisebrecht Stomme.

f.79v.

Jan van Bloys doen cond enz. dat wi verleyt hebbe ende verlyen Ghisebrecht van IJselsteyn die soen was van heer Otten van IJselsteyn van ons ende van onse nacomelinghen te houden te leene ten zuytveenschen rechte die t'walef morghen ende viere ende ene halve morghen lands die legghen in Benscoep ende her Otten sijn vader voern. te houden plach van onsen lieven heer ende oude vader Janne v. Henegouwen enz.

Hier waren over onse ghetruwe mannen alse her Arnoud van IJselsteyn, her Aernt van Randerode, ridderen, Coene v. Oesterwijn, Gyelis v. Windelsnesse, knapen ende anderen.

Ghegheven des woensdaghes na Palmen sonnendaghes de 1e aprille m ccc neghen en vijftich.

f.79v.

Wi Jan v. Henegouwen enz. maken cond alle luden waer dit sake dat Hildegont Brandsdochter van den Vore storve sonder gheboorte bi heer Ghisebrecht heer van IJselsteyn soe soude die XII merghen lands ende die 3½ merghen lands die gheleghen sijn in Benscoep die wi

Hildegonden voirm. verleyt hebben tot hoirre lijftochte comen op heer Otten van IJselsteyn na Hildegonds doet voerz. Ende dit voerz. lant sal heer Otte voirm. ende sine nacomelinghen van ons ende van onsen nacomelinghen houden te leene ten Zwtfensche rechte. Ghegheven t'Scoenhoven des manendaghes na onsen vrouwendach te half oeste int jaer M CCC zeven en dertich.

f.80.

Jan van Henegouwen heer van Byaumont maken cond allen luden dat wi ghegheven hebben ende gheven mit desen jeghenwoerdighen brieve onsen trouwen knape Janne den Blonden om trouwe dienste die hi ons en onsen kinderen van Bloys ghedaen heeft twee gorse die gheleghen sijn in onsen lande van der Tolne in zeelant ende gheheyten dat eene die waerd dien Goodscalc onse knaep te houdene plach en nu helt sine weduwe tot horen live ende t'andere te watervliet van welken gorsen Jan voirnoemt den pacht opheffen sal jaerlix sijn leven lanc of dat die ghene ghestorven sijn die hoer lijf daer an hebben ende daer tenden mach Jan voirscr. of hijt gheleeft mit den voirscr. gorsen sinen wille doen dier te ghebruken tot sijnre orbaer alsoe langhe als hi leven sal ende ombieden onsen rentemeyster die daer nu is en namaels wesen sal dat hi Janne voirscr. den pachts van den gorsen of der gorse voirm. ghebruken late in der manieren dat voirscr. is Ende daer af soe is Jan voirscr. onse man worden ende heeft ghelovet mede man te wordene of hi ons verleeft Jans van Bloys ons zoens of des gheens die na ons heer van der Tolne wesen sal alle pointen te verstaen sonder argelist. Hier over waren onse lieve en ghetrouwe die heer van Barbenchon en heer Aernt van Randerode onse neve en man. In orconde der waerheyt van desen dinghen die wi vaste en ghestade houden willen soe hebben wi desen brief daer op bezeghelt mit onsen zeghele ghedaen en ghegheven tot byaumont des dinxdaghes na sinte peters daghe ingaende oest int jaer ons heren m ccc vijf en vijftich.

Jussu dns de Sensellis, aelbrecht van Meerten.

f.80v.

Jan van Bloys heer van Scoenhoven en van der goude doen cond allen luden dat wi ghegheven hebben en gheven voor ons en voer onse nacomelinghen Janne den Blonden onsen trouwen man en knape om menighe trouwen dienst die hi onsen ouders ende ons ghedaen heeft en ons alst god wil noch doen sal veertich goede goude scilden van t'sgraven slaghe van vlaenderen of payment alsoe goet daer voer te heffen ende te nemen jaerlix alsoe langhe alsoe hi leven sal op st martijns dach in den winter naest comende ende alsoe voert van jare te jare op onsen renten ter Tolne in zeelant ter stonde toe dat wijt hem bewijst hebben in te nemen bi sijns selves hant op sekere stuccke daer wijt hem bewisen sullen. Ende ombieden onsen rentmeyster ter Tolne die nu is of namaels wesen sal dat hi Janne voern. die voerscr. scilde vytreyke jaerlix op den dach voerscr. alsoe langhe alsoe hi leven sal sonder ander ghelde daer of van ons te hebben. Ende want wi willen dat dit vaste en ghestade blive en wel ghehouden soe hebben wi daer op desen brief ghegheven beseghelt mit onsen seghele ende omme die meerre sekerhede soe hebben wi ghebeden onsen lieven heer en broeder onsen gheboernen voghet den grave van Bloys, van Soisson en heer van Avesnes dat hi desen brief mit ons beseghelen wilde. Ende wi Lodewich van Chastellon grave van Bloys voern. om bede wille en nutscap ons liefs gheminde brueder Jans van Bloys voerscr. hebben desen brief mede beseghelt mit onsen seghele in kennisse der waerheyt ghedaen en ghegheven tot Vyleneuve bi Soisson den sesten dach in ouste int jaer ons heren m ccc lvii.

f.81.

Jan van Bloys enz. doen cont allen luden dat wi ghegheven hebben ende gheven Wilhelmus uten Campe onsen clerc om dienste dien hi ons ghedaen heeft ende noch doen zal tot enen

vryen eyghen ene hofstede op onse erve ghelegghen binnen onser stede van der Goude dat ghehoyten is t'hof. Welke hofstede wesen zal vier roeden breet of ghemeten van Ouwels Tolnaers husinghe en erve ter plaetsen waert an streckende langhes van den strate tot op die vaert daer wi of hebbe zulle alle jare tot elke st martijns misse inden winter enen cappoen. Ende daer om zal Wilhelmus die voirsch. hofstede vrylic ghebruken ende doen ghebruken sonder wedersegghen van ons of van yemende anders allen arghelist wyghesceyde. Ende want wi willen dat dit wael ghehouden blive tot ewelike daghen en inder manieren voersch. so hebben wi hem daer op desen openen brief ghegheven beseghelt mit onsen zeghel ghedaen t'Scoenhoven des saterdaghes na theylichs sacraments dach anno lxxv. Presentibus dns de Herlaer, dns Jan van langherak, ridders, Aelbrecht van Meerten, kanunnik, Jan van Bueren.

f.81v.

Jan v.Bloys heer van Scoenhoven ende van der Goude doen cond allen luden dat wij ghegheven hebben ende gheven Peter Peterssoen van Harderwycj clerc die scole in onser stede van Scoenhoven te regelen ende te verwaren van sulken diensten ende laste als daer toe behoert daer hi sulc loen ende bate of hebben sal als daer toe staet ende men van ouds ghepleghen heeft durende tot onsen wedersegghen. In oerconde des briefs beseghelt met onsen zeghele ghedaen ende ghegheven op onse borch t'Scoenhoven des vridaghes na st.Aghatendach viij daghe in februari int jaer ons heren m ccc lvij.

f.82.

Jan van Bloys heer van Scoenhoven en van der Goude doen cond allen luden dat voer ons quam Goyer Soyerssoen die oude ende droech ons op bi sinen vryen wille sijn huys en hofstat die hi nu ter tijt heeft binnen der veste van der borch in onsen lande van Tessel ende daer toe al sijn erve dat hi heeft in zuythasselt en in noerthasselt op dese tijt in onse lande van Tessel voersch. daer die (lande) of sijn Aelbrecht die witbacker ende older an ander side welc huus en erve voersch. tot Soyer voern. weder verlyet hebben en verlien also onsen man van ons en van onsen nacomelinghen hem en sinen nacomelinghen te houden tot enen onversterflichen erfleen in sulken manieren dat die voersch. huus en erve na Soyers doet voern. comen sal op Artor sinen joncsten zoen die hi nu heeft ende men salt verheergewaden mit enen witten hantscoen te verstane al sonder arghelist. Hier waren over also mannen onse lieve en ghetrouwe zwagher die heer van Yselsteyn en Dirc van der Goude onse knaep. In orconde desen brief beseghelt mit onsen seghele ghedaen en ghegheven tot Yselsteyn des sondaghes na st pouwels dach convercio int jaer ons heren m ccc lvii.

f.82.

Jan van Bloys heer van Scoenhoven en van der Goude doen cont allen luden dat wi om bede wille en versoec Soyers Soyerszoen des ende quyt ghescoude hebben ende quyt scelden die manscap die wi hadden an enen huse staende in den middelsten coghe in onse lande van Tessel ende an tsestich mandeel lands daer omtrent liggheende daer Soyer voersch. onse man of was ende gheven hem goeden oerlof dat voirsch. huus ende lant te vercopen of daer mede te doen also mit sinen vryen eyghenen goede. In orconde desen brieve beseghelt mit onsen seghele ghegheven tot Yselsteyn des sondaghes na st pouwels dach conversio int jaer ons heren duysent dryehondert zeven en vijftich.

f.82v.

Jan van Bloys heer van Scoenhoven en van der Goude doen cont allen luden dat wi om bede wille en versoec Soyers Soyerszoen des ouden ons mans verleyet hebben ende verlyen Diedewi die nu sijn wijf is tot hoere rechter lijtochte die minre helft van den huse en erve dat

Soyer voerscr. van ons in leene hout al sonder arghelist. In orconde dese brieve beseghelt mit onsen seghele ghegheven tot Yselsteyn des sondaghes na st pouwels dach conversio int jaer ons heren duysent zeven en vijftich.

f.82v.

Jan van Bloys enz. maken cond allen luden want Gherbrant die Gruber van ons te houden plach mit enen erflene drye maden lands gheleghen in Carwoude biden por... met Clayse sinen broeder ghemene welc lant ... hem weder vry en ... ghegheven hebben sine wille te doen als met sinen eyghene goede voer welke 3 made lands hi ons weder opghedraghen heeft en enen vryen eyghendom ghegheven van vier lands gheleghen op catwoude gheheyten die lancweiden daer an die zuutzide naestleggend is mit lande Melis Maerensoen en an die noertzide Clays Gherberts sone mitter lande welc vierdene lands ons Gherbrant voerscr. gheloeft heeft vry en goet te waren mit sinen opene brieve soe hebben wi den voerscr. Gherbrant die vier demen lands voerscr. weder verlyet hem en sinen nacomelinghe te houden van ons en van onsen nacomelinghen tot enen onversterflike erfleen. Hier waren onse ghetrouwe manne alsoe heer Jan van Herlaer, heer van der Ameyde, heer Jan van Langherak, ridders en Jan van Bueren knape. In oerconde desen brieve beseghelt mit onsen seghele ghegheven t'Scoenhoven op onser vrouwe dach concepcio int jaer ons heren m ccc lxiiii.

f.83.

Die luyden tusschen den crommensloet ende gouder sluse hasoerswoude boscoep wadinxveen waterganc.

Hertoghe Willem van Beyeren grave van Henegouwen van Hollant en van Vrieslant maken cond allen luden dat wi ghegheven hebben en gheven voer ons en voer onse nacomelinghen onsen goeden luden van Alphen tusschen der goudsluse en den crommen sloet onsen goeden luden van Hazertswoude tusschen den crommensloet ende der groter sluse die gheleghen is op den bansloet daer kocken kinder lant nu ter tijt op leyt, onsen goede luden can Boscoep op die westzide van der Goude ende onsen goede luden van Waddinxveene die gheleghen sijn tusschen Boscoep en Waddinxveenre ka die gheleghen is in Clays Dorrekijns weer enen ghemenen ende enen vryen waterganc durende tot ewelike daghe te beghinne an den Rijndijc ende ene ka te legghen ende te houden op Betten kinder lant op die oestzide van den sloet die men heyt die bansloet ende voerscr. is doergaende ende die goudwal op die westzide dicht te houden tot Clays Dorrekijns ka toe ende wt te gaen in der Ysele onverseyt van yemande den Yseldijc op ende toe te doen, hore sluse daer wt en in te doen ende dat te dammen ende dien dam op en toe te doen alsoe dicke als die sluse noet hevet ende dat mit ende oerbaerlic is onsen goeden lude voerscr. ende desen voerscr. dam sullen scouwen die heemraden van desen voerscr. waterganghe ende dat te versien an desen voerscr. hiemraden dat tghemene lant gheenen scade en crighen mit der ghemeenre morghen van desen voerscr. waterganghe ende den Rijndijc tot enen waterkeer ende met deser voerseyder sluse soe sullen onse goede lude voerscr. horen vrien wille doen tot ons ghemeyns lands orbaer dat nu ter tijt becost dese sluse ende waterganc voerscr. ende hore nacomelinghe sonder yemants wedersegghen ende nimmermeer anderlude doer desen voerscr. waterganc wt te wateren ten si bi ghemeen consente onser goede lude voerscr. ende alle ander wateringhe die nu ter tijt comende sijn of hier namaels comen moghen an desen waterganc voerscr. sellen diken en ymmer alsoe laghe wesen dat onser goede lude waterganc voerscr. hoor diepe behout tot oerbaer onser goeder lude voerscr. Ende tot desen voerscr. waterganc hebben wi onsen goede luden voerscr. ghegheven en gheven also vele lants als si behoeven totter Ysel toe op horen cost hoer wateringhe en waterkeringhe op te maken ende te houden ende te ghelden tot ons edelen heemradensegghen ende desen voerscr. waterganc waterkeringhe ende ka die daer toe

behoeren waer dat si gheleghen sijn soe sellen scouwen die scoute van Alphen die nu is of namaels wsen sal mit tweek heemraders van Alphen mit tweek heemraders van Hasaertswoude mit 2 heemraders van Waddinxvene ende mit enen heemraet van Boscoep ende dese voerscr. heemraders soe sellen kiesent int ambocht van Alphen die scoute van dien ambocht bi den bueren die in den ambocht ende in den voerscr. waterganc woenen In Hasaertswoude die scoute van dien ambacht mitten bueren die in den waterganc woenen In Boscoep die scoute van dien ambocht bi den bueren die in den waterganc woenen ende in Waddinxvene soe sellen kiesent onse scoute van Polyen bi den ghemeynen bueren van Waddinxvene die in de waterganc woenen alsoe voerscr. is ende wes dese voerscr. heemraders die desen waterganc voerscr. waterkeeringhe ende ka die daer toe behoeren scouwen koren bi horen eede toot ons lands orbaer voerscr. daer nyemands weder te segghen ende dese scouten en heemraders voerscr. sullen scouwen alsoe dicke alst nut ende oebaerlic is tot ons lands behoef voerscr. Ende desen voerscr. waterganc soe sal ghelden elken morghen morghens ghelijc sonder yemants wedersegghen en al onrecht water buten hore wateringhe te keren ende te houden waer dat hem deren mach ende die van Hazaertswoude sullen houden eene ka ende ene wateringhe van den vene an den Rijndijc op den ban die voerscr. is op die westzide ende voert sullen die van Hazaertswoude voerscr. den Rijndijc dicht houden van den lanssloet ten crommen sloet toe ende die van Alphen den Rijndijc dicht houden van den crommen sloet ter goudsluse toe. Voert sullen die van Alphen voerscr. ene ka en ene waterkeringhe houden van der goudsluse tot Boscoep toe ende die van Boscoep sullen van Alphenre ban eene ka en ene waterkeeringhe houden tot waddinxvene toe ende die van Waddinxvene sellen van Boscoep ban een ka ende ene waterkeringhe houden op die goude tot aen Claes Dorrekijns ka toe. Gheviel oec dat onser goeder lude voerscr. wateringhe of waterkeer van horen watergange te cleyne worden die soudent si meerre mit der naesten aerden ende mitter scade ende die aerde sullen onsen goede lude voerscr. dan ghelden tot hore heemraderen segghen. Gheviel mede dat onder desen scoute ende heemraders voerscr. enigherhande twi quame waer bi dat si enighe scouwe afterlaten wouden of afterlieten daer ons voerscr. lants orbaer aen laghe dat soude men brenghen an onsen edelen heemraders ende daer bi dien twi eynden ende ymmer te scouwen waert mede dat yemans vischede in onser goeder lude sluse voerscr. alsoe dicke ende alsoe menichwarven als hi daer in vischede ende daer men ofbetughen mochte na 2 wittachtighen luden of meer alsoe dicke verbuerde hi ieghens ons 10 lb. ende den scoute en heemraders voerscr. 4 lb. Ende van desen 4 ponde voerscr. soe sel die scoute hebben 10 sc. en elc heemraet alsoe vele Ende want onse meninghe altoes is mit onser heerlicheyt te helpe te comen onsen goeden lude in alle saken waer dat sijs noet hebben tot ons lants oerbaer. Ende aenghesoen hebben groet ghebrec en noetsaken die onsen goeden luden voerscr. aenlaghen alsoe van vreemden wateren daer si bi bederft waren ghebleven waer wi hem te hulpe niet ghecomen hier om soe hebben wi onsen consent hier toe ghedaen ende onsen goeden luden voerscr. dese punten ghegheven in allen manieren alser voerscr. staet sonder enigherhande argelist behoudens onsen edelen heemraders van Rijnlant en van Scielant alle haers rechts in orconde desen brief bezeghelt mit onsen seghele ghegheven in Middelburch des manendaghes na palmen sonnendach int jaer ons heren mccc lvi.

f.84.

Jan van Blois heer van Scoenhoven en van der goude maken kond en kenlic allen luden want onse lieve heer en neve hertogh Willem van Beyeren grave van Henegouwen van Hollant van Zeelant en heer van Vrieslant mit sijn openen brieven voer hem en voer sine nacomelinghe ghegheven heeft sinen goedeluden van Alphen tusschen der goudsluse en den crommen sloet sinen goeden luden van Hasaertswoude tusschen den crommensloet en der groter sluse die gheleghen is op den bansloet daer Betten kinder lant nu ter tijt op leyt sinen goede luden van Boscoep op die westside van der Goude ende sinen goeden luden van Waddinxvene die

gheleghen sijn tusschen Boscoep en Waddinxvene ka die gheleghen is in Claes Dorrekijns weer eenen ghemeenen en enen vrien waterganc durende tot ewelike daghen te beghinnen an den dijc ende ute te gaen in der Ysel welken waterganc wi hadden doen toeslaen en damme om dat hi buten onsen consent ende oerlof ghesciert is ende gaet in eenen deele doer onse lant ende heerscip van der Goude des ons die goede ludevoern. Alsoe vriendelike vervolghet hebben ende daer of alsoe mit ons ghedaen dats ons ghenoeghet ende den voerscr. waterganc ghewilkoert hebben en wilkoren voer ons en voer onse nacomelinghen alsoe verre alst ons ane gaet tot eweliken daghen an allen in allen manieren dat die brieve spreken ende begripen, die onse lieve heer en neve die grave voern. daer of ghegheven heeft ende alte verstaen sonder enigherhande arghelist. In kennisse der waerheyte soe hebben wi desen brief daer of ghegheven en beseghelt mit onsen seghele ghedaen en ghegheven op onse borch t'Scoenhoven des vridaghes na st lucas dach int jaer ons heren m ccc acht ende vijftich.

Presentibus, dns de Yselsteyn, Jan van Langherak, Gherit van Oesterwyc, Jan van Bueren.

Ghisebrecht Stomme, Aelbrecht van Meerten.

f.85.

Jan v.Bloys heer van Scoenhoven en van der Goude doen cond en kenlic allen luden dat wi onthouden hebben heer Gherit Fouken . . . der tijt deken van oudenmunster t'Utrecht van onsen rade te wesen en van onsen cleederen te hebben wanneer wi ghemeenlike cleeden sullen ende alsoe dicke alse wi hem bi ons ombieden sullen of dat hi erghent om onse saken buten sijns selfes herberghe wesen sal sullen wi hem van sinen coste quiten varende voerende ende ute blivende alse hem toebehoert ende redenlic wesen sal daer toe om die goede ionste die wi tot den deken voerscr. draghen en oec omme goede en ghetrouwe dienste die hi ons namaels doen sal soe hebben wi hem ghegheven en gheven tot sine live ende niet langher vive en twintich scilde tsiaers of 24 vlaemsche gr. voer den scilt alle jare te betalen op st martijns misse in den winter daer deerste termijn of wesen sal op st martijns misse nu naest comende en daer na voert van jare te jare alsoe langhe als hi leven sal welc ghelt wi bewijst hebben en bewisen den deken voern. op onsen renten van Scoenhoven en van der Goude. Ende ombieden onsen rentmeester die daer nu is of namaels wesen sal dat hi den deken voerscr. of sinen ghewaerde bode uytreyken en betalen sulc ghelt en tot sulker tijt alse voerscr. is op sinen brief van quitanche voer ons mede te rekenen sonder daer of eenich ander ghebot van ons te hebben. Ende want wi dit ghehouden en ghedaen willen hebben in der manieren dat voerscr. is soe hebben wi des den deken voerscr. teenre orconde ghegheven desen opene brief beseghelt mit onsen seghele. Ghegheven op onsen borch t'Scoenhoven des saterdaghes na st baven dach int jaer ons heren m ccc lviii.

Jussu johannes de Blesis.

Scr. Ghisebrecht Stomme

f.85v.

De berchtiende

(latijn)

f.86.

(latijn)

f.86v.

texel.

Jan van Bloys heer van Scoenhoven en van der Goude doen cond allen luden dat wi omme bede en versoec onser liever en ghetrouwer lude in onsen lande van Texel aenghesien die grote lieve en rechte ionste die wi tot hem draghen ende oec menighe goeden en dankeliken dienst sie si ons ghedaen hebben en namaels doen sullen sulke hantvesten brieve en recht als

onse lude van Texel voern. hebben beseghelt van den grave Florens die voermaels grave te hollant was des god ghedenke loven voer goet houden ende fineren altoes behoudenlic onser heerlicheyt en sonder argelist ende omme dat wi voer ons ende onse nacomelinghen onsen voerscr. lude van Texel en horen nacomelinghen dese voerscr. hantveste brieve en rechte houden willen en doen houden in der manieren dat voerscr. is. Soe hebben wi hen daer op desen openen brief ghegheven beseghelt mit onsen segheletot eenre orconde en in kennisse der waerheyt ghedaen en ghegheven ter borch in onser lande van Texel voern. des woensdaghes na onser vrouwen dach in september int jaer ons heren m ccc lviii. Presentibus dns de Barbenchon, Hughe de Barbenchon, Jan van der Goude Jan van Bueren.

f.86v.

Jan van Bloys heer van Scoenhoven en van der Goude doen cond allen luden dat wi ghewilkoert hebben Bartout Hasekinen soen en Brunen Gherijts soen die hofstede die ghelegghen is voer die borch in onsen lande van Texel en nu woent (opaeruman) an die oestside en Coen die Emdre an die westside te houden ende te ghebruken tot hore beider live ende alsoe langhe als enich van den voerz. Bartoude en Brunen leven sal soe ne mach ons dese voerscr. hofstede niet weder aen comen ende den wilkoer van der voerseyder hofstat hebben wi ghedaen in der manieren dat voerscr. is om alsulc ghelt als Bartout voerscr. daer of gaf onsen camerlinghe te verstaen sonder argelist. In orconde desen brief beseghelt mit onsen seghele. Ghegheven ter borch in onsen lande van Texel voern. swoensdaghes na onser vrouwendach in september int jaer ons heren m ccc lviii. Presentibus, Dns de Barbenchon, Hughe sinen broer, Jan van der Goude, Vrederic van der Zevender, Ghisebrecht Stomme.

87.

Texel.

Jan van Bloys heer van Scoenhoven en van der Goude doen cond allen luden dat voer ons ghecomen is Nannekijn (Hobbensoen) en heeft ons opghedraghen mit sinen vrien wille vijfhondert roeden lants ghelegghen ten oestenende in den hemmen in onser lande van Texel daer die leuden of sijn Olmaer Wobichssoen, Lubbe Nannekijnssoen, Kempe Bolt, Heerkin Zibrechtssoen, van welke lande Nannekijn voerz. Onse man gheworden is en wi voer ons en voer onse nacomelinghen Nannekijn voerz. en sinen nacomelinghen weder verliet hebben en verliet te houden van ons tot enen onversterflichen erfleer. Hier waren over alsoe onse mannen heer Jan van der Goude, ridder, Jan van Bueren, Oesselic Alderssone, Yene Beenensoen en anderen. In orconde desen brief beseghelt mit onsen seghele. Ghedaen en ghegheven ter borch in onsen lande van Texel swoensdaghes na onser vrouwe dach in september int jaer ons heren m ccc lviii.

f.87.

Texel.

(latijn)

f.87v.

Jan van Bloys heer van Scoenhoven en van der Goude doen condt en kenlic allen luden dat wi sulke ghenoech en wilkoer alsoe heer Jan van der Goude in dien tiden onse baeliu van Scoenhoven en van der Goude, Willem die Witteen Henric Dircssoen makeden mit den hoghen heemraet mit den laghen heemraet en mit den ghebueren van den lande van Steyne ieghens Damaes Byensoen van den waellande dat men heyt sbiscops wael ende ghelegghen is in den lande van Steyne consenteren loven ende voer goet houden in alle der manieren dat die brief hout daer dese door ghestoken is beseghelt mit der dryer seghele voern. Ende willen voer

ons en voer onse nacomelinghen dat die voerscr. wilkoer ende ghenoech Damase voorn. en sinen nacomelinghen vaste en ghestade ghehouden worde tot ewelike daghen. In orconde van desen dinghen soe hebben wi onsen brief doer desen ghestoken en beseghelt mit onsen seghele in kennisse der waerheyt. Ghegheven in onsen stede van der Goude tsaterdaghe na theylich cruys dach int jaer ons heren m ccc lviii.

Presentibus, dns de Barbenchon, Hughe de Barbenchon, Dirc van der Goude, Jan van Bueren. Ghisebrecht Stomme. Allaert van Meerten.

f.87v.

Steyne.

Allen den ghenen die desen brief sullen sien of horen lesen doen wi verstaen Jan van der Goude, ridder, Willam die Witte en Heinric Dircssoen knapen dat wi hier over en aen waren mit den hoghen heemraet van den lande mitten laghen heemraet en mit den ghebueren van den lande van den Steyne dat Damaes Byensoen quam voer alle desen goede lude die voerscr. sijn ende ontwenc dat waellant dat men hiet sbiscops wael en gheleghen is in den lande van Steyne tot ewelike daghe in dusdanighe manieren dat hi en sinen nacomelinghe dat lant bruken en orbaren sullen tot horen besten gheliken horen eyghen lande. Ende hier om heeft hem Damaes voerscr. weder verbonden en ghewilkoert voer hem en voer sinen nacomelinghen voer den dijgrave en voer den hiemraden van den lande dien dij ende alle banwerc die die hiemraden voerscr. daer op koren of scieren die koren te maken ende te bewaren sijn si groet of cleyne te volre kore ende waer dat sake dat hier eenich ghebrec in viele dat bi sinen versumen toe quame of bi sijnre nacomelinghen dat heeft hi gheloeft en ghewilkoert te verbeteren hi en sinen nacomelinghen op hoer lijf en op hoer goet sonder argelist. Ende is Jan van der Goude, ridder, voerscr. baeliu in dien tiden aldaer en woude hier niet over wesen daer dit gheschien soude icen spracs eerst mit minen lieven heer van Byaumont daer god die ziel of hebben moet en sinen goeden raet om dat dir waer is en wi hier over en aen gheweest hebben soe hebben wi Jan van der Goude, ridder, Willem die Witte en Heinric Dircssoen, knapen, alle voerscr. desen brief beseghelt tot eenre orconde mit onsen seghele ghegheven op st marcus dach evangelist int jaer ons heren m ccc lvii.

f.88.

Jan van Bloys heer van Scoenhoven en van der Goude doen cond en kenlic allen luden dat wi verliet hebben en verliet voer ons en voer onse nacomelinghen Janne van der Goude Dircssoen was van der Goude alsulc goet en lant als hier na ghescreven sijn dats te verstante een halve hoeve lants en hout 8 morghen gheleghen te heeswijk in den lande Montfoerde an der overe egghe ghelandt pape heyne en an den nederen egghe Ghisebrecht van Yselsteyn. Item eene hoeve lands hout zestien morghen gheleghen in Gherit lande van den Vliete an den Yseldijc ghelandet an den overe egghe Jan Hooghebroec, an den nedere egghe Ghise kinderen van den Vliete. Item op den tiende in Papecoep 10 lb. zwartetsiaers welc lant en renten voerscr. Jan van der Goude voerscr. van ons en van onsen nacomelinghen hoeder en houden sal tenen rechten leene. Voert soe hebben wi den voerscr. Janne gracie ghedaen om bede goeder lude dat is dat wi verliet hebben en verliet joncfrou (Benselden) die nu ter tijt sijn ghetrouwde wijf is van allen desen voerscr. goeden die eene helft alse men se naest gheraken mach tot hare rechter lijftochte te ghebruken daer wi se in gheloven te houden na den rechte en costume van den lande daer dese voerscr. goede gheleghen sijn, alle argelist ghescolden. Dit gheschiede op onse borch t'Scoenhoven daer bi en over waren onse gheminde neve die heer van Barbenchon en onse ghetrouwe manne alse heer Jan van der Goude, Gherit van Oesterwijk en Jan die scriver en anders vele goeder lude. In orconde desen brief beseghelt mit onsen segle. Ghegheven op onsen borch voerscr. int jaer ons heren m ccc lvii den elften dach in meye.

f.88v.

Jan van Bloys heer van Scoenhoven en van der Goude doen cond allen luden dat wi om bede wille en verzoec Jans van Berkenrode ons mans verliet hebben en verliet Eenisen sinen wive die Gherits Peridaens soens dochter is tot huerre rechter lijftochte die minre helft van eenen campkine lands gheleghen voer tsgraven made te Thetrode welc campken die voerz. Jan van ons hout in rechten leene. Hier waren over onse trouwe manne alse Coen die cuysser van Oesterwijn, Ysebrant Dullaert en anderen. In orconde desen brief bezeghelt mit onsen zeghele ghedaen en ghegheven tot Reewijn int jaer ons heren m ccc lvii des anderen daghes na severijns dach.

Presentibus, dns de Barbenchon. Jan van langherak, Jan van der Goude, Jan Blonde.

f.88v.

Hantveste van boeten t'Scoenhoven.

Jan van Bloys heer van Scoenhoven en van der Goude doen cont allen luden dat wi om reden wille verzuoc ende gherecht liene die wi draghen tot onser stede van Scoenhoven onsen luden van der stede voern. ghegheven hebben wilkoeren en gheven om ene verbeteringhe hoers rechts en hantvesten die si hebben van onsen voerders, dat voert meer gheen man die onse poerter is aldaer en in witteliken huwelike sit jeghens ons meer verbueren mach dan deene helfte van sinen goede behoudenlic sinen wive der ander helfte. Voert soe hebben wi hem ghegheven wilkoeren en gheven dat onser poerter kinderen aldaer dien hems sijn en in hoers ouders en moeders broode sijn voert meer ieghens ons niet meer verbueren en moghen van hoers ouderen goede dan thien lb.holl. Ende want die dinghe die in goeder meyninghe gheset sijn ende om dagheden dicwijl verboert worden ende in archheyt ghebesicht soe willen wi dat dese voerscr. punten staen sullen en gheduren t'onsen wedersegghen ende al sonder arghelist te verstaen om dat wi dese punten vast en ghestade houden willen in der maniere dat voerscr. is soe hebben wi daer op teenre orconde desen openen brief ghegheven bezeghelt mit onsen zegle. Ghedaen en ghegheven op onser borch tot Scoenhoven op st barbaren dach int jaer ons heren m ccc zesse en vijftich.

f.89.

Vercoep van den wintmuelen tot Scoenhoven.

Jan van Bloys heer van Scoenhoven en van der Goude doen cond allen luden dat wi voer ons en voer onse nacomelinghen ghegheven hebben en vercoft onsen lieven en ghetrouwen luden van Scoenhoven ende horen nacomelinghen erflic en ewelic den wijnt ende die wijntmolen van onsen voerz. stede van Scoenhoven om vive en twintich lb. holl. tsiaers sulx payments als men daer van onsen renten te nemen pleghet. Te betalen onsen rentmeester aldaer of onser nacomelingher die nu is of namaels wesen sal op sinte martijns misse in den winter naest comende ende alsoe voert van jare te jare op ten zelven sinte martijns misse alsoe dat onse lude voerscr. voert meer setten moghen het sij binnen der veste of buten bi der stede daer si willen alzo menighe wijntmolen alse hem goet dunct ter stede orbaer op dat si ghenoech doen van der molen stat den ghenen dies terve wesen sal noch nyeman en sal voertmeer enighe orsmolen setten binnen onser stede van Scoenhoven voerz. dan die twee die daer van ouds gheweest hebben ten si bi oerlove onser goeder luden voerscr. Ende wi of onse erfname ne sullen voert ane gheene molen setten noch doen setten binnen die vriheyt voerscr. noch op hondert roeden daer na ende binnen desen coep sullen alle onse wijnt molen binnen Scoenhoven ende daer omtrent die nu sijn mit allen horen toebehooren onser lude van Scoenhoven voerscr. wesen horen wille mede te doen. Ende overmids desen vorwaerden sullen onse lude van Scoenhoven voerscr. dies wijnts ende der molen ghebruken tot horen ghenoege erflic en ewelijc te verstaen sonder alrehande arghelist. Ende want wi willen dat dit vaste en ghestade blive in allen manieren alse voerscr. is soe hebben wi daer op teenre

orconde desen openen brief beseghelt mit onsen seghele. Ghedaen en ghegheven op onse borch van Scoenhoven in st.barbaren daghe int jaer ons heren m ccc lvi.

f.89v.

Hantvesten en vrieden van Scoenhoven te houden.

Jan van Bloys heer van Scoenhoven en van der Goude doen cond allen luden want wi die rade onser ouders gheerne in doghedeliken saken na volghen souden ende namelijc an dien daer onsen luden orbaer en vrede of incomen mochte soe confirmeren wi ende loven alle hantveste en vrieden die onse lieve en ghetrouwe lude van onser stede van Scoenhoven voertijts vercreghen hebben en beseghelt van onsen lieven heer en oudevader mijn heer Janne van henegouwen heer van Byaumont des god ghedenke of van den grave van Hollant bi beyaghe ende toedoen ons lieves heer en oudervader voern. Daer toe soe hebben wi hem ghegheven willekoren en gheven dat voert ane nieman scepene noch raed in onser stede voern. wesen en sal hine hebbe ses jaer of langher daer binnen ghewoent ende hine si in onser stede voerz. ghegoet tot hondert lb. holl. of bat te verstane al sonder arghelist. In orconde hier of soe hebben wi desen openen brief beseghelt mit onsen seghele ghedaen en ghegheven op onse borch t'Scoenhoven op st barbaren dach int jaer ons heren m ccc lvi.

f.89v.

Mabelyen Willams wijf van der Woude.

Jan van Bloys heer van Scoenhoven en van der Goude doen cond allen luden dat wi om bede wille en verzoec Willems van der Woude ons mans verlyet hebben en verlyen Mabelien sinen wive die Wouters dochter was uten Houte tot hore rechter lijftochte 40 lb. holl. tsaers op sijn leen dat hi Willem voirz. van ons hout gheleghen an Riederwaert gheheeten inthout, hier over waren onse trouwe manne alse Gherit van Oesterwijn en Jacob die scriver. Ghedaen en ghegheven op onse borch t'Scoenhoven op st martijns dach in den winter int jaer ons heren m ccc lvii.

f.90

Willem Symanssoen.

Jan van Bloys heer van Scoenhoven en van der Goude maken cond allen luden want Willam Symonssoen onse man is van 13 morghen lants gheleghen in den ban van Westzaenden die hi van ons hout te rechten leene. Soe hebben wi hem van gracie ghewilkoert en goeden oerlof ghegheven mit neghen morghen van den voerz. lande sinen vryen wille te doen ende des te ghebruken in allen manieren alse vry eyghen erve, mer van den vier merghen des voirz. lants sal hy onse man bliven alse te voren ende die van ons houden teenen rechten leene. In orconde. (geen einde)

f.90.

Jan van Bloys heer van Scoenhoven en van der Goude ombieden u Jacoppe van der Goude onsen rentmeyster in die Wijn en tot Noertwijn want wi ghewilkoert en gheoorlooft hebben Willem Symonssoen dat hi mit neghen morghen lants van den 13 morghen die hi van ons hout in rechte leene gheleghen in den ban van westzaenden sinen vryen wille doen mach alse mit vryen eyghenen erve ghelijc dat ghi sien moghet bi onsen openen brieven die hi daer of heeft. Soe ombieden wi u dat ghi den eyghendom die wi an die voerscr. 9 morghen lants hebben den voerz. Willem quyt scelt hem daer of enen vryen eyghendom te gheven van onsen weggen alse onsen voerz. brief begrepen hebben en maken u machtich te doen al dat daer toe behoert mit desen brieve beseghelt mit onsen seghele. (geen einde)

f.90. Quitanche.

Jan v. Bloys enz. doen cond ende kenlic allen luden dat ons Pouwels Tolnaer Pouwels sone die onse rentemeyster van Scoenhoven ende van der Goude te wesen plach alsulke betuggingen ende alzoe vol ghedaen heeft van alle toesegghen of ghebreken die wi op hem hebben mochten roerende van sinen dienste voerz. dat wi hem ende sine nacomelinghen daer of quite scelden ende loven sine rekeninghen die hi daer of ghedaen heeft.

In orconde desen brief beseghelt ghegheven tot IJselsteyn op st. Gheerdendach int jaer ons heren m ccc lvij.

presentibus, dni de IJselsteyn, Jo Blonde, Gh. Stomme.

f.90v.

segghen.

Jan van Bloys heer van Scoenhoven en van der Goude doen cond allen luden want Willam Botterman borgher t'Utrecht aen deen side ende Claes Pelegrijns soen an dander side an ons ghebleven sijn van sulken twye (twist) also si onderlanghe hadden roerende van alsulken goede also onder ons leyt ende Zeeborch die Clays suster voerz. was hueren kinderen na hoer liet die si bi Willem Botterman voerz. hadde. Soe is onse segghen want die huwelic tusschen Willem en Zeeborghen voerz. ende die voerwaerden binnen der stat van Utrecht ghemaect waren daer brieve en ghescrifte of sijn dat die partyen voerz. des bliven sullen an den ghemeenen raet van der stat van Utrecht voern. In deser manieren vinden si na den huwelic voerwaerden en brieven dat die kinderen die Willem bi Zeeborghen sinen wive voern. hadde op hueren vader niet erven en sullen dat die coep die van den voerz. goede ghegaen is ontdaen ende te niete ghemaect werde. Ende voert ane gheschie van den voerz. goede als die huwelic voerwaerden begripen al sonder arghelist ende Willem en Clays voerz. hebben ons gheloeft op een peyne van vijftien pont groten dit voerz. segghen te houden ende te voldoen ende soe welke van hem des niet en helde sonder van der voerseyder peyne verboren een derdendeel jehghens die stat van Utrecht tander iehghens ons en tderde iehghens den ghenen diet segghen helde. Dit gheschide tot Yselsteyn op sinte gheertruden avond int jaer ons heren m ccc lvii. Ende wi hebben onsen seghel op desen cedulae gheplact in kennisse der waerheyt van desen dinghen voerscr.

f.91.

Jan Korstiaens kinderen in Lopic.

Jan v. Bloys enz. doen cond dat wi om goods wille ende in aelmossen ghegheven hebben ende gheven Jan Korstiaens kinderen ute Loepic ghemeyne te bruken ende te hebben dien halve merghen lants ghelegghen in Lopic an Wouter Siers land die onsen lieven heer en oudevader mijn heer Jan v. Henegouwen aenghecomen ende gheeyghent sijn overmids boeden die die kinderen voerz. verboert hadden jehghens onsen lieven heer en oudevader voerz. Overmids dat si butenlands waren ende hem selven niet verantwoerden en mochten also die ghene die doe trecht voerden ons aenbrocht hebben.

In oerconde enz. ghedaen en ghegheven te IJselsteyn op st. Gheertrudenavond in meerte m ccc seven en vijftich.

f.91.

Pouwels die tolnaer.

Cond si allen luden dat ic Pouwels Tolnaer Pouwels sone vervoft hebbe wittelic en wale minen lieven en gheminde jonchere Janne van Bloys heer van Scoenhoven en van der Goude dat ambocht van Moerdrecht mit allen sinen toebehoeren als ict hadde in coepe van Florens van der Boechorst heer Florens soen in allen manieren als dei brieve begripen en spreken die ic daer of hadde van minen lieven en gheduchten heer den grave van hollant welke brief ic mit

minen vrien wille overghegheven hebbe minen lieven jomcheer voerscr. en kenne mi daer of vol en al betaelt den lesten penninc mit den eersten ende scelde quite tot mijns liefs joncheren behoef voern. al recht dat ic an dit voerscr. ambocht hebben mochte ende daer toe heb ic gheloeft en ghelove in goeden trouwen voer mi en voer mine nacomelinghe te doene al dat ic sculdich ben te doene en vermach dat mijn lieve joncher en sine nacomelinghe daer in wael versekert en bewaert worden mit mijne gheduchts heren tsgraven hant voerscr. ende mit sinen mannen als recht is en daer toe behoers tot allen tiden als ics vermaent sal wesen te verstane al sonder arghelist. In orconde desen brieve beseghelt mit minen seghele ende omme die meerre sekerhede soe heb ic ghebeden en bidde minen lieven heer den heer van Yselsteyn, heer Willem van Thuul, ridder, en Janne den Blonden knape dat si dit mit mi beseghelen ende over mi kennen willen als manne mijns liefs heren en gheduchts heren tsgraven van hollant voerscr. Ende wi Aernout heer van Yselsteyn, Willem van Thuul ende Jan voern. om dat wi over en bi deser quytsceldinghe ende overghevinghe voerseyt ghewwest hebben alse manne ons liefs heren en tsgraven voern. soe hebben wi om bede wille Pouwels voern. desen brief mit hem beseghelt in kennissen der waerheyt. Ghedaen en ghegheven tot Yselsteyn op st gheertrudendach int jaer ons heren m ccc zeven en vijftich.

f.91v.

Margherete bi der ghenaden goets gravinne van Henegouwen maken cond allen luden dat wi ghesien hebben en horen lesen eenen brief gans sonder eenich ghebrec wael beseghelt mit ons liefs soens seghele shertoghen Willems van Beyerens grave van Hollant van Zeelant en heer van Vrieslant inhoudende van woerde te woerde als hier na volghet. Hertogh Willem van Beyerens grave van Hollant van Zeelant, heer van Vrieslant ende verbeider der graeflicheide van Henegouwen maken cond allen luden dat wi om bede wille onser liever vrouwen en moeder der gravinne van Henegouwen ons liefs oems heer Janne van Henegouwen, heer van Byaumont ende ons liefs neven heer Walraven van Luxemborch, heer van Lyni verliet hebben verliet en wilkoren mit desen ieghenwoerdighen brieve onsen lieven neve Janne tsgraven Lodewice soene van Bloys of sinen naesten erfname van ons liefs oems voerscr. live comende alle goede poerten vesten dorpe heerlicheide hoeghe en laghe land ende watre vervalle sekere en onsekere hoe dat si ghenoeft of waer dat si ghelegghen sijn binnen onsen landen van hollant van zeelant van keenmaerlant ende van vrieslant mit allen toebehoeren hem en sinen nacomelinghen of sinen naesten erfname van ons liefs oems voerscr. live comende van ons en van onsen nacomelinghen graven van hollant van zeelant en heer van Vrieslant te houden in alsulker vorme ende in allen manieren alst onse lieve oem voerscr. tot desen daghe toe ghehouden heeft en helt doe dese brief ghescreven was in vaderlike en moederlike bewisinghe en in rechter brueders deelinghe ende manier onse lieve oem voerscr. van live ter doet ghevaren sal wesen op dat wi van Bloys ons neve hem verleeft. Soe willen wi Janne voern. of sinen naesten erfname van ons liefs oems voerscr. live comende te manne ontfanghen sonder eenich wedersegghen in allen goeden voerscr. die van ons en van onsen nacomelinghen te houden tot eenen rechten erfleene ende alle dese voerscr. dinghen te verstaen sonder arghelist ende om dat wi hertoghe Willem van Beyerens en grave van Hollant voerscr. willen dat alle desen voerscr. saken bliven vast ghestade en wel ghehouden in allen manieren dat voerscr. is soe hebben wi desen openen brief gheseghelt mit onsen seghele in kennissen der waerheyt. Ghedaen en ghegheven tot Valenchijn des saterdaghes na jaersdach int jaer ons heren m ccc vier en vijftich. Ende wi Margrieten gravinne van Henegouwen voern. hebben dit vytschrift van desen voerscr. brieve beseghelt mit onsen seghele tot eenre orconde ghegheven in onse stede tot Valenchijn des sonnendaghes na jaersdach int jaer ons heren m ccc vier en vijftich.

f.92.

Jan van Bloys heer van Scoenhoven en van der Goude doen cond allen luden ic minen lieven en gheduchten heer minen heer den grave van Henegouwen en van Hollant quyte ghesconden hebbe en quyte scelde van alre scout die hi minen lieven heer en oudervader mijn heer Janne van Henegouwen heer van Byaumont des god die ziele hebben moet sculdich mochte wesen ende ghelove hem daer of scadeloos te houden mit desen openen brieve bezeghelt mit minen zeghele, ghegheven (niet vermeld).

f.92v.

Willem grave van Henegouwen van Hollant van Zeelant en heer van Vrieslant maken cond allen luden dat die wile dat die burchgraefscap van Leyden onse was eer wi se Philips van Wassenaer vercoofden ene grote crominghe die ons liefs oems lude heer Jans van Henegouwen heer van Byaumont van Noertich ende anders onse lude vyt onsen lande ieghens die van Catwijc hadden dine die vismarct te Catwijc te houden ende omme die boeten daer die van Catwijc die lude mede dvinghen wilden die vismarct daer te houden, wi mit onsen lieven oem heer Janne van Henegouwen heer van Byaumont voerscr. over een droeghen ende setten lude daer toe van onse beyder weghen diere een waerhede of besochten na der croene van beyden partyen. Ende omme dat die waerhede besocht was eer wi se Philips voern. die burchgraefscap vercoofden soe hebben wi ons besproken mit den goeden luden van onsen lande ende mit onsen rade ende sijn over een ghedraghen dat wijt na der waerhede sculdich sijn te sceyden. Ende hebben mit onsen goeden luden voerz. die waerhede ghehoort ende onse lude die die waerhede besaten ende na der waerhede soe hebben wi ghevonden dat die vismarct van ouds gheleghen hevet te Catwijc mer dat menre van rechts nyemant toe dvinghen en mach mit enighen boeten die vismarct te houden ende alsoe ghebieden wijt voertwaert meer te hantieren. Ghegheven in die Haghe des dinxdaghes na jaersdach int jaer ons heren m ccc en veertich.

Presentibus dns de Arkele, Willem de Duvoerde, ridderen, Dirc Moelnaer, Gherit Alewijn. Floris de Haemstede.

f.93.

Dijckaedse van den westerhil anden polder van Dalem.

Jan van Bloys heer van Scoenhoven en van der Goude maken cond allen den ghenen die desen brief sien sullen en horen lesen dat wi gheoerloeft hebben en oerloven mit desen ieghenwoerdighen brieve dat men den polre die gheheeten is den westerhil ende is gheleghen an den polre van Dalem bedriven sal te dikene mit sulken luden als int lant ghegoet sijn ende daer toe sal die onsen rentmeyster die nu is of namaels wesen sal enen man setten alle jare tot 7 jaren toe diet bedrijft ende int lant voerscr. is ghegoet ende wi wel aen ghehouden sijn ende soe wien hijt beveelt dien gheven wi macht tallen tiden scepenen te makene of ende aen te doen alsoe dicke alst ons oerbaer is ende tslants voerscr. In orconde enz. (geen datum).

f.93.

Ermgaert Jacobs dochter.

Jan van Bloys heer van Scoenhoven en van der Goude doen cond allen luden dat wi om beden wille en versuec Remonds van Meerloe ons mans verliet hebben en verliet Ermgaerden sinen wive die Jacobs t'Stillen dochter is van Montfoerde tot hore rechter lijftochte die minre helft van 7 morghen lands gheleghen in die heerlicheyde van Yselsteyne welke zeven morghen lands die voerscr. Remond van ons hout ten rechten leene. Hier waren over onse trouwe manne alse Jan die Blonde, Jan die forier en anderen. In orconde desen brieve beseghelt mit onsen zeghele ghedaen en ghegheven tot Yselsteyn 6 daghe in maerte int jaer ons heren m ccc lvii.

Presentibus, dns Aelbrecht van Meerten, Jan Blonde. Ghisebrecht Stomme.

f.93v.

Jan Janssoen.

Jan van Bloys heer van Scoenhoven en van der Goude doen cond allen luden dat wi die 34 ghemete lants luttel min of meer legghende ter capelle in Duveland die Boudijn Willemsone van ons te houden plach ende onsopghedraghen heeft weder verliet hebben ende verliet Janne Jans sone Boudijns neve voern. van ons en van onsen nacomelinghen hem en sine nacomelinghen te houden also Boudijn voern. van ons te houden plach en mit sulken vryheden also nu daer ane hebben. In orconde desen brief bezeghelt mit onsen zeghele en in kennisse der waerheyt. (geen datum).

f.93v.

Claes scrivers wijf.

Jan v.Henegouwen enz. maken cond allen luden dat wi Ermgaerden Claes Scrivers wijf was die onse rentemeyster te Scoenhoven ende ter Goude te wesen plach alle sine erfname ende borghen quyt ghesconden hebben ende quyt scolden van alle den afterstalle dat hi ons sculdich bleef in sijnre lester rekeninghe overmids sulke betalinghe also hi ons sint daer of ghedaen heeft Ende daer die partyen in onse ambochtsludeboec van rekeninghe of begrepen sijn. Ende wi noch onse nacomelinghen en sullen Ermgaerden voern. Claes erfnamen noch sinen borghen voerghenoemt daer of voert ane niet eyschen, in orconde enz. (zonder datum).

f.94.

Lieve heer en neve wi laten U weten dat swoensdaghes na sinte martijnsdaghe in den soemer onse lyeve vrouwe en zuster uwe oudemoeder die vrouwe van Fontenelle bi ons was tot .ymer.. ende op die selve tijt quam aldaer Willekijn Ever toenre des briefs die ons lyete syen goede brieve ghans en ghave also ons dochte van onser lyeve vrouwe en nichten uwer moeder ende van u daer hem mede bevolen was en ghegheven dune waerder te wesen inder manyeren dat sine bryeve spreken enghi syen moghen ende op die selve tijt tughede onse lyeve vrouwe en zuster voerscr. openbaerlijc voor ons dat si daer oever ende ane was tot Aet in brabant (burbant) dat in henegouwen is daer hem dese dyenst bevolen weret ende dattet oec bi huerre toedoen ende bede was welke Willekijn ons toende dat hi des dyensts nyet ghebruken en moet dat ons h..de wonderlijc heeft water wi ghene manyere gheproeven en (konnen)waer bi dat men hem sine dyenst benemen mach daer en si anders wat in dan wi gheweten konnen .

f.94.

Jan Janssoen.

Jan van Bloys heer van Scoenhoven en van der Goude doen cond allen luden dat wi die vierendertich ghemete ambochts luttel min ofte meer ligghende ter Capelle in Duveland die Boudijn Willemssoen van ons te houden plach en ons op ghedraghen heeft weder verliet hebben en verliet Janne Janssoene Boudijns neve voern. van ons en van onsen nacomelinghen hem en sinen nacomelinghen te houden alst Boudijn voerscr. van ons te houden plach te verstaene tot rechten leene en mit sulken vryheden als wi daer an hebben. In oerconde desen brieve bezeghelt mit onsen zeghele en in kennisse der waerheyt. Ghegheven ter Tolne in Zeelant int jaer ons heren mccc zeven en vijftich des manendaghes na palmen daghe.

Presentibus dns de Barbenchon, dns, dns de Blonde, Aelbert van Meerten., Ghisbrecht Stomme.

f.94v.

Jan van Berkenrode hout van Janne van Bloys eenen camp lants legghende in Theterode bi Haerlem te rechten leene. (bijgeschreven) dit heeft mijn heer Gherit Jansz. Int jaer lxxviii voor mannen heer Floris van Adrichem en Vrederic van der Zevendaer den jonghen.

Item Ghisebrecht Dullaert Dircs sone te rechten leene vii merghen lants gheleghen an Alphenre koerne die hi ontfenc int jaer lxii op der 11000 maghede dach tot Beverwijk.

Item Jan Berwouts soen hout tot enen erfleene xlii maet lantsligghende buten dijcs ten holen sloete bi Hughes lande van Zaende in Oestzaenden.

Gherit Berthout Jan Hughen soens soen uter Wijc hout tot enen erfleene eene made meden gheleghen in den biese camp van der noertzide in te meten welc land verliet is Berwoude Hughen soen als voecht van den voerz. Gherit Berthout ende heeft die selve Berwoude verherwaed.

Item hout die heer van der Lecke van Janne t'goet van tisels waerde van Capelle.

Item Ysebrans Walichs soen houd vi merghen lands die ligghen te langhevelt int ambocht van Noertwijk die belegghen hebben an die eene zide t'cloester van der Lee en an die ander zide Hughe kinderen van Langhevelt.

(doorgedaan)

Item Gherit Pieters sone vyt Lopyc dede minen joncheren manscap ende ontfanc van hem 3 daghe in januario tot enen onversterflichen erfleene 2 merghen lants gheleghen in Lopijc en belegghen hebben mit lande Walich Willemssoen an die oestside ende Jan Botterman an die westside.

Item Willem Florens soen is van Joncheren Jans van Bloys van eenre morghen lants gheleghen in den ambochte van Noertwijk op Rijns oever Item noch van enen ponde t'siaers op mijns joncheren tijns in den voirsch. ambochte.

f.95.

Dat is dat goet dat Mijn Joncfrauwe van der Zevendaer van Janne van Bloys hout tot enen rechten erfleene.

In den eersten die thien saten in Bloemendael in den broeke.

Item dat huys te Haestenberch ende ene hoeve lants in t'lant van Steyne. Item ene halve hoeve in stoetvoets sate an die westzide van den huse te Haestenberch. Item ene halve hoeve gheheyten Faysenlant ende leyt oestwart van den huse te Haestenberch. Item enen viertel bi Clays Zeghers gheleghen in den zelven gherecht. (zonder datum).

Dirc Jacobssoen wt Loepic dede manscap heren Janne van Langherak ende anders mijns Joncheren rade dien hi sijn lant bevolen hadde doe hi in Pruyssen was tot mijns joncheren behoef van ix merghen lants gheleghen in Loepic boven den kerke ende belegghen hebben mit erve anden overen egghe Loef Henrick Buycssoen ende anden nederen egghe Daem Ghisekijnssoen te houden van mijns jonchere tot enen onversterflike erfleene. (zonder datum). Half t'voirsch. Lant of de minren helfte heeft mijn heer verlyet Claren Dirx wijf voersch. tot hore lijftochte.

Die 2 morghen lands gheleghen in Loepic die Gherit Pieters soen van mijnre heer hilt heeft ghecoft Walich Willams soen ende mijn heer heeften him verliet in al der selver manieren

dattet Gherit hilt dies teenen onversterflike erfleene dat gheschiede omtrent barthelmei anno lxxvii. Daer over waren als mannen, heer Jan van Langherak, Jan van Bueren en Daem Matten soen.

Die voirschr. 2 morghen lands als si ghelegghen sijn verliede mijn heer Hughe Walich soen inder manieren dat voirschr. is , dat gheschiede des manendaghes viii daghe in julio Int jaer ons heren m ccc lxxix, over waren als mannen heer Jan van Langherak, Brunaert Grieten soen, Gherit de Wilden en Jacop de Scriver.

f.95v.

Willam Gherit Ockers soen.

Jan van Bloys doen cond allen luden dat wi wt vriendelijke verzoeken en naer.... ver.... van Gherits Ockerssoen en sinen vrienden ende oec om beteringhe die hi ons ghedaen heeft vergheven hebben en vergheven Willam Gherits Ockers soens sone onsen evelen moet dien wi tot hem w.. hadden van dien dat hi een onmondich kint ontvoerde wt onsen lande van Texel soe dat hi daer of onse gramscap vercreghen heeft ende willen dat die voerschr. Willam vrylic ghebruken sulc goet als hi mitten voerschr. vriende zinen wive (heerlicke) ende hoer aenbestorven is van hoere puders en ombieden en ghebieden onsen baliu van texel die nu is of namaels wesen sal dat se Willam dat voerschr. goet doen hebben en ruimen van den ghenen diet onder ghehadt hebben moghenwie dat si sijn want wijt hem weder ghegheven hebben alsoe als hijt nu vint en al sonder arghelist. In orconde desen brieve beseghelt mit onsen seghele. Ghegheven t'Scoenhoven op st michiels avont int jaer ons heren m ccc lxxiii. Presentibus dns de Langherak, ridder, Aelbrecht van Meerten, Jan van Bueren.

f.96.

Wi Jan van Bloys heer van Scoenhoven en van der Goude maken kont allen luden dat wi ontfaen hebben van Aloud Janszone onsen rentmeyster in Zeelant bi heer Symone prchipape tot Scakerloe vijfhondert vive en sestich bruxe en andwerpse scilde t'stuc voer vier en twintich sc. tornoys. Item hondert achte en twintich philippus scilde tstuc voer twee en twintich sc. tornoys. Item drye en vijftich oude scilde tstuc voer xx.. sc. toyrnoys maeckt an een hele somme achte hondert lxxxv lb. Xiid sc.gr. ende van alsoe velen gheloven wi Aloude quite te houden in die eerste rekeninghe die hi oms doen sal. In oerconde desen brief beseghelt mit onsen seghele, ghedaen tot Scoenhoven int jaer ons heren m ccc lvi op onser vrouwen avond assumpcio.

f.96.

Guy van Chastillon greve van Blois doen cont dat wi mechtich ghemaect hebben en maken onsen ghetrouwen Dirc van der Goude enen vryen eyghendom te gheven van onsen wegghen van vii morghen lands also als si ghelegghen sijn in Alfenre hoorn die Ghisbrecht Dullaert Dircssoen en sijn ouders van onsen ouders en ons ten rechten leen ghehouden hebben overmids dat Ghijsbrecht voirschr. en Heinric Janssoen ons weder opgedragghen hebben en enen vryen eyghendom gegeven van vii morghen lands dats te verstaen Ghijsbrecht Dullaert voirn. 4 morghen lands in den ambocht van zwamerendam en belegghen hebben aen die westzyde Luutgen Dircs Bruunensoen en sijn stiefkind en an die noertsyde Screvel Robbrechtssoen. Item heinric Janssoen voirschr. 2 ½ morghen landsgelegghen inden ambocht van Alfen belegghen aen beiden syden Jan Gheritssoen Engbrecht Gherijt soens brueder. Item die selve Heinric ½ merghen lands gelegghen in den ambocht van Aerleveen belegghen aen die zuutsyde die heer van Osenbroec en aen die noortsyde Jacop Doedensoen en Willem van Noord en van desen vii morghen lands voirschr. sal onsen Gherijt voirn. Enen vryen eyghendom nemen tot onsen behoef van Ghijsbrecht en Heinric voirschr. In orconde

ghegheven t'Scoenhoven xix dage in junio int jaer m ccc xxxix

f.96v.

Poortvliet (latijn)

f.96v.

Jan van den Zijl.

Wi Jan van Henegouwen heer van Byaumont maken cond allen luden dat wi voer ons en voer onse nacomelinghen verlyet hebben Janne van den Zile en sine nacomelinghen van ons in rechten erfleene te houden al dat lant dat heer Jan van den Zile sijn oem van ons te leene helt legghende in maselant an Ghisekijns woninghe van Ammers. In orconde desen brief beseghelt mit onsen seghele. Ghegheven in den Haghe des manendaghes na sheylichs cruysdach in september int jaer ons heren m ccc zeven en dertich.

f.97.

Van den puedijc te dikene.

Jan van Bloys enz. Maken cond allen den ghenen die desen brief zellen sien en horen lesen dat Aloud Jans zone ons rentmeester in zeelant hevet ghegheven te dikene van onsen weggen enen polre die gheheten is die puedeke en is gheleghen an den polre die gheheten is die westerhil in deser manieren dat dese voirscr. polre dese naeste vii jaer vry wesen zal van allen oncoste die daer op comen mach sonder dat men jaerlix daer of gheven zal den elften scoef ende tiende lam ende t'ende die seven jare sal men daer of ghelden ghelike den anderen polren. Ende desen voirscr. polre sal men bedriven te dikene mit zulken lieden als int lant ghegoet sijn ende daer toe sal onse rentmeester die nu is of namaels wesen zal eenen man setten dien bedrijft tot sinen wedersegghen ende die in desen voirscr. polre ghegoet is ende wi wel an ghehouden sijn. Ende soe wien hijt beveelt dien gheve wi macht tot allen tiden scepen te maken of ende an te doen alsoedicke alst onse orbare is ende t'lants voirscr. ende tenden den seven jaren soe sal men bedriven met zulken rechte als men ons lant ter Tolne bedrivet. Voert soe zal ene lantscedinghe wesen tusschen twier man erve ene dilve van achte voeten wijt ende vinden si dan daer dary inne dien moghen si barnen te selle ende daer of sellen si ons gheven van elker kupe zels drie scellinghe tornoyes ende soe wie sijn arve splitten wil dien mach delven ene delve ses voete wijt ende die mede sullen bliven ses roeden wijt breet ende van darye die daer ute valt zullen si ons gheven ghelike als voirscr. is ende die ettinghe van den zeedike van desen voirscr. polre zullen ghemeenlike behouden die daer in ghegoet sijn. Voert soe wie enich warc name voerdit voerscr. lant en an andere lande voerde of voeren wilde die soude onse boete alsoe dicke als hijt dede een pont tornoyes behouden in allen zaken onser heerlicheit ende alle pointe zullen wesen sonder archlist. In orconde desen brieve bezeghelt mit onsen zeghele wt haghende. Ghegheven ter Tolne op onser vrouwen dach concepcio int jaer ons heren m ccc seven en tsestich.

f.97v.

Segghen van der visserye.

Oplossing van een geschil over de visserij tussen heer Harbaren van Liesvelt en Ponciaen van Lakervelt poorter tot Schoonhoven.

St.Martijnsavond int jaar lix.

Van der vischerie die in twee ghestaen heeft tusschen heer Herbaren van Liesvelt en Ponciaen van Lakervelt poorter van Schoonhoven. Is mijns joncheren segghen van Bloys wants die partyen voirscr. an hem ghebleven sijn op eene peine van 500 ponde holl. te vyttten na den rechte of bi ghevoeghe om die meerre ruste ende orbaer diere vyttte comen mach. Als dat her

Herbaren voirsch. bliven sal in die voirsch. vischerie in alre manieren dat hi se in pachte hout van den heren van oudemonster t'utrecht ende dier ghebruken tot sijnre orbaer behoudekijc mijnen jocher voirn. Ende eenen ygheliken sijns rechts, mer om des betoechs wille dat Ponciaen voirsch. heeft van der voirsch. vischerie beide van sinen ende sijnre ouder tiden, soe sal hem her Herbaren voirsch. gheven 16 lb. swart t'siaers of 160 lb. payments voirsch. ende dof mach her Herbaren kiezen welc hi hem gheven wil of die 16 lb. swarts s'jaers of die 160 lb. voirsch. ende kiest her Herbaren die 16 lb. t'siaers te gheven die sal hi Ponciaen voirn. Wel bewisen daer hi se hiffen mach d'eeene helft te st. Martijns misse in den winter naestcomende ende dander helft te st Peters misse in zulle daer naest volghende ende alsoe voirt van jare te jare. Ende die sal Ponciaen ende sinen nacomelinghen van heer Herbaren ende sinen nacomelinghen houden tot eenen erfleene. Ende kiest her Herbaren die 160 lb. te gheven soe sal hise hem betalen te Bamisse naestcomende of binnen 14 daghen daer na ombegrepen ende hier of sal her Herbaren voirsch. kiezen welc hi wille tusschen dit ende sinte Jansmisse te midzomer naestcomende. Ende viel hyer in namaels eenich stoet dat hout mijn joncher tot sijnre verclaeringhe.

Dit voirsch. segghen was gheseyt op den huse t'Scoenhoven op sinte Mathijs avond int jaer 59. Daer bi ende over waren als rade mijns voirn. Joncheren, die heer van Barbenchon, die heer van Yselsteine. Her Jan van Langherak, Gherijt van Oesterwijn, Jan van Bueren, Dirc van der Goude, her Ghisebrecht ende heer Aelbrecht capellaen.

Ende dit segghen hebben die voirsch. gheloeft te houden op die voirsch. peine voor 500 ponden mit heer Herbaren, Willam Beckenoirt ghesamender hant ende elc voir al. Ende mit Ponciaen Vrederic van der Zevender, Eggaert Veeneman ende Herman die Weldighe ghesamender hant ende elc voir al.

f.98.

Willam Vinke.

Jan van Bloys heer van Scoenhoven ende van der Goude doen cond allen luden dat wi voir ons en voir onse nacomelinghen verliet hebben en verlyen Willam Vinke Willam Vinken soen ende sinen nacomelinghen vier gaerden lands gheleghen in Yselmonde in jacop Bokels ambocht gheheten tboomgaertwee ende belegghen heeft mit erve aen die oestzide Willam selve ende aen die westside die selve Willam mit erve dat hi hout van der vrouwen vander Weteringhe. Item vier gaerden en neghen voete lands dat drie voete min dan vijf gaerden gheleghen in Yselmonde int selve weer dat voerghenoemt staet ende belegghen heeft aen die oestside mit erve Willam Vinke selve dat hi hout van der vrouwe vander Weteringhe ende aen die westside Roelinc Ghisen soen. Dit voirsch. lant te houden van ons ende van onse nacomelinghe Willam en sine nacomelinghen tot enen erfleene ende te verheerghewaden alst verstarft mit vier lb. holl. Hier waren over onse ghetrouwe manne alsoe haer Jan van Langheraec en Jan van Bueren. In orconde desen brief besegghelt mit onse seghele ghegheven t'Scoenhoven neghen daghe in julio int jaer ons heren m ccc vijf en tsestich.

f.98v.

Joncfrouwe Jenette Ghisebrechts dochter van der Vliete dede minen joncheren manscap van xiiii marghen lands gheleghen in Bloendale bi der Goude ende van xiii ½ marghen lands gheleghen in Lopijc beneden der kerke t'scoenhoven rot. Hier waren over mijns joncheren manne als heer Jan van Langheraec, Gherit van Oesterwijn, Dirc van der Goude, Jan van Bueren, Gherijt Borchman en Dirc Janssoen vuyt Lopijc dat gheschiede t'Scoenhoven in die eerste weke van aprille int jaer ons heren m ccc lxi.

f.98v.

Willem Vinc Willemssoen wonende in Yselmonde in Jacop Bokels ambocht hout van minen heer daer hi manscap of doen sal als hi te sine jare coemt tot ene erflene 4 gaerden lands gheheiten tboemgaertweer ghelegghen besiden Willem Vinken huus en belegghen heeft mit erve an die oestzide Willem selve en an die westside die selve Willem mit erve dat hi hout van mer vrouwe van der Weteringhe. Item 4 gaerden en 9 voet dats 4 voet min dan 5 gaerden ghelegghen in Yselmonde int selve weer en belegghen heeft Willem Vinc selve an die oestside mit erve dat hi hout van mer vrouwe van der Weteringhe an die westside Roelant Ghisensoen. Ende men selt verheerghewaden alst versterft mit eenen half pont groten.

En van desen lande nam Daem Mattensoen den eyghendom tot mijns heren behoef en kennede die hiemraet die 4 gaerden al vry ende die 5 gaerden 4 voet min daer staet op die houding van enen kinde dat Willem Vinke moeder heeft bi eenen knaep gheheten Willem Zonderlant die dat kint gheloeft heeft te houden op al hoer goet ende na dat si dat gheloofd hadde soe waren die 5 gaerden lands 3 voet min jeghen hoir ghecoft mer anders soe waren si vri ghekent en Willem Vinke en Badeloghe sijn zuster hebbent ghelovet van den voirsr. pointe te vryen op al hoir goet. Ende heeft tvoirsr. Kijnt ghelooft mit sinen 4 vierendelen minen heer manscap te doen alst sine jare heeft tot mijns heren vermanen. Hier waren over heer Jan van Langherak, Jan van Bueren, heer Aelbrecht, heer Ghisebrecht en anderen. (later bijgeschreven)

Dese 9 gaerden lants 3 voet min die naestvoirsr. Sijn verliede mijn heer Ocker Baen op st pouwels anond conversio anno lxxix daer bi waren als mannen Goodscalc van Brakel, Herman die Barbier en Daem Mattensoen, oec waren daer bi heer Jan van Langherak en heer Aelbrecht.

f.99.

Ic Clays van Cats ridder, doe kondich allen den ghenen die dese lettre sullen zien en horen dat ic Pieter Heykins sone die dese lettere hout verlien hebbe viftien gaerden lants die legghen t'Yselmonde tussen Janne Vere Betten soen en Ghenekijns lande mit seghedane voerwaerde dat dese Pieter dit goet van nu en van minen nacomelinghen houden sal te rechte lene ende na siere doet soe sal dit goet erven en comen op sinen sone ewelike also menich alser es of ne hadde hi ghenen sone op sine dochteren ewelike alsoe menich alser ware ende dat si dat goet scaphans na siere doet offen deylen souden en van nu voorwart te rechten lene. Desen brief wart ghescreven des manendaghes na sente pieters daghe in den oeghest in den jaer ons heren m ccc en tachtich ende twee jaren

f.99.

Wi Jan van Henegouwen heer van Byaumont maken cont allen lude dat wi verliet hebben en verliet Pieter Hayekins sone te lene van ons te houde als sulke erve als hi tes rechte van ons te lene houden sal. In oerconde van desen brieve beseghelt met onsen seghel ghegheven int jaer ons heren dertienhondert en dertiene the halven maerch.

f.99.

Jan Berwouts soen is man joncher Jans van Bloys van xlii gaerssen lands ghelegghen tot Zaender damme en waren daer over daer hi manscap dede als man heer Jan van der Goude, Coene die Cuser en Jan die Blonde. (later bijgeschreven) Ende 1 hoet ghersten jaerlix uter thiende van Wormer tot enen rechten leene.

f.99v.

Lude van wapene.

Thonijs de Lambert van Zierixe leverde heer Dirc Voppen soen tot Scoenhoven des

donredaghes na bartholomei int jaer lx op goede rekeninghe ende in minderinghe van den recessse dat hem de voerscr. Dirc ghaf enen ouden scilt gherekent voor xxviii gr. lxxii lb. gr. ende blijft de voerscr. Thonis noch sculdich naden voerscr. recessse xxviii lb.xxii d. gr.

Floris Hughe soen van Oudewater ghelenede op den jaers avond int jaer lxi heer Jans zegghen van Langherak te houden op eene somme van 200 lb. holl. van dat hi jehghens minen joncheren mesdaen hadde des worden borghen Dirc sijn brueder, Mans Florensoen, Floren die Jonghe.

f.100. ledig.

f.100v.

Dits voir die van der Tolne van hoirre vriheyte t'antwerpen als der stat boec van antwerpen hout.

Die vriheit des borchswercs strecket hare ten dorpen en ten steden die hier na staen bescreven. Ierstwerf van Antwerpen tote Ossendrecht van daer tote Dibbrugge van daer tote Tuernouter voert van daer tote Molregrave van daer rechts wegghes tote (testelt). In damere van daer tote Aerscot ende de stat altemale behoere ten voerscr. borghwerke van daer tot Werchtere van daer tote Wispelaer van daer tote Selle van daer tote Steenvoert van daer tote des Conningsbossche van daer tote Ledeberghe in de stelt (scelt) van daer tote Ridinxvliete van daer in de scelt in des.... ..muyden voert meer te desen voirgheseggheden borchwarke behoert op die ruere mit neghen velt dorpen.

f.100v.

Claes Janssoen, Pouwels Hughe Spierinx soen en Jan Boudijn hebben ghelooft t'Scoenhoven in te comen tot mijns heren vermanen en sijn wonachtich ter Tolne in Zeelant.

f.101.

Witte Henrick soen.

Jan van Bloys doen cond allen luden dat voer ons quam Witte Henricksoen en droech ons op van sinen eyghenen goede een huus mit eenre hofstede staende binnen spijs dorpe in onsen lande van Texel weldie hofstede voerscr. groet is viertich roeden luttel min of meer ende belegghen hebben an die noertzide grote Allaert van Medenblic ende aen die westzide Bone emelen sone. Oec droech hi ons op enen coech lands die heyt Ysebrande made groet wesende zevenhondert roeden lands daer bi ghelandt is an die noertzide Bauke uten Nesse en Enghe Gheerlofs sone an die zuutzide ende hebben voerscr. t'voern goet weder verleyt van ons en onsen nacomelinghen hem en sinen nacomelinghen te houden tot enen onversterflike erflene want hire onse man of worden is. Hier over waren onse manne als Jan van Bueren en Coene van Oesterwyc. In oerconde desen brieve besegghelt mit onsen seghele ghegheven t'Scoenhoven op xxii dach in junio int jaer ons heren m ccc lxiij Jussu dns de Blonde, dns de Haerlaer, Aelbrecht van Meerten, Hughe de Barbenchon.

f.101.

Daem Matten soen.

Jan van Bloys enz. doen cond allen luden want ons Daem Matten soen op ghedraghen hadde van sinen eyghene erve vier gherde lands legghende in den ambochte van Bercwoude daer hi onse man of worden was die wi hem weder verleyt hadden van ons en onsen nacomelinghen te houden tot enen onversterflike erflene ende wi hem ghewilkoert hebben weder te vercopen daer Willaem Enghebrechts soen nu ter tijt onse scouten in Stolwyc den eyghendom of ghegheven heeft bi onsen bevelen. Soe heeft ons Daem Mattensoen voerscr. daer voer op ghedraghen van sinen eyghene erve vier en halve gaerde lands legghende in den Zuurbroec ende belegghen hebben mit erve Lauwerijs Jansz. Andie westzide Daem Mattensoen selve ande

westzide en streckende van den Cadijc an Stolwiker lantsceydinghe daer hi onse man of worden is. Ende hebben die selve vier gaerden ende ene lands weder verlyet en verlyen van ons en van onsen nacomelinghen hem en sinen nacomelinghen te houden inder manieren dat hi die eerste voerscr. vier ghaerden lands te houden plach dats te verstaen tot enen onversterflike erflene ende men selt verheerghewaden mit eenre jaer renten die van den vier en ene halve gaerde lands voerscr. coemt en al sonder arghelist en hier over waren onse ghetrouwe mannen als die heer van Haerler, Jan van Langherak en Jan van Bueren. In oerconde desen brieve beseghelt mit onsen seghele ghegheven t'Scoenhoven des vridaghes xxii daghe in junio int jaer m ccc lxiiii. Jussu dns de Blonde.

f.101v.

Ponciaen van Lakervelt

Jan van Bloys doen cond allen luden dat wi van gracie verlyet hebben en verlyen Ponciaen van Lakervelt en om dienste die hi ons doen mach vii gaerden lands alsoe als si gheleghen sijn in Yselmonde in Ogiers ambochte van Cralinghe die men van onsen ouders te rechte leene te houden plach ende ons anebestorven sijn en daer Trude Aernt Belyen soens dochter Ponciaens suster voerscr. hoir lijftochte an heeft ende belegghen hebben mit erve wi selve mit lande andie oestzide dat Daem Mattensoen van ons hout te lene ende an die westzide Heyn die Jonghe streckende mitten overen ende andie Merwede ende mitten utersten ende andie lantsceydinghe van Barendrecht die voerscr. zeven gaerden lands min of meer te houden van ons en van onsen nacomelinghen Ponciaen voirsr. en sinen nacomelinghen tot enen onversterflike erflene Ende hier om soe heeft ons Ponciaen voerscr. uut sinen vryen wille opghedraghen van sinen eyghene goede twee morghen lands gheleghen in Boenrepas in ene were lands van ii morghen ende belegghen hebben mit erve an die noertzide Ghise die Vryer en Ghise Gheerlofs soen ende an die westzide heer Tyedeman die Hase, Jan die Jonghe ende veel anderen die daer an strecken mit horen erven van welken 2 morghen lands voerscr. Vrederic van der Zevender op die tijt onse baeliu van Scoenhoven en van der Goude enen eyghendom of nam tot onsen behoef die wi weder verlyet hebben Ponciaen voerscr. en sinen nacomelinghen te houden van ons en van onsen nacomelinghen tot enen onversterflike erflene. Hier waren over doe dit ghescyede ende ons Ponciaen manscap dede onse ghetrouwe manne heer Jan van Herlaer heer van Ameyde onse gheminde gheselle, Benoet Feignaer en Lubbrecht van Rikele onse camerlinghen. In oerconde desen brieve beseghelt mit onsen seghele ghegheven t'Scoenhoven op st mathijs dach int jaer ons heren m ccc lxiiii.

f.102.

Heinrick de poertier.

Jan v.Bloys enz. doen cont allen luden want Heinrik die Zasse die nu onse poertier is op onsen huse t'Scoenhoven hun verbonden heeft ons diene voer yemand anders also lang als hij leeft endes ons ghenuecht so hebben wi hun ghegheven ende gheven 8 lb.holl. s'iaers slechts ghelts zijn leven lanc durende daer hi of bueren zal die wile dat hi ons dient toten wedden die hi nu van ons pleecht te hebben 5 lb.holl. t'siaers ende zijn corste termijn os wesen zal op st.Martijns misse in de winter nu naest comende ende also voert van jare te jare. Ende waer t'zake dat hi ons niet dienen en mochte van zichten zijns lichaems of van ouderdomme so soude hi sonder enighe wedden behouden die voerscr. 8 lb. holl. t'siaers alinghe tsine live die ene helfte t'ontfanghen op st martijns misse inden winter ende dander helfte ts pieters misse in julie daer naistcomende ende also voort van jare te jare welc voirsr. ghelt wi hem bewijst hebben ende bewijzen an onsen renymeyster van Scoenhoven ende van der Goude. Ende ombieden onse rentmeister van onsen lande voerscr. die nu is of namaels wesen zal dat hi Heinric voern. inder selver manieren tvoerscr. ghelt wtreyken ende betalen sonder ende

enighe bevelnisse van ons daer of te hebben ende daer of neme tot elken termine zinen brief of goede kennisse van quitanche voer ons mede te rekenen. Ende want wi wille dat Heinric voirsch. dit wael ende ghestade ghehouden bliven als voersch. is sonder wedersegghen van ons of van onse nacomelinghen en sonder enigherhande arghelist. So hebben wi him daer of desen openen brief ghegheven bezeghelt mit onsen seghele tot eenen oerconde en in kennisse der waerheyt dat ghedaen was t'Scoenhoven 10 daghe in julio anno lxiiii

Presentibus dns de Harlaer, Jan van Langherak, Aelbrecht van Meerten, Jan van Bueren

f.102v.

Heinric Buffel wordt man mijns heren Jans van Bloys xxix daghe in meye in Dreyschier van enen ghemete lands dat hem mijn heer oerlof gaf wt te moeren onder him an t'nyewe Dreyschier ende daer voer droech hi minen heer op een ghemet lands van zine eyghene erve legghende int Nyeweland boeste Duiveland onder den grave ligghende in Speutwijn daerne mijn heer van beyden of ontfenc te manne ende te houden tot enen onversterflike erflene hier over waren als mannen heer Jan van Langherak, Jan van Bueren, Aloud Janssoen ende andre.

f.102v.

Herman Barbier.

Jan v.Bloys enz. hebbe ghewilkoirt ende gheoorloeft Hermanne van Huesden onsen knaep om dienst dien hi ons ghedaen heeft ende noch doen zal dat hi van zine lande dat hi heeft liggende in onse lande van Dreyschier twee ghemete vercopen mach wt te moeren wt te delven tot zijnre meester bate en orbaer en den gheenre diet jehens him copen zullen dat is te verstante twee ghemete van zinen lande dat meest overwayet is mit zande en die nutste ghedelven zijn tot ons voersch. lands behoef van Dreyschier. Ende zellen die ghenen die die voersch.2 ghemete lands jeghen Hermanne copen en wt moeren dat waren als recht is van moerlande. In oerkonde enz. Ghegheven ter Tolne 10 daghe in meye int jaer lxiiii.

f.103.

Meyster Dirc v.Heeswijk.

Jan v.Bloys enz. doen cont dat wij meester Dirc van Heeswijk onsen clerc draghen ende om dienste die hi ons ghedaen heeft en noch doen zal hem ghegheven hebben ende gheven sestien pond holl.t'siaers tot sinen live zulcs payments als altoes ten van betalinghen ghenghen en gane wesen sal binnen onser heerscap van Scoenhoven welc ghelt wi hem bewijst hebben en bewisen jaerlix te ontfane an onsen renten van Scoenhoven en van der Goude en sijn eerste termijn of wesen sal op onser vrouwen dach ter lichtmisse naestcomende en alsoe voert van jare te jare. Ende ombieden onsen rentmeyster van Scoenhoven en van der goude die nu is of namaels wesen zal dat hi voersch. ghelt van onsen wegghen meyster Dirc voersch. of sinen ghewaerde bode tot zijnre behoef jaerlix ten voersch. termine wtreyken en betalen sonder anders enich ghebot of beveelinghe van ons daer of te hebben mer daer af neme sinen brief van quitanchen alle jaer voer ons mede te rekenen. Hier over waren alsoe onse ghetrouwe manne her Jan van Haerlaer heer van der Ameide, her Jan van Langherak, Jan van Bueren en andre en om dat wi willen dat meyster Dirc voersch. dit wael en vast ghehouden bliven in der manieren voersch.en sonder arghelis so hebben wi hem desen openen brief ghegheven en bezeghelt mit onsen zeghele tot eenre orkonde en in kennisse der waerheit dat ghedaen was t'Scoenhoven op st katrine avond int jaer ons heren m ccc vier en tsestich.

f.103.

Op sinte Agniete dach anno LXIX verbeterde mijn heer meester Dirc van Heeswijk sine rente ende gaf hem in alle d'voirsch. manieren ende op den termijn voirsch. voir die XVI lb.holl. XXXIJ lb.holl. siaers tot sine live.

f.103.

Op den pinxteravond anno xcvi verliede mijn heer van Bloys ter Tolne Ghijsbrecht Jacops scriverssoen alsulc leen als de brief begrepen die hi daer of heeft en de copie staet omme an dander zide voor sijn manne Janne den bastaert, Goedscalc van Brakel, Vrederik van der Zevender en andre.

f.103v.

Jacob die scriver.

Jan v.Bloys doen cond allen luden dat wi verlyet hebben Jacob den Scriver ende verlyen die vier honts lants die ghelegghen zijn biden opweghe van Beckevoerts poerte die Jacob d'scriver zijn oem te houden plach van onsen lieven heer ende oudevader mynen heer Janne van Henegouwen heer van Byaumont was des god ghedenke en van ons dat zi die voerscr. Jacob en zine nacomelinghen houden zullen van ons en van onsen nacomelinghen inder selver manieren dat se zijn oem voern. te houden plach dats te verstane tot enen erfleene ende om dienst die ons die voirsch. Jacob ghedaen heeft ende noch doen zal ende oec om dat hi over ghegheven heeft ende quit ghescoude xl sc. holl. sjaers die wi hem ghewilkoert hadden, so hebben wi hem daer voer ghegheven ende gheven een stuxkin lands ghelegghen in Texel biden westkerken gheheyten t'clif dat belegghen hebben der kerken lant an die westzide ende Omghe Olbouts soen an die noirt zide welc stuxkin lants werdich wesen soude xxxv sc. holl. tsiaers dat Jacob voerscr. van ons houden zal ende van onsen nacomelinghen hi en zinen nacomelinghen tot enen erfleene. Ende al sonder argelist hier waren over onse ghetrouwe manne heer Jan van Haerler heer van der Ameyde, heer Jan van Langherak, ridders, en Jan van Bueren. In orkonde deser ghegheven t'Scoenhoven anno lxiiii.

f.104.

Pieret.

Jan v.Bloys enz. doen cont dat wi om dienste wille die ons Pieret die maerscalc onse knecht ghedaen heeft ende noch doen zal hem ghegeven hebben al so lang als hi leeft die vij lb. holl. t'siaers buersgelt die wi hebben an dat huus ende erve dat Gherijt Melisz. is in onse stede van der Goude daer Pieret onse man of gheworden is welke seven lb. holl. t'siaers ons ghepant waren ende gheeyghent an t'voers. huys ende erve enz. Ghedaen t'Scoenhoven op st.Katerineavond int jaer Lxiiij.

f.104v.

Herman Vinken.

Jan v.Bloys enz. doen cont dat wi om goede gonste ende goede meninghe tot Herman Vinken Jonghe Herman Vinkensoen te Dordrecht ende om sonderlinghe vrientscap die hi ons bewijst heeft hun ghegheven hebben tot zine live xxv lb.holl. t'siaers. Ghegheven t'Scoenhoven op st.Katerine avond anno lxiiij.

f.105.

Willam Bottelgier.

Jan v.Bloys enz. doen cont dat wi om bede wille Willems ons bottelgier hem gheoorlooft hebben wt te moeren die twee ghemete lants die hi heeft liggende in onsen landekine gheheyten clene Dreyschier welke twee ghemete lands wesen zullen van den onorberlixte vruchte te draghen ende die meeste belegghen zijn mit zande en al zonder argelist. In orkonde desen brief bezeghelt mit onsen zeghel ghegheven t'Scoenhoven des manendaghes x daghe in februario int jaer ons heren m ccc lxiiii Presentibus, dns Jan van Langherak, Aelbrecht van Meerten, Jannes Tolnaer.

f.105.

Aernoldus van Bubnaghel.

Jan van Chastillon heer van Avesnes van Scoenhoven en van der Goude maken cond en kenlic allen luden dat voer ons en voer onse mannen ghecomen sijn Trude die Aernt Belien zoens dochter was en Jan de Jonghe hoer oudste zoen als hoer ghecoren voecht en hebben over ghegheven en quyt ghesconden tot Aernolde van Bobnaghel hoers neven behoef seven garden lands luttel min of meer die Ponciaen van Lakervelt van ons ten erfleen te houden plach en gheleghen sijn te Yselmonde in Ogiers ambocht van Cralinghen en beleghen hebben mit erve wi selve aen die oestzide dat Daem Mattenzoen van ons hout te leen en aen de westzide Hein die Jonghe streckende mitten overen einde aen de Merwede en mit ten utersten einde aen de lantsceydinghe van Barendrecht. Welke seven gaerden lands wi weder verliet hebben Aernolden van Bobnaghel voerscr. van ons en van onsen nacomelinghen hem en sinen nacomelinghen te houden tot enen onversterflike erfleen. Hier over waren onsen ghetrouwe manne als her Jan van Langherak, ridder, Gherit den Wilden, Dirc Veynken, Jan van Brakel en anderen. Ghegheven t'Scoenhoven op sinte urbaens dach anno lxxiiii

f.105v.

Allaert Hughen soen van den Waellande.

Jan van Bloys enz. doen cond allen luden dat wi voir ons en voir onse nacomelinghen verhuert hebben Allaert Hughen soen ter Goude en sinen nacomelinghen tot enen erfpachte een stuc lands dat wi hebben ligghende bi der Goude en gheheite is dat waellant mit sine dike in ald. . . nighen manieren dat die voerscr. Allaert dit lant hebben sel alst nu verhuert is dats die morghen om xvi sc. gr. siaers ende in dier huere sal hijt hebben mit sine dike alsoe langhe als anders onse lant dat daer naest gheleghen is verhuert is en daer en tende tot alle tiden als men onse lant die daer bi gheleghen is verhueren sal. Soe sal die voirsch. Allaert of sine nacomelinghe dat waellant mit sinen dike in huere hebben en houden en hoe veel dat die morghen van anders onsen lande dat daer naist gheleghen is meer of min ghelt tot enigher tijd alsoe veel sat hi of sinen nacomelinghen meer of min gheven jaerlix van der morghen van de voirsch. waellande. En al sonder enigherhande arghelist. In orconde ghegheven op den lesten dach van maerte af daer Anno vier en tsestich.

f.106.

Convent van Scoenhoven.

Jan v. Bloys doen cont allen luden want hun die prior ende die bruederen van den convente van de Carmelieten in onse stede van Scoenhoven in voertyden verbonden hebben tot ewelike daghen ene misse te doen daghelix op onse borch t'Scoenhoven bi oerlove ende goedenken van horen provinciael ende overste die zi doe hebben overmids aelmisse ende goetdoen die si daer of hadde van onsen lieven heer en oude vader mijn heer Jan v. Henegouwen. Ende oec van ons zeder ghehat hebben ende want wi willen dat si daer toe te meer ghehouden bliven ende si des te bet ghewesen moghen te doene. Soe hebben wi den voersch. convente ghegheven en gheven voir ons en voer onse nacomelinghen poverlic om goeds wille ende in rechter aelmissen twalef lb. holl. slechts ghelts siaers eeweliker renten sulx payments als binnen onse stede van Scoenhoven gaen sal in tiden van betalinghe mer om sonderlinghe gunste die wi draghen tot broeder Ruerich van Hackenberch nu ter wilen conventuel in den voersch. convente ende om dienst dien hi ons ghedaen heeft en noch doen sal soe hebben wi hem ghewilkoert ende ghegheven bi oerlove ende consente van den prior en den bruederen van den voersch. convente ghemeenlic dat hi die voersch. twalef lb. siaers tot sinen besten hebben sal sijn leven lanc ende sijnre doet den convente voersch. op een stuc lands dat wi hebben legghende bi der kerke van Wilghen gheheten die Magherhoeve alle jare te betalen tot sulken daghen als die renten van den voersch. lande verscenen. Ende ombieden onsen rentmeyster

van Scoenhoven die nu is ende die namaels wesen sal dat hi broeder Rurich voir ende den convente na die voerscr. renten jaerlix wtreyken en betalen in der manieren dat wise ghegheven hebben en voirsr. staet sonder ander ghebot daer of van ons te hebben wedercomende alle jare brieve van quitanchen voir ons mede te rekenen. Ende want wi willen dat dit vast ende wel ghehouden worde soe hebben wi desen brief doen beseghelen mit onsen seghele tot eenre orkonde en in kennisse der waerheit ghegheven tot Scoenhoven op den ascensioensdach int jaer ons heren m ccc vijf ende tsestich.

106v.

Gherijt die Wilde.

Jan v. Bloys heer van Scoenhoven enz. doen cont dat wi om dienste die ons Gherijt die Wilde onse camerleng ghedaen heeft ende noch doen zal ende oec van goeden die wij hem toedraghen ghegheven hebben ende gheven voer ons ende voer onse nacomelinghen den voerscr. Gheride tot zinen live xx lb. holl. Slechts ghelts tsiaers zulcs paymente als in onse stede van Scoenhoven gaen zal ten tyden van betalinghen alle jare te betalen tot ii terminen dats te weten te sinte jans misse te midzomer die ene helfte ende dander helfte te kersavond daer ene eerste termijn of wesen zal vander eene helfte te st jansmisse nu naistcomende ende die ander termijn van den ander helfte te kerssavond daer naist volghende ende also voert van jare te jare also langhe als hi leeft. Ende van dese voirsr. rente is hi onse man gheworden ende zal ons daer om dienen also langhe als ons ghenueghet ende en zal oec van ons voert meer die wedden niet hebben die hi voermaels ghehadt heeft ghelijc anders zinen ghezellen van welken rente voerscr. wi den voerscr. Gheride bewisinghe ghedaen hebben op onsen renten van Scoenhoven ende van der Goude. Ende ombieden onsen rentmeyster die nu is of namaels wesen zal dat hi Gheride voern. os zinen ghewaerde bode wtreyken ende betalen die voerscr. xx lb. holl. tsiaers zijn leven lang an zulken paymente ende tot zulken terminen als voirsr. is sonder anders enich ghebot van ons daer of te hebben ende wondernemen zinen briefvan quitanchen voer ons mede te rekenen. Ende want wi willen dat Gherit voerscr. onse ghifte voerscr. ghebruike tot zinen live en inder manieren voerscr. so hebben wi hem daer op desen openen brief ghegheven bezeghelt mit onsen zeghele tot eenre orkonde ende in kennisse der waerheyt ghegheven t'Scoenhoven opden lesten dach van meye int jaer lxxv.

Presentibus, dns de Haerler, Jan van langherak, ridders, Aelbrecht van Meerten, Jan van Bueren, Jannes Tolnaer.

f.106a.

Jan van der Goude Dirxsoen.

Jan van Bloys enz. doen cond allen luden dat wi van gracen en doir bede van sonderlinghen vrienden gheoorlooft hebben voir ons en voir onse nacomelinghen Janne van der Goude Dirxsoen was van der Goude sinen vryen wille te doen mit eenen deele lands dat hi van ons ten rechten leene te hebben plach dats te verstaen mit eenre halver hoeve lands al op twee merghen naeste den besten van der voirsr. halver hoeve welke 2 morghen wi selve behouden onse vryen wille mede te doen. Welke halve hoeve lands voirsr. gheleghen is te Heeswijk in den lande van Montfoert ghelant sijn paepheinen erfname an den overen egghe en die borchgrave van Montfoert an die nedere egghe daer joncfrou (Rensselt) des voirsr. Jans ghetrouwede wijf hoir lijftochte an hadde die si voir ons mit horen vryen wille en mit lachende monde quytghescoude heeft. Soe dat wi behouden ons den voirsr. 2 morghen lands an der halver hoeve voirsr. onse vryen wille mede te doen wes daer aen verblijft daer hebben wi Janne van der Goude voirn. eenen vryen eyghendom of ghegheven en gheven daer mede te doen al dat hi mit sinen vryeighene goede doen mochte sonder eenigherhande arghelist. Hier waren over onse ghetrouwe mannen heer Jan van Langherak, ridder, Benout Feigniart, en Lubbrecht van Rikele en anders veel goede luden. In oerconde enz. int jaer ons heren m ccc

lxvi op alreheylyghen dach.

f.106a.versus.

Jan van Bloys heer van Scoenhoven enz. maken cont allen luden dat voer ons ghecomen is Floris van Scie Janssoen van Scie ende heeft beleyt ende bekent dat hi den viertel lands die gheleghen is in onsen ambocht van Moerdrecht die Floris voerscr. van ons te lene hout ende die Gherit Barthouts soen voertijts van Janne van Scie plach te houden den voerscr. dijc voert verleyt heeft daer wi onse consent en goetdenken toe ghedaen hebben ende dat bi onsen wille ghesciet is ende al sonder arghelist. Hier over waren onse ghetrouwe manne heer Jan van Langherak Lubbrecht van Rykle onse knecht ende andre. In orkonde ghegheven te Scoenhoven op st pieters en pouwels dach avond anno lxv.

Presentibus dns Aelbrecht van Meerten, kanunnik, Jan van Bueren.

f.106a, versus.

Breedeman.

Jan van Bloys heer van Scoenhoven en van der Goude doen cont allen luden want Ghisebrecht van Thienhoven onse rentmeyster van Scoenhoven en van der Goude van onser weggen ghepant heeft en gheeyghent een huus en een erve daer toe voer scoude die ons Tyelman Lammekijns zoen sculdich was welc huus en erve Dirc die Breede jeghens onsen rentmeyster voerscr. ghecoft heeft ende beleghen hebben binnen in onser stede van der Goude ande noertzide Wolfaert Janssoen en ande zuytzide Gheye Volprecht soen daer Dirc voern. onsen rentmeyster voerscr. of voldaan heeft als onse rentmeyster ons seyt en ons van den ghelde daer of verandwerden zal soe gheloven wi Dirke Breedeman voerscr. t'voern. huus en erve te waren en daer in te houden in der manieren dattet an ons ghecomen is mitten rechte en sonder arghelist voer ons en onsen nacomelinghen. In orconde desen brief beseghelt mit onsen zeghel. Ghegheven t'Scoenhoven tsaterdaghes na st martijns dach inden winter int jaer ons heren m ccc vive en tsestich.

f.107v.

Want her Dirc Loef heer van Huerne op die ene zide en her Gherijt van Harler heer van Poederoeyen op die ander zide an ons Janne van Bloys heer van Scoenhoven en van der Goude eens segghens ghebleven zijn des wi huer opene brieve hebben mit huere en mit huere vriende zeghele bezeghelt van alzulken scoet als zi onderlinghe hadden, so is onse segghen dat die heer van Huerne en die van Poederoeyen voerscr. voertaen vriende wesen zullen. Ende voer die vierhondert vijftich mottoen die de heer van Huerne den heer Van Poederoeyen sculdich was des hi brieve hadde so zal die heer van Huerne den heer van Poederoeyen gheven ses hondert zulker mottoenen als die voerscr. brief begrijpt te betalen tusschen nu en jaersdach naestcomende ende den anderen twiste of scoec die deen jeghen den anderen hebben mach roerende van hertoghe van Ghelre of anders dat houde wi an onse verclaren tusschen nu en st jans misse te midde zomer naestcomende. Ende dir segghen hebben wi Jan van Bloys gheseyt bi onse rade en met een ghevoech te houden op alsulke pene en verbont als die brieve inhouden die voern. zijn ende wi daer of over hebben van beyden partien voerscr. en alle pointen te verstaen zonder arghelist. Dir segghen was gheseyt op onse huse t'Scoenhoven op barthelmeus dach daer bi waren die heer van Poederoeyen zelve en sine vrienden als die heer van haerler, die heer van Ammerzoeyen, heer Jan van haerler, her Goeswijn van Rossum, Jan en Gherit van Leyenberch en anderen ende s'heren vriende van Huerne die dat voerscr. segghen ontvinghen en aennamen van sinen weggen als her Willem van Dronghelen, Jan uten Campe en Florens van Rijswijc en anders veel goeder lude die vriende waren an beiden ziden. Ende hebben tot eenre orkonde en in kennisse der waerheyt van den segghen voerscr. onsen zeghel op dese cedula ghedruct int jaer ons heren m ccc vive en tsestich.

f.108.

heer Florens van Adrichem.

Jan van Bloys heer enz. doen cond allen luden want heer Florens van Adrichem ghecoft heeft jeghens Willem Dirx van Valkenborch die husinghe hofstede en al zulc lant daer toe behoerende legghende in onsen gherechte en heerlicheyt van Beverwijk in (vrijt ghers) en die de voerscr. Willem en sijn vader van onsen lieven heer en oudervader minen heer Janne van Henegouwen heer van Byaumont was des god ghedenke en van ons hilden in erfpachte. So hebben wi om dienst die ons die voirscr. heer Florens ghedaen heeft en noch doen zal hem dien pacht quytghescouden. Ende hebben heer Florens voerscr. goede husinghe en lant ghegheven en gheven verliet en verliet hem en sinen nacomelinghen te houden van ons en onsen nacomelinghen tot enen onversterflike erflene en te verheerghewaden alst verstarft mit eenen roeden havic en alsulke als op die voirscr. hofstede is en als men daer noch op maken sal zal altoes open wesen ons en onsen nacomelinghe en tot onsen lesten en alzonder enighe argelist. Ghegheven t'Scoenhoven tswoenstaghes na katerine int jaer ons heren m ccc vive en tsestich.

f.108v.

Jan van Bloys enz. doen cont allen luden dat wi alsulc land als ons aengecomen was van Jannes heer Symons grote Janssoens soen die prochiepape plach te wesen van Scakersloe wlc land ghelegghen is in onsen lande van den cleynen Dreyschier ende Aloud Janssoen onse rentmeyster ghecoft heeft van onsen wegghen Cornelise des voerscr. heer Symons soen om lx lb.tournoys daer ons voerscr. rentmeyster of gherekent ende voldaan heeft so dat wi den voerscr. Cornelise dat voerscr. land waren zullen ende vaste ende stade houden wes onse voerscr. rentmeyster daer toe van onsen wegghen ghedaen heeft sonder argelist. In orconde ghegheven t'Scoenhoven op st.katerine dach int jaer lxxv.

Presentibus, dns Hughe van Barbenchon, ridder, Aelbrecht van Meerten, Ghisebrecht Stomme, kanunnic, Jan van Bueren, Jannes Tolnaer.

f.109.

Dirc Gale.

Jan van Bloys enz. doen cont allen luden want onse lieve heer ende oudervader mijn heer Jan van henegouwen heer van Byaumont des god ghedenke verlyet hadde Dirc Galen die Symon Gale soen was den stal in onse wanthuis inde Wijc die Symon zijn vader van onsen voerscr. oudervader des god ghedenke te houden plach in rechte lene. So hebben wi den selven Dirc Voern. den voerscr. stal verlyet voer ons en voer onse nacomelinghen hem ende zinen nacomelinghen inder voerscr. manieren. Ende hebben him om dienst dien hi ons ghedaen heeft en noch doen zal zijn voerscr. leen ghebetert en ghegheven daer toe sesse swanen tsaers wt onsen swanen tot spuewoude van ons te houden in rechten leen. Ende als hi den voerscr. stal hout sonder argelist. Hier over waren onse ghetrouwe manne heer Jan van Langherak, Jan van Bueren, herman die Barbier en anderen. In orconde desen brief bezeghelt mit onsen zeghel ghegheven t'Scoenhoven tsaterdaghes inde kers heylighen daghe int jaer ons heren m ccc lxxv.

f.109v.

Pieraert.

Jan v.Bloys doen cont dat wi ghegheven hebben ende geven Pieraerde van Vilers onsen maerscalc om dienst dien hi ons ghedaen heeft en noch doen zal dat land dat ons aengecomen is van Robbrecht Engbrechtszoen ghelegghen in den ambocht van Bloemendael mit ghemengheder vuere mit en belegghen hebben mit erven Willem Hughen soen op die noirtzide op dat een ende ende Dirc Philips soen op die noirtzide an tander ende. Ende Witte

Aernts soen op die zuutzide welc land voerscr. also alst ghelegghen is dat Robbrecht was Pieraert voerscr. ende zine erfnamen hebben zullen erflic huere vrye wille mede te doen als mit horen goede sonder arghelist. In orkonde desen brief bezeghelt enz. ghegheven t'Scoenhoven swoensdaghes na palmen sondach int jaer lxxv.

f.109v.

Meyster Willam Sonderdanc.

Jan v.Bloys enz. doen cont dat wi ghegeven hebben meyster Willem Sonderdanc onse knape ende Cierurgien wonende te Goude ende sinen nacomelinghen om menighen trouwen dienst ene hofstede op onsen erve ghelegghen binnen onse stede van der Goude ende gheheyten is t'hof die wi hebben ende brucken zal tot enen vrijen eyghen streckende oestwaerts an die strate beneven Jacobs husinghe van der Goude daer nu ter tijd in woent ende westwaerts ten watre toe dat nu heyt die vaert ende van der noirtzide die op die selve vaert keert zuutwaert streckende zeven roeden breed luttel min of meer Ende die voerz. hofstede zal hi betymmeren ende bewonen mogen van de voerz. vaert zuutwaert streckende vier roeden breed Ende die ander drie roeden en zal hi daer an niet betymmeren mit husinghe.

Daer of zal hi ons geven alle jaren tot elken st.Martijns misse in de wijnter drie cappoene die op die voerscr. hofstede zullen bliven in pachte wt ewelike daghen. In oerconde ghegheven t'Scoenhoven des woensdaghes na Palmen anno lxxv.

presentibus dns.de Harlaer, Jan v.Langherak, Joh.v.Bueren.

f.110.

her Aelbrecht.

Jan v.Bloys enz. maken cont alle luden dat wi bi rade ende goerdenken ons liefs neve s'heren van Barbenchon ghegheven hebben Aelbrecht van Meerten onsen ghetruwen raet Canonic ten Doem t'Utrecht om menighe trouwe dienste die hi onse ouders ende ons ghedaen heeft ende noch ons doen zal xl lb.holl. slechts ghelts siaers tot sine live zulx payments als in onse stede van Scoenhoven gaen zal ten tiden van betalinghe daer men hem die eene helfte of betalen zal tsinte peters misse naistcomende en dander helfte tsinte martijns misse daer naist volghende ende alsoe voert tot dien twee terminen alle jaer alsoe langhe als heer Aelbrecht voerscr. leven sal ende overmids deser voirsr. jaerrente soe sellen quite wesen die xv bruxe scilden siaers die wi hem te voren plaghen te gheven. Ende hebben heer Aelbrecht die voirsr. xl lb. holl. siaers bewijst ende bewisen an onse renten van Scoenhoven en van der Goude ende ombieden onsen rentmeyster die nu is of namaels wesen sal dat hi hem of sinen ghewaerde bode die selve xl lb. siaers slechts ghelts jaerlix wtreyken en betalen sonder eenich wedersegghen ten termine en in alle der manieren dat voirsr. is sonder anders eenich ghebot van ons daer of te hebben wedernemende sine brieve van quytanche voir ons mede te rekenen. En want onse wille en meninghe is dat heer Aelbrecht voirsr. die voirsr. rente jaerlix van ons hebbe in der manieren dat voirsr. is soe hebben wi hem daer op onsen openen brief ghegheven mit onsen zeghele in kennisse der waerheit ghegheven t'Scoenhoven op st katerinendach int jaer ons heren m ccc lxxvi.

Presentibus, dns Jan van Langherak, Jan van Bueren.

f.110v.

Heinrik Poertier.

Jan v.Bloys enz. doen cond allen luden want Heinric die Zasse die nu onse poertier is op onse huse tot Scoenhoven hem verbonden heeft ons te dienen alsoe langhe als hi leeft ende hij't vermoghen zel en des ons ghenoecht. Soe hebben wi hem ghegheven ende gheven achte pont holl. slechts ghelets siaers sijn leven lanc durende.

Ghegheven t'Scoenhoven xv daghen in december int jaer ons heren m ccc ses ende t'sestich.

f.110v.

Willem Barbier.

Jan v.Bloys doen cond allen luden dat wi ghegheven hebben ghewilkoert ende gheven Willem den barbier onsen knecht om goede gunste die wi hem toe draghen ende om dienst die hi ons ghedaen heeft ende noch doen sal dat in onse stede van Scoenhoven anders nyemant dan hi sijn ambacht alse van sceren en laten doen noch hantieren en sel ten si van sinen wegghen en bi sinen wille dat dueren sel tot onsen wedersegghen.

In orconden desen brief beseghelt mit onsen seghelen ghegheven t'Scoenhoven xv daghe in december anno lxxvj.

f.111.

Jacop Mouwen zoen.

Jan van Bloys enz. doen cond allen luden want onse lieve heer en oudervader mijn heer Jan van Henegouwen heer van Byaumont was des god ghedenke tot enen erfpacht ghegheven hadde Wouter Edelinxzoen een stuc lants gheheten tveerstallant houdende achte morgghen en sesthalf hont ende een ander stuc lants gheheten die waelviertel houdende vier morgghen gheleghen in Gouderaec mit alsulken dike als daer toe behoert des die voirscr. Wouter onse lieve heer voirscr. sinen pacht ende van den dijc te houden t'onderpande gheset hadde ene halve hoeve lands gheleghen in Gouderaec tusschen Boudijn Spakers en Katerinen Jonghe Dirx lant op die tijd ende want al dit voirscr. lant bi versumenissen ons aenghecomen is soe hebben wi voir ons en voir onsen nacomelinghen ghegheven en gheven Jacop Mouwensoen en sinen nacomelinghen tot enen eweliken erfpachte die helfte van den veerstallande voirscr. gheleghen an die oestzide ende die helfte van den waelviertel gheleghen op die westzide ende twee morgghen lands in der halver hoeve voirscr. die t'onderpande gheset was in doester viertel an die oestzide mit alzulken dike als daer toe behoert te houden en te verwaren op sinen cost anxt en arbeit altoes te comen alst verstarft op enen erfnaem die de oudste en naeste daer toe is, van welken lande voirscr. men jaerlix gheven sel vier pont holl. goetghelts onsen rentmeyster aldaer die nu is of die namaels wesen sel die ons daer of rekenen sel alle jare te betalen op sinte baven daghe of binnen viertien daghe daer naest volghende in zulken paymente als men van anders onsen renten neemt op dese voirwaerde waert zake dat die voirscr. vier pont holl. goetghelts jaerlix binnen den termine voirscr. niet betaelt en worde altoes en al op enen dach soe waer dat voirscr. lant dat wi Jacop in pachte ghegheven hebben alse voirscr. is ons of onsen nacomelinghen vry en los weder aen ghecomen. Voert waert zake dat an den dijc behorende ten heelen veerstallande ter heelre waelviertel en ter halver hoeven lands die tonderpande gheset was erghent enichg ghebrec quame van diken soe mochten die ghene die daer in ghelant waren dien dijc zenbaren ende weder maken en houden of si wouden ende en deden si des niet soe quame dat alinghe lant altemale vry en los weder an ons en alle voirwaerden en pointen voirscr. te verstaen sonder enigherhande argelist. In orkonde desen brief bezeghelt mit onsen zeghele ghegheven t'Scoenhoven op des heilichs cruus dach invencio drie daghe in meye int jaer ons heren m ccc zeven en tsestich.

Presentibus, dns Jan van Langherak, Jan van Bueren, Aelbr. van Meerten.

f.111.

In alle der selver manieren dat voirscr. is soe hadde op die selve tijd en op die selve brieve Han Nouwe mijns heren open brief van der ander helfte van den veerstallande ghegheven an die westzide en van der oestzide van der westviertel in der halver hoeven die tonderpande staet dats van vi morgghen ten erfpachte in der manieren dat die brief spreect die voirscr. staet om 3lb goetsghelts siaers.

f.111v.

Item in der selver manieren heeft Claes Panneel eenen brief van der ander helfte van der waelviertel ghelegghen an doestzide dat sijn 2 morghen om xx sc. goetsghelts siaers.

Item in alle der selver manieren en op die selve tijd voirscr. hadde Gheerlof Dirx soen mijns heren opene brief van 2 morghen lands in der halver hoeven die tonderpande staet ghelegghen an die westzide van der oestviertel om xx sc. goetsghelts siaers.

Item in allen der selver manieren en op der selver tijd voirscr. hadde Heinric Han Nouwen soen mijns heren open brief van 2 morghen lands in der halver hoeven die tonderpande stont ghelegghen an die westzide van der westviertel om xx sc. goetsghelts siaers.

Soe dat alle die 5 brieve die ghegheven waren van den veerstallande wael viertel en van der halver hoeven die tonderpande stont elken van sinen deele als voir besceiden is van woerde te woerde al eens waren en te samen ghegheven en daer niet in en sceelde dan die ondersceidinghe van ghelyx deele en van den pachte in der manieren dat voirscr. is

(later bijgeschreven)

En is te weten item heeft Jan Robbijn al dat voirscr. lant van minen heer in pachte in der manieren voirscr. en dat Jan Mouwen soen te hebben plach dat heeft hi in der selver manieren in enen brieve en al tander lant voirscr. in enen anderen brieve.

v.111v.

Dirc Jans zoen heeft minen heer Janne van Bloys op ghedragghen een stuc lands dat 4 ½ demede hout tot eenen erfleen ghelegghen op catwoude en is gheheiten Rietoert dat belabt heeft op die oestzide Jan die Wael en op die westzide Claes Pieter zoen. Ende dit voerz. leen sel eerst comen op Wouter sinen jonghen zoen ende voert alst recht is ende dit voerz. goet selmen verheerghewade mit eenen roeden hacic. Dit gheschiede int jaer lxix, xxi daghe in november daer bi en over waren heer Jan van Langherak, ridder, Jacob van der Goude, Dirc van der Goude, Vrederic van der Zevender alse manne.

Ende op die selve tijt en voer die selve Claes Pelgherijns soen wort mijns heren man van 2 ½ demede lands ghelegghen op Catwoude in de grote beye die Pelgherijn Lisen zoens was te houden tot eenen onversterflike erfleen te comen na Claes doet op Pelgherijns sinen jonghen soen en van hem voert daert van recht sculdich is te comen ende in der selver manieren is Claes voerscr. mijns heren man gheworden van der helfte van eenen stuccke lands dat gheheiten is (uulbome) ghelegghen binnen den gherechte van zoutwoude. Ende beyde dese voerscr. goede te verheerghewaerden mit eenen lb. holl.

f.112.

Jan Breye.

Jan v. Bloys maken cond enz. want Jan Wissensoen van ons hilt tot enen erfleene eene hoeve lands ghelegghen tussen Scoenhoven ende Ammers ende belegghen hebbe mit erve Baernt Pieter Meyerssoen an den overe egghe Ende Louwe Vrowijnszoen an den nederen egghe streckende van der Lecke tot an die Vlist. Welc lant Jan voirz. ons opghedragghen heeft mit sine vrijen wille overmids dat hij't bi oerlove ende consente van ons vercoft heeft Janne Breyen onsen knaep Soe hebben wi om die goede gunste die wi dragghen tot Janne Breyen voirz. Ende om dienste die hi ons ghedaen heeft ende noch doen zal hem ende sinen nacomelinghen die voirz. hoeve lands verleyt ende verleyen te houden van ons ende van onse nacomelinghen tot eene onversterflike erfleene. Voorts soe hebben wi Janne Breyen voern. omdat wi willen dat hi ons te meer ghehouden si te dienen ende van goeder gunste ghegheven ende gheven te

houden twee merghen lands die ons selfs waren ende ons aenquamen van Janne van der Goude gheleghen in Heeswijk in des borchgrave land van Montfoerde enz.enz. Ghegheven tot Scoenhoven neghen daghe in februari int jaer ons heren m ccc ses ende t'sestich.

f.112.

Jan v.Bloys enz. doen cond enz. dat wi doer goede gonste verleyt hebben ende verleyen Jan Breyen onsen knape van ons en van onse nacomelinghen in lene te houden tot sinen live zeven merghen lands die gheleghen sijn in Benschop in des gherechte van IJselsteyn welc land voerz. Willekijn van Retersbeec pentier ons liefs heren ende oudevaders heer Jan v.Henegouwen van hem in leene te houden plach tot sinen live ende Jan Breye voerz. jeghens hem bi onsen wille ende consente ghecoft heeft enz. Ghegheven des dinxdaghes na onser vrouwen lichtmisse int jaer m ccc ende t'seventich.

(onder geschreven)

Ende dese vij morghen lands voerz. heeft grave Guy gegeven (Etter) van Mourzeke sinen penetier te houden tot ene rechte leene enz. 3 febr. lxxxix. na costume des hoves van hollant.

f.112v.

Wateringhe.

Jan van Bloys maken cond en kenlic allen luden dat wi ghegheven hebben en gheven voir ons en onse nacomelinghe den heer van Brederode en sinen luden van Swadenburch damme en van Rewijc ende anders den ghenen die nu ter tijd mit hem watere doir onse lant van Steyn inder Ysele om liefde en om goede gunste die wi tot den heer van Brederode en tot sinen luden voirscr. hebben dat si ene nuwe sluse legghen moghen wanneer si willen binnen hoirs selves dike dien si voertijds bi onsen ouders vercreghen hebben ende bi der ander sluse die si nu daer legghende hebben ende gheven hem oerlof voir ons en voir onse nacomelinghe die slusen ende dien dike op te doen en weder toe te legghen alsoe dicke als sijs te doen hebben zullen ende hem dat orbaer doen mach bi onsen dijgrave en hoghen heimraet al sonder arghelist. In orconde en in kennisse der waerheit soe hebben wi desen brief bezeghelt mit onsen zeghel ghegheven t'Scoenhoven des dinxdaghes na sinte martijns dach in den zomer int jaer ons heren m ccc seven en tsestich.

Presentibus, dns Jan van Langherak, ridder, Aelbrecht van Meerten, kanunnic, Jan van Bueren.

f.112v.

Scoenhoven.

Jan van Bloys enz. maken cond en kenlic allen luden dat wi om te verhoeden en te scuwen enighe scoet of twist die gheweest heeft voertijts of namaels vallen mochte tusschen ons en onsen luden van Scoenhoven bi goeden rade overdragen sijn dat wi en onsen nacomelinghen heren van Scoenhoven voeret meer tot eweliken daghen so wanneer dat men ene proeve besitten zal te Scoenhoven in onse stede van den hoghesten rechte altoes enen wittachtighen man mit ons nemen moghen dien wi willen over die prove te wesen ende als ons selve niet en ghenoeghet te doene soe mach onse baeliu aldaer die inder tijt wesen zal die voirscr. proeve besitten ende enen wittachtighen man tot hem nemen inder selver manieren dat wi selver doen soudien die ons of onsen voirscr. baeliu ghenoeghet al sonder arghelist. In orconde dese en in kennisse der waerheit soe hebben wi desen brief bezeghelt mit onsen zeghele ghegheven t'Scoenhoven des woensdaghes na sinte martijns dach in den zomer int jaer ons heren m ccc seven en tsestich.

Presentibus, dns. Jan van Langherak, ridder, Aelbrecht van Meerten, kanunnic, Jan van Bueren.

f.113.

Texel.

Jan van Bloys enz. doen cond allen luden wany onsen lieve en ghetrouwe lude van Texel een hantveste hadden van grave Florens (wileer) grave was te Hollant des god ghedenke welke hantveste ghegheven was int jaer ons heren m cc lxxxix des vridaghes voir meydach daer die zeghel mit onghewalle of te broken is. Soe hebben wi hen voir ons en voir onse nacomelinghen alzulken graci ghedaen ende recht ghegheven ellelike durende ams inder hantveste bescreven was in der manieren als hier na volghet dat is te verstaen dat wi weghe borghen ende vesten moghen maken in hoir lant willen wi groet willen wi cleyn ende si zullen ons gheven thyende den elften scoef en de tyende te nemen daert coren wasset ende als dat coren tyenbaer is soe sel die ghene wies dat coren is driewarf roepen den tyendenaer elkewarf alsoe dat ment horen mach over senen acker ende coemt die tyendenaer dan niet soe sel die ghene des dat coren is den tyende wtsetten bi sijnre ghebure en den tyende houden een atmael. Is dat daer na an den tyende scade gheschiet dat en sal men den manne des dat coren was niet tyen waer dat zake dat men enen man aensprake dat hi onrecht ghedaen hadde an tyende die soude sijn onschulde doen mit tween sijnre bueren en ghebrake hem an sine buere soe name hi twee sijnre maghe . Ghebrake hem an sine maghe soe soude hi ons den tyende vierscat ghelden, voert zullen si ons gheven cyens vronescult ende heervaert ghemeenlike ten ware dat wi hem der heervaert verdraghen willen, voert zullen wi hem setten enen rechte wt onsen lande of wt des graven lande van hollant dien wi willen recht recht rechtende bi scepene wisinghe waer dat ons die rechter (onnut) dochte en de bueren wi souden enen anderen die ons goetdochte en den bueren nut waer. Waert dat een man sijn hant leghet op die heylighen sonder oerlof jof af dede sonde oerlof jof stempelde dat hem die rechter ghene boete of en naem en waer dat die clagher sprake en die rechter mach scepene setten en ontsetten bi den bueren wanneer hi wil waer een man spreect an een lant die lantghenoete die dat lant helpen souden diene zullen ghene boeten ghelden mer dien tlant ontgaet sel ons ghelden xlii sc. Ende des ghelijc sel wesen van den dike waert dat men enen man aensprake van diensten die niet openbaer en waer die soude sijn onschulde doen bi 2 sijnre ghebueren, ghebrake hem an den bueren hi name sijnre maghen, ghebrake hem an den maghen hi daedse eenrehant ten heylighen tusschen tween sonnescijn. Waer dat een man den anderen wonde sonder (leemde) hoe veel der wonde sijn hi en verbuert mar 1 lb. op die wijl jeghens ons waert dat een man den anderen een hant of enen voet of slaet of oeghe wtsteect hi verboert tyen pont jeghens ons. Die seven ghebueren die gheven een heel boedel diene verbueren en gheen boete mer dient ontgaet verboert xlii sc. Die anevant doet an een paert aen een koe of dier ghelike die verboert twee sc. Gheen goet mach besterven an ons .. en sie buten eersten lede ende si zullen varen doer ons lant mit zulker tolne alsoe varen die van kennemerlant. Alle poynte die hier besceven sijn of niet besceven en sijn zullen wi rechten of onsen rechteren doen rechten bi scepene en bi zulken rechte alsoe coninc Willem van Aelmaengen wilneer plach te hebben tot vroen en tot oddorp om dat wi willen dat desen dinghe vast en ghestade sijn enz. (geen datum).

f.113v.

Texel.

Jan van Bloys enz. doen cond allen luden dat wi ghegheven hebben en gheven en gracy ghedaen van alrehande poynten voir ons en voir onse nacomeninghen onsen lieven en ghetrouwen luden van Texel alsoe hier na ghesceven staet. Dat is te verstaen dat si hoir slusen en wateringhen legghen en maken moghen bi onsen dijgrave heemraders en waterscap van den lande sonder enich ghelt ons of onsen luden dijgrave daer of te gheven, voert soe mach elc man die wil conijn vaen in den zeediken en in den marsschen sonder yet jeghens ons te verboerne. Voert wie over vrede vecht daer en zullen sijn maghe niet mede belast wesen jeghens ons die raeds ende daede onschuldich sijn het en waer bi wille ende den meesten

hoep van sinen beste maghen, die bode sal hebben van elken beeste die hi scut op den dunen enen grote slechts ghelts en niet meer. Ende alle poynte voirschr. sonder arghelist ende zullen duren tot onsen wedersegghen om dat wi willen dat alle dese poynte vaste ende stade bliven en wel ghehouden als voirschr. is soe hebben wi enz. (geen datum).

f.114.

Heer Jan van Pollanen de jonghe hout van minen heer na heer Willems doet van Duvenvoerde 100 lb. holl. t'siaers gheleghen inden groten wairde ten erflene ende heer Willem heeft die lijftocht aen dat (sciende) voer Cameric int jaer van xxxix op sinte lambrechts daghe des heeft hi mijns heren openen brief.

Item heer Willem van den Dongen heer Willems soen van Duvenvoerde hout van minen heer ten erflene xxiiii morggen landsgheleghen te Capelle biden Ysel int jaer van xl opden derthien avond des heeft hi mijns heren openen brief

f.114v.

Brouwen. (Gouda)

Dit is die ordinanche ende overeen drage van den brouwen te Goude In den eersten dat elc man die brouwen wil brouwen mach tweewerve die weke ende elc brouwet zal hebben xiiij vate Ende daer toe zullen wesen xlv scepel goids haverens mouts Ende ix scepele goits tarwens mouts Ende dat zalmen wegghen bi twee wittachtighe mannen diere toe ghenomen zullen worden bi den scouten ende gherechte van der Goude daer toe ghesworen Ende die manne zullen xij brouwers verwaren Ende die brouwers zullen zweren ten heylighen also veel goids mouts in elc brouwet te doen ende ghewicht als voerschr. is Ende vonden die twee verwaerres dat enich brouwe in ghebreke viele van den moute ende ghewichte dat souden zi brengghen an den scouten ende ant gherechte voerz. Ende so soude die brouwer verboert hebbe 1 lb. dat soude hebben die heer, die stede ende die verwaerres elc 1 derdendeel Ende die voerz. brouwer en soude binnen ene maent daer na niet brouwen . Ende brouwede hi binnen dier maent so en soude hi binnen enen jare daer na niet brouwen ende brouwede hi binnen enen jare so soude hi ins..len dat te beteren bi minen heer ende der stede. Ende en zal nyemende brouwen hine hebbe zinen eer ghedaen voer den scouten ende gherechte te doen ten brouwen als voirschr. is mar waer tzake dat nijn heer vinden konde dat die neringhe also beterde ende dat nutte ware der stede so soude men dat toe helpen dat men driewerve die weke brouwede ende altoes te verbeteren bi nibeb heer ende de stede. Dit was ghedaen bi mijns heren eade t'Scoenhoven xx daghe in aprilie als heer Jan van Langherak, Gherit van Oesterwijn, Jan van Bueren, Jacob en Dirc van der Goude. Ende biden nuwe ende oude Gherijt van der Goude int jaer lxvi.

f.115.

Brouwen te Goude.

Dit sijn poynten van der ordinanchen van den brouwen ter Goude gheordineert en overdraghden bi minen heer heer Janne van Bloys heer van Scoenhoven en van der Goude en bi sinen rade en bi borghermeesters scepenen en anders goede knapen van der stede van der Goude. Welke poynten gheordineert waren des woensdaghes na ambrosij anno lxvii.

In den eersten sel men doen in elc brouwet biers ix sacker haverens mouts ende elc sac sal wegghen cxxxv lb. Ende drie sacker tarwes mouts elc sac va cxxxv lb. weghens Ende dit mout sel wel ghemelt wesen Ende daer toe sal men brouwen xiiij vaten biers sonder arghelist mer men moet van dien moste wel min brouwen dan xiiij vate biers om te maken sonder begrip enz.

Item sellen wesen elx jaers xxvi brouwers daer elke 2 binnen dien jare eene maent lanc die wichte van den voirscr. moute bewaren sellen op horen eet ende waert sake dat si daer yemant in droeghe of niet an den rechter en brochten als si sculdich waren te doen soe verbuert hoirre ighelijc 3 lb. tot mijns heren en der stede behoef. Ende als zijt gheweghen hebben soe sellen si daer bi bliven ter tijd toe dattet mout al nat ghemaect is in die cupe op die selve boete die voirscr. is.

Item waer dat sake dat men vonde dat yemant meer biers brouwede dan voirscr. is of dicker dan tweewarf die weke die verbuerde 3 lb. of coft yemant ieghens die brouwers dat bier dat overghebrouwen waren die coep ende vercoep verbuerde elc 3 lb. tot mijns heren behoef der stede en der ommeghanghers elken 1 dardendeel. Ende wat bier men vint dat overghebrouwen is dat is verbuert totten boeten ende dat bier selmen int gasthuus draghen die armen mede te laven.

Item waert sake dat mijns heren thinsenaers in enighe brouwers huus quamen daer si vonden dat alsoe niet ghebrouwen en waren als mijns heren ordinanche houdt soe mach die een int huus bliven en die ander wtgaen aenspreken twee poerters en dat beleiden mit dien 2 poerters en soe wie alsoe beleit wordt verbuert 3 lb. Ende waer eenich poerter die den thinsenaer wegherde mit hem te gaen om die voirscr. beledinghe te doen die verbuerde 1 lb. En die voirscr. boeten sellen hebben mijn heer en die stede.

Item waer dat sake dat die thinsenaer yemant in ghebreke vonden of wisten van deser ordinanchen en si dat niet aen enbrochte alsoe dicke als men se daer of in broken vonde soe verbuerde si 3 lb. half minen heer en half der stede.

Item waert sake dat yemant den thinsenaer keeren wilde in sijn huus te gaen of hinder daer in doen als si omme ghinghen om orbaer van den assise dat soude staen tot mijns heren en der stede correctie. Ende alle poynten te verstaen sonder eenigherhande arghelist ende altoes ten verbeteren en goetdenken mijns heren en der stede.

Presentibus, Jan van Bueren, Vrederic van der Zevender, baeliu, Willem Allardi. Gherit Johannis

f.115v.

Jan v.Bloys bi der ghenaden gouds hertoghe van Gelre, grave van Zutphen doen cont allen luden dat wi sculdich sijn van rechte wittachtighen scout Jacob Dukint poerter t'Dordrecht hondert dobbelen mottoenen die wi hem gheloeft hebben ende gheloven in goeden trouwen wel te betalen binnen meydag naest comende sonder enigherhande arghelist. In oerconde dese brief beseghelt mit onsen zeghele ghegheven t'Scoenhoven des sonnendaghes na sinte Barberendach.(zonder jaartal).

f.115v.

Jan v.Bloys enz. maken cond allen luden dat wi om beden wille ende verzoec van Jan Berwoutssoen onsen manne verleyt hebbe ende verleyen Sophyen van Dalem die nu sijn wijf is alsulc erve als hi van ons houdende is ghelegghen in de parochie van onsen dorp van Westzaenden dat wi an beiden ziden mit erven belegghen hebben Ende gheloven der voirz. Sophyen daer in te houden als recht is lijftochten behoudelic of yemant recht of toesegghe heeft .. al of deel van desen voirscr. lande dat hi des hier bi niet (ontvoert) en sel wesen. Ende al te verstaen sonder arghelist. Hier waren bi en over onse ghetrouwe manne alse her Jan van Langherak, ridder, Gherit die Borgher, knaep, en anderen. In oerconde des briefs beseghelt mit onsen zeghele ghegheven t'Scoenhoven saterdaghes na sinte Katrinendach int jaer duserit driehondert een ent seventich.

f.116.

Jan Berthouts soen van Assendelf hout van minen heer 1 ½ gaerde lands als sijn brief en houden daer na droech hi minen heer ½ gaerde lands op ghelegghen int selve lant overmids dat men hem oerlof gaf 1 huus of te breken dat op de voirsch. gaerde stont.

f.116.

Mijn heer verliede Willem van Haerlem Janssoen van haerlem 1 thiendeken tot wermer dat Jan scide dat ten hoechsten omtrent 1 oude sc. siaers waert is dat den voirsch. Willem van sijnre moeder soude aencomen wesen en Willem van Adrichem sijn oudevader te houden plach en dit verliede hem mijn heer behouden hem en yghelike sijns rechts. Voor mijne heer Ghijsbrecht van Langherak en Vrederik van der Zevender lxxxvi
Hier na te vraghen den scout aldaer en bueren.

f.116v.

stuk in latijn

f.117.

heer van Barbenchon.

Jan v.Bloys enz. doen cond allen luden want wi onsen lieven neve de heer van Barbenchon ghegheven hebben ende bewijst op onse tienden ten Tolne vierhonderd Bruxsche scilde t'siaers in der manieren dat die brieve houden die hi van ons daer of heeft enz. Ghegheven ter Tolne des sonnendaghes na der 11000 maghedendach int jaer m ccc ses ende t'sestich.

f.117.

Wendelmoet Gherijt Wilden.

Jan v.Bloys enz. doen cont allen luden dat wi om beden wille Gherijt Wilden ons camerlings ghegheven hebben ende ghewilkoirt Wendelmoet sinen wive die Jacop Bottermans dochter was huer lijftocht an die twintich pont holl. t'siaers die Gherijt voirsch. van ons in lene hout en daer hi onse man of is die wi Wendelmoeden voirsch. bewijst hebben en bewisen an onse renten van Scoenhoven en van der Goude. Ende waert zake dat Wendelmoet voirsch. langher levede dan Gherit voern. soe ombieden wi onsen rentmeester van Scoenhoven en van der Goude die nu is of namaels wesen sal dat hi der selver Wendelmoede die voirsch. twintich pont holl. alle jare also langhe als si leeft wtreyken en betalen die ene helfte op sinte jans misse in den zomer en die ander helfte op kersavond daer na volghende enz. enz. Ghegheven des donredaghes na st.Bavendach int jaer m ccc sesse ende t'sestich.

f.117v.

Jan Cattenborn.

Jan v.Bloys enz. doen cond allen luden dat wi om dienst die ons Jan Cattenborn onse koc ghedaen heeft ende noch doen zal hem ghegheven hebben ende gheven also langhe als hi levet twintich lb.holl. t'siaers enz.

Ghedaen t'Scoenhoven des donredaghes na st.Bavendach int jaer m ccc ses ende t'sestich.

f.117v.

Lisebet Cattenborns.

Jan v.Bloys enz. doen cond allen luden dat wi ghegheven hebben ende gheven voir ons ende onse nacomelighen Lysebetten Aechtendochter die Jan Cattenborn ons cox wijf is sestien lb.holl. t'siaers also langhe als si leeft die wi huer bewijst hebben ende bewisen jaerlix t'ontfanc an onsen renten van Scoenhoven en van der Goude. Ghegheven t'Scoenhoven des donredaghes na st.Bavendach int jaer m ccc sesse en t'sestich.

f.118.

Aemstelredamme.

Jan van Bloys enz. doen cond allen luden dat wi voir ons en voir onse nacomelinghen mit ghevoeghe overdragen sijn mit onsen goeden vrienden van der stede van Aemstelredamme alsoe dat alle hoir poerters en hoir goet daer hoorre stede voirsch. waer teyken bi is of sekerheit ghedaen worde te brenghen tot eweliken daghe tollenvry varen sellen voir alle onse tollen die wi hebben in hollant te lande en te watere sonder eenich afbrec of lette wtgheset den merctollen die in onsen steden van Scoenhoven ende van der Goude gheleghen sijn daer sellen si tollen ghenen van horen goede ghelijc andren luden die daer tollen pleghen te gheven. Ende daer om sellen si ons en onsen nacomelinghen gheven en betalen alle jaer tot ewelike daghen vier cuelsche (Keulse) marc lodichs zulvers sestien loet voir die marc gherekent te leveren alle jaer onsen rentmeyster ter Goude of die in sine stede wesen zal altoes op den meydach of binnen xiiii daghen voir of na ombegrepen ende waert dat si des niet en deden soe mochten wi van horen goeden waer wijt wouden binnen den onsen aentasten en nemen voir die vier marc achte marc alsulkes zulvers als voirsch. is alsoe dicke als sijt verzumeden. Voert waert dat enich poerter van der stede voirsch. eenich tolbaer goet voer eenighe onse tolln voerde in sinen naem onvertollet bi sinen weten dat sal die gheene diet voert verbeteren mit sijns selfs goede tot onsen wille ende des en soude hoir die stede voirsch. niet onderwijnde dat wi na beteringhe stonden en daer bi so en sal die stede van aemstelredamme of eenich ander poerter aldaer gheen recht noch goet mede verliesen ende al te verstaen sonder arghelist. Ende want wi willen dat dit vaste en stede si en welghehouden worden tot ewelike daghen soe hebben wi daer op desen openen brief ghegheven bezeghelt mit onsen zeghele tot eenre orkonde en in kennisse der waerheit ghegheven t'scoenhoven op sinte margriete dach int jaer ons heren m ccc seven en tsestich.

Presentibus dns. Jan van Langherak, ridder, Aelbrecht van Meerten, kanunnik, Jan van Bueren.

f.118v.

Aemstelredamme.

Wi scepenen enz. maken cond en kenlic allen luden dat wi voir ons en voir onsen medepoerters van onser stede van Aemstelredamme ghemeenlic en voir onse nacomelinghen mit ghevoeghe overdragen sijn mit eene edele en moghende heer heer Janne van Bloys heer van Scoenhoven en van der Goude voir hem en voir sinen nacomelinghen alsoe dat alle onse poerters en hoir goet daer onse voirsch. stede waer teyken bi is tot eweliken daghen tollenvry varen sellen voir alle sinen tolln die hi heeft in hollant te lande en te watre sonder eenich ofbrec of lette wtgheset sinen marctolln die in sinen stede van Scoenhoven en van der Goude gheleghen sijn daer wi tolln sellen gheven van onsen goede ghelijc andren luden die daer tolln pleghen te gheven. En daer om soe sellen wi en onsen nacomelinghen gheven en betalen alle jare tot ewelike daghen vier cuelsche marc lodichs zulvers xvi loet voir die marc gherekent te leveren alle jaer sinen rentmeyster ter Goude of die in sine stede wesen zal altoes op den meydach of binnen xiiii daghen voir of na ombegrepen ende waert dat wi des niet en deden soe mochte onse gheminde heer Jan van Bloys voirsch. of sinen nacomelinghen of dien zijt bevelen zullen doen aentasten en nemen van onsen goede waer dattet ghevonden worde binnen den somme voir die vier marc viii marc alzulx zulvers als voirsch. is alsoe dicke alsoe wijt verzuumden. Voert waert dat eenich onser medepoerteren in sinen naem eenich tolbaer goet voerde voir eenighe tolln ons ghemijnds heer voirm. overtollet dat sel die ghene diet voert verbeteren mit sijns selfs goede en des sel hoir onse voirsch. stede niet onderwinden dat onse gheminde heer voirm. die beternissche crighe alsoe redenlic wesen sal. Ende daer bi en zel anders gheen onse poerter sijn goet mede verliesen. Ende al te verstaen sonder enigherhande arghelist. In orkonde deser enz. datum ut supra.

f.119.

Stavoren.

Jan van Bloys enz. maken cond allen luden dat wi voir ons en voir onse nacomelinghen ghegheven hebben en gheven der stede van Stavoren dat alle hoir poorters en goet die der stede voirsr. waerteyken brenghen tollenvry varen zullen voir onse tollen tot Spaernedamme sonder enighe lette van onsen orbaer aldaer duerende tot ewelike daghen toe daer si ons en onsen nacomelinghen om gheloeft hebben en sculdich sijn te gheven alle jaer tot ewelike daghen toe drie cuelsche marc zulvers xvi loet voer den marc gherekent te betalen onsen rentmeyster ter Goude of die in sijn stede wesen zal altoes op den meydach of binnen xiiii daghe voir of na onbegrepen. Ende waer dat si des niet en deden soe mochte wi van hoere goede waer wijt vonden binnen den onsen aentasten en nemen voir die drie marc vi marc alsulcx zulvers als voirsr. is alzoe dicke als zijt verzuumden, mer waert zake dat die voirsr. stede van Stavoren van den vreyen vernielt of verderft worde soe ne zullen si dit voirsr. zulver niet gheven voir die tijd dat si weder varen doir Spaernedamme. Ende al te verstaen sonder arghelist ende want wi willen dat dit vast ende ghestade blive in allen manieren als voirsr. is soe hebben wi daer op desen openen brief ghegheven bezeghelt mit onsen zeghele tot eenre orkonde. In kennisse der waerheyt ghedaen en ghegheven t'Scoenhoven des dinxdaghes na sinte martijns dach in den zomer int jaer ons heren m ccc seven en tsestich. Presentibus dns. Jan van Langherak, ridder, Aelbrecht van Meerten, kanunnik, Jan van Bueren.

f.119v.

Ermhout.

Jan v.Bloys enz. doen cond allen luden dat wi om bede wille Ermhout Mathijs soens ghewilkoert hebben en gheloeft voir ons en onse nacomelinghen Ermboude voirsr. en sinen nacomelinghen dat wi vijf roeden erves van onsen hoflande ter Goude ghelegghen neffens sijn huus van meyster Willams zuutwaert neymande verhueren noch verpachte vercoepen noch gheven en sellen dan Ermboude voirsr. of sinen nacomelinghen die besitter wesen sellen van den voirsr. huse daer Ermhout in woent ende ghebrect dat ment wtgheven of vercoepen soude soe soudent Ermhout of sine nacomelinghe voirsr. hebben voir anders yemant om den penninc diet ghelden soude ende alse redelic ware ende meene dattet voirsr. erve onbetimmert bleve en ombeset. In orkonde desen brief bezeghelt mit onsen zeghele ghegheven t'Scoenhoven vier daghe in oestmaent int jaer ons heren m ccc acht en tsestich.

f.119v.

Naghel.

Jan v.Bloys enz doen cond allen luden dat wi voir ons en voir onse nacomelinghen ghegheven hebben en gheven Gheride Naghel onsen knecht om dienst dien hi ons ghedaen heeft en noch doen sel die hofstede ant Merctvelt in onse stede van der Goude alsoe groet als hi se nu betimmert heeft hem en sinen erfnamen rustelic te besitten en erflic daer hi onsen rentmeyster ter Goude die nu is of namaels wesen sel jaerlix of betalen sel vier scellinghe hollants slechts ghelths siaers ende hi noch sinen erfname en moghen dat voirsr. huus mitter hofstede niet vercoepen ten si bi oerlove en consente van ons of van onsen nacomelinghen sonder arghelist. In orkonde desen brief bezeghelt mit onsen seghele ghegheven t'Scoenhoven vijf daghe in oestmaent int jaer ons heren m ccc acht en tsestich.

Presentibus dns. Jan van Langherak, Aelbrecht van Meerten, Jan van Bueren.

f.119v.

Jan Tolnaer.

Wi Ghisebrecht Neyse en Didderic die Grave scepene tot Woudrichem orkonde mit desen

brieve bezeghelt mit onsen zeghelen dat joncfrou Machtelt Ricout heer Goetscalc zoen dochter op droech en gaf Goetscalc horen broeder tot behoef heer Jans van Bloys heer van Scoenhoven en van der Goude vijftien morghen lants alsoe groet en alsoe cleyn als si ghelegghen sijn in den gherichte van Woudrichem daer drie morghen of ghelegghen sijn opt oeken daer Claes lant Uten campen ghelegghen is aen die een zide ende die ghemeyne steghe an die ander zide drie morghen in die henghemenghe daer des persoens lant van Woudrichem leghet aen die een zide ende Aernt Jan Neuden soens soens lant aen die ander zide. Ene halven morghen lants ghelegghen opt hoghe lant alsoe groet en alsoe cleyn als hi daer ghelegghen is die helft van vijf merghen lants anderhalf hont min gheheyten der armerlude camp daer ghisebrecht Neysen lant scepen voirn. leghet aen die een side ende Aernt Jan Neuden zoens soens lant aen die ander zide seven hont lant ghelegghen in die middelste weyde daer heer Aernt Reyners zoens ende Willem Reyners zoens kinderen lant leghet aen die een zide ende Aernt Claes zoens lant aen die ander ziden vijf talven merghen lants ghelegghen in die oude broeke daer Ghisebrecht Neyse lant scepen voirscr. leghet aen die een zide ende Jan Loys kinderen lant aen die ander zide. Enen halven marghen lants ghelegghen in die enghe daer den steenhoeven camp leghet an die een zide en Tielmans Rueden lant aen die ander zide ende een stuxkin lants ghelegghen in den enghe daer Jans Roeden lant leghet aen beyden syden ende si verteech daer op ende verhalmede daer na op tot heer Jans behoef van Bloys voerscr. voert quam joncfrou Mechtelt voirscr. en ghelovede den voertghenoemde Goetscalc haren broeder ter behoef heer Jans van Bloys voirscr. dit voersproken lant te waren jaer en dach alsoe men erve sculdich is te waren binnen vryhede ende allen voercomen af te doen en alle voerplecht. Ghegheven int jaer ons heren m ccc acht en tsestich des dinxdaghes na sente peters dach ad vincula.

f.120v.

Eggaert van der Vlist.

Jan van Bloys maken cond allen luden dat wi ghewilkoert en ghegheven hebben Egaerde van der Vlist sijn testament mede te maken twe termine nader tijd dat hi wt leve ter doet ghecomen sal wesen van zulker pency als hi jaerlix tot tween tiden van ons te hebben pleecht dat is te verstaen den pacht van enen heelen jaer dien te keren in aelmissen tot des gheens behoef die daer meest reden toe heeft. Ende al sonder arghelist. In orkonde deser brief bezeghelt mit onsen zeghel ghegheven t'sinte Gheerdenberghe des dinxdaghes na alderheylighen dach int jaer ons heren m ccc acht en tsestich.

Pres. Dns Jan van Langherak, Aelbrecht van Meerten, Jan van Bueren.

f.120v.

Poncyen Gheneen zoen en Bely sijn wijf.

Jan van Bloys maken cond allen luden dat wi om bede wille van goeden luden ende oec om dienst die ons daer voir ghedaen is quyt ghesconden hebben en quytscelde alzulc recht en toesegghen als wi nu hebben moghen ter besterfnisse of ernnisse die ons toebehoren mach en aencomen van Poncyen Gheneen zoen ende Belyen Brunaerts dochter die nu sijn wijf is overmids dat si beide bastaerden sijn. Ende laten ons lief wesen dat si bi haren live daer mede doen horen vryen wille ende na horen doet te comen daert van rechte comen zal ende sculdich is te comen ende al sonder arghelist te verstaen. In orkonde desen brief bezeghelt mit onsen zeghele ghegheven des donredaghes na sinte martijns dach in den winter int jaer ons heren m ccc acht en tsestich.

Pres. Dns. Jan van langherak, Aelbrecht van Meerten, Jan van Bueren.

f.121.

Jan van Bloys enz. maken cond allen luden dat wi om beden wille Jan Breyen ons knapen

verliet hebben en verliën Belien die nu ter tijt sijn wijf is haer lijftochte an die minre helfte van eenen hoeven lands ghelegghen tusschen Scoenhoven en Ammers die Jan voerscr. van ons te leene hout ende belegghen hebben mit erve Baernt Pieter Meyers soen an den overen egghe en Lauwe Vrowijns zoen an die nederen egghe streckende van der Lecke tot an die Vlist. Ende gheloven Belyen voerscr. daer in te houden als zede en recht is in orkonde enz. ghegheven des donredaghes na sinte martijns dach in den winter int jaer ons heren m ccc acht ende tsestich.

f.121.

Jan van Bloys enz. maken cont allen luden dat voer ons comen is her Jan van der Goude onse ridder en man en droech ons op mit sinen vrien wille tot sijns broeder behoef Jacops van der Goude ons knapen acht morghen lants ghelegghen an die oestzide van onser stede van der Goude also groet en clein als si daer ghelegghen sijn ende belegghen hebben mit erve Willem Heynen zoen an die oestzide en meester Willem zonder Danc an die westzide streckende van den dike an den thiendewech die welken Jacob voerscr. wi dit lant rechtevoert weder verlyen en is daer ons man of gheworden dat van ons te houden in leen in zulker manieren alst her Jan voerscr. van ons te houden plach hier over waren onse ghetrouwe manne Jan van Langherak ridder Jan van Bueren en anderen. Ende want wi willen dat dit vaste en ghestade blive so hebben wi desen brief bezeghelt mit onsen zeghele. Ghegheven int jaer ons heren m ccc acht en tsestich des vridaghes na st martijns daghe in den winter.

f.121v.

Goodscalc van Brakel.

Jan van Bloys enz. maken cond allen luden dat voir ons quam Goodscalc van Brakel onse knaepen droech ons op mit sinen vryen wille vijftien morghen lants alsoe groet en cleyn als si ghelegghen sijn in den gherechte van Woudrichem daer drie merghen of ghelegghen sijn opt ocken daer Claes lant van den Campe ghelegghen is an die een zide en die ghemeyn steghean die ander zide, drie morghen in die (henghemenghe) daer des persoens lant van Woudrichem leghet an die een zide en Aernt Jan Neuden zoens soen lant an die ander zide. Enen halven morghen lants ghelegghen opt hoghelant alsoe groet en cleyn als hi daer ghelegghen is, die helft van vijf morghen lants anderhalf hont min gheheiten der armerlude camp daer Ghisebrecht Neysen lant leghet an die een zide en Aernt Jan Neuden zoens lant an die ander zide, zeven hont lants ghelegghen in die middelste weyde daer heer Aernt Reyniers soen en Willem Reynierssoens kinderen lant leghet an die een zide en Aernt Clkaes soens lant an die ander zide, vijftalve morghen lants ghelegghen in die oude broeke daer Ghisebrecht Neysen lant leghet an die een zide en Jan Loys kinde lant an die ander zide. Enen halve morghen lants ghelegghen in die enghe daer den steenhoven camp leghet an die een zide en Tielmans Rueden lant an die ander zide, ende een stuxkelands ghelegghen in den enghe daer Jans Rueden lant leghet an beyden ziden welc lant voirsr. wi den voirn. Goodscalc en sinen nacomelinghen verleyt hebben en verlyen van ons en onsen nacomelinghen te houden tot eenen onversterflichen erflen ende men salt verheergewaden mit eenen roede sperwaer. Ende om dienst dien ons Goodscalc voirsr. ghedaen heeft en noch doen sel en om goede gunst die wi tot hem draghen soe hebben wi hem te helpen ghegheven dit voirsr. lant mede te coepen vijf en twintich pont groet payments. Hier over waren onse ghetrouwe manne Jan van Langherak, ridder, Jan van Bueren en anderen. In orkonde hier of soe hebben wi desen brief bezeghelt mit onsen zeghele ghegheven int jaer ons heren m ccc acht en tsestich des donredaghes na sinte martijns dach.

f.121v.

Jan v.Bloys enz. doen cond allen luden dat wi van heer van Arkel Culenborch ende sinen ondersaten die onse vyande niet en sijn om seker saken ende redenen die wi daer of verstaen

hebben verliet hebben ende verliën eens verzoex van alsulken leene alsoe hi ende sijn ondersate voerz. van ons ende van onser liever ghesellinne der hertoghinne van Gelre ende Gravinne van Zutphen houdende sijn ende hebben hem ghewilkoert enz. Ghegheven des vridaghes na onsen vrouwendach conceptio dusent driehondert twee en t'seventich.

f.122.

Poelgheest.

Jan v.Bloys enz. doen cond allen luden dat wi om dienste die ons Jan v.Poelgheest onse knaep ghedaen heeft ende noch doen zal Ende om goede gunste die wi tot hem draghen ghegheven hebben ende gheven vijftich pont holl. slechts ghelts s'iaers tot sine live enz.

Ghegheven t'sinte Gheerdenberghe int jaer m ccc acht ende t'sestich des donredaghes na sinte Martijnsdach in de winter

f.122.

Jan v.Bloys enz. maken cond allen luden dat wi voer ons ende onse nacomelinghen ghegheven hebben Ghisebrecht Molnaerssoen onsen knecht ende sinen nacomelinghen om dienste die hi ons ghedaen heeft ende noch doen sal zestalf ghemet lands die Kempen Kempen soens waren en ons weder aenghecomen sijn die ghelegghen sijn int oestende die sceldijc ant westende die waterganc, an die zuutzide Heyne Busint en noertzide Jan Oitierssoen voert soe hebben wi ghegheven Ghisebrecht voern. zulke husinghe en hofstat als ten voerscr. lande behoert die Claes Kempensoens waren welc land husinghe en hofstat voerscr. also als si ons aenghecomen sijn wi verlyet hebben Ghisebrecht voerscr. voer ons en voer onse nacomelinghen tot enen onversterflichen erfleene. Voert hebben wi den voerscr. Ghisebrecht gheerloeft van gracen t'voerscr. goet voer eyghen en voer vri te vercoepen met zulk ghelt als daer of comen sal weder te belegghen an erve daers hem ghenoeghet en van den erve dan onse man te worden en dat gheliker ... van ons en van onser nacomelinghen tot enen onversterflichen erfleene te houden. Dit voerscr. goet te verheerghewaden mit enen roden havic. Hier waren over onse ghetrouwen manne heer Jan van Langherak, ridder, Goedscalc van Brakel en Jan Breye. In orkonde desen brief beseghelt mit onsen zeghele ghegheven t'Scoenhoven xx daghe in julio int jaer ons heren dusent driehondert en tseventich.

f.122v.

Gribber.

Jan van Bloys enz doen cont allen luden dat wi verliet hebben en verliën Claes den Grubber drie deemden lands ghelegghen op Catwoude mit alzulker husinghe tymmeringhe als daer op staet die Garbrant die Grubber sijn broeder van ons plach te houden, welke drie deemden lands mitter husinghe en tymmeringhe voerscr. also als si ghelegghen sijn Clays voernoemt en sine nacomelinghen houden sellen van ons en onse nacomelinghen tot ene erfleene altoes te comen op eenen man die de naest is van der zwaertzide also langhe als er een afterzusterkint is datter toebehoert, te verheerghewaden mit eenre jaerrente. Hier waren over als manne Daem Mattensoen, Gherit die Wilde en Lubbrecht van Rikle. In orkonde desen brief beseghelt mit onsen seghel ghegheven tot Scoenhoven xvi daghe in december int jaer ons heren m ccc neghen en tsestich.

f.122v.

Item verlyede mijn heer Kerstinen Willam Beckevoertsdochter dat Floren Claessoen hoor man ontfinc als voogt viij merghen lands ghelegghen bi Wilghenkerc die Willam voirz. van minen heer hilt alsoe als si ghelegghen sijn tot enen onversterfliche borchleene welc lant belegghen heeft die kerclane van Wilghen boven ende mijn heer selve beneden mit lande gheheten die Nesse. Dit gheschiede des donredaghes na st.Margrietdach int jaer lxx daer over waren als mannen

heer Jan v.Langherak, Jan Botterman Gheerlofssoen ende Gherijt de Wilde.

f.123.

Jan van Bloys enz. maken cond allen luden want heer Reynier Dener ons opghedraghen heeft tot enen vryen eyghen sine woninghe te Lisse mit vijf morghen lands binnen den hiemwarve alsoe als si ghelegghen sijn. Soe hebben wi hem de voirscr. woninghe mitten erve weder verlyet van ons en van onsen nacomelinghen hem en sinen nacomelinghen te houden ten rechten erfleene sonder versterven. Ende dir voirscr. goet sel men an ons en an onsen nacomelinghen verzoeken en verheerghewaden mit enen roeden havic of vijf scellinghe grote daer voor altoes alst verscinen sal voor onsen casteel tot Scoenhoven. In orconde desen brief beseghelt mit onsen seghelen ghegheven t'Scoenhoven op st laurens dach int jaer ons heren m ccc en tsestich.

Pres. Jan van Langherak, Aelbrecht van Meerten.

f.123.

Jan van Bloys enz. maken cond allen luden dat voer ons quam Heinric Claessoen en droech ons op mit sinen vrien wille sijn halve huus mit sijnre selver hofstede daer hi nu ter tijd in woent ende anderhalf hondert zaetlands dat die soede hiet ghelegghen binnen desen vier merken an die noertzide ende opt westende Nanne Hanninxsoen, Rike Beymt op die zuutzide ende op dat oestende Stierman Wibrant, welke halve huus en halve hofstede ende land voerscr. wi den voerz. Heiric weder verliet hebben en verliet van ons en van onsen nacomelinghen hem en sinen nacomelinghen te houden tot enen onversterflichen erfleene. In orconde desen brief beseghelt mit onsen seghel ghegheven ter borch in Texel op st sextijn avond int jaer ons heren dusent driehondert en tsestich.

f.123.

Jan van Bloys enz. maken cond allen luden dat wi ghegheven hebben en gheven van gracien onsen goeden luden van Texel tollen vri te varen in onser stede van der Wijc mit alzulken goede als si in onser voerscr. stede ter merct brenghen sellen dat ghedueren sal tot onsen wedersegghen. In orconde desen brief beseghelt mit onsen seghel ghegheven ter borch in Texel op st sextijn avond int jaer ons heren m ccc en tsestich.

Pres. Jan van Langherak, Aelbrecht van Meerten.

f.123v.

Jan van Bloys enz. maken cond allen luden want wi Willem onsen bottelgier en Gherit den Wilden onsen camerlinc ghegheven hebben en hofstede ghelegghen bi der borch in onsen lande van Texel die si bi onsen wille en goetdenken Jacob Claessoen vercoft hebben, welke hofstat ghelegghen is binnen desen vier merken an deene side mijn heer selve mit eene hofstat die (oblemaerl) beseten heeft an dander zide die kercwech an tveer ende mijns heren wech ende an casteel ende Jacob Claes soen selver daer si hem vol en al of betaelt kennen den lesten penninc mitten eersten. In orconde desen brief beseghelt mit onsen seghel ghegheven ter borch in Texel op st sextijn avond int jaer ons heren dusent driehondert en tseventich.

f.123v.

Jan van Bloys enz. doen cond allen luden dat wi ghewilkoert hebben en gheorloft Reyngaer Heinrix soen onsen scout op westzaenden te vercoepen (vroer) vry eyghen goet die drie maden lands die hi van ons te leene plach te houden daer dat ene mat of ghelegghen is in de vierthien maden onderdeilt tander mat in de rugghe (broeye) onderdeelt ende t'ander mat in Symons Ynten soens oert. Ende soe wi en hijt vercoept dien waren wi enen vryen eyghendom van ons sonder arghelist. In orconde desen brieve beseghelt mit onsen seghel ghegheven

t'Scoenhoven xx daghe in november int jaer ons heren m ccc en tseventich.

f.123v.

Jan van Bloys enz. maken cond allen luden want Reynaer Gherit Berthouts soen van sinen eyghen vryen goede ons op ghedraghen heeft en ene vrien eyghendom ghegheven van sinen huse en erve staende op zaenderdamme alst daer begraven is en van sijnre scuur die daer bi staet mitter hofsteden als si gheleghen is ende belendt hebben Dirc Dirxsoens rielant an die zuutside, Symon Oerkens soens hofstede an de noertzide streckende mitten westende an den dijc. Soe hebben wi voer ons en voor onse nacomelinghen den voerscr. Reynaer en sinen nacomelinghen t'voerscr. huus en erve die scuur mitter hofstede also als si begraven en beleghen sijn en voerscr. is weder verlyet en verlien van ons te leene te houden dats te verstaen tot enen onversterflike erfleen te verheerghewaden alst versterft mit enen goeden sperwaer. Hier waren over als mannen heer Jan van Langherak, heer Floris van Adrichem, ridders, en om dat Reynaer van sijns selfs goet onse man gheworden is in der manieren voerscr. soe hebben wi hem en sinen nacomelinghen ghegheven voer ons en voer onse nacomelinghen in enen erfpacht een stuc lands gheheiten vruunzekoeys alsoe als si gheleghen is over de zaende buten dijc dat belant hebben wi selve an die zuutzide mit Aelbrecht Zoenekins koeye, Jan Berwouts soen an die noert zide mitter zuder lantkoye die hi van ons hout ende wi selve an die westzide mit Willams camp daer voer sellen wi jaerlix weder hebben erflic thien pont goetsghelts zulx payments als men aldaer van anders onsen lande nemen sal in tiden van betalinghe te leveren onse rentmeester aldaer tot zulken daghe als men anders onse landrenten aldaer sculdich is te betalen. Ende dese voerscr. pacht mitten goede sal altoes volghen tot den huse en al te verstaen sonder arghelis. In orconde desen brieve beseghelt mit onsen zeghele. Ghegheven t'Scoenhoven xx daghe in november int jaer ons heren m ccc en tseventich.

f.124v.

Mijn heer Jan van Bloys heeft Janne Bloc ghegheven thien lb. tornoyts t'siaers tot sinen live.

f.124v.

Willem den bottelgier.

Jan v.Bloys geeft Willam onsen bottelgier ende knape om dienst dien hi ons ghedaen heeft en noch doen sal onse hofstede die wi hebben legghende voer onse woninghe t'Tolne daer hi op te wonen plach voor den lesten brant alsoe als si gheleghen is van ons en van onsen nacomelinghen hem en sinen nacomelinghen te houden mit zulker husinghe als daer op sal ghetymmert worden tot enen onversterflike erfleene. Ende meenen en willen dat de voerscr. hofstede vry si en bliven van allen zaken van scote van waken van anderen dinghen van der stede wegghen van der Tolne roerende ende daer om soe sellen wi en onsen nacomelinghen en die gheene die onse castelleins aldaer wesen sellen enen doorganc houden door de voerscr. husinghe ende ene herberghe daer in hebben voer onse ghesinde tot allen tyden als wi willen sonder arghelist. In orconde desen brieve beseghelt mit onsen zeghele. Ghegheven t'Scoenhoven op sinte Katherinedach int jaer m ccc ende t'seventich.

Pres. Dns. Jan van Langherak, ridder, Aloud Janszoen.

f.124v.

Jan van Bloys enz. doen cond allen luden dat wi ghegheven hebben en gheven Willam onsen bottelgier en knape om menighen dienst die hi ons ghedaen heeft en noch doen sal onse bakenghelt van der Tolne mit sinen toebehoren tot sinen live des te ghebruken als behooric is en daer of te hebben sijn leven lanc zulk profijt en bate als daer toe staet en wi hebben souden of ons selfs ware sonder arghelist. In orconde desen brief beseghelt mit onsen zeghele

ghegheven t'Scoenhoven op sinte katerine dach int jaer ons heren m ccc en tseventich.
Pres. Als voren.

f.125.

Jan van Bloys enz. doen cond allen luden dat wi ghegheven hebben en gheven Willam onsen bottelgier en knape om dienst die hi ons ghedaen heeft en noch doen sal omtrent een ghemet lands luttel meer of min ghelegghen bi onser stede van der Tolne en gheheiten is die tichelrie meed daer men den steen wan daer de kerke ter Tolne mede ghemaect was welc land voerscr. Willam en sinen nacomelinghen houden sellen van ons en van onsen nacomelinghen tot enen rechten leene. In orconde desen brief beseghelt mit onsen seghel. Ghegheven t'Scoenhoven op st katerine dach int jaer ons heren m ccc en tseventich.

Pres. Als voren.

f.125.

Jan van Bloys enz. doen cond allen luden dat wi om bede van vrienden ghegheven hebben en gheven Adriaen van Nuwenhave overmids thien lb. groten die hi daer om gaf die husinghe en hofstede ghelegghen in (sceelvliet) die Kempe Kempe soens plach te wesen en ons aenghecomen was die voirscr. husinghe en hofstede alsoe als si ghelegghen is te houden van ons en van onsen nacomelinghen Adriaen voirscr. en sinen nacomelinghen tot enen onversterflichen erfleen. Hier waren over onse ghetrouwe mannen her Jan van Langherak, ridder, en Jan van der (creke). In orconde desen brief beseghelt mit onsen zeghele ghegheven des woensdaghes na sinte katerinen dach op onsen borch t'Scoenhoven int jaer ons heren m ccc en tseventich.

f.125v.

Jan van Bloys bi der ghenade goods hertogh van Gelre grave van Zootphen doen cond allen luden want ons Jan Hughensoen onse baeliu in Dreisschier opghedraghen heeft om sine eyghene goede vijf ghemete lands ghelegghen in onsen lande van Dreisschier after sine huus binnen desen lantghemarke wi selve naestghelegghen noertof de heerwech oestof Jan Hughensoen selve Zootof en Gielis Heinrix soen westof. Soe hebben wi daer om en om dienst dien ons de voirscr. Jan ghedaen heeft ghegheven en gheven voer ons en voir onse nacomelinghen Janne voirscr. den middeldijc van den oestpolre dien Jan en anderen van onsen luden an Dreisschier bedijckt hebben alsoe als der zeedijc van den oestpolre (gaet) of en an den voirscr. middeldijc. In der manieren dat hier na volghet, dat Jan voirscr. en sine nacomelinghen de voirscr. vijf ghemeten lande en dien middeldijc houden sellen van ons en van onsen nacomelinghen tot eenen rechte leenena Jans doet voirscr. te comen op sinen soen dien hi heeft en op die zone die hem god verleenen sal van joncfrou Heyl wegghen gheenen soen of sone en liete als hi storve te comen op sine andere sone die hi laten sal van ghetruwen bedde en te houden tot eenen rechte leene als voirscr. is. In kennisse der waerheyt soe hebben wi desen brief beseghelt mit onsen zeghele, ghegheven t'Scoenhoven. (geen datum).

f.125v.

Jan van Bloys bi der ghenaden goods hertogh van Gelre, grave van Zootphen doen cond allen luden dat wi om goede dienste die ons Willem Gieis soen onse baeliu ter Tolre ghedaen heeft en noch doen sal ghegheven hebben ende gheven voor ons en voor onse nacomelinghen hem en sine nacomelinghen die ettinghe (weide) van den middeldijc die ghemaect is mitten polres van der puden en vanden puedijc die an die Tolne en an den nuwen landen van der Tolne ghedijct sijn te oerbaren en te ghebruken mit ettene tot sijnre nutscap en profijt, in deser manieren dat hijt en sine nacomelinghen houden sellen van ons en van onsen nacomelinghen tot enen rechte leene te verheerghewaden alst versterft mit eenre jaerrete ende is te verstaen

dat men dit voirsch. goet houden sel van hollantsche rechte en al sonder arghelist. In oerkonde desen brief bezeghelt mit onsen zeghele ghegheven t'Scoenhoven xv daghe in julio int jaer ons heren mccc twee en tseventich.

f.126. ledig.

f.126v. „

f.127. „

f.127v. „

f.128.

Zoene van Pouwels Tolnaer.

Jan van Bloys here van Scoenhoven en van der Goude maken cond ende kenlic allen luden want Pouwels Tolnaer Pouwels soen bi raeden en goetdencken sinen maghen en vriende an dene zide Jan van der Goude Jacobs soen en Reynbout sijn knecht bi rade en goetdencken hare maghe ende vryende an dander zide aen ons ghebleven sijn eens segghens ende gheloef hebben alse van den doetslaghe die Jan van der Goude en Reynbout sijn knecht waenen ghedaen hebben den Pouwels Tolnaer des voersch. Pouwels vader des god ghedencke. Soe is onze zegghen mit goeden voorsiene ende gansen berade daer op ghehadt inden name goods ons heren in der manieren dat hier na volghet In den eersten zellen Jan en Reynbout sijn knecht voernoemt winnen dusent zielmissen Pouwels ziele te troesten. Voert sellen si cloosterwinninghe doen tusschen maze ende zipe als zedelic en ghewoente is en des bewach brenghen daer sijt ghedaen hebben. Voert sel Jan van der Goude voersch. eer hi binnen der vryheyt van der Goude sel comen moeten hem vijsten doen drie beden doen Pouwels ziele te verlichten om den heylighen cruus te Gheerdenberghe dander t'onser vrouwen t'sgravenzande die derde ten heylighen sacrament t'Aemstelredam. Ende des bewech brenghen ter stede van der Goude den borghermeysters ende den scepenen aldaer. Voert omdat Jan voern. desen voersch. doetslach dede doe wi buten lands waren en boven dat onse bode die wi onze zaken bevolen hadden daer toe deden en seyden om meer ten onraet te verhoeden soe sal hi alse dit segghen en zoene volcomen is betalinghe voetval oerdenen en anders dat daer toe behoert binnen eenre maent na onsen vermanen of mit onsen ghewaerden bode of mit onze brieventrecken tot iherusalem ende op theylich graf des betoech brenghen dat hi daer gheweest hebben sal en daer na nyet weder binnen hollant comen ten si bi oerlove en goetdencken van ons. Voert so sel Reynout binnen der vryheyt van der Goude niet comen eer ten middelsten daghevan desen betalinghe ende na den lesten daghe van der betalinghe soe sal hi binnen eenre maent daer naest volghende sonder vermaninghe trecken ende varen in Cyprus en nyet weder comen in hollant ten si bi oerlove en goetdencken van ons en van Pouwels Tolnaer voern. Voert sellen Jan en Reynout voernoemt den voerseyden doetslach beteren boven dat voersch. staet mit twalef hondert pont hollants zulx payments als in tiden der betalinghe in hollant ghenghe en gane wesen sal des wi hebben sellen tonsen deel voer die broke die daer in ieghens ons misdaen is vierhondert pont payments voersch. daer of onze baeliu hebben sal te keeren daer hi wil vive entwintich pont holl. en onse ghesinde vive eb tseventich pont holl en van den andere achte hondert pondendie daer van bliven sal gaen een derdendeel ter voerzoene een derdendeel ter maechoene ende een derdendeel ter erfzoene. Dese voersch. somme ghelts salmen betalen tot onser stede van der Goude bi onsen baeliu aldaer of bi den ghenen dien wijt bevelen te drien tiden van desen jare also tot sinte piters misse in zulle tsinte jans misse in den zomer en te bamisse alle naest volghende ende telken termine een derdendeel. Voert sellen si bede kiezen en in gheschrifte overgheven ten middelsten daghe van den drien terminen viersch. En die oerbede salmen doen ten lesten daghe ende ten voersch. middelsten daghe salmen over leveren betooch en brieve van cloosterwinninghe en zielmissen voersch. Voert selmen voetval doen ten voersch. lesten daghe mit vijhondert mannen en alle die ghene die den doden naerze sijn dan wenenden sellen hier

of soene nemen en gheen ende die den levende naerre sijn dan den doden sellen soene gheven en gheen nemen. Ende die hem beyden effen na sijn sullen soene gheven en nemen. Ende mitten desen ieghenwordighensegghen sellen Pouwels Jan en Reumbout voern. en hoer maghe an beyden siden claerlike versoent wesen sonder enigherhande arghelist. Viel oec namaels hier in enich scoet of tuumes dat houde wi altoes an ons en tot onsen verclaringhe welke zoene wi segghen te houden en te voldoen wittelicke ende wael in alle manieren als voerscr. is op ene peyne van zestien hondert pont holl. payments voerscr. die (verborghet) hebben van Pouwels wegghen Pieter Pouwels soen Pouwels Tolnaer Pouwels soen voerscr. Willem Pouwels soen Coppapert Jans soen Jan Poertegael Dirc van Scoutenberch Ghisebrecht Jacops soen Jacop Maes Heynric Peters soen Willam Blanbaerts soen Ysebrant Floris soen Jan Roesse Jan Willams soen Gherijt Jacobs soen Andries die backer Jacob Herman Oeghen soen en Pouwels Tolnaer voerscr. ghelooft alle dese voern. borghen scadeloes te houden. Ende van Jans side van der Goude en van Reymbouts voern. hebben verborghet dese voerscr. soene en segghen te houden en te voldoen op die peyne voerscr. Jan en Reymbout selve daer toe van Jans vader maghen hoer Jan van der Goude, Jacob van der Goude en Dirc van der Goude ghebrueders Panc Willams sone d'oude Dirc Willams soen, die jonghe ende hoer Jan ende Jacop van der Goude hebben ghelooft scadeloes te houden Dirc van der Goude, Dirc Willams soen en Dirc Willams soen voerscr. Ende van Jans moeder maghen van enen achtendeel Willam Heyne, Aernt Janssoen, Jan Ludolfs soen en Melijs Ghisebrechtssoen. Ende tweder achtendeel Jan selve Aernt en Heynric sinen broeder en joncheer van drecht. Ende int leste verendeel Jan selve Aernt Heynric sijn broeder voern. en Jacop van der Goude hoer vader. Dese soene en segghen voerscr. was gheseyt t'Scoenhoven in den voerborchte van onsen huse aldaer des sonnendaghes op sinte katherine avond int jaer ons heren dusent driehondert en tseventich daer bi waren onse ghetrouwe raet en mannen heer Jan van Langheraec, ridder, heer Aelbrecht van Meerten canonic t'Utrecht ten Doeme, Aloud Janssoen, Gherit van Oesterwijn, Vrederic van der Zevendaer.

f.129v.

Jan van Bloys heer van Scoenhoven en van der Goude doen cond allen luden dat Willaem van der Heul Gherijts Borghers soen ons op ghedraghen heeft van sinen eyghenen goede omtrent achtiendalf marghen lands ghelegghen in Leckerlant en beleghen hebben mit erve Allaert Joncheren soen an die oestzide en Dirc die Witte Egghebrechtssoen an die westzide mitten overen ende an die Lecke ende mitten utere ende an den oude kadijck van welken lande op omtrent twalef grote siaers die daer jaerlix wtghaen van enen vryen eyghendom hebben overmids dat bi onsen oerlove en consente de voerscr. Willaem omtrent achte marghen lands gheheyten twaellant dat hi van ons tot enen erflene te houden plach voer vryeyghen goet vercoft heeft altoes behoudende ons onser rente die wi an t'voerscr. waellant hadden welke rente wi noch daer an behouden waer om wi die voerscr. achtiendalf marghen lands alsoe als si ghelegghen sijn en voerscr. is verlyet hebben en verlyen Willaem voerscr. en sinen nacomelinghen te houden van ons en van onsen nacomelinghen tot enen onverserflike erfleene. Ende al sonder arghelist. Hier waren over onse ghetrouwe manne heer Jan van Langherak, ridder, Jan van Poelgheest en oude Gherit die Wilde knapen. In oerconde desen brieve beseghelt mit onsen seghel ghegheven t'Scoenhoven xxv daghe in maerte int jaer ons heren m ccc ene en tseventich.

f.129v.

Jan van Bloys doen cond allen luden dat wi ghegheven hebben en gheven Enghebrecht Jonghe Pieterssoen onsen knecht om dienst die hi ons ghedaen heeft en noch doen sal dat bode ambachts in onse stede van Scoenhoven mit sine toebehoren alsoe alst anderen boden voertijds ghehadt hebben mit sulken dienste en mit sulker bate daer of te hebben als daer toe

staet en ghewoenlic is. Ende dit voerscr. bodeambacht mach hi selve bewaren of doen bewaren enen goede man van sinen wegghen den welken wi den selve macht gheven inde voerscr. bodeambacht die wi Enghebrecht voern. ghegheven hebben en tot behoef ende ombieden onsen poerteren en goede luden van Scoenhoven ende elker besonder dat si den voerscr. Enghebrecht of den ghenen dien hijt bevelen sal des bodeambochts rustelic ghebruken laten en hem daer of doen dat si sculdich sijn en men anderen boden voertijts ghedaen heeft ende soe wye des niet en dade dat souden wi an hem houden als an den ghenen die ons niet ghehorich wesen en woude ende onse heerlicheyt vervuren dat gheduren sal tot onse wedersegghen. In oerconde desen brieve beseghelt mit onse seghele ghegheven t'Scoenhoven xxv daghe in maerte int jaer ons heren duisent dryehondert ene ende tseventich.

f.130.

Jan v.Bloys doen cond alle luden dat wi ghegheven hebben ende gheven Machteld Lambrechts Brabandersdochter tot horen liven 10 lb.holl. slechts ghelts siaers enz. bewijst uit onse renten van Scoenhoven ende van der Goude. Ghegheven t'Scoenhoven xxv daghe in maerte m ccc ende t'seventich.

f.130v.

Jan van Bloys doen cond allen luden want Willam van der Heul Gherijts Borghers soen van ons te lene hout omtrent achtiedalf marghen lands ghelegghen in Leckerlant die mit erve belegghen hebben Allaert des Joncheren soen an die oestzide ende Dirc die Witte Egbrechtssoen an die westzide streckende mitten overen ende an die lecke en mitte uteren ende an den cadijc. Soe hebben wi om bede wille en verzoec Willams voerscr. en van gracen verleyt en verlyen Machtelde Heynrixs Scalkaerts dochter sinen wive hoer lijtochte an die achtiedalf marghen lands voerscr. daer wise in gheloven te houden alsoe zedelic en woentelic is sonder arghelist. Hier waren over onse ghetrouwe manne haer Jan van Langherak, ridder, Jan van Poelghest en oude Gherit die Wilde knapen. In oerconde desen brief beseghelt mit onsen seghel ghegheven t'Scoenhoven xxv daghe in maerte int jaer ons heren m ccc ene en tseventich.

f.131

Jan v.Bloys doen cond allen luden want wi begheren ende meynen dat broeder Jan van Leyden onse soen ten dyenste gods ende onser vrouwen te meer verbonden ende ghehouden si soe hebben wi ne ghebrocht in de oerde van den Carmelieten die onser vrouwen broeder heeten Ende op dat hi bet vermoghe goeder leeringhe te volghen ende goet man te worden Soe hebben wi hem ghegheven ende gheven poorlic om gods wille xv lb.holl. siaers slechts ghelts tot sine live sulx paymente als in der tiden van betalinghe in hollant ghenghe ende ghane wesen sal enz. Ghegheven t'Scoenhoven xxvi daghe in maerte int jaer ons heren duysent driehondert ene ende tseventich.

f.131v.

Jan van Bloys enz. doen cond allen luden dat wi ghegheven hebben en gheven Janne Quarlet onsen knecht om menighen dienst dien hi ons ghedaen heeft ende noch doen sal en overmids dat hi dat boedeambocht onser stede van Scoenhoven dat wi hem ghegheven hebben quyt ghesconden heeft zes marghen lands alsoe als si ghelegghen sijn in Lopic in den gherechte der heren van sinte marien van Utrecht die belegghen hebben mit erve anden overen egghe Pelegrim Pawensoen ende anden nederen egghe der heren lant van sinte marien voerscr. streckende van jaersvelder lande an bescops lantsceydinghe welc lant voerscr. Jan voerscr. hebben sal alsoe langhe als hi leeft ende na hem te comen op sijn oudste kint dat van

ghetrouwen bedde van hem bliven sal welc kint t'voez. lant tot sinen live hebben sal daer en tenden weder an ons te comen of an onsen nacomelinghen sonder argelist. In oerconde desen bryef beseghelt mit onsen seghele. Ghegheven t'Scoenhoven xxvi daghe in maerte int jaer ons heren duysent dryehondert een en tseventich.

Pres. Dns. Jan van langherak, ridder, Aelbrecht van Meerten canunnic.

f.131v.

Op st agnieten dach anno lxxiii dede mijn heer Janne Quarlet gracie om dienst die hi ghedaen hadde en doen soude alst van den vi morghen lands voirscr. dat die comen sellen op sinen kinderen en op sijnre kinds kinderen en alsoe voert dattet voirscr. lant an minen heer noch an sinen nacomelinghen niet comen en mach alsoe langhe als yemant leeft die van Jan Quarlets live ghecomen is van ghetrouden bedde van voert te voert daer over waren heer Jan van Langherak, heer Aelbrecht en anderen voern. des heeft hi mijns heren openen brief door den anderen ghestoken.

f.132.

Jan v.Bloys doen cond allen luden dat wi voer ons ende voer onse nacomelinghen hebben quite ghesconden ende scelden quite tot ewelike daghe om bede wille van vrienden Willaem van der Heul Dammaessoen alle sine borghe ende hoer goet van al sulcke tichte ende toesegghen als wi tot hem hadden Roerende van den stoet ende ghesceele dat Dirc uten Camp onse scout van Scoenhoven in die tiden hadde doe hi Arnt Panneel Gherijtesoen van onsen wegghen antasten woude ende ghevanghen soude hebben dat hem van enighe van de luden benomen was als men ons seyden om welke sake die voez. Wilaem onder borghe ghedaen was soe dat hi ende sine borghe van der borchtocht quite wesen sullen tot ewelike daghen ende onghecalengiert sonder enich argelist.

Ghegheven t'Scoenhoven xxvj daghe in maerte m ccc een ende t'seventich.

f.132.

Jan v.Bloys enz doen cond allen luden want ons Jan Dirxsoen van sinen eyghenen goede opghedraghen heeft ene viertel lands van vier morghen ghelegghen in Lopic Ende belegghen heeft mit erve Willem Jans an den overe egghe Ende onser vrouwen outaer dat te Lopic in de kerke staet an den nedere egghe enz.enz.

Ghegheven t'Scoenhoven xj daghe in julio int jaer m ccc een ende tseventich.

f.132v.

Melis Ghijsbrechtssoen.

Wi Jan van Henegouwen heer van Byaumont maken cond allen luden dat Ghisebrecht Dirxsoen van ons ontfanghen heeft vijf morghen lants die ghelegghen sijn in Barwouds woude in die prochie van Woerden welc lant voirscr. Herman Speytert belegghen heeft mit sinen lande beide op die oestzide en westzide dat noirtende loopt op den Rijn en twestynde strecket op an Wairder daer hi der vrouwen van Steyne hier voormaels die hierghewaden of betaelde welc lant voirscr. wi verlyet hebben Ghisebrecht voirscr. hem en sinen nacomelinghen van ons en van onsen nacomelinghen te houden in rechten leene. In oerconde desen brieve beseghelt mit onsen zeghele. Ghegheven t'Utrecht des dinxdaghes na sinte martijns dach int jaer ons heren dusent driehondert vier en dertich.

f.132v.

Wij Margriete vrouwe van Steyne doen kond allen onsen mannen en allen den ghenen die desen brief sellen sien of horen lesen dat wi verleent hebben Dideric Willams soen vijf morghen lands daer hi onse man of is worden. In oerkonde des jeghenwoerdichs briefs die

ghegheven is int jaer ons heren duser driehondert ende dertien des saterdaghes na sinte peters dach ingaende oest.

f.133.

Hantveste in Dreyschier.

Jan van Bloys enz. maken cond en kenlic allen luden dat onse lieve heer en oudevader mijn heer Jan van Henegouwen heer van byaumont des god ghedenke wt ghegheven heeft te dyken onse land van Dreyschier in zeelant tot zeuscher kore daer wi of hebben sellen van alle dier breedte van den lande dat vijfte ghemet vry van dykaedsen van scoten van heerwaerde van beden en van alre settinghe diere op comen mach tot eweghen daghen. Voert soe sellen die lude die daer in ghelandt sijn horen uterdijc behouden en waer dat in enighen steden op dyke of op erve dorp of sameninghe van volke worde dat moghen wi aen ons trecken oec wies dat waer en (elwaer) land daer voren gheven even breet, voert is dat men wt polres an tland van Dreyschier voerscr. dyket waer dat is, soe sellen wi behouden den middeldijc tusschen daer die polre op en of gaet voert sal men den dijc allessins vryen van etten ter tijt toe dat die dijcgrave mitten ghesworen dunken sal datter den lande gheen onscade of comen mach. Voert soe sellen wi hebben ueten voerscr. lande den elfen scoef dat thiende lam en anders thiende die men on zeelant castumelic te gheven pleghet. Voert soe sellen wi behouden veren visscherien ambochte heerscappien kerken en costerien te gheven. Voert soe sellen wi alle saken hoghen en laghe aldaer in den lande of ter Tolne berechten mit onsen mannen en scepenen van Dreyschier alsoe dicke en menichwerve als ons goet dunket mit alzulken rechte als men ter Tolne pleghet te doen. Ende want die van Dreyschier die eerste twee jaer nader note vry ghehadt hebben al tland aldaer binnen dijx van der jaerbede. Soe sellen wi voertaen hebben van elken ghemete siaers zes penninghe zwarter tournoys te betalen tot elken tweek jaren. Ende want si van anders allen beden settinghen en heerwaerden vry gheweest hebben die eerste zeven jaer soe sellen si voertmeer mit ons pleghen en dienen gheliken anderen ambochten in zeelant. Ende wanneer die grave volle heervaert heeft in sinen lande soe sellen ons die van Dreyschier dienen mit enen kogghe van binnen en twintich mannen op die tweedeel van den lande in dreyschier en dat ander derdendeel sellen wi vry op heffen ghelike onsen anderen ambochte in zeelant. Ende want tghemeene land van Dreyschier bedijkt heeft tot papeliker prebende van elken hondert ghemeten een ghemet so sal die ghene die de voerscr. kerke heeft of hebben sal tland dat daer toe behoert aenvaen en houden mit sijnre dykaedsen en mit allen coste en laste ghelike anderen lande. Voert soe sel die coster in Dreyschier hebben alzulc recht loen en goet alsoe die coster van der Tolne heeft van sijnre costerie. Ende soe wanneer dat die kerke enighen salen behoeft het si van tymmeringhe van ornamente van boeken of van anders enighen zaken daer si ghebrec of heeft soe selmen die settinghe maken op t'ghemeene land mer met ghelike daer toe te ghelden. Voert soe sellen wi behouden alle onse gorsse buten en binnen want men die ploech daer in steect en tijt is te zaeyen ende want die pape van Dreyschier sijn land datter kerken toebehoert heeft en hebben sal in den selven vierendeel daer die kerke in staet in gheliken lande soe willen wi dattet land daer die kerk en kerchhof is vry ghedijct warde ghelijc ons selfs lande dat wi daer binnen hebben. Ende soe wat onse rentmeyster in zeelant Peter Kerkinx soen oem Hughe Hallinc en Storm sine broeders bi bevelnisse ons liefs heer en oudevaders des god ghedenke van onsen lande in Dreyschier wtghegheven hebben in allen manieren als voerscr. is dat houden wi vaste en ghestade sonder enich wedersegghen behoudelic in allen saken onser heerlicheit. Ende alle poynten te verstaen sonder arghelist ende want wi alle dese poynten houden willen en ghehouden willen hebben voer ons en voer onse nacomelinghen tot eweliken daghen in allen manieren als voerscr. is. Soe hebben wi daer op ghegheven dese opene brief beseghelt mit onsen seghele tot eenre orconde en in kennisse der waerheit. Ghegheven t'Scoenhoven op sinte agnieten dach int jaer ons heren m ccc en tseventich.

f.134.

Jan van Bloys bider ghenaden gods hertoghe van Gelre grave van Zootphen doen vond allen luden dat wi voor ons en voor onse nacomelinghen ghegheven hebben en gheven Coenen van Oesterwyc onsen knaep om menighen dienst dien hi ons ghedaen heeft en noch doen sal tlant dat onse ghemeyne van Texel in desen jaer bedijct heeft ende gheleghen is inden middelste coghe van onsen lande van Texel voirsr. mit welken lande Coene voirnoemt sinen vrien wille doen mach behoudelic onsen thienden daer of ende alsulke recht ende dienste alsoe wi van anderen onsen lande hebben dat in Texel gheleghen is ende al sonder arghelist. In oerkonde desen brieve beseghelt mit onsen zeghele ghegheven op onser vrouwen avond concepcio int jaer ons heren m ccc tweeentseventich.

f.134.

Ic Coen van oesterwyc knaep maken kond allen luden want mijn lieve gheduchte heer mijn heer jan van Bloys mi ghegheven heeft tlant dat in desen jare bedijct is in Texel in den middelsten oghe aldaer alsoe die opene brief spreect die ic daer of van hem hebbe soe hebbic gheloofte en ghelove in goeden trouwen voor mi en voor minen nacomelinghen mijne lieve gheduchten heer voirn. of sinen ghewaerden bode wt te reiken ende te gheven alsic of mijn nacomelinghen dit voirsr. lant vercoft hebben den rechten vierden penninc van al dat daer of comen sal. In oerkonde desen brieve beseghelt mit minen zeghele ghegheven op onser vrouwen avond concepcio int jaer ons heren dusent driehondert twee en tseventich.

134v.

Jan van Bloys doen cond allen luden ende bekennen mit desen openen brieve dat ons heer Aernt van Herlaer heer van Ammersoeyen onse amptman tot Boemel in Boemelrewaert in Gelre waert tot Beesde tot Rynoyen en tot Herwaerden wittelic en wael gherekent heeft van allen ontfanghen ende opboren dat hi in den voirsr. ampten van onsen wegghen gheboort heeft ende van allen cost en wtgheven dat hi voor ons en in onsen oerbaer wtghegheven en ghedaen heeft soe dat hi onse amptman wort tot desen daghe toe datum des briefs ende bekennen wi dat wi hem bedanken van den voirsr. rekeninghe ende ons beloven dat hi ons wittelike rekeninghe ghedaen heeft van welcher voirsr. rekeninghe wi den voirsr. heer van Ammersoeyen sculdich bliven twalef dusent achten hondert acht en veertich pont en vier scellinghe zwarten. Een plagghen gherekent voor twee en dertich penninghe welc voirsr. ghelt wi den heer van Ammersoeyen voernoemt of sinen erven gheloven te betalen en hem bewisen te boven in al der manieren als sinen brieve van sinen voirsr. ampten inhouden en begripen van den voirsr. (annoten) te boren en ten ghevanghen die hi ghevanghen heeft tot witteliker rekeninghe te bewisen. Dese rekeninghe wart ghedaen t'Scoenhoven op onsen huse in onse ieghenwoerdigheit daer over en bi waren her Zweder heer van Montfoert her Aelbrecht van Meerten canonic ten doom t'Utrecht Goodscalc van Brakel Jan Breye en anders van onsen vrienden een deel. In oerkonde en in kennisse alle desen voirsr. punten hebben wi onsen zeghel aen desen openen brief doen hanghen ghegheven int jaer ons heren m ccc twee en tseventich des vridaghes na onser vrouwen dach concepcio.

f.135.

Dir is tsegghen ons Jans van Bloys enz. tusschen heer Ghisebrecht heer van Vyanen en van den Goey op deene zide en heer Aernde heer van Harlaer op dander zide alsoe van den rechte dat heer Aernt voirsr. heeft ter voechdycen van Heylwyen sijnre nichte die oudste dochte is sheren van Harlaer sijns broeder des god ghedenke en van anderen ghebreke dat hi heeft van sijnre erfnisse die hi hebben soude na sinen brieven in den lande van der Ameyden. In den eersten is onse segghen dat die heer van Vyanen den heer Ammersoeyen beyde voern. gheven sal voer sijn recht van der voechdien voersr. en voer ander ghebiet dat hi heeft twee dusent

vijf hondert pont zwart payments als in den lande van Utrecht gaet te betalen die vijf hondert tusschen dit en sente peters daghe ingaende oest naestcomende, dusement te sinte martijns misse en dusement te sinte petersmisse in zulle beyde naestcomende of binnen achte daghe na elken termine voerscr. Voert soe sal die heer van Vyanen houden en voldoen zulke brieve als die heer van Ammersoeyen heeft sprekende van sijnre erfnisse. Ende die heer van Ammersoeyen sal oec houden en voldoen ghelike brieven die hi weder ghegheven heeft van der zelve sake, soe dat wi daer of den enen brief setten jehens den anderen. Ende soe wanneer dat die heer van Ammersoeyen die scout daer die voerscr. brief of spreket betaelt sal hebben of op him ghenomen alsoe dat die heer van Vyanen en die sine daer of ombelast en onghemoyet moghen bliven en hi des wael versekert is bi gheliken luden soe dats hem billic ghenoeghen sal. Soe sal hi tot den ghelde dat voerscr. is den heer van Ammersoeyen gheven noch twee dusement vij hondert lb. payments voerscr. te betalen binnen den naesten jare na dat die betalinghe of sekerhede van den voerscr. scout ghedaen sal wesen als voerscr. is. En van alle den voerscr. ghelde sal die heer van Vyanen den heer van Ammersoeyen beyde voern. zulke zekerhede doen dat hem billic ghenoeghen sal. Ende overmids deser beloefden en vorwaerden soe sal die heer van Ammersoeyen den heer van Vyanen beyde voern. des huus en lands van der Ameyde mit sinen toebehoren rustelic ghebruken laten sonder hem daer of yet te bewijnde alsoe langhe als Heylwijf die oudste dochter was sheren van harlaer voern. leeft ende in vorwaerden van huwelic is mit Heynric van Vyanen oudste soon sheren van Vyanen voern. ende storve Heylwijch voern. voor dat haer twee jonghste zusteren selve mondich waren soe soude die heer van Ammersoeyen voerscr. alle sijns rechts ghebruken dat hem van der voochdye der voerscr. kinderen mit rechte toe behoren mochte alsoe verre als hi dede dat een recht voghet van recht sculdich is te doen behoudelic zulke brieve en vorwaerden als die heer van Vyanen voerscr. ons van deser zake gheven en loven sal, alle poynten te verstaen sonder enigherhande argelist. Dit voerscr. segghen was gheseit tot Scoenhoven on onser borch des vridaghes na sinte margriete dach int jaer ons heren dusement driehondert en tseventich. En wi Jan van Bloys voern. hebben onsen seghel op dese cedule ghedruct in orconde en in kennisse der waerheit van den dinghe die hier voer ghescriven staen ende gheviel in den voerscr. segghen enich twivel of scoot dat houde wi aen ons tot onser verclaringhe.

f.135v.

Jan van Bloys enz. doen cond allen luden want wi verstaen dat in onsen segghen dat wi tusschen den heer van Vyanen en van den Goye an deen side en den heer van Ammersoeyen an dander side gheseit hebben en hem beiden in gheschrifte onder onsen seghel overghegheven wat scoots en twivel valt alsoe van den 200 (300) lb. siaers die de heer van Ammersoeyen in erfnisse hebben soude in den lande van der Ameyde en van der scout te betalen in den lande van Ghelre en in Brabant na den brieve die daer of sijn en die heer van Harlaer des god ghedenke en die heer van Ammersoeyen voern. dene den anderen overghegheven hebben. Soe is onse verclaringhe daer of dat die joncfrou van der Ameyde sculdich is te betalen den heer van Ammersoeyen horen oem driehondert lb. siaers na hoors vader brieve die daer of sijn. Oec is die heer van Ammersoeyen sculdich te betalen sulke scout als sine vorders in den lande van Ghelre en in Brabant sculdich waren en sine voerscr. nichte daer of scadeloos en quyt te houden na den brieven die daer of sijn en hoor oem voern. weder ghegheven heeft. Ende soe wanneer die heer van Ammersoeyen sijnre nichten voerscr. maent en eyscht bewisinghe te hebben van den driehondert lb. siaers voerscr. na den brieve die hi daer of heeft soe mach si wedermanen en eyschen scadeloos en quyt ghehouden te wesen van der voerscr. scout na horen brieven die si weder heeft en dunct ons dat men dene brieve alsoe sculdich is te houden en te voldoen als die anderen na onsen besten verstaen soe dat die joncfrou van der Ameyde onse nichte voerscr. noch die driehondert lb. siaers in erfnisse bewisen noch die 25 hondert lb. betalen en derf voer dat die heer van Ammersoeyen hoor oem voerscr. sulke quytsceldinghe

vercreghen sal hebben van der scout in den lande van Ghelre ende in Brabant die hi betalen soude of daer voor zulke sekerhede ghedaen dat onse nichte voerscr. tot eweliken daghe daer of scadeloos en onghemoyt bliven. Ende hier mede houden wi dit voerscr. point verclaert. In orconde deser cedula en onsen seghel hier op ghedruct gheghevne tot Ruermonde des manendaghes na sente gelijs dach int jaer ons heren m ccc en tseventich.

f.136.

Jan van Bloys enz. doen cond allen luden dat wi in onsen handen ghehadt hebben ghesien en selve overghelesen enen openen brief gans en gave ongherascert en onghescancilleert wel beseghelt mit seghelen heer Aernts van harlaer heer van Ammersoyen alsoe (satwoude)em principael en heer Edewaerts van Ghelre ons lieve neve, heer Vrederix heer van Bare en heer Jans heer van Waerdenberch, alsoe orconde en ghetughe inhoudende en sprekende van woerde te woerde als hier na bescreven staet. In Aernt van harlaer knape doe cond en kenlic allen luden die desen brief sellen sien of horen lesen dat ic van alzulker goedinghe als her Jan van Herlaer, ridder, heer van der Ameiden mijn lieve heer en brueder mi ghegoet heeft na behout dier brieve die hi daer of heeft ghegheven in ieghenwoerdicheit en bi goetdenken eens hoghen edelen mans joncheer Edewaerts van Ghelre mijn lieve joncheren heer Vrederix heer van Baer, heer Johans heer van Waerdenberch en anders mijnre vriende en maghe een groot deel om sonderlinge bedanke en belone. Ende hem daer mede van allen versterve die wi van minen lieven heer en vader van mijnre liever vrouwe en moeder en van heer Gheraert van Herlaer mijnre lieven broeder daer god die sielen of hebben aen versterven en vervallen is tot desen daghe toe quyt scelde en bekenne dat hi mi daer of voldaan heeft. Voert sijnt vorwaerde dat ic alle leengoede daer mi mijn lieve heer ende broeder voerscr. aen ghegoet heeft en thus tot Ammersoyen tot erflene in rechter brueder sceidinghe van hem houden sal en van hem ontfanghen. Voert soe hebbe ic ghelooft in goeden trouwen heer Janne minen lieven heer en broeder voerscr. dat ic hem van alre scout die mijn lieve heer mijn vader en mijn lieve vrouwe mijn moeder en mijn broeder heer Gherit van Herlaer voerscr. daer god die sielen of hebbe die si inden lande van Ghelre en in den lande van Brabant sculdich waren scadeloos te houden en wel te quytten. Voert soe hebbic ghelooft en ghelove heer Janne voerscr. minen lieve heer en broeder of enigherhande scoot of twivel tusschen hem en mi vielen dat ic des heer Vrederic heer van Bare en heer Janne heer van Waerdenberch minen lieven neven ghehoeren en gheloeven sal. In orconde en in scxedicheit alle deser voerscr. voerwaerden en poynten soe hebbe minen seghel van mijnre rechter wetentheit an desen brief ghehanghen. Ende om die meerre orconde en ghetuuchinghe der waerheit soe hebbic ghebeden enen hoghen edelen man joncheer Edewaert van Ghelre minen lieven joncheer heer Vrederic heer van Baer en heer Janne heer van Waerdenberch minen lieven neve dat si haer seghele mitten minen an desen brief hanghen. Ende wi Edewaert van Ghelre, Vrederic heer van Baer en Jan heer van Waerdenberch om bede wille (verder slecht te lezen).

f.137. niet te lezen.

f.137v. slecht te lezen.

Los stuk.

Dit is de grote van den ambochte dat mijn heer de grave van Bloys in zeelant vercoft heeft.

Eerst in Walcheren tot Welzinghe 261 morghen.

In tser Allaertskerke 1628 morghen daer of gaet 38 morghen.

In Gapinghen 648 ½ morghen.

In Popkinborch	269 morghen.	
In noertambocht van Emelisse	16 morghen	Renghe
In ts Wittenkinderen ambocht	38 morghen	Renghe
In Gherolfs dijc	128 morghen.	
In Wissekerke	(niet te lezen)	
In Campen	375 morghen.	

Somma behalven 54 morghen dubbel an Rengher en 38 die ofgaen blijft des ambocht dat heer Vinke heeft 3683 ½ morghen.

f.137v.

Jan v.Blois enz. doen cond dat wij ghegheven hebben onsen dochter Katerinen die nonne is ter Lee tot horen live, vijf pont hollants siaers enz.enz.

Ghegheven t'Scoenhoven op den meydach int jaer ons heren m cc lxxii.

f.138.

Hantveste van den waterganc van Stolwijk.

Jan van Blois enz. maken cond en kenlic allen den ghenen die desen brief sellen sien of horen lesen dat wi mit goeden voersiene en gansen berade ghegheven hebben en gheven den ghemeenre luden van Stolwijk van den vryenlande in beide siden van der wateringhe dien van Scoenouwen ende van Coolwijk alsoe alst den heerscappe van Scoenhoven en van den Berghe toebehoert om ghemeinen orbaer der lude en lande voirsr. enen vryem waterganc duerendetot ewighen daghe die aengaen sal op Gouderakvelt an den afterbroec streckende op tlandt dat Spierinc Boudijns soens was mit alsoe veel verlieten als den ghesworen dunken sal dat slands orbaer is opstreckende doer den thiendwech en van daen rechtvoert tot aen den Yseldijc en daer door tot halver Ysel toe en mit alsoe veel slusen als den ghesworen dunken sal dat slands orbaer is in alzulker manieren als hier na bescreven staet. In den eersten dat die ghene die desen waterganc vercreghen hebbensiewes land dat si daer toe nemen en behoeven sellen ghelden sellen bi den ghemenen ghesworen van den lande beide ten waterganghe en ten wateringhe. Voert moghen die dwarren (zijgangen) en wateringhe ghebruken en besinghe tot horen wille en meesten orbaer alsoe veer alst onser heerlicheit toe behoert. Voert sellen si an voirsr. waterganc en wateringhe scouwen bi den ghemeenen lands van boven en beneden en soe welc van den luden voern. der scouwe begheert soe selse dander willichlic en goedertierlic mit hem legghen als redelic is. En so welc van hemluden daer in onwillich ware soe machdie willighe sonder den andere scouwen. En wi sellen onder ons voer den onwillighen doen wtlegghen en dat ghelt wedernemen als recht is alsoe veer alst aen ons coemt. Voert moghen die goeden lude voersr. mit dwersweteringhen in desen voersr. waterganc comen door onse land als redelic is en bi den ghesworen van den lande boven en beneden. Ende die van Scoenouwen moghen mit eenre dwarsweteringhe daer in comen tusschen der dwarree en den husen tot slands orbaer. Ende viel daer in enich sceel dat houden wi tonsen verclaren. Ende waert sake dat de slusen uten putten voeren dat god verbiede soe moghen onse voersr. lude die putte weder aenvaen en thout daer of besighen ter horen orbaer onwederseit van yemande. Ende waert sake dat die voersr. putte alte diep verwaelden dat men die slusen daer niet weder legghen en mocht soe moghen si se wederlegghen boven of beneden ter meester orbaer en ten minsten cost bi onsen dijcgrave en bi den ghesworen van den dijc en hen stede te wisen alsoe veel slusen weder te legghen als si te voren hadden sonder coep jeghens ons of onsen

nacomelinghen mer soe wat land anders dat si daer toe besighen dat sellen si ghelden ter scatinghe van den hiemraden van Gouderaec. Voert soe sijn si altoes gheoorlooft horen dijc opte doen en toe te doen hoer slusen te maken en te vermaken hoer aerde te voeren haer viletten te stoppen damme te maken en op te doen ende dat sellen si versoeken an onsen dijcgrave en hiemraden mit horen scout en mit tween van horen hiemraden en als sijt versocht hebben soe sellen onse dijcgrave en hiemraden daer op comen binnen den eersten drien daghen na dattet alsoe versocht is en dan koren en scieren des dijc en lands orbaer. Ende waert sake dat sijs niet en deden soe moghen die voerscr. goede lude bi hem selven hoers dijc en lands orbaer doen onverseit van yemande. Voert soe sal die voerscr. dijc en lant van den waterganghe bliven legghen in allen dijcrechte en onder ene warende. Voert waert sake dat si aerde behoefden die si selve niet en hadden die soudmen scieren bi den hiemraden van Gouderaec daer sijs begheerden ter meester oerbaer en ten minsten scade en die aerde sellen si ghelden als redelic is ende want si om desen voerscr. waterganc die weghe duer graven sellen soe sellen si goede brugghen houden over al daer si die weghe duergraven op horen cost alsoe dat men se biden mach mit waghene en anders. Voert soe sellen si hoor water houden binne horen wallen mit eenre waterkeringhe vi voete breet 1 ½ voet hoech boven ghedeilder groenswaert ende gheene kant naere te ghaen daren bliven twee roeden die voerscr. waterkeringhe op te houden. Ende viel enich scoot of ghesceel in dien dat die waterkeringhe niet breet noch hooch ghenoech en ware tot enigher tijd tot houden wi altoes tonsen verclaren dese voerscr. waterkeringhe sellen die van Gouderaec scouwen eens binnen den jare dat sel wesen op sinte jacops avond. En waer daer teinden an dese voerscr. waterkeringhe enich ghebrec dat si hoor water binnen horen wallen niet en hielden dat souden si laten weten den rechter van Stolwijn en die sel dat ghebrec doen maken binnen den naesten drien daghen. Ende en dede mens niet soe mochten die van Gouderaec scouwen en doen maken op enen van daer deerste of wesen sal van tween sc. voerscr. dander en die darde oec van tween sc. en die vierde van 10 sc. Ende waert sake dat rechter en hiemraet van Gouderaec hier boeten op wonnen die selmen wtreyken binnen xiiii nachtena dats die rechters en hiemraden van Stolwijn vermaent worden. Ende en dede mens niet so moghen sijtdarenteinden panden op die waterkeringhe en waterscap ende voert berechten als recht is van den lande die helfte van den voerscr. baten ons en dander helfte den hiemraden. Voert sal desen waterkeringhe legghen onder ene warende ende nyemant en sel onrecht water leyden in desen voerscr. waterganc. Ende nyemant en sal korve of fuker daer in legghen hine souder aen verboren 10 sc. Ende sine korve of fuker half sheren behoef en half den hiemraders. Voert soe moghen onse voerscr. lude enen put maken en sluse legghen tusschen onsen veerstalle van der Goude en horen ouden waterganc daert hem best ghenoecht. Ende daer toe sellen si hebben vi gaerden dijc en alsoe veel lands als si daer toe behoeven totten weghe totten vliet ende totten waterkeringhe dat lant te ghelden bi scieren des hiemraders van Gouderaec dien put, wech, sluse, waterganc en waterkeringhe te houden te bruken en te besighen in allen manieren dat van den anderen voerscr. is. Ende wanneer onse lude die voerscr. sluse en waterghanc maken willen soe sijn sheren lude van Arkel daer toe ghehouden en verbonden onsen luden daer in te helpen en bi te staen als ons redelic denken sal. Voert waer yemant die op desen waterghanc quame te veghen of te bescore of te dijken om boeds wille van rechter of hiemraders dien gheven wi een goet gheleide van scade en van scoude. Ende soe wie dat onse gheleide brake op onsen rechters en hiemraders die soude verboren jehens ons sijn lijf en sijn goet. Ende soe wie anders kijf of vechtelic machte die soude verboren 10 lb. jehens ons. Voert sellen onse rechters van onsen wegghen innen alzulkeboeten als onder ons verscinen en wtlegghen en weder innen als recht is. Ende want onse lude voerscr. desen waterganc aen ons vercreghen hebben en alsoe veel ghedaen dats ons wael ghenoecht en wijs ons beloven soe hebben wi ghelooft en gheloven in goeden trouwen voer ons en voer onse nacomelinghen hem en horen nacomelinghen tot eweliken daghen dien voerscr. waterganc te vryen en te waren in allen

manieren dat voerscr. is sonder enigherhande argelist en want wi willen en meynen dat hem en horen nacomelinghen alle dese voerscr. poynten vorwaerden en ghelooften wittelic en wel ghehouden worden van ons en van onsen nacomelinghen sonder enich ghebrec alsoe veer alst aen ons coemt. Soe hebben wi daer op desen openen brief ghegheven beseghelt mit onsen seghele tot eenre orconde en in kennisse der waerheit. Ghegheven op onsen borch t'Scoenhoven op onser vrouwen avond in maerte int jaer ons heren m ccc en tseventich. Pres. Dns Jan van langherak, ridder, Aelbrecht de Meerten canonic.

f.140.

Des saterdaghes na heylich sacramentsdach int jaer LXXIIJ versocht Hughe Walichssoen t'Scoenhoven voor de brugge van den huse an den castellein dat op die tijd was Dirc Willamssoen overmids dat mijn heer selve van huus was twee morghen lants luttel min of meer legghende in Loepic.

f.140v.

Item 1 anderen hantveste van den selven van Bercoude.

Jan van Bloys maken cond en kenlic allen den ghenen die desen brief sien of horen lesen dat wi mit goeden voersien en mit gansen berade ghegheven hebben en gheven den goeden luden van den Afterbroec die wonachtich sijn binnen der prochien van Bercoude om verzoecs wille der goeder lude van Stolwijn diet aen ons vercreghen hebben twee waterscap doer onsen ambocht van Gouderaec streckende van den afterbroec door den dijc van Gouderaec en voert te halver Usel in sulken manieren als hier na bescreven staet. Dats te verstaen dat dat oesteinde van den Afterbroec hebben sel twee roeden lands an die van Stolwijn daer hoer waterscap op ghaet dat si aen ons vercreghen hebben an die oestside ende met meer lands en sellen die van den Afterbroec houden ter waterscap van Stolwijn dan daer si hoor slic op legghen moghen. Ende dat ander van dien tween roeden lands die sellen si hebben oestwaert. Ende in die twee roeden lands moghen die van den Afterbroec hoor orbaer in doen mit enen vliet of mit tween soe dat dat die hiemraders van den Afterbroec en in Gouderaec visiteren sellen en in die voerscr. waterscap sellen onse buer van Gouderaec mede wateren ghelike die van den Afterbroec van dier waringhe die op dat land leit daer Gherit Heye nu ter tijt op woent tot desen waterscap toe voern. Ende hoeneer dat waterscap volmaect is soe sellent onse buer die hier mede wateren sellen houden en becosten en horen hoefslac maken alsoe veer als si daer in wateren merghen merghen ghelijc gheliken die van der Afterbroec. Ende waer dat onse buer daer overhorich en waren ende daer boeten op ghescouwet worden die soudent wi wt doen reyken onsen rechteren van Gouderaec van den ghenen die daer of in ghebrec ghevonden worden binnen den eersten vierthien daghen als die rechteren van den Afterbroec onsen rechteren van Gouderaec aenbrocht mitten hiemraders datter boeten verboert waren en die boeten sellen wesen drie de eerste scouwen op elken waringhe ende die daerbescouwet wort vier scell. Ende die vierde scouwe thien scellingh en dan voert te waren na den rechte van den lande als die hiemrade wisen dat recht is. Ende dese acouwe sellen doen twee hiemraden van den Afterbroec mit horen rechteren ende mit enen hiemrader van Gouderaec, voert soe sel dat westeinde van den Afterbroec hebben een waterscap tusschen Voel Gheritssoen ende Alijt Willam Peterssoen ende tot desen waterscap sellen die van den Afterbroec hebben vijftalf roede lands en die sellen van beide desen landen daer dit tussche bepaelt is ghemeten wesen van elken sijn aendeelsoe dat die van den Afterbroec vijftalf roede vrijes lands behouden hoor orbaer in te doen opstreckende van den Afterbroec tot an den dijc van Gouderaec en voert door den dijc ter halver Ysel toe welc land en waterscap wi hem ghegheven hebben en gheven hoor orbaer in te doen hoe en dat sijt visieren dat hem orbaerlixste wesen mach mit hoeveel vlieten slusen of zilen die si binnen desen palen legghen of maken willen dat moghen si doen onverseit van ons of yemant van onsen weggen. Voert soe sijt vorwaerde dat dat westeinde

van den Afterbroec dat hier wt wateren sel houden sel an beiden siden van desen waterscap waterkeringhe enen hoet hoech boven ghedeilder groenswaert ende boven vier voete breed ende an elke side van der waterscap een halve roede heels lands of meer hoer waterkeringhe op te legghen. Ende dese waterkeringhe sellen onse bueren van Gouderaec alle jaer eens scouwen op sinte jacops avond die an dit waterscap ghelegghen sijn mit horen water en anders niet. Mer tot allen tyden van den jaer moghen sise waterdicht scouwen als hoer waterkeringhe ghedicht sijn teinden horen lande. Ende waer dat si dese waterkeringhe scouweden en sire ghebrec of vonden na desen voerscr. verwaerden dat souden die van Gouderaec laten weten den rechter en den hiemraden van den Afterbroec mit twee hiemraders van Gouderaec dat si dat ghebrec deden maken soe dattet binnen den eersten drien daghen ghemaect worden na der weet enz.

Het verdere gedeelte gelijk aan dat van Stolwijk.

Ghegheven op onsen borch t'Scoenhoven op den meye dach int jaer ons heren mccc ene en tseventich.

f.142v.

Hertogh Aelbrecht segghen tusschen minen heer en den heer van Arkel.

Dit is mijns heren hertogh Aelbrecht segghen van alzulken gheschille en twiste als is en gheweest heeft tusschen heer Janne van Bloys sinen luden en hulperen an deen side en den heer van Arkel sinen luden en helpers an dander side want si diere twiste en gheschille an beiden siden an minen heer ghebleven sijn. Ende hebben ghelooft daer of mijns heren segghen te houden. Ende mijn heer seghet daer of sijn segghen als hier na ghescreven staet. Elker partien te houden op ene pene van 5 scilden en op mijns heren hulde te verliesen. In den eersten soe seit mijn heer de hertogh heer Janne van Bloys en sine lude en hulpers an deen side ende den heer van Arkel sine lude en hulpers an dander side claerlic ende al vezoent op zulke vorme en poynte als hier na volghet van allen gheschille en disoorde als si onderlinghe hebben ghadht tot desen daghe toe. Voert soe seit mijn heer dat die heer van Arkel quytscelden sal en quytgheven alle die ghene die onder heer Janne van Bloys opten derthien dach lestleden woenden mit alre woenstatvan allen (coermieden)(toermieden) en coermiedighen rechte die si den heer van Arkel of sinen voervaderen moghen sculdich hebben gheweest tot desen daghe toe ten waer dat si alle of hore enich hem namaels verdieden of coermiedich worden. Soe souden si die ghene die hem na verdieden dan voert coermiede gheven en coermiedich bliven oec waer si woenachtich worden of waren. Ende alle die ghene die opten derthiendach woenden onder heer Janne van Bloys salmen overgheven in scrifte om te setten in mijns heren register en namaels te weten en te tughen wie quyt gheschic is. Voert soe seit mijn heer dat dat onderzoec dat her Jan van Bloys ghedaen heeft van den coermiedighen luden besceidelic en wittelic ghedaen is mit goeden besceide en ernste. Voert seit mijn heer dat alzulc segghen als die heer van Brederode en die heer van Putte gheschic hebben tusschen den heer voerscr. vaste en ghestade bliven sal. Voert seit mijn heer dat men alle die ander dien die heer van Arkel van coermieden aen tyet en in derthiendach lestleden niet en woenden onder heer Janne van Bloys aen spreken sal ende die set mijn heer tot alzulken rechte als daer toe behoert ende daer om en sal men nyemant meer slaen noch aen vechten mit vyantscappe noch anders vervolghen dan mit den rechte. Ende alle die ghene die mitten rechte coermiedich vonden worden en verwonnen ende opten derthiendach lestleden onder heer Janne van Bloys niet en woenden of diere die woenden ende hem namaels verdieden sellen coermiede gheven oec waer si woenden of wonen sellen. Ende des en sal hem heer Jan van Bloys niet bewinden. Voert seit mijn heer van den twee knapen die men aen teyt Aelbrecht van Foreest dat is dat sake dat die heer van Arkel hem machtighen wille en machtich wesen mach die twee knapen te doen comen in den Haghe en daer of recht te nemen en te gheven van diere sake na allen haercomen soe sal hem mijn heer den baeliu uter Haghe

ten rechter setten daer die partijen rechts voer pleghen sellen van den doetslaghe ende en mach hijs niet machtich wesen die twee te doen comen ten rechte voerscr. soe seit mijn heer dat die heer van Arkel die knapen van hem sel doen en wt sinen lande doen houden sonder wedersegghen des sel die heer van Arkel minen heer weten laten binnen viert nachten na den date des segghens wes hi machtich is te doen alst voerscr, is voert seit mijn heer dat heer Jan van Bloys an deen side en die heer van Arkel an ander side elc twee mannen setten sellen en dien macht gheven en die sullen macht hebben die dootslaghe brande huusbreeke en alle aentichte die si en hoer lude onderlinghe hebben te segghen te verliken en te slechten na hore besceidelicheit ende wes si daer of segghen sellen sel aen beiden siden ghehouden wesen en voldaan. Gheviel enich ghescil tusschen den maexmannen voerscr. van enighen stucke dat souden si aen minen heer brenghen en overgheven waer in en hoe groet ghescil ware en dat sel mijn heer sceiden of een of twee van sinen rade die hi daer toe voecht ende waer dat sake dat hier enich ghescil of twivel in viele het waer in mijns heren segghen of inder effeninghe die de maez lude voerscr. gheset hebben of segghen of ordineren dat hout mijn heer al tot sinen verclaren. Dit segghen wart gheseit op sinte valentijns dach int jaer ons heren dusent driehondert en tsestich.

f.144. ledig.

f.144v. ledig.

f.145. ledig.

f.145v. ledig.

f.146.

Jan van Bloys enz. doen cond allen luden want een yghelic sculdich is te vorderen en voert te setten alle saken daer goeds dienst sonderlinghe bi ghemeerret en gheoch moghen wesen dat aenghesien hebben wi wt vriendelike versoeke Aernts van Diest ons poerter t'Scoenhoven voor ons en voor onse nacomelinghen ghewilkoert en gheconforteert (versterken, bemoedigen) Arnde van Diest dat hi van sinen wegghen en Aliden Jans Jonghe dovhter sijns wijfs nu lest was bi onsen oerlove in onsen prochikerke t'Scoenhoven in die eere goods gheschicht gherent en ghemaect heeft een outaer en cappelrie van sijns en van sijs wijfs eyghene ghecregen goede ewelic duerende en hebben Arnde voerscr. sulke gracie daer in ghegheven dat hi en sinen nacomelinghen naest van sinen live de voerscr. cappelrie gheven sellen iiii deerste ghiften en daer en tende sel de ghifte comen te gheven an ons en onsen nacomelinghen heren tot Scoenhoven sonder argelist. In orconde anno lxxvii (bijgeschreven) De voerscr. cappelrie had eerst heer Jacop Bokel. Daer na Jan de Bruun.

f.146v.

Jan van Bloys doen cond alle luden en bekenne mit desen openen brieve dat wi om dienste wille dien ons Marcelijs van Inghen ghedaen heeft en noch mere doen sal, soe hebben wi hem ghegheven en gheven enen anden aenworpe gheleghen in den gherechte van Aelst op den uterdijc welc aenworpe drie morghen helt gheleghen tusschen den essche an deene zide en Heyma Haecke an dander zide en is gheheiten den derenwaert dat onser heerlicheit toebehoert. Ende want wi willen dat hem dit voerscr. lant vast en stede blive. Soe hebben wi onsen zeghel aen desen brief doen hanghen. Ghegheven tot Scoenhoven int jaer ons heren dusent driehondert twee en tseventich des saterdaghes na onser vrouwen dach concepco

f.146v.

Heer Jan van Langherak hout van minen heer den thiende van Ammergravelant tot sinen live en op st dach int jaer lxxiiii gaf mijn heer jonghen Ghijsbrecht van Langherak sinen soen den selven thiende mit sinen toebehoeren na heer Janne doet sijns vader te hebben en te

houden tot sinen live daer si beide opene brieve of hebbe.

f.147.

Dit is alsulc segghen als mijns liefs heren rade van Gelre die heer van Montfoerde, her Jan van Langherak en heer Aelbrecht van Meerten gheseyt hebben van Gribbers doet op catwoude daer god die ziel of hebben moet. Ende sinen maghen an deen zide Scuber Jan sijn broeder en Jan Bienaerts zoen en horen maghen en hulperen an dander zide van allen sceel dat op dien dach gheschiede doe Gribber voerscr. gheslegghen wert. Eerst dat Scuber Jan sijn broeder en Jan Bienaerts zoen gheven sellen van Gribbers doet tot alingher zoene ende van alle der broke die si daer aen ende op die tijt misdaen moeghen hebben jeghen onse lieve heer van Gelre twalef hondert vijftien pont een plagghe voer neghen penninc gherekent. Daer af soe sellen die ghemeen maghe hebben van Gribbers doot twehondert tseventich pont payments voerscr.. Daer af sellen Scuber Jan sijn broeder en Jan Bienaerts zoen weder hebben voer alzulke smerte als leden op dien dach en tijt doe Grubber gheslegghen wert vijfenveertich pont payments voerscr. en dat te ondersceiden bi Reingher Heinrix zoen den baeliu hoe veel elc van dien drien na sijnre smerte daer af hebben sel Ende die twehondert vijftwintich ponde die daer dan bliven soe sellen op boren en heffen toter voerzoen Gribbers kinder elc van hem vierre elf pont vijf scellingh payments voerscr. Ende van den ghenen die buten den lande sijn of niet selfmondich en sijn sel Louwe Felien zoen op heffen en bewaren tot horen behoef. Ende ter maechzoen hondert tachtich pont payments voerscr. Daer of soe sellen hebben Reingher Heinrix zoen baliu na oude costumen tien pont en Claes Tesselaer clerc veertich scellingh payments voerscr. Ende Jan Didden zoen voer sijn smerte neghen pont payments voerscr. Ten waer dat hi ymmer buten dier zoene bliven woude soe souden die maghe die neghen pont behouden ende die voerscr. maechzoen sellen op boren en heffen Bruninc Gribbers zoen en Claes Morael sijn broeder en daer af betalen allen oncost en den ghemenen maghen voldoen bi Rengher Heinrix zoen baliu voerscr. alsoe ver alsus bi hem selven niet overdraghen en comen in allen vier cedelen elc alsoe als hi an Gribbers gheboren is. Voert so sellen Scuber Jan sijn broeder en Jan Bienaerts zoen gheven van hoerre broke als van Gribbers doot onsen lieven heer van Gelre voerscr. achthondert tien pont payments voerscr. ende ons liefs heren rade tneghentich pont ende ons liefs heren ghesinde vijfenveertich pont payments voerscr. Dit voerscr. ghelt selmen betalen deen helfte op sente Jans dach te midsomer ende die ander helfte op sente baven dach beide naestcomende in die wijc voer den baliu. Hierenboven so sellen Scuber Jan sijn broeder en Jan Bienaerts zoen rumen Catwoude opten meye dach naestcomende ende niet daer weder op te comen binnen enen jaer daer naestcomende op hoer lijf en op hoer goet ende nymmermeer daer na op Catwoude te comen op hoer lijf. Ten si bi ons liefs heren wille ende alle die ghenen die den doden naerre gheboren sijn dan den levenden die en sellen niet mit hen ghelden ende die ghene die op beiden ziden effen na gheboren sijn die sellen gheven en nemen ende de den beneden naerre gheberen sijn dan den doden sellen mit hem ghelden alsulke kerve als hem hoer maghe daer of rekenen en kerven sellen naden recht van den lande. Ende daer af sel hem die baeliu enen pande brief gheven ende voert bidden an allen rechteren in sgraven lande doer hoer maghe onder gheseten sijn dat si hem daer in helpelic en vordelic sijn. Voer soe sellen Scubers Jans sijns broeders en Jan Bienaerts zoens borghen machtich wesen alsulc recht te soken en te vorderen op horen maghen en hoer maechghelt op te boren en te heffen ghelikerwijs oft sijt selve waren overmids dat si buten den lande van Catwoude wesen sellen ende mit desen voerscr. segghen soe sellen alle zaken die op dien dach gheschieden daer an Gribber dien doetslach ghedaen wert als tusschen Willam den Grubber die op die tijt scout was op catwoude en noch is. Ende sinen maghen en hulperen aen dien zide Scuber Jan sijn broeder Jan Bienaerts en horen maghen en hulperen an dander zide ghesoent wesen mer vonden men den scout of sijn hulpen in enighen broken jeghen onse lieven heer voerscr. dat soude si hem beteren ende Reynaer Mat, Claes

Meynken soen en Claes Lisen zoen sellen Scuber Jan sinen broeder en Jan Bienaerts zoen te helpen comen in desen ghelden als Rengher Heinrix soen baliu dunken sal dat besceidelic is. Ende dit segghen is gheseit behoudelic der heren segghen als ons heer hertogh Aelbrecht ons heren van Bloys en heer van Waterlant dat in voertiden gheseit is ende die partyen voerscr. sellen dit voerscr. segghen houden op hoer lijf ende op hoer goet. Ende tvoerscr. segghen hebben verborghet mit Scuber en mit Jan sijn broeder, Symon Jacops soen, Hein Rode, Jan sijn broeder en Claes Claes soen ghesamenderhand ende elc voer al mit Jan Bienaerts zoen is borghe Dirc Heyden zoen ghesamenderhand en elc voer al op hoer alre goet tvoerscr. ghelt te betalen tot dien daghe voerscr. des sel Jacop Lisenzoen te helpe comen Jan Bienaerts zoen en Dirc Heyden zoen mit vijfenveertich pont payments voerscr. daer hi Jan Bienaerts zoen borghe voer worden is. Ende Brunic Gribbers zoen en Claes Morael Gribbers broeder sellen verborghen dit voerscr. segghen te houden en te voldoen op een pene van derthienhondert vijftich ponden payments voerscr. opten eersten dach van betalinghe. Ende gheviel hier in desen segghen enich ghesceel dat houden die voerscr. rade tot hoorre verclaringhe. Alledese voerscr. poynten sijn te verstaen sonder enigherhande arghelist. Dit segghen was gheseit tot Scoenhove inden voorborcht vander borcht aldaer op sente willeboerts dach int jaer ons heren dusent driehondert drie ent seventich daer bi en over waren beyde partijen voern. en anders veel goeder luden. Ende dit segghen heeft bezeghelt Reimgher Heinrix soen baliu van der Wijc wt bevelen der heren voern.

f.148v.

Jan van Chastillon grave van Bloys heer van Annesinesvan Scoenhoven ende van der Goude maken kond ende kenlic allen luden dat wi om vriendelike bede en verzoec onser liever ghetrouwen lude van onser stede van der Goude ende om menighen goeden ende trouwen diensteden zi ons ghedaen hebben ende noch doen zellen ende overmids sonderlinghe profijt ende grote orber die zi ons ghetoghet hebben dat ons ende hun daer an leghet voer ons ende voer onse nacomelinghen hun ende huer nacomelinghen ghegheven hebben ende gheven tot ewighen daghen in verbeterin huers rechts zulke punten als hier na bescreven staen. Eerst dat men voert meer nyemend van onsen poerteren onser voerscr. stede van der Goude in borchtchte commen en zel moghen van doetslaghen noch van leemten voert dat gheen onser poerteren onser stede van der Goude die in witteliken huwelic sit of ghetrouwede kinderen heeft jehens ons meer verbueren mach dan zijn lijf ende die ene helfte van zijn goede behoudelic zinen wive ende ghetrouweden kinderen dander helft voert dat onsen poerteren onser stede van der Goude voerscr. met meer maechghelts sculdich en zellen wesen te gheven dan van den after zusters kinde 5 lb. holl. alle desenpoynten te verstaen sonder enigherhande arghelist. In orkonde deser ghegheven t'Scoenhoven op st pontyaens dach int jaer lxxiii.

f.149.

Jan van Chastillon enz. doen cont allen luden dat wi ghegheven hebben ende gheven voir ons ende voer onsen nacomelinghen Willem Hont Wittelsoen ende sinen nacomelinghen al dat ambocht dat men ons diken sel in dat eerste nuwelant tusschen Dreysschier ende Scouwen dat is te verstaen maelrie vogherie visscherie alle boet ende ban tot tyen ponden toe en daer beneden ende al ambocht ghevolghet. Ende al dit voerscreven ambocht met al sinen ghevolghe sel Willem Hont ende sine nacomelinghen van ons ende van onse nacomelinghen houden tot enen rechten leene voert sel ons Willem Hont dienen mit desen voerscreven ambochte ghelijc als Dreysschier na den grote van den lande ende alle pointen sonder arghelist.

(geen datum).

f.149.

Jan van Chastillon enz. doen cond allen luden dat wi van gracies verliet hebben ende verliet Gherijt Jans zoen en om dienste die hi ons ghedaen heeft ende noch doen mach alsulc goet als hier na bescreven staet dat is te verstaen die een helfte van des (verlaten) lande van der noertzide in te meten daer Ysebrant van Scoten twe der deel van ons leen of hout dat aen die noertzide belegghen is mit des scouwers lande ende aen die zuutzide mit Willams Zaeys lande ende een mad maden ghelegghen inden biesekamp van der noertzide in te meten. Ende aen dat een eynde belegghen is mit lande dat Gherijt Jaghers kijnder is en op dat ander eynde mit lande dat coman Pieters nu ter tijt is daer Gherijt voirscr. onse manneof gheworden is van ons ende van onsen nacomelinghen hem ende sinen nacomelinghen te houden tot enen onversterflichen erflene. Hier waren over doe dit gheschiede onse ghetrouwe manne als her Jan van langherak onse ridder en Gherit die Wilde onse camerlinc. In orkonde desen brief bezegghelt mit onsen zeghele ghegheven t'Scoenhoven des woensdaghes na sinte bonifaes dach int jaer ons heren dusedt driehondert vier en tseventich.

(bijgeschreven)

tvoirscr. Goet verleyde mijn heer Bathelmeeus den Gouwer Gherijts oudste soen in alle der manieren dat dese brief begrijpt tallen rechte voor mijne Goodscalc van Brakel, Gherijt den Wilden en Lubbrecht van Rikele dat was op sinte gregoriusdach int jaer lxxxix.

f.149v.

Latijns stuk betreft Harbaren van Akersloot.

f.149v.

Jan van Bloys enz. doen cont allen luden dat wi overmids verzoec en (arnstich) vervolch heer Jans van Pollanen heer van der Lecke en van Breda en bi wille en concete heer Jans van der Lecke heer vander nuwer vaert sijns soens verleent hebben en verliet in gherechter tochten vrouwen Margriete van der Lippe vrouwen van der Lecke en van Brada sinen wittighen wive den gheheelen thijns van thiselijns waerde mit den eylanden van Munsterkerke en van Almsvoet daer toe behorende so groot en so cleyn als die heer van der Lecke en van Breda voirscr. die selve goede van ons houdende is. In welker tochten wi vrouwe Margrieten houden sellen als costumelic is. In orkonde desen brieve bezegghelt mit onsen zeghele ghegheven t'Utrecht op sinte pieters avond in zulleint jaer ons heren mccc en tseventich

f.150.

Cond si allen luden dat ic Gherit van Herlaer heer van Poederoyen ridder, ghelooft hebbe en ghelove in goede trouwe voer mi en voer mijn erve ende alle mijnre hulpe dat ic mijne lieve heer Janne van Bloys hertoghe van Ghelre, grave van Zutphen aen sine lande luden en goede die hem of den zinen toebehoren wt wat lande si sijn wtgheset den lande van Ghelre ende dat daer toe behoert niet eysschen moeyen noch scaden en sal om eenich ghebrees wille of toe segghen dat ic hebbe of hebben mocht an mijnen lieve heer voirscr. na der ghelooften mit brieven die ic van hem en van mijnre liever vrouwen der hertoghinne sijre ghesellinnen hebbe besegghelt mit hoorre beyder zegghel yet ic mach mijne lieven heer voirscr. manen na mijnen brieven sonder yet meer daer toe te doen op hem of op die sine alse voirscr. is ende alle sonder arghelist. In orconde enz.

(geen datum)

f.150.

Jan van Chastillon enz. doen cond allen luden dat wi om bede wille ende versuex Aelbrecht Willem Vyfaes zoen verliet ebben ende verliet Margrieten sinen wive hoer lijftochte aen de mynre helfte van eenre halve hoeve lands alse ghelegghen is inden lande van Montfoerde die

Aelbrecht voerscr. van ons hout ten rechten leen. Welke halve hoeve lands beleggen hebben aen den overen egghe mit erve Evert Jans zoen ende aen den nedere egghe die borchgrave van Montfoerde. In welker lijftochten wise gheloven te houden voer ons en onsen nacomelinghen na costume en zeden van den lande. In oerkonde enz. Ghegheven t'Scoenhoven anno lxxiiii.

f.150v.

Jan van Bloys bider ghenade goods hertogh van Gelre en grave van Zootphen doen cond allen luden dat wi sculdich sijn van gherechte wittachticher scout en van gheleende ghelde onsen lieve en ghetrouwen ridder heer Janne van Langherak elf hondert goeder oude scilden van des keysers munte van roemen gherechtich van munten en van ghewichte die wi hem gheloeft hebben en ghelove witelic en wel te betalen ende op dat hi des te bet versekert si en om dat wi meenen en willen dat hi van der voirscr. somme ymmer wel betaelt worde en oec wel ghequyt van allen gheloften en voerwaerden die hi en anders onse vriende mit hem also onse stede van Scoenhoven en van der Goude, Floris van Adrichem, heer Aelbrecht van Meerten canonic ten doem t'Utrecht, heer Jan Tonaer cureyt tot Cloetinghe, Gherit van Oesterwijc, Jan van Poelgheest, Vrederic van der Zevendaer, Dirc van der Goude, Dirc Willemssoen die oude, Jan van Brakel, Goodscalc van Brakel, Willem Alouds soen en Jan Breyen voor ons en mit ons ghelooft en beseghelt hebben of noch doen sellen. Soe hebbe wi hem in de hant gheset en bevolen te bedrive en te bewaren onse borch tot Scoenhoven en die baeliuscap van Scoenhoven en van der Goude mit horen toebehoren die wel te verwaren en te bedriven of te doen bewaren tot onsen behoef en tonser eeren en oerbaer ons goede rekeninghe daerof te doen tot onsen vermanen en daer of te hebbe sulke wedden als daer toe staen en ghewoenlic sijn op sulke voirwaerden als hier na bescreven staen. Dats te verstaen dat heer Jan voirscr. onse voerscr. borch en die baeliuscap voirscr. voert bevelen mach den ghenen die hem ghenoeghen daer wi en hi wel mede bewaert sijn en die vervullen na sijnre ghenoechten ende alle die scouten van den voirscr. bedrive in der selver manieren setten ende ontsetten wtgheset den scout en tscouambocht van der Goude dat wi an ons selven behouden. Ende onse borch sel men houden en verwaren op onsen cost in der manieren dat wi daer of mit heer Janne overdragen sellen na onser beider ghenoechte bi redene ende besceide en hebben gheloeft en gheloven in goeden trouwen voor ons en voor onse nacomelinghen heer Janne voirscr. en sinen nacomelinghen dat si in der voirscr. beveelnisse bliven sellen sonder ontsetten ter tijd toe dat her Jan voirscr. of sinen nacomelinghen vol en al betaelt sijn vander sommen van elf hondert ouden scilden voirscr. en her Jan en anders onse vriende voirscr. wel ghequyt sijn van alle gheloften die si mit ons en voer ons gheloeft en beseghelt hebben of noch gheloven en zeghelen sellen ende si wanneer men de voirscr. somme betalen wil en die baeliuscap mit horen toebehoren en mitten castelrie voirscr. enen anderen bevelen soe sel ment hem een maent te voren te weten doen en daer en tenden als hi of sine erfname betaelt sijn en ghequyt als voirscr. is soe sellen si ons of onsen nacomelinghen onse huus en dienst voirscr. opleveren en rume tot onsen wille ende daer of goede rekening en bewisinghe doen en alle punten voirscr. te verstaen sonder enigherhande arghelist. Ende want wi willen dat dese voerwaerden wittelic en wel ghehouden worden en voldaan in alle manieren als voirscr. staet soe hebben wi daer of tot eenre oerconde en in kennisse der waerheit desen brief beseghelt mit onsen zeghele ghegheven op sinte lambrechts dach int jaer ons heren m ccc twee en tseventich.

f.151.

Jan van Bloys enz. doen kond alle luden dat wi sculdich sijn van gherechter scout en van gheleende ghelde onsen gheminden knape Dirc van der Goude driehondert en vijftich franke van vrancrije goet en gherechtich van goude en van ghewichte die wi hem wittelic en wel betalen sellen. Ende op dat hi des te bet versekert is soe hebben wi hem onse scoutambacht van der Goude bevolen en bevelen wel te bedrive ende te bewaren tonser eeren en oerbaer

daer hi ons goede rekening of doen sel tonsen vermanen en ghelove hem in goeden trouwe voor ons en voor onse nacomelinghen dat wi ne van den voirscr. scoutambacht niet ontsetten en sellen hem en si die voirscr. somme volcomelic en al betaelt en ghebrake sijns in den dienste soe gheloven wi ghelike wijs dat wi of onsen nacomelinghen sinen erfname die voirscr. somme wittelike en wel betalen sellen tot hoors selfs wille en al te verstaen sonder enigherhande arghelist. In oerkonde desen brieve beseghelt mit onsen zeghele in kennissen der waerheyt. Ghegheven op sinte lambrechts dach int jaer ons heren duseut driehondert twee en seventich.

f.151v.

Verbelyen polder bedijct.

Jan van Chastillon grave van Bloys heer van Annesines van Scoenhoven ende van der Goude doen cond allen luden dat wi wtghegheven hebben te diken voer ons en voer onse nacomelinghen den ghenen die dyken sellen een landekijn ghelegghen an Verbelien polre streckende op doo... an mosselhoeke ancomende ter goeder scape him en huere nacomelinghen om den elfsten scoef en om thiende lam. Ende des sellen wi hebben dat vijfste ghemet lands vry van allen dykaedsen en van allen sluusghelde. Ende dese voirscr. polre sel vry wesen van sgraven hervuert ende deerste zeven jaer selt vry wesen van allen oncoste behoudelic ons onse thiende en vroenen ende tenden dien zeven jaren sal de voirscr. polre doen ghelijc anderen polres behoudelic allen poynten voirscr. Ende dit land selmen bedriven deerste zeven jaer mitten ghenen dierre in ghegoet sijn en daeren tenden selment bedriven mitten rechte vander Tolne ende alle die ghene dierre in wonen sellen ghebruken sulker vrihede als onse lude ter Tolne hebben ende alre verstaen sonder eenigherhande arghelist. Ende want wi meenen dat alle dese voirscr. poynten wittelic en wel ghehouden worden in der manieren voirscr. Soe hebben wi daer op desen openen brief ghegheven bezeghelt mit onsen zeghele in kennissen der waerheit. Ghedaen en ghegheven t'Scoenhoven drie daghe in februario int jaer ons heren m ccc drie en tseventich.

f.152.

Maelrie van Broeke in Zeelant.

Jan van Bloys bi der ghenaden goods hertoghe van Gelre grave van Zootphen doen kenlic allen luden dat wi verliet hebben en verlyen ghegheven hebben en gheven Heinric van der Creke om goeden dienst dien hi ons ghedaen heeft en noch doen sal die maelrye in onsen ambochte van den Broeke die Colijn Jans soen en Jan van Yerseke sijn soen van ons te houden plagen in aldus dingher manieren dat hi die voirscr. maelrie van ons ende van onsen nacomelinghen houden sel in leene tot sinen live mer dat wi of onse nacomelinghen die voirscr. maelrie of lossen moghen alst ons ghenoecht of onsen nacomelinghen om een pont groote slechts ghelts jaers dat hi dan van ons houden sel in leene en onse man of wesen tot sinen live sonder enighen arghelist. Hier over waren onse ghetrouwe manne die heer van Montfoert, Heinric Buffel, Willem Gielis soen, Aernt Anekijn en anderen. In kennissen der waerheit bezeghelt mit onsen zeghele ghegheven des woensdaghes na kersdach int jaer ons heren m ccc twee en tseventich.

f.152.

Wi Rengher Willemans soen rentmeister van Zeelant, Willem Alouds soen en Heinric Buffel mannen ons liefs heren heer Jans van Bloys hertoghe enz. Hein Loet, Andries Claes soen en Heyneman Jans soen scepene binnen der Tolne oerconden en kennen en maken kund allen luden dat voir ons ghecomen is Hanne Goedewille en heeft ghesworen ten heylighen mit eenen ghescaefde eede en hem verwilkoert op sijn lijf en op sijn goet nimmermeer in woerden noch in werken jeghen onsen lieven heer voirscr. noch jeghen sijnre heerlicheit noch jeghen

sinen baeliu noch jeghen sine scepene noch jeghen enighen van ons liefs heren van Bloys of diens luden wie zi sijn in gheenne manieren te misdoene ende wt sake dat hi in enighe der voirscr. manieren broekich ghevonden worde dat soude hi beteren mit sinen live en goede tot mijn heren wille voirscr. sonder enich wedersegghen in deser voirscr. manieren heeft hem onse lieve heer van Gelre sijn lijf weder ghegheven dat hi hem of ghewonnen hadde mit rechte en mit sulker beteringhe als hi en sine borghen onsen lieve heer voirscr. daer om ghedaen hebben. In oerkonde en in kennissen soe hebben wi mannen en scepene desen brief bezeghelt mit onsen zeghele. Datum ter Tolne des sondaghes na jaersdach anno lxxiii.

Des ghelijx is een brief van Clase Dordebout, Aernde Claes Aernts soen en janne den Vlaminck op de selve manne en scepen wtgheseit dat zi vanden live mit rechte niet verwonnen en waren mer in mijns heren wille ghecomen (zelfde datum).

f.152v.

Jan van Bloys hertoghe enz. doen kond allen luden dat wi ghegheven hebben en gheven onsen ghetrouwen knape Rengher Willemans soen om menighen dienst die hi ons ghedaen heeft en noch doen sal onse deel van den ambochte dat wi hebben in Cats ambocht int oudelant van noertbeveland bewesten tswaels int niewelant van Cats en int oude landeken van Cats mit onsen deele van den dorpe van Cats mit den hofsteden en allen ambacht ghevolghe alsoe als wijt daer hebben mit al dat ons van onsen voorvaders daer of aenghecomen is in der manieren dat hijt en sinen nacomelinghen van ons en van onsen nacomelinghen houden sal tot eenen rechten leene. Hier over waren onse ghetrouwe mannen die heer van Montfoert, heinric van der Creke en Heinric Buffel. In oerkonde enz. ghegheven ter Tolne des vridaghes na kersdach int jaer ons heren m ccc lxxii.

f.152v.

Jan van Bloys hertogh enz. doen kenlic allen luden dat wi van gracies ghewilkoert hebben en gonnen Pieter Danen onsen gheminde knape ende waert tot Andwerpen te foretten te jaghen ende te patriseis over al in onzen lande van Brabant tot alsoe veel toe als hi behoeven sel in sijnre herberghe duerende tot onsen of tot onser heren ghesellinnen wedersegghen. Ende ombieden en ghebieden allen den ambachtsluden in onsen lande voirscr. dat zi Pieter Danen voirscr. of zinen ghezinde tot sijnre behoef onghemoeyt laten foretten jaghen en patrisen inden voirscr. manieren sonder meerre bevelnisse van ons daer of te hebben. In kennissen der waerheit soe hebbe wi hem daer op ghegheven desen brief ten zegghe mit onsen zeghele ghegheven des manendaghes na jaersdach ter Tolne int jaer ons heren m ccc twee en tseventich.

f.152v.

Jan van Bloys herthoghe enz. doen kenlic allen luden dat wi om goods wille en om beden van vrienden ghegheven hebben en gheven Cloud Poppen soen een gorzekijn en een delvekijn ghelegghen buten dijcs an onsen ambacht van Hinclenoerde tusschen hooyereke ende der (dilven) soe dat Clout voirscr. die bruucwaer daer of hebben sal dats te verstaen die ettinghe alsoe langhe als hi leeft mer soe wanneer dats ons of onse nacomelinghen ghenoeget soe moghen wi of onse nacomelinghen dat gorzekijn in de creke voirscr. na ons nemen om thien scellinghe groete slechts ghelts jaerlix die hi dan van ons hebben en houden sel daer voor also langhe als hi leeft. In kennisse der waerheit soe hebben wi hem daer op ghegheven desen brief beseghelt mit onzen zeghele int jaer ons heren m ccc lxxii des manendaghes na jaersdach.

f.153.

Heinric Jans zoen van Reymerswale is man gheworden mijn heren van gelre van den leene dat

sijn vader van hem hielt dat gheschiede des woensdaghe na kersdach int jaer lxxii daer bi en over waren alsoe manne die heer van Montfoerde, Willem Gielis soen, heinric Buffel, Aernt Annekijn en anderen.

f.153.

Item is Grobbe Grobbe soen man gheworden mijns heren voirscr. van alsoe veel uten gorze die Gielis Janssoen onder minen heer in den lande vander Tolne ligghende hadde alsoe hem daer of aenbesterven mach wesen tot sinen deele ende wanneer mijn heer dit voirscr. gors bediken wille dat mach hi doen ombecroent van Grobben voirscr. Ende het sal an minen heer staen of hi hem voor die manscap anders yet bewisen wille of en wille. Dit gheschiede ter Tolne ende op die tijd voirscr. daer bi waren die voirscr. sijn.

f.153.

Jan van Bloys hertoghe enz. doen kond allen luden dat wi alle de rekeninghen die ons Aloud jans soen daer god die ziele of hebbe ghedaen heeft van onser rentmeesterscappen in Zeelant ende die rekeninghen die Willem sijn soen daer of dede voor sinen vader na sijnre doet loven en voor goet houden ende dat ons Aloud voirscr. alsoe ghedient heeft en sine erfname alsoe vol ghedaen hebben dat wi se bedanken ende alinghe daer of quyt schelden allen arghelist wtghesceiden. In oerkonde enz. Ghegheven ter Tolne op den derthienavond int jaer ons heren m ccc tweentseventich.

f.153v.

Jan van Bloys hertoghe enz. doen cond en kenlic allen luden dat wi bevolen hebben en bevelen Willem den Hont Wittelle soen onse rentmeesterscap van alle onsen lande goeds en renten in Zeeland te bedriven en te bewaren tot onsen eeren en oerbaer daer hi ons goede rekeninghe of doen sel of den ghenen dien wijt bevelen tot onsen vermanen en ombieden allen onsen luden binnen onser rentmeesterscap voirscr. en begheren an anders allen den ghenen die daer binnen gheseten sijn of daer onse rentmeester voirscr. van onsen wegghen mede te doen sal hebben dat si den voirnoemden Willem van onsen landen renten en goeden in Zeeland ghehoerich en bereet sijn en hem doen van onsen wegghen en tot onser behoef alsoe daer toebehoert want wine machtichg ghemaect hebben en maken te doene al dat onse ghewaerde rentmeester aldaer mit rechte pleghen en sculdich sijn te doene dat ghedueren sal tot onsen wedersegghen. Ende was dat Willam voirscr. van onser wegghen tot onser behoef en in onsen dienste meer wtleyt bi goeder rekeninghe en bi besceidenre bewisinghe dan hi van den onsen en van onsen wegghen ontfaet dat gheloven wi hem in goeden trouwe wel te betalen en te voldoen eer wine ontsetten van onser rentmeesterscap voirscr. sonder enighen arghelist. In oerkonde enz. ghegheven int jaer ons heren m ccc twee en tseventich des dinxdaghes na jaersdach.

f.153v.

Jan van Bloys hertoghen enz. doen cond allen luden dat wi bevolen hebben en bevelen heer Claise Kervinc van Reymerswale onse baeliuscap van der Goys te bedrive en te bewaerne tot onse eeren en oerbaer daer hi ons goede rekeninghe of doen sal of den ghenen dien wijt bevelen tot onsen vermanen. Ende ombieden allen onsen vrienden en luden ter Goys ende begheren an anders allen den ghenendaer hi van onsen wegghen mede te doen sal hebben onser baeliuscap voirscr. aengaende aldaer dat si den voirscr. heer Claise daer in ghehorich en bereit sijn en hem doen van onsen wegghen ende tot onser behoef alsoe daer toebehoert. Want wi ne machtich ghemaect hebben en maken te doene al dat onse ghewaerde baeliu aldaer mit rechte pleghen en sculdich sijn te doen dat ghedueren sel tot onsen wedersegghen. In oerconde enz. Ghegheven ter Tolne des dinxdaghes na jaersdach int jaer ons heren m ccc twee ende

tseventich.

f.154

Jan van Bloys hertoghe enz. doen kenlic allen luden dat wi om goods wille ghegheven hebben en gheven Boudijn Willams sone die costerie van onsen lande van Dreisschier tot sinen live duerende te helpe sijnre costerscap te regeren en te bewaren ter eeren en oerbaer onser lude van Dreisschier voirsr. Ende daer toe te doene dat een coster sculdich is te doen ende ombieden en ghebieden onsen luden ghemeenlic van onsen lande van Dreisschier voirsr. dat si hem daer of wtreyken en betalen sulke vruchten renten en vervallen alse ter costerie behooren en ghewoonlic is. In oerconde enz. des woensdaghes na jaersdach int jaer ons heren m ccc twee en tseventich.

f.154v.

stuk in latijn.

f.155.

Huge van den Woude.

Jan van Chastillon hertoghe enz. doen kond allen luden dat wi voor ons en voir onse nacomelinghen verliet hebben en verlyen Hughe van de Woude Willams soen sulc goet als hi en sijn vader van onsen oude vader des god ghedenke en van ons te houden plach in alsulken manieren als die brieve houden die daer of zijn behoudelic enen ycheliken sijns rechts en sonder enighen argelist. Hier over waren onse ghetrouwe manne her Zweder van Montfoerde, Jan Breye, Gherit den Wilde en anderen. In oerconde ghegheven des sonnendaghes na sinte agneten dach int jaer ons heren m ccc twee en tseventich.

f.155.

Jan van Bloys enz. en mechtelt hertogheinne enz. doen kenlic allen luden dat wi sculdich zijn Alaerde van Vauderic onsen knape alse van gheleenden ghelde van paerden die hi ons in onsen dienste beleit heeft en van ghelde dat hi in onsen dienst verteert heeft die hi ons mit goeder bewisinghe aenbrocht heeft zeshondert dubbel mottoen der munten van Brabant goet van goude en zwaer van ghewichte daer wi hem voor in de hant gheset hebben die een helfte van tween hondert morghen lands ghelegghen te Beesde en te Rynoey die plaghen te wesen der vrouwen van Voorne doe si levede dier god ghedenke. Soe dat Alaert onse knape voirsr. die voirsr. hondert morghen lands ghebruken sel ter tijd toe dat wi of onse nacomelinghen him of sinen nacomelinghen die zeshondert dubbele mottoen voirsr. of payment der waerden vol en al betaelt hebben. In kennisse der waerheit soe hebben wi desen brief bezeghelt mit onsen zeghelen ghegheven tot sinte Gheerdenberghe des woensdaghes na sinte aghaten dach int jaer ons heren m ccc twee en tseventich.

f.155v.

Een sluyse inden noortdam van Zaenden.

Jan van Chastillon enz. maken cond allen luden dat wi voer ons en voer onsen nacomelinghen ghewilkoert hebben ende wikoeren Claise Amelgaer soen en sinen nacomelinghen ene sluse te legghen en te houden in onsen heerlicheyt inden nnoirdam van den Zaende duerende tot eweliken daghen om thien pont hollants goeds ghelts tsiaers alle jare te betalen op bamisse. Ende dese voirsr. sluse zel hi legghen en verlegghen in zijns selfs lande ende in zijns selfs dijc buten onsen cost. Ende waert zake dat die voirsr. dam verleit worde bi eendracht ons liefs heren en neve des grave van Hollant en ons so soude dese voerwaerde wt wesen ende waer dat zake datmen dit ghelt niet en betaelde alle jare inden manieren voirsr. so soude wi ons verhalen op zijn drie made lants gheheyten de buercamp daer die sluse nu in ghelegghen is

sonder alle arghelist. In orkonde desen brieve bezeghelt mit onsen zeghele. Ghegheven ter Goude des woensdaghes na jaersdach int jaer ons heren m ccc lxxiiii

f.155v.

Lieve en ghenedighe heer u wille ghemuechlic sijn te wesen dat mijn lieve heer en vader in hiliker voerwaerde gheloeft heeft alrande tochte te maken mijnre liever vrouwen sinen wive de hi hare zom gaerne bewisen soude dest u ghenuchlic ware op den goede van tyselmiswaerde mit den eylanden van Alinsvoet ende van Monsterkerck daer toe behorende ghelijc dat mijn lieve here en vader van u houdende es waer om lieve en ghenedighe heer ic u vriendelike bidde dat ghi uwe consent daer toe gheven wilt en mijnre liever vrouwen de voirsr. goede in tochte verlyen wilt want dat wael bi mi es overmids dat ic die brieve van der hylixer voerwaerde mede beseghelt hebbe en gheloeft te houden lieve en ghenedighe heer wilt altoes over minen mate dienst ghebieden onse heer god moet ons u bewaren. Ghegheven des woensdaghes na grote vastelavond.

Jan van der Lecke ridder bereit tot uwen dienst.

f.156.

Jan van Chastillon grave van Bloys heer van Annesijnines van Scoenhoven en van der Goude doen kond allen luden dat wi bevolen hebben en bevelen machtich ghemaect hebben en maken Gherade Harden Willem zoen onse maerct tollen van Banisse in onse stede te Beverwijk te bedriven en te bewaren tot onser eren en oerbaer ende daer of van onsen weggen in te nemen sulc ghelt als men van rechtpleecht en ane sculdich is te doen dat dueren sel tot onsen weder segghen. In oerconde desen brieve beseghelt mit onsen zegle ghegheven ter Goude des donredaghes na jaersdach int jaer ons heren m ccc lxxiiii. En van den voerscr. tolne sel Gherijt voirsr. tsiaers gheven ses pont gr. de plagge voer twe groten of payment dat alsoe goet is.

f.156.

Jan van Chastillon grave van Bloys enz. doen cond allen luden dat wi om dienst dyen ons Gherijt Harde Willem zoen ghedaen heeft en om trouwen dienst dien hi ons noch doen mach hem verleent en verliet hebben voer ons en voer onsen nacomelinghen den hollen sloet den coestal en den pol te houden en te brueken tot sine live daer hi onse man of gheworden is ende waer dat zake dats ons namaels ghenoeghede so mochten w tvoirsr. Goet weder an ons nemen of onsen nacomelinghen om xxx sc. holl. slechts ghelts tsiaers die wi of onse nacomelinghen hem gheven en bewisen soude an onsen anderen goede daer hise op bueren mochte tot sinen live en te lene van ons en van onsen nacomelinghen te houden inder manieren voerscr. en sonder arghelist. In oerconde desen brieve bezeghelt mit onsen zeghele ghegheven ter Goude des donredaghes na jaersdach int jaer ons heren m ccc lxxiiii. Pres. Dno. Jan van Langherak, Dirc van der Goude, Goodscal van Brakel.

f.156v.

Jan van Chastillon grave van Bloys heer van Annesijns van Scoenhoven en van der Goude doen cond allen luden dat wi verlyet hebben en verlyen Arent Sayers soen thuys en hofstaet gheleghen binnen der veste van der borch in onse lande van Tessel Sayer sijn vader van ons plach te houden en daer toe alc erve dat sijn voern. vader hadde mit zuut hasselt en in noerre hasselt in onsen voerscr. lande van Tesselen hi van ons plach te houden als die brieve begrepen die Sayer voerscr. daer of hadde in al sulcker manieren dat Arent voern. al tvoerscr. goet houden sal van ons en van onsen nacomelinghen tot enen onversterflichen erflene te verheerghewaden mit enen witten paer hantscoen alte verstaen sonder arghelist. Hier waren

over als mannen heer Jan van Langherak onse ghetrouwen ridder, Godscalc van Brakel en Gherit den Wilden. In oerconde desen bryef beseghelt mit onsen seghele ghegheven t'Scoenhoven op sente andries avont int jaer ons heren duysent dryehondert vier en tseventich.

f.157.

Steden die gordelghelt sculdich zijn ende (reederghelt) den grave van Bloys.

Dirc Lottum Jans zoen die mijns heren shertoghen maercte van gelre menich jaer bewaerde ende sijn vader voer him tot haerlem tot sinte jans misse te middezomer brochte jacob van der Goude an die mijns heren balue was daer een deel vanden gherechte van Haerlem bi waren dat dit mijns heren rechte is ende sijn heerliche de inder voerscr. maercte. Ende men se over xxx jaren en over xl jaren plach te regieren en bewaren als hier na ghescreven staet.

Inden eersten alle die ghene die over maze ghezeten sijn jof in zeelant jof buten den lande van hollant die sijn sculdich gordelghelt dat is een stoep wijns ende roeder tolne sie si sculdich dat is enen ouden groten.

Ende dien van Dordrecht sijn sculdich half gordelghelt en roeder tolne.

Voert die van Gorichem sijn sculdich gordelghelt en roeder tolne ende mit onrechte ist dat si daer jeghens segghen want mijns heren shertoghe lude van (Gelre) (is doorgedaan) als die van Scoenhoven van der Goude van Beverwijc en anders alle sijn lude. Ghegheven tot Ghorichen xxvi ouder holl. te tolne. Ende die van Gorinchem hebben dese tolne nu betaelt en over een jaer tot Haerlem.

Voert die van Zierixzee van Middelburch van der Goes van der tolne vvan Reimerswale ende ander dorpe van Zeelant en hebben niet ghegheven mer hebben borghen gheset die tolne te betalen alsoe verre alsit an mijnen heer niet en behalen binnen eenre vermeenden tijt dat hijs hem voerdroeghen en die tijt is langhe verleden.

f.157v.

Ende die maerslude sijn minen heer tot elker maercte sculdich $\frac{1}{2}$ pont ghenghebeers (gember) en $\frac{1}{2}$ lb. pepers.

Voert so is die maercte die ghelegghen is binnen Haerlem tot sinte jans misse te middenzomer mijn heren alsoe vri als die maercte t'Dordrecht is heer Daneels vander Merwede hoghe en laghe, mar wi voertiden wt een overdracht ghemaect van ons heren voirvaders dat die scouten mitten gherechte begripen soude alle koren als joft buten der maercke waren.

Ende wat mijns heren tolnaer de scout anbrochte en hi dan mit rechte verwonnen dat soude die scout half op boren tot sijns heren behoef.

Item sel mijn heer van Brederode hebben jaerlix wt deser tolne voerscr. xxviii sc. heren ghelts die hi van minen heer hout die Jan Berwouts soen van Assendelf betaelt heeft van den jaer (l)xxii.

Item so heeft Jan Berwouts soen onfaen van mijns heren wegghen van Gelre van sijner heerliche de voerscreven in die maercte voerscr. inden jaer lxxii van mijns heren helfte als van behoen.

Eerst van scone Ghise van vechten 3 $\frac{1}{2}$ ruwen scilt.

Item van Godeciaen Jacops soen van vechten 2 ruwe scilden.

f.158. ledig.

f.158v.

Jan Aelbrechts zoen.

Jan van Chastillon greve van bloys heer van Annesijns van Scoenhoven en van der goude doen cond allen luden dat wi ghegheven hebben en gheven Jan Aelbrechtssoen onsen knecht om dienst dien hi ons ghedaen heeft en noch doen sal die ettinghe en bruucweer van den gorse dat wi hebben alsoe alst ghelegghen is bewesten Monster haven an Borsle te behouden ende te ghebruken alsoe langhe als hi leeft in deser manieren ofs ons ghenoeghede t'voerscr. gors namels aen ons te nemen dat wi him daer voer bewisen souden an anders onsen goede vijftien pont tornoyts tsiaers die hi daer voer hebben en behouden soude alsoe langhe als hi leeft. Ende hebben him des tot eenre orkonde in kennessen der waerheit ghegheven desen openen brief bezeghelt mit onse zeghel ghedaen tot Scoenhoven op sente thomaes avond int jaer van lxxiiii.

f.158v.

Jan Quarlet.

Jan v.Chastillon enz. doen cond allen luden dat wi vercoft hebben Quarlet onsen knecht tot enen vrijen eyghen t'land dat ons Eggard van der Vlist opghedraghen hadde ende ons van hun aenquam doe hi starf alsoe alst ghelegghen is bi onser stede van Scoenhoven tussen de Voerenvliet ende Heine Voskijns erfnameland daer wi ons of kennen den eersten penninc mitten lesten enz.enz.

Ghegheven t'Scoenhoven op sente Tomaesdach int jaer lxxiiii.

f.159.

Dirc van der Goude.

Jan van Chastillon enz. doen cond allen luden want onse gheminde knape Dirc van der Goude van ons in erfpachte hadde thien hont lands alsoe als ghelegghen sijn bi onser stede van der Goude inden corten ackeren om xxx sc. holl. goits ghelts tsiaers dat belegghen hebben mit erven Gherit Wouterssoen zootwaert en Wilhelmus uten Campe noirtwaert. Soe hebben wi Dirc voerscr. daer aen gracie ghedaen en hebben hem die voerscr. xxx sc. holl. tsiaers quyte ghescouden en hem tvoerscr. land ghegheven tot enen vryen eyghen en hebben bevolen en bevelen Jan van Poelgheest onsen rentmeester van Scoenhoven en vander Goude dat hi Dirk voerscr. daer op ghegheven heeft van onsen wegghen den eyghendom van den voerscr. lande in zulker manieren als daer toebehoert en men pleecht inden ban daert ghelegghen is. In oerconde desen brief bezeghelt mit onsen zeghele ghegheven t'Scoenhoven des saterdaghes na sente thomaes dach int jaer lxxiiii.

f 159.

Dirc Beynkin.

Jan v.Chastillon enz. doen cond dat wi om dienst dien ons Dirc Beynkin onse knecht ghedaen heeft ende noch doen sal Ende om ene som ghelts die hi ons daer toe betaelt heeft een stuk land ghelegghen an de noirtzijde van Langherake gheheyten die Magherhoeve alsoe alst ghelegghen is mit sulken dike ende mit zulken jaerrenten alse daer toe behoren ende belegghen hebben, erven Aelbrecht Ghenensoen an die oestzide ende dat gasthuus van Scoenhoven aen de westzide.

Ghegheven te Scoenhoven des woensdaghes na sente Odolfsdach int jaer ons heren M CCC vier ende t'seventic.

f.159v.

Jan van Bloys enz doen cont dat wi vercocht en verghicht hebben voir ons en voer onse

nacomelinghen Pieter Maertme en sinen nacomelinghen hondert twee en tseventich ghemete lants en een half luttel meer of min ter goeder mate gheleghen binnen den banne van Poortvliet in allen sticken en merken als hier na bescreven staet. In priestermeet over den vliet lviii ghemete en een vierendeel en iiii ghemete daer an die breespaden waren en xxxiiii ghemete daer an liggende in den oest hoec ende xv ghemete en 100 roeden gheleghen in den oest hoec in Damaes Coppeieren hoec ende in den westhoec ende 3 ½ quartier in Damaes Coppiers hoec. Item in Poortvliet buten priestermaet vii quartier binnen allen merken van den scetegheere en iii ghemete binnen allen merken van Pauwels polre en 9 ½ ghemete en lx roeden binnen allen merken van Jedden hoeke en xix ghemete binnen alle merken van Heynrix hoeke en vii quartier binnen allen merken van Goeshoeke ende vi ghemete binnen allen merken van borghemeede en viii ghemete en lxxxv roeden binnen allen merken van Hanne Gelnouts hoeke en 7 ½ ghemete en lxx roeden binnen allen merken van Pieter Bellaerts hoeke en 2 ½ ghemete en 50 roeden in den hoec vort dorp. Ende op al dit voerscr. lant gheloven wi vore ons en vore ons nacomelinghen Pieter voirscr. en sine nacomelinghen te houdene als op enen rechten eyghendom ende allen commer of te doene die daer op was vore den daet van desen brieve en hier of verlien wi ons betaelt den eersten penninc en den lesten

f.159v.

Jan van Chastillon grave van Bloys enz. maken cond allen luden dat wi vercoft hebben voor ons en voor onse nacomelinghen heer Vranken van Borssele heer van sinte Martijns dijc en van Payndrecht alle dat ambocht dat wi hebben in Walcheren soe waert gheleghen is ende inde lande van noirtbevelant bewesten dat vijfzoeden ende alle ambochts ghevolch van molen van werven van voirhoven van hofsteden van veren van visscherien van voghelyen ende alle ander ambochts ghevolch alsoe als wijt daer hebben ende wi houden van onsen lieven heer en neve in Walcheren ende in noert bevelant bewester vijfzoeden voirscr. behouden ons onsen thiende ende erve welc voirscr. ambocht en ambochts ghevolch voirscr. heer Vranke voorn. en sine nacomelinghen van ons houden sal en van onsen nacomelinghen ten rechten leene. Ende hi sel van desen voorgenoemde ambochte dienen onsen lieven heer en neve den grave van hollant en van zeelant ende sinen nacomelinghen in sulken rechte en dienste als trecht van zeelant ghedraghen mach ende men sculdich is te doene. Ende hi en sel ons daer of tot ghenen dienste staen van rechte vorder dat wi hem in gonste bidden sellen moghen. Ende alst voirscr. ambocht verstarft soe sellent sine afcomelinghe diet mit rechte aen comt an ons of an onse nacomelinghe verzoeken ende verheerghewaden als men sulc leen na den rechte sculdich is te verheerghewaden ende houden van ons of van onsen nacomelinghen ten rechten leene als voirscr. is. Welc voirscr. ambocht her Vranke voorn. ons wel ende wittelic betaelt heeft ende ghelove hen en sinen nacomelinghen voor ons en voor onse nacomelinghen t'voirscr. ambocht mit alle sinen ghevolghe inder manieren voirscreven te ghewaerne ten volle rechte en alle commer of te doen diere up ghewesen heeft voor den datum van desen brieve ende al te verstaen sonder enigherhande arghelist. In orkonde desen brief beseghelt mit onsen zeghele Ghegheven (verder niet vermeld).

f.160.

Cond si allen luden dat ic Gherit van Herlaer heer van Poederoyen, ridder gheloeft hebbe en ghelove in goeden trouwen voer mi en voor mijn erve en alle mijnre hulpe dat ic minen lieven heer heer Janne van Bloys hertoghe van Gelre grave van Z uutphen aen sinen lande luden en goede die hem of den sinen toebehoeren wt wat lande zi sijn wtgheset den lande van Gelre en dat daer toebehoert met eysschen moeyen noch scaden en sal om enichs ghebrees willen of toesegghen dat ic hebbe of hebben mocht an minen lieven heer voirscr. na der gheloeften mit brieven die ic van hem en van mijnre liever vrouwe der hertoghinne sijnre ghesellinnen hebbe bezeghelt mit hoorre beider zeghel. Mer ic mach minen lieven heer voirscr. manen na minen

brieven sonder yetmeer daer toe te doen op hem of op de sine alsoe voirschr. is en alle sonder arghelist. In orkonde desen enz.

f.160v.

Een sluyt inden mont vanden Zaende.

Jan van Chastillon grave van Bloys enz maken cond allen luden dat wi voor ons en voor onsen nacomelinghen ghewilkoert hebben en wilkoren Claise Amelgaer soen en zinen nacomelinghen enen sluse te legghen en te houden in onse heerlicheyt inden montdam van den Zaende durende tot eweliken daghen om thien pont holl. goets ghelts tsiaers alle jare te betalen op bamisse. Ende dese voirschr. sluse sel hi legghen en verlegghen in zijns selfs lande ende in zijns selfs dijc buten onsen cost. Ende waert zake dat die voirschr. dam verleyt warde bi eendracht ons liefs heren en neve des graven van hollant ende ons soe soude dese voerwaerde wt wesen ende waer dat zake dat men dit ghelt niet en betaelde alle jare inder manieren voirschr. so souden wi ons verhalen op zijn drie made lands gheheyten de vuer camp daer die sluse nu in gheleghen is sonder alle arghelist. In orkonde desen brieve enz. ghegheven ter Goude des woensdaghes na jaersdach anno lxxiii.

f.161.

Wi hertoghe ende hertoghinne enz. Bekennen mit desen opene brieve dat wi overdragen sijn mit heer Walrave van Valkenborch heer van Born ende van Zittart in voerwaarden als hier na ghescreven staet. In den eersten is te weten dat want heer Walraven voirschr. onse hulp worden is tgeghen den hertoghe van Gulic in den oorloghe dat wi nu hebben tgegen een om des lands en der heerlicheyt van Ghelre dat wi hem daer omme gheloeft hebben en gheloven te bewisen ende te vesten dusernt oude scilde goet van goude en gherecht van ghewicht van munten des keyzers of s'coninx van vrancricj jaerlicscher reynten in unsen reynten die wi hebben in hollant oft in zeelant soe dat hi daer seker si welke voirschr. dusernt oude scilde heffen ende boren sal nu aen kerssavond naest comende voor den eersten termijn en also voert alle jare op den voirschr. dach also langhe als hi levende is ende niet langher. Voert soe hebben wi hem gheloeft en gheloeve te bewisen ende te vesten drie dusernt oude scilde van munten ende ghewicht voirschr. jaerlixer erfreynten in den lande van Ghelre waer hem die veste gheleghen sijn ende hem beste ghenoeghet vyt ende in alsulker reynten als wi hertoghinne voirschr. hadden in den lande van Ghelre by leven onser liever broeder heer Reynouts en heren Eduwaerts der hertoghen van Ghelre dien god ghenedich si oft anders waer in den lande van Ghelre dat wi nu hebben soe waer hem des beste ghenoeghet. Ende waert sake dat wi namaels enich goet of reynten in den voirschr. lande van Ghelre vercrechtichden of mit sonen creghen des heer Walram voirschr. bat ghenoeghede soe sullen wi hem die drie dusernt scilde erfrenten voirschr. daer aen bewisen en vesten ghelijc als voirschr. is ende daer mede sullen onse andere guede in den lande van Ghelre herledich wesen van den voirschr. drie dusernt ouder scilde erfrente welke drie dusernt oude scilde erfrenten gelijc voirschr. is wi hem bewisen sullen nu aen kerssavond naest toe comende aen te heffen ende te voren nu aen kerssavonde naest comende voer den iersten termijn en alsoe voert erflijc en alle wege hem en sinen erfgenamen op den voirschr. dach ende dese bewisenisse en vest byde van der lijftocht ende van der erfrenten sullen wi hem doen tusschen dit en sinte Remeys misse naest comende voert sijnt voerwaerde dat wi oft onse erfghenamen dese voirschr. renten alleweghe of lossen moghen op den taeldach mit der jaergelden voirschr. en voert aen elken scilt voirschr. mit tyen scilden der voirschr. munten en ghewichts in voerwaarden dat wi beneden dusernt scilde t'siaers der voirschr. renten elcx maels niet of lesen sullen moghen mer daer vanen oft wi willen voert hebben wi gheloeft heer Walraven voirschr. dat wi binnen eenre maent na dien dat wi des oorloghes ghelikoert (?) of ghesoent worden soe welke konne vorderinghe oft cronen dat hi heeft tot der heerlicheyt voirschr. et si mit brieven oft mit kunden dat wi hem daer voer doen

sullen also veel als twee van onsen vrienden en twee van sinen vrienden recht ende besceyt dunket welke vier rechts en nimmer mechticht wesen sullen van onser beyder wegghen ende weert dat die vier niet overdrechtich worden soe sal die heer van Ghenp een overman wesen ende die sal rechts en minre mechticht wesen ghelijc voirsr. is. Alle dese voirsr. Punten hebben wi hertoghe en hertoghinne voirsr. gheloeft en gheloven in goeden trouwe onser sekerhede in rechter eed dat vaste en stede te houden en onverbrekelijc te voldoen alle arghelist wt ghesceyden. In orkonde ter datum anno domino MCCCLXXII die beate marie magdalene virginus.

Copra her Walravens van Valkenborch.

Wi Walraven van Valkenborch heer van Born en van Zittaert doen cond allen luden en bekennen mit desen openen brieve dat wi gheloeft hebben en gheloven in goeden trouwe en sekerheyden heer Johan van Bloys hertoghe van Ghelre grave van zutphen en vrouwe Mechtelden hertoghinne van Ghelren gravinne van zutphen dat wi oen helpen sullen mit onsen live mit onsen goede ende mit al onser macht thgegen den hertoghe van Gulike Willem oudsten soen s' hertoghen van Gulike tghegen al oer partyen en oer hulper die nu sijn of namaels hoor hulp worden tghegen alle den ghenen die den voirsr. hertoghe van Ghelre onghebruke maken of ghemaect hebben wtghesacht den biscop van Ludic en den hertoghe van Brabant ende hebben gheloeft in goeden trouwe en sekerheyden dat wi nimmermeer vreden of soenen en sullen mit den voirsr. hertoghe van Ghulike noch mit sijnre partyen en hulperen voirsr. buten wille des voergenoemde hertoghe en hertoghinne van Ghelre en waert sake dat die hertoghinne van Ghelre aflivich worde nochtan soe soelen den hertoghe van Ghelre voert helpen in allen saken ghelijc of si levede tghegen alle den ghenen die den voirsr. heer Johan hertoghe van Ghelre vercorten of veronrechten woude aen sinen recht en lijftoght en soelen helpen en dienen op ons selfs cost mit hondert ghelaeyen op unse w...ghe ende verleys ende weert sake dat wi den hertoghe van Gulike neder toghen en vynghen die selde half wesen de hertoghe en hertoghinne voirsr. en die ander helft soude onse wesen. En waert oec tsake dat ons selfs lijf neder laghe en wi ghevanghen worden soe soude uns die hertoghe en hertoghinne voirsr. half belegghen des ons af ghescat worde. Voert waert sake dat wi enich slot wonnen ot mechtich wurden die den lande van Ghelre toebehoerden die soelen wi overleveren den hertogh van Ghelre tot sijnre maninghen sonder arghelist. Alle dese voirsr. Punten gheloven wi in goeden trouwen bi onser sekerheyt in eedscat vast ende stede te houden en onverbreclic te voldoen sonder alle arghelist in orconde desen brieve beseghelt mit onse segle int jaer ons heren dusent driehondert twee en tseventich op sinte marien magdalenen dach.

f.162.

Wi hertoghe en hertoghinne doen kont allen luden ende bekennen mit desen opene brieve dat wi gheloeft hebben in goeden trouwen en in sekerheyden heer Walraven van Valkenborch heer van Born en van Zittaert dat wi hem helpen sullen mit onsen live mit onser guede en mit alle onser macht op ons selfs cost t'gheghen den hertogh van Gulike willem Audsten sone shertoghe van Gulyke voirsr. t'gheghen alle partyen en t'gheghen alle hoor hulperen die si nu hebben of namaels hoor hulp worden suellen en t'gheghevn alle die ghene die sinen vyande worden om horen wille en des oorlogs wille dat wi nu hebben in den lande van Ghelre en hebben gheloeft in goeden trouwen en bi onser sekerheden dat wi nimmermeer vreden noch soenen en (scelen) in gheenre wijs mit den voirsr. hertoghe Willem sinen soen noch mit hoorre partyen en hulperen voirsr. buten wille en weten des voirsr. heer Walraven alsulken voerwaerde die ghedaen oft god voorsaghe dat heer Walraven voirsr. den hertogh van Gulyke nedertueghe en vinghe soe soude hi half onse wesen en half heer Walraven voirsr. of oec gheviele dat god verbieden moet dat heer Walraven lijf ghevanghen worde soe soude wi

alsulke scatinghe als hem of ghesat worde half ghelden sonder enigherhande wedersegghen of arghelist. Ende woert sake dat heer Walraven voirsch. in enighe slote beseten worde of dat sijnre sloete enich besette worde dat sellen wi helpen ontsetten mit alle onser macht binnen eenre maent na dien dat hi beseten worde of sine slote op ons selfs cost alle dese voirsch. punten hebben wi gheloeft en gheloven wi in gueden trouwe bi onser sekerheyde in rechter eydscat vast en stade te houden en onverbrekelijc te voldoen alle arghelist wtghesloten. In orkonde enz. ghegheven op sinte marien magdalenen dach int jaer ons heren m ccc lxxii.

f.162.

Wi hertoghe en hertoghinne doen allen luden kunt en bekennen mit desen openen brieve dat wi heer Walraven van Valkenborch heer van Born en van Zittaert gheset hebben en setten te heffen en te bueren alsulke reynten als ons verscenen sijn en versommen sullen in Boemelrewaert en in Tielrewaert tot Beysde en tot Rijnoey die deylige doer ghelijc der vrouwe van Ghelre en van Turnhout en voert alsulken reynten als ons an der heerlicheyte van Ghelre aen comen sijn verscenen sijn en noch verscinen suelle van den goede ende reynten van Voirne soe waer die gheleghen sijn in afcortinghen der 3000 ouder scilde die wi him sculdich sijn op kerssavond naest toe comende na in houden der brieve die wi daer op ghegheven hebben voert ghelove wi hem dat wi alsulken guede ende reynten als ons aen comen sijn van den gueden van Voern voirsch. soe waer die gheleghen sijn dat wi die heer Walraven voirsch. gheven suelle in enen gheliken erfacht bi onser beider vrienden in afcortinghe der 3000 ouder scilde die wi hem jaerlix en erflic sculdich sijn wt onsen goede en reynten in den lande van Ghelre na in handen der brieve die wi hem daer op ghegheven hebben. In orkonde enz.

f.162v.

Wi Mechtelt bi der ghenaden goeds enz. doen cont allen luden en bekennen mit desen brieve dat wi sculdich sijn van gherechte scult heer Dideric van Apeltern of sinen rechten erven twelfhondert alder scilde goet van goude enz. Welc ghelt voersch. wi aen ghesat hebben en ghemaectsetten en maken onsen rechter en amptman in onsen dorpe tot Harwarden mit alle sinen recht en toebehueren ghelijc als onse vaderen hertoghen van Ghelre dit hebben ghebruyct en ghehadt te hebben ende te verwaren van onsen weggen ende in ons behoef ende gheven aen volkomen macht voert scepen en onder richter ende peynder te setten ende te ontsetten also dicke als een dunket dat ons orbaer is ende alle upcominghe broken ende vervalle die daer verscenen en vervallen te heffen en te boren van onser weggen en ons goedere kenninghe daer af te doen. Ende gheloven mede in goede trouwe dat wi noch onse erven heer Dideric voirsch. noch sinen erven mee ontsetten en sullen noch doen noch laten ontsetten nyemant van onser weggen wi en hebben een of sinen erven ten iersten wittelic ende wel betaelt an reeden ghelde die twelfhondert alder scilde mit sinen jaerliken hantghelde na beloepe ende mede wes hi meer wtgheleyt hadde dan opghebuert in onsen behoef tot witteliker bewisinghen an den voirsch. ampt sonder arghelist dat is te weten van den hantghelde van den voirsch. twelfhondert alder scilden alle jaer te rekenen en te betalen hondert en twintich alder scilde heer Dideric of sinen erven voirsch. van welken ampt hi ons ghenen cost rekenen en sal mar waert dat wi een omboden mit onsen brieven of dat wi een mit onsen monde haren riden ghewapent buten sinen ampte dat sal sijn op onsen cost winninghe ende verlies alle arghelist wtghesceyden. In orkonde des hebben wi onsen seghel aen desen brief doen hanghen. Ghegheven int jaer ons heren dusent driehondert drye en tseventich des sonnendaghes na sente mateus dach des heylighen apostels ende ewangeliste.

f.163.

Jan van Chastellon grave van Bloys heer van Annesines van Scoenhoven en van der Goude

doen cond allen luden dat wi ghegheven hebben onser dochter Katrinen die nonne is ter Lee twalef pont holl. tsiaers alsoe langhe als sileeft sulx payments also onse rentmeester van der Wijc en van Noertwijc van onsen renten aldaer pleecht te ontfane die wi hoor bewijst hebben ende bewisen op onsen renten wt Noertwijc daer deerste dach of wesen zal op den meyedach naistcomende en alsoe voert van jare te jare alsoe langhe alsoe onse voern. dochter leven zal. Ende ombieden onsen rentmeester die nu is ter voirscr. stede of namaels wesen zal dat hi onser voirscr. dochter of hueren ghewaerden bode wtreyken en betalen jaerlix dese somme ghelts sonder ander ghebot daer of te hebben wedernemende brieve van quytanche onder der abdissen zeghel van der Lee alle jare voor ons mede te rekenen. Ende overmids desen brieve zel die brief doet wesen van den vijf pont tsiaers die wi hoer te voren ghegheven hadden. In orkonde desen brieve beseghelt mit onsen zeghele. Ghegheven t'Scoenhoven des dinxdaghes na sinte aechtendach int jaer ons heren m ccc vijf ende tseventich.

f.163.

Jan van Chastillon grave van Bloys enz. doen kond allen luden dat wi om dienst die ons Gheret Mole onse poertier ghedaen heeft ghegheven hebben en gheven voor ons en voor onse nacomelinghen Elsbenen Gherit Molen weduwe acht pont holl. slechts ghelts tsiaers also langhe als si leeft die wi hoor bewijst hebben alle jare te ontfane an onsen renten van Scoenhoven en van der Goude die een helft op sinte pietersdach in zulle naistcomende en dander helft op sinte martijns dach in den winter daer naistvolghende en alsoe voert van jare te jare. Enz. enz.

Ghedaen tot Scoenhoven des dinxdaghes na sinte aechtendach int jaer ons heren m ccc vijf en tseventich.

f.163v.

Jan bi der ghenade goods hertoghe van Gelre grave van Bloys en van Zutphen en Mechtelt bider selver ghenaden hertoghinne en gravinne der selver lande voerscr. doen cond allen luden dat wi quyt ghesconden hebben en quyt scelden heer Ghesibrecht heer van Vyanen en van den Goye om gonsten wille en dienste die hi ons daer om ghedaen heeft en ghelooft heet te doen van alre anspraken die wi of onsen erven op hem of op sinen erven hebben moeghen als van alsulken ghevanghen die in de stride van brabant tot baeswijke ghevanghen worden en aen des heren hant van Vyanen ghecomen waren voort soe gheloven wi in goeden trouwe den heer van Vyanen voerscr. wt zake dat hi enighe vyande creghe van den ghenen die nu onse vyanden zijn daer en suelen wi niet mede zoenen die heer van Vyanen en zi mede ghesuent alsoe verre als hi rechts en besceide an ons bliven wille en wat wi den heer van Vyanen voerscr. alle ansprake en segghen van allen zaken vergheven hebben en .. onser gonsten ghenomen soe hebben wi hertoghe en hertoghinne van Gelre voerscr. desen brief doen beseghelen mit onsen zeghelen. Ghegheven int jaer sessentseventich op xxix dach van meye.

f.163v.

Dorp van Lexmonde ende van Odewijck.

Jan enz. doen cond allen luden mit desen openen brief dat wi verliet hebben en verliet heer Ghisebrecht van Vyanen en van den Goye dat halve dorp van Lexmonde en dat dorp van Odewijc mit allen zinen toebehoren hoghe en laghe te water en te lande dat te houden van ons en van onsen nacomelinghen tot enen onversterflichen erfleen en niet te versterven en te verheerghewaden mit enen ponde goets ghelts en gheloven voer ons en voer onse erven heer Ghisebrecht en sinen erven daer in te houden en te sterken ghelijc als onse (boelen) hertoghe van Ghelre Reynout en Edewaert dier god ghedenke hem dat verliet hebben en verliet daer hi goede brieve of heeft. In orkonde desen brief bezeghelt mit onsen zeghel. Hier over waren onse manne van leen her Reynoult van Brederode heer van Genip onse neve heer Dirc van

Pollanen heer van Asperen heer Jan van Langherak heer Ghisebrecht van Sterkenberch ridders en Wouter heer van Vorst en van Keppel en anderen. Ghegheven int jaer lxxvi op des heylich sacraments dach.

f.164.

Wi Jan enz. doen cond allen luden dat wi gheloest hebben heer Ghisebrecht heer van Vyanden en van den Goye hem over te gheven alle brieve die wi hebben van heer Jan van Herlaer heer van der Ameyden of van hem ruerende van den heerlicheyt vanden Ameyde ute gheset die erfbrieve die heer Jans kinderen van herlaer voerscr. aen rueren en waer dat die heer van Vyanden of her Henric van Vyanden zijn zoen diere erfbrieve yet behoefde soe soude wi hem copien daer wt gheven wanneer zi des begheerde en behoefden en oec mit principael brieve hem te behelpen wanneer zis noit hadden en soe sellen zi ons die principael brief weder en gheven. In orkonde desen brief bezeghelt mit onsen zeghele. Ghegheven int jaer lxxvi op den xxviii dach inde maent van meye.

f.164.

Wi Jan v.Blois enz. doen cont allen luden dat wi om dienst dien ons Herman die backer onse knecht ghedaen heeft ende noch doen sel ghegheven hebben en gheven hem en sinen erfname ene hofstede tot enen vrijen eyghen binnen onser stede van Scoenhoven gheleghen op Wissen hofstede twee roeden breet luttel myn of meer streckende voer van der straet tote after ander stede erve bi der muur daer wi ende onser nacomelinghe of hebben zullen van hun ende van sinen erfnamen of van den ghenen die besitters werden zellen der hofstede voirsr. twee goede capoene t'siaers alle jare te betalen op sinte Martijnsdach in den winter welke hofstede voersr. belegghen hebben mit erven Jan de Koc onse knecht an de westzide ende om dat wi hem enz. enz.

Ghegheven t'Scoenhoven des donredaghes na onser vrouwendach assumptio m ccc lxxvi.

f.164v.

Jan de koc.

Jan van Chastillon enz. doen kond allen luden dat wi om dienst dien ons Jan de koc onse knecht ghedaen heeft en noch doen sel ghegheven hebben en gheven voor ons en voor onse nacomelinghen enen hofstede tote enen vryen eyghen binnen onser stede van Scoenhoven gheleghen op Wissen hofstede dardalf roeden breet luttel min of meer streckende voor van den straet tote after an der stede erve bi den muur daer wi en onse nacomelinghen of hebben zullen van hem en van sinen erfnamen of van den ghenen die besitters worden zellen der hofstede voirsr. twee goede capoene tsiaers alle jaer te betalen op sinte martijns dach in den winter welke hofstede voern. belegghen hebben mit erven Mathijs die Hamckiere onse knecht an de oestzide en Harman die backer onse knecht an de westzide. Ende om dat wi hem dit vaste en wel ghehouden willen hebben in der manieren voirsr. soe hebben wi hem daer op desen brief ghegheven beseghelt mit onsen zeghele tot eenre orkonde en in kennissen der waerheyt ghedaen t'Scoenhoven des donredaghes na onser vrouwen dach assumpcio int jaer ons heren m ccc lxxvi.

f.164v.

Jan van Chastillon enz. doen kond allen luden dat wi voor ons ende voor onse nacomelinghen ghegheven hebben en gheven Mathijs Thonemanssoen om dienst dien ons sijn vader ghedaen heeft die ellen mate in onsen dorpe van der Goys mit horen toebehoren te ghebruken en te doen bewaren om redenlic loen en bate na dat men ghewone is daer of te hebben. Ende ombieden en ghebieden allen onsen vrienden en ondersaten van der Goys dat si Mathijs voirsr. of den ghenen dien hijt bevelen der voirsr. ellen maten rustelic ghebruken laten en

daer of gheven en doen hebben dat hi sculdich is te hebben alsoe langhe als hi leeft en na sijnre doet weder te comen an ons of an onse nacomelinghen. In orkonde desen brief beseghelt mit onsen zeghele ghegheven t'Scoenhoven des vridaghes na onser vrouwe dach assumpcio int jaer ons heren m ccc lxxvi.

f.164v.

Jan van Chastillon enz. doen kond allen luden want ons Dirc Willams soen de Jonghe onse knaep van sijns selfs goede opghedraghen heeft eene halve viertel lants ghelegghen an de Vlist daer Vrederic van der Zevender onse knaep en baeliu van Scoenhoven en van der Goude enen eyghendom of ghenomen heeft tot onsen behoef, welke halve viertel lands belegghen hebben mit erve Dirc Roelofs soen an de noirtzide, Hughe de Beel an die zuutzide. Soe hebben wi voor ons en voor onse nacomelinghen verlyet en verlyen Dircke voirsr. en sinen nacomelinghen te houden tot enen onversterflichen erflene. Hier over waren onse ghetrouwe manne heer Jan van Langherak, ridder, Vrederic van der Zevender. Int jaer lxxvi.

f.165.

Jan van Chastillon enz. doen cont allen luden want ons heer Ghijsbrecht heer van Vyanen en van den Goey van sijns selfs goede opghedraghen heeft eene hoeve lants gheheiten Coliers hoeve also als hi se hadde legghende in sinen ambocht van Hoeycoep. Soe hebben wi hem de selve hoeve lands weder verlyet en verlyen te houden van ons en van onsen nacomelinghen heren tot Scoenhoven hem en sinen nacomelinghen tot enen onversterflichen erfleene. Hier waren over onse ghetrouwe manne en raet heer Jan van Langherak, ridder, Vrederic van der Zevender en Goodscalc van Brakel knapen. In orkonde desen brief beseghelt mit onsen zeghele ghegheven t'Scoenhoven des woensdaghes na sinte jacops dach int jaer ons heren dusent driehondert zeven en tseventich.

f.165.

Jan van Chastillon grave van Bloys enz. doen kond allen luden want wi ghesien hebben opene brieve beseghelt die onse lieve heer en oudenvader mijn heer Jan van Henegouwen heer van Byaumont dien god ghedenke ghegheven heeft, enen eersamen vader in gode den abt van Egmonde en sinen convente alsoe van bewisinghen voer enighen thiende in onsen lande van Dreyschier roerende van xx lb. tournoys tsiaers t'ontfanghen an onsen rentmeyster in noirt hollant. Soe hebben wi voor ons ende voor onsen nacomelinghen gheconsenteert en consenteren gheconfirmeert en confirmeren den voirsr. abt en sinen convente die voernoemde brieve vaste en stade te houden in alle der manieren dat die selve brieve begrepen. Ende ombieden onsen rentmeyster van Beverwyc en van Noirtwyc die nu is of namaels wesen zel dat hi den abt van Egmonde en sinen convente alle jaer die xx lb. toutnoys wtreyken en betale tot sulken termine als ons liefs heer en oudevaders brieve voirsr. inhouden sonder meer ghebots of beveelnisse daer of te hebben wedernemende brieve van quitanche alle jaer mede te rekenen. In orkonde desen brief beseghelt mit onsen zeghele ghegheven t'Scoenhoven op sinte bartholomeus avond int jaer ons heren m ccc lxxvi.

f.165v.

Jan van Bloys bider ghenaden goods hertoghe van Ghelre grave van Zuutphrn doen cont allen luden dat wi om trouwen dienste die ons onse lieve en ghetrouwe heer Zweder heer van Montfoert ghedaen heeft in onsen oerloghe van Ghelre voor ons en voor onse nacomelinghen heer Zweder voirsr. en sinen nacomelinghen verleent en verlyet hebben en in hant gheset onse gherecht van Papencoep mit alsulken tijns en thiende en anderen toebehoren als totten voorsr. Papencoep staet in deser manieren soe wanneer dat wi of onse nacomelinghen hem of sinen nacomelinghen betalen of doen betalen sesse hondert en zesendartich oude vrancrixe

scilde goet van goude en zwaer van ghewichte of payment dier waerden op enen termijn van kerssavond binnen Montfoert of binnen den ghesticht van Utrecht daerd heer Zweder voirscr. of sijn nacomelinghen begheren de welke somme van ghelde voirscr. her Zweder voirscr. in onsen oirloghe van Ghelre voern. verteert heeft en hi ons bewijst heeft voor onsen raet met goeder rekeninghen ende daer toe sulc ghelt als hi noch in onsen dienste verteren sel met goeder besceydenre rekeninghe en bewysinghe soe sel heer Zweder voirscr. of sijn nacomelinghen ons en onse nacomelinghen onse gherecht van Papencoep alsulken tijns en thienden en anders alsulke toebehoerenals toten voirscr. Papencoep staen commerloes en vry weder over leveren alsoe als wijt hem nu verleenen verlyen en in hant setten tot elken termine van kerssavond alst ons of onsen nacomelinghen ghenoeget. Ende waer dat sake dat ons of onsen nacomelinghen die rekeninghe en bewijsinghe niet redelic noch besceidelic en dochte wesen die hi of sinen nacomelinghen doen zellen van den toecomenden teringhenen coste in onsen dienst voirscr. so sal dat staen ter verclaringhe en goetdenken onser liever en ghetrouweden heer Reynout van Breederode heer van Ghenpe en heer Jans heer van Broehusen. Ende waer dat sake dat men die twee voirscr. daer niet wel bi werven en mochte soe souden wi of onsen nacomelinghen die heer van Montfoert voirscr. of sinen nacomelinghen elc enen man daer toe nemen in daer tweer scat voirscr. alle desen voirscr. punten te verstaen sonder enigherhande arghelist. Hier over hebben gheweest onse ghetrouwe manne die heer van Ghenip en die van Broechusen voirscr. Zweder van Zulen, Jan Brey en Jan Dirx soen. In orconde desen brief beseghelt mit onsen zeghele ghegheven tot Ghelre op sinte willebroerts dach int jaer ons heren m ccc twe ende tseventich.

f.166.

Jan van Chastillon enz. doen cond allen luden dat wi ghegheven hebben en gheven meister Willem sonder Danc onsen knaep om dienste die hi ons ghedaen heeft en noch daghelix doet alsulke bate en profijt als jaerlix comen sal van onsen mercttolle en wissel in onse stede van der Wijc mit allen horen toebehoren dat te doen bewaren tot onser eeren soe dat de coemans niet veronrecht en wordt en hem sulc ghelijc en reden ghedaen worde als men van onsen wegghen gheploeghen heeft behouden dien dat meister Willam onsen baliu aldaer die nu is of wesen zel van redeliken coste dien hi in de merct doen sel de merct te bewaren als ghewoonlic is en hi ons pleghet te rekenen voldoen sel soe dat hi ons daer gheenen cost of en rekene ende ombieden onsen baeliu scout scepenen en raet en anders onsen ondersaten aldaer ghemeenlic dat si meister Willam of den gheenen dien hijt bevelen sel den voirscr. merct tollen en wissel in de Wijc rustelic ghebruken laten sonder hem eenighe hinder daer an te doen mer helpen en starken van onsen wegghen ofs te doen viele dat onse eer en recht verwaert worde alsoe lief als si ons hebben en dit sel gheduren tot onsen wedersegghen. In orconde desen brieve beseghelt mit onsen zeghele. Ghegheven t'Scoenhoven op sinte barthelmeus dach int jaer ons heren m ccc lxxvi.

f.166v.

Jan van Chastillon grave van Bloys heer van Avesnes van Scoenhoven en van der goude doen cont allen luden dat wi mitten gheenen overdraghen zijn die onsen land ghecoft hebben en aenghenomen op enen eweliken pacht daer onse liesch te staen plach bi onser stede van der Goude dats te weten mit Dirc van der Goude onsen knaep Dirc den Poorter mit Dirc Boterman mit Outgher Ghilensoen mit Willem Clais backers soen mit Voppe Pieters soen mit Jan Tidemans soen mit Jan Rosen soen en mit Willem Louwerens soens also dat wi ende onse nacomelinghen van him ende van hueren nacomelinghen hebben zellen alle jare erflic ende ewelike die zi onsen rentmeester van der Goude in dien tyden wesende betalen zellen op sinte baven dach of binnen vierthien daghen daer naist volghende van elker merghen lands enen ouden vrancrixen scilt of payment dat also goet wesen zel inden tijd der betalinghen dat te

panden an huer goet waer zijt hebben binnen of buten onser stede van der Goude alse men onse scout pleecht te panden. Ende daer om zellen zijt hebben dijc vrij, voert zijt vorwaerde dattet voirsch. land enen wech behouden zel op Waddinxveenre weteringhe twee roeden breed en datter wt wateren zel mit dien van Waddinxveen in huer waterscap ende viel him daer in hinder of scoet dat zellen wi him reden buten hueren cost. Voert zijt vorwaerde dat onse scout van der Goude tscoutambocht van den voirsch. lande bedriven zel ende dat nyemant uten eyghendom van den voirsch. lande comen mach zijt vercopen dan bi onsen rentmeister ende bi onsen scout van der Goude en by drien of bi hem twee ghebueren of poorters die daer inghelant zijn des onse rentmeister hebben zel van elken eyghendom twe scellinghen die scout en bueren twe scellinghe en daer om zellen zi overden euyghendom staen also verre a;st landt niet ghebernt en is ende waert ghebernt so en zellen zijt nyemant vercopen dan daer wi ons pachts wel an verzekert zijn bi onsen rentmeister en scout voersch. Ende al te verstaen sonder argelist. Ende om dat waer is ende wi die voirsch. vorwaerde en gheloefte volcomelic ghehouden willen hebben voer ons en voer onsen nacomelinghen den voern. pachters en hueren nacomelinghen so hebben wi daer op desen brief ghegheven bezeghelt mit onsen zeghele tot eenre orkonde en in kennisse der waerheyt en om de meerre zekerheyt so hebben wi ghebeden onsen gheminden brueder den heer van Beaumont dese voirsch. punten en vorwaerden mit ons te loven ende te confirmeren. Ende wi Guye van Bloys heer van Beaumont om bede wille ons liefs heren en broeder des grave van Bloys voirsch. loven mit him voer ons en voer onse nacomelinghen alle punten en vorwaerden voirsch. en hebbe des tot eenre orkonde desen brief mede bezeghelt mit onsen zeghel. Ghegheven t'Scoenhoven des sonnendaghes na sinte katrinen dach int jaer ons heren dusent driehondert sevene ende tseventich.

f.167v.

Willem Gherit soen heeft van minen heer den moerwaert an Texel daer of dat hi hebben zel zulke nutscap alse of coemt wtghenomen den zeevont daer hi den baeliu van Texel tallen tiden goede bewisinghe of doen sal en van den voirsch. goede is Willem mijns heren man gheworden en mijn heer mach hem dat goet weder segghen als hem ghenoecht. Mer soe sel Willem voertsne tot sinen live hebben wt mijns heren renten 3 lb. staers sulx payment als mijn heer van sinen renten neemt ende daer of mijns heren man bliven des heeft hi mijns heren brieve. Daer waren over manne Jan van Poelgheest, Dirc Soyers soen en Jacop Scriver

Dirc Soyers soen vercreech op de selve tijd an minen heer dat Soyer sijn soen de costerie ter Borch tot sinen live hebben sel op dat hi se wel verdient.

f.167v.

Texel.

Jan van Chastillon enz. doen cond allen luden dat wi ghegheven ende gheven onsen goeden luden van Texel dat hem onse baliu en scout die nu sijn of namaels wesen sellen recht en kennis doen sellen na horen hantvesten en van bitichten en donkeren saken die hem onse baeliu of scout tyen of aensegghen daer of sellen si goede borghen setten te rechte te comen daer wi wel an ghehouden sijn en soe wie hem soe verborcht dien en sel men niet vanghen noch stocken. Voert hebben wi onsen voirsch. luden ghegheven dat men gheenen eedt op nemen en sel voert alle scout die men verpleghen sel sel men verpleghen voer den scout en twee buere dat goede wittachtighe knapen sijn en daer voor verslaen de somme van der scout waer of de scout roert ende die daghe van betalinghe en mit eeden goet maken dattet goede wittachtighe scout is. Voert soe wie den zoe coept van eens andersmans goede die sellen daer wt brenghen mitten eersten rechte dat hi en daer wt brenghen mach ende waer hi des niet en doet soe moghen wi den zoe van dien goede aentasten en hebben als ons ghenoecht en

waert dat anders yemant an dien goede yet ghebrake dien soudmen an dat goet rechten eer wi daer an quamen en dan en soude de ghene die dien zoec ghecoft hadde van sinen scout niet hebben. Voert waert sake dat yemant enen anderen sijn goet onder settede ander lude van sijnre door mede te wesen en hoor scout mede te ont. doe ghene die goet ondername en kenlic ware dat in sine scout mit sinen eede voor onsen scout en buerre te voeren niet goet ghemaect en hadde die verbuerde jehghens ons x lb. en voor sulke scout sel men setten twiscatte pande. Voert soe wie sijn erve vercoept die mach borghen daer of nemen van den ghenen diet coept also goet als de somme van den ghelde draecht sijn ghelt te hebben tot sinen daghe en vielt dat men dat erve voert vercoft binnen dien daghen van dien voerscr. coep soe en mach dat erve niet vri worden van dier scout mit vercoepen noch mit versetten die eerste penninc en si betaelt mitten lesten. Voert sel men nemen twee raeds die tlant bewaren sellen bi rade der manne ende der scepene en die sel men nemen t'eerste jaer den enen in den borch kerspel en den anderen in den westkerspel en tander jaer eenen ten oesten ende en den anderen ten wale ende alsoe sel men se alle jaer versetten elc in sijn kerspel ende die sellen daer toe gheedt wesen s;ands eer en orbaer te doen eren slands gaet in te nemen ende wt te gheven ende daer of goede rekeninghe doen voor ons of voor onse baeliu manne en scepene en die xxx scepene sullen dese raetslude kiezen die hem daer alre nutste toe dunken ende elc raetsman sel hebben siaers twe oude scilden voor sinen cost en anders en sel men en sel men op tlant gheen oncost (binnen) slands doen. Voert soe moghen onse lude van Texel visschen en voglen als si voermaels ghedaen hebben behoudelic ons onsen visscherie en voghelyen in alle poynten te verstaen sonder arghelist behoudelic ons in allen poynten onse heerlicheyt en dit sel ghedueren tot onsen wedersegghen

f.169.

Des woensdaghes na alrekinderen dach int jaer lxxvii dede Vrederic van der Zevendaer minen heer den grave van Bloys manscap van v morghen lants ghelegghen inden lande van Steyn dat ghesciede t'Scoenhoven op den huse daer over en aen waren als manne Goodscalc van Brakel, Dirc Beynkin, Gherit den Wilden en anderen.

f.169.

Jan van Chastillon enz. doen kond allen luden dat mit ons overeen ghedraghen is Allaert Grebbe van den gorse daer die etting Gielis Jans soens of was in sulken vorwaerden dat ons die voerscr. Allaert wijt houden sel hem selven en van sinen susteren en bruederen van enighen recht of toe segghen dat zi daer toe hebben moeghen. Zoe hebben wi hem ghegheven 5 lb. tournoys tsiaers van ons en van onse nacomelinghen ten rechten leen te houden daer hi onse manne of worden is te betalen alle jaer tsinte martijns misse en hem bewijst hebben aen onsen rentmeester in Zeelant en ombieden onsen rentmeester in Zeelant die nu is of namaels wesen sel dat hi hem alle jaer wtreyken en betalen die voerseyt 5 lb. tournoys sonder meer ghebots van ons daer of te hebben en daer of weder quitanche neem alle jaer voer ons mede te rekenen. In orkonde (verder niets)

f.169v.

Den baeliu van Texel was bevolen barbare lxxviii also van den talmans in Texel dat gheen talman hebben en sel van woerden voor den scout boven 4 sc. des ghelijx voor den baeliu van slechten of daghelixen dinghen 4 sc. van vredebrake hof dinghe viii sc. van vredebrake 1 lb. van doetslag xl sc. goets ghelts.

f.170 ledig.

f.171 ledig.

f.171v.

..... alsoe als si ghelegghen sijn in Strevelant bi der kerken daer boven naist ghelant is Hase En beneden Jan Ecken soen opgaende van de after dijc an die Lecke.

Dit is tlant dat in Wandel minen heer op ghedraghen is bi Willem van der Heul voir twaellant dat hem mijn heer gheoorloft heeft sine willete .. als mit vrien goede. Dats te verstaen 17 ½ morghen lands ghelegghen in Leckerlant dat belegghen hebben mit erve Allaert S..chen soen an d'oestzide, Dirc de Witte Egbrechts soen an de westzide streckende mitten overen ende in de Lecke. Ende mitten uteren ende an den ouden cadijc daer der zuutbroeker lant keert.

f. 171v.

Die Zabbuxche hoeve die hevet belegghen anden oversten egghe haer Heynric van Montfoerde en ande nederen egghe die joncfrouwe van Haestrecht heer Heynrix zuster voerscr. op ghaende an Lopiker lant nederghaende an den broedt dijc.

f.172 ledig.

f.172v. in latijn

f.173.

Wi Dirc heer van Brederode maken cond allen luden dat onsen lieve heer die grave van Bloys ons zijn lant bevolen hadde te bewaren alse ruwaert dat doe voer ons quam Jan Berwouts soen en quyt scout een deel van den lande dat hi helt van onsen lieven heer den grave van Bloys voerscr. welc voerscr. lant dat wi varlieden Jan Eggherde te heve te houden van onsen lieven heer voerscr. in allen scijn alst Jan Berwouts soen van onsen lieven heer voerscr. plach te houden. Hier by waren alse manne ons liefs heren voerscr. Jan van Zaenden en Gherit Barthout. In orkonde desen brief en onse zeghel hier binnen op ghedruct des donredaghes na sinte martijns dach tranclacio in den jaer seven en tseventich.

f.173.

Alle die ghene die desen brief sellen zien of hoeren lesen doe ic Jan Berwouts soen cont en kenliken dat ic gheloeve bi mijnre zekerheyt en bi mijnre trouwe Jan Eggherde alsulke hantvesten te leveren als ic sprekende hebbe van minen lande dat lighet binnen den banne van Westzaenden dat ic houde van heer Jan van Bloys binnen zes weken nadien daghe dat haer Jan voerscr. binnen lands koemet jof waer dat sijns ombrake soe soude ic se leveren voer den ghenen daer haer Jans goet voerscr. op quame binnen alsulken daghe als voerscr. is en die zuder langhe koy daer wt te trecken alsoe als hise ieghens mi ghecoft heeft daer ic him of Belye al betaelt den lesten penninc mitten eersten. Voert so gheloeve is Jan Eggherde voerscr. waer dat ic die hantvesten niet en leverde als voerscr. is dat hi die renten op boeren sel van al minen goede datter blijft binnen dien van voerscr. In kennissen der waerheyt soe heb ic desen brief open bezeghelt mit minen zeghel ghegheven des manendaghes na sinte pouwels dach int jaer ons heren dusent driehondert en neghen en tsestich.

f.173v.

Alle die ghenen die desen brief zullen zien of horen lesen die ic verstaen Iohan Barwouts soen dat ic kenne en lye dat mi Iohan Egghaerts betaelt heeft dat vierendeel van twe en viertich made lands de ic houde van den heer van Bloys en ghelegghen zijn in den ban van Westzaenden wtgheset dertich scilde de zellen bliven staen ter tijd toe datter mijn moeder quijt scelt van hoorre lijftocht ende so wanneer zi hoor lijftocht quijtschild zel hi mi de dertich scilde betalen daer ic hem dien brief of leveren sel van minen heer daer ic dit ghoet of houden

binnen zes weken na des heren coemst van Bloys of zjnre nacomelinghen. In orkonde des briefs bezeghelt mit minen zeghel ghegheven int jaer ons heren dusent driehondert acht en tsestich op sinte thomaes avont.

f.173v.

Jan van Bloys heer van Scoenhoven en van der Goude laten u weten Reyngaer Heinrix soen onsen scout tot Westzaenden dat ons Jan Egbrechts soen als voghet van Jan Eggaerts kijnde manscap ghedaen heeft van alzulken lande als Jan Eggaert voerscr. ghecoft hadde jehens Janne Berwouts soen dat men van ons te leene hout. Ende wi hebben den voerscr. Janne Egbrechts soen ontfaen te manne als voghet van den voerscr. kijnde behouden enen yghelijx sijns rechts. In orkonde desen cedula en onsen zeghel hier op ghedruct in kennissen der waerheyt ghegheven in den Haghe op sinte gregorijs avont int jaer ons heren dusent driehondert en tseventich.

f.173v.

Johan van Chastillon grave van Bloys heer van Avesnes van Scoenhoven en van der Goude doen cond allen luden want Jan Berwouts soen in den Tiden doe wi lest in Pruussen waren ende wi den heer van Brederode des god ghedenke onse land bevolen hadden gheweest heeft voer den heer van Brederode voerscr. en quijt ghesconden een deel lands van den lande dat Jan voerscr. van ons te leen hout ghelegghen in onsen lande van Westzaende tot behoef Jan Eggherts daer wi opene brieve of ghezien hebben die Jan Berwouts soen selve bezeghelt heeft datter is die zuderlanghe coye. Ende hi hem daer of voldaan hevet in zinen brieve den eersten penninc mitten lesten. Soe hebben wi wt goeden beraden die voerscr. zuderlanghe coye alsoe als zi ghelegghen is en Jan Berwouts soen vercoft heeft verliet en verliet Willem Jan Egghaerts soen en sinen nacomelinghen te houden van ons en van onse nacomelinghen in allen manieren alsoe Jan Berwouts soen dander drie vierendeel van ons hout al te verstaen sonder argelist. Hier waren over en aen onse ghetrouwe mannen her Jan van Langherak, Goodscalc van Brakel en Dirc van Beinhem. In orkonde desen brief bezeghelt mit onsen zeghele ghegheven op onser borch van Scoenhoven op onser vrouwen avond purificacio int jaer ons heren dusent driehondert zeven en tseventich.

f.174.

Ic Willem Eggaerts doe cond en kenlic allen luden dat ic gheloeft hebbe en gheloeve in goeden trouwen Janne Berwouts soen te betalen dertich scilde sulc payments als ghinc in den jaer achten tsestich dats te verstaen alsoe vroech alsoe Jan Berwouts soen gheweest sel hebben mit sijnre moeder voer minen lieve heer den grave van Bloys mit sinen brieven van den lande dat hi van hem hout ghelegghen op Westzanen ende daer wt ghecomen sel hebben tot mijnre behoef t'vierendeel van dien lande dats te verstaen die zuderlanghe coye alsoe als hise Jan Egghaert minen vader des god ghedenke vercoft heeft en sijn moeder quijt ghesconden heeft alsulc lijftochte alsoe si daer aen hadde dat Jan voerscr. dan hebben sel die voerscr. dertich scilde sonder argelist. Ende want ic zelve ghenen zeghel en hebbe soe heb is ghebeden Symon Abben soen van Aemstelredam desen brief over mi te bezeghelen en dese voerscr. vorwaerden over mi te kennen ende ic Simon voerscr. om dat ic hier by en over gheweest hebbe ende om bede wille Willem Egghaerts voerscr. hebbe desen brief open bezeghelt mit minen zeghel tot eenre orkonde en in kennisse der waerheyt ghegheven op onser vrouwen avond purificacio int jaer ons heren dusent driehondert en tseventich.

Los briefje.

Jan van Brakel als bailiu heeft enen eyghendom ontfaen tot mijns liefs heren behoef van Bloys van heer Staesken van Brakel van vive morghen lands daer her Staesken mijns heren man of

gheworden is alsoe alst ghelegghen is mit erve hoofstede en uterdijc in zijns selfs ambocht van Langherak en belegghen hebben mit erve aen den over egge Goyer Ghisebrechts zoen daer her Staesken den eyghendom of heeft en beneden belegghen heeft mit eyghen en erve Arnt van Diest. Hier waren over scout Eggaert Godevaerts soen ghebueren Pieter Herman, Goyer Ghijsbrechts soen, Lambrecht Lijsbetten soen, Jan Lijsbetten soen.

Los briefje.

Vermanen over de verlijnghe van mer vrouwe van Langherak.
Goeyer Ghijsbrechts soen en Gherit Claes soen.

f.175.

Jan van Chastillon grave van Bloys heer van Avesnes van Scoenhoven en de van der Goude doen cond allen luden want wi om goede gunste die wi toedragghen Herman Vinke jonghe her Herman Vinke soen des god ghedenke him ghegheven hadden xxv lb. holl. tsiaers also langhe als hi levede. So hebben wi om gunste die wi tot sinen kinderen dragghen ende om dienst dien ons Herman Vinke van Brandenborch him ghedaen heeft ende noch doen zel him ghegheven hebben ende gheven die helfte van den voerscr. ghelde tsiaers dats te weten xii lb. x sc. holl. tsiaers zulcs payments als altoes ghenghe ende gane wesen zel in holland ten terminen der betalinghe des ghelts dat zi alle jare op sinte katrinen dach also langhe als hi leeft t'ontfaen van onsen rentmeester van Scoenhoven ende van der Goude en ombieden onsen rentmeester voerscr. die nu is of namaels wesen zel dat hi Herman Vinken van Brandenborch voerscr. die voerscr. xii lb. x sc. holl. tsiaers wtreyken ende betalen ten voerscr. terminen sonder ander ghebot van ons daerof te hebben ende daer of alle jare wedernemen brieven van quytanche ons mede te rekenen. Want hi onse man daer of worden is. Hier over waren onse ghetrouwen manne heer Jan van Langherak ende Dirc van der Goude. In orkonde ghegheven svridaghes na valentini anno lxxvii.

f.176 en 177. niet aanwezig.

f.177v.

Henric van Waes Herman Vinken soen heeft enen brief in alle der manieren dat Herman zijns brueder brief hout die voerscr. is.

f.177v.

Jan van Chastillon grave van Bloys enz. doen kond allen luden dat wi om dienst willen die ons her Jan van Langherak onse ghetrouwe ridder, raed en manne ghedaen heeft en noch doen sal hem gheoorloeft hebben en oerbaren mit desen brieve te vercopen Jan Libaert Claes Jans zoen Willem Spaen en Dirc Poppen zoen poerters tot Zierixie omtrent vierentwintich ghemete vronen die wi hem ghegheven hebben en hem te deele ghevallen zijn int nu lant tusschen Scouden en Dreysschier datter bedijct is welker vronen die voerscr. knapen en huer erfnamen vilic ghebruken sullen in alsulken rechte als anders die voerscr. vronen int voerscr. lant ligghen en bedijct zijn ghelijc den onsen die wi daer behouden hebben behouden ons onser thienden en heerlicheit sonder enigherhande arghelist . In orkonde desen brief bezeghelt mit onsen zeghele ghegheven tot Landrechiez tien daghe in junio int jaer ons heren m ccc achten tseventich.

f.178.

Den Andel gelegen in Texel.

Jan van Chastillon grave van Bloys enz. doen kond allen luden dat wi voor ons ende voer onsen nacomelinghen ghegheven hebben ende gheven Coenen van Oesterwyc onsen knape om menighen dienste dien hi ons ghedaen heeft ende noch doen zel dat land dat onse

ghemeynte van Texel in deser jaer bedijct heeft ende gheleghen is anden westende van onsen lande van Texel gheheyten den Andel streckende mitten oesteren egghe an Jan Trysen spijs ende ande zuutzide streckende ande Horn ende ande noirtzide streckende also voert anden ouden dijc ende ant ckyf ende voert streckende vanden clyf ande wambeuse ende van daer voort ande galghen Mit welke lande Coene voern. zinen vryen wille doen mach behoudelic ons onsen thienden daer off ende alsulc recht ende dienste als wi van anderen onsen lande hebben dat in Texel gheleghen is ende al sonder arghelist. In orkonde desen brieve bezeghelt mit onsen zeghel ghegheven t'Scoenhoven des dinxdaghes na sinte jacobs dach apostoli int jaer lxxviii.

f.178v.

Ic Coene van Oesterwyc knape make kond allen luden want mi mijn lieve gheduchte heer mijn heer de grave van Bloys ghegheven heeft dat land dat in desen jaer bi onser ghemeynten hulpe bedijct is ande westzide van onsen lande van texel gheheyten den Andel also die open brief spreckt die ic daer of van mijnen gheduchte heer voerscr. hebben. So hebbic ghelooft ende ghelove in goeden trouwe voer mi ende voer minen nacomelinghen mijne lieve gheduchte heer voerscr. of zinen ghewaerden bode wt te reyken ende te gheven als ic of minen nacomelinghen dit voerscr. land vercoft hebben de rechte helfte van al dat daer of coemen zel. In orkonde desen brieve bezeghelt mit minen zeghel ghegheven t'Scoenhoven des dinxdaghes na sinte jacobs dach int jaer lxxviii.

f.179.

Jan van Chastillon enz. doen kond allen luden dat wi ghegheven hebben ende gheven voer ons ende voer onse nacomelinghe heer Floris van Adrichem onsen ridder ende zinen nacomelinghen tot ewighen daghe om goids wille ende om trouwen dienste dien hi ons ghedaen heeft ende noch doen zal die ghifte ende presentacie van eenre capelrie gheleghen in onser kerk van der Wijc ende ghesticht ende gherent hebben heer Floris selve ende her Rutgher van den Poele priester in die ere goids ende gheven him ende zinen nacomelinghen voer ons ende voer onsen nacomelinghen alle recht dat an die voirsch. cappelrie hebben souden sonder arghelist. In orconde enz. ghegheven t'Scoenhoven op den lesten dach in julius anno lxxviii.

f.179.

Jan van Chastillon enz. doen cond allen luden want wi meister Willam sonder Danc onsen gheminden knaep om menighen dienst dien hi ons ghedaen heeft en noch doen sal ghegheven hadden onse merctolle van bamisse mit horen toe behoren die wi hebben in de Wijc en langhe daer te voren hem ghegheven hadden xvi lb. siaers tot sinen live. Welke merctolle en xvi lb. siaers en sulke brieve als hi daer of hadde hi ons over ghegheven heeft. Soe hebben wi hem voorbeyde dinghe voirsch. weder ghegheven hebbe en gheven zes en vijftich ouder scilde vrancrijx of vlaemsch goet gherechtich van goude en van ghewichte of payment hore waerde siaers tot sinen live daer hi onse man of is alle jaer te betalen te kerssavont of binnen xiiii daghe daer naest volghende sonder langher vertrec welke lvi ouder scilde voirsch. wi hem bewijst hebben en bewisen alle jare sijn leven lanc te heffen ten voersch. termine wt den ghelde van ons sluus ter Goude ende ombieden onsen luden die de voersch. sluus nu ghehuert hebben of namaels huere sellen dat si meister Willem of sinen ghewaerden bode die voersch. somme ghelts wtreyken en betalen ten voersch. termijn in aforcoringhe en mindering van des ons daer jaerlix of vorscrive sel sonder meer bevelens daer of te hebben wedernemende sinen brief van quytanche onsen rentmeester over te leveren en voert op te voldoen en waert dat onse sluus bewaerres tot enigher tijt meister Willem onghereet vielen sijn ghelt te betalen tot sinen daghe soe mach of sijn ghewaert bode sijn ghelt voersch. talle tiden wtpanden ghelijc

onsen rentmeester soude doen moghen. In den welken wi bevelen neernstelic onsen scout en scepenen die dan wesen sellen hem sulke reescap en recht te doen als si ons selfs rentmeester aldaer doen souden. Ende want wi meenen en willen dat meister Willem des renten rustelic ghebruke sijn leven lanc en hem alle vorwaerde voerscr. wittelic en wel ghehouden worden. Soe hebben wi hem des voor ons en voor onse nacomelinghen desen brief ghegheven bezeghelt mit onsen zeghel in kennisse der waerheit. (geen datum).

f.180.

Wi Jan van Henegouwen heer van Byaumont maken cond allen den ghenen die desen brief sellen sien of horen lesen dat wi ghegheven hebben en gheven Pieter Jacops zoen ten rechten erfpacht jaerlix om vijftien pont holl. een hont lants dat den heer aen quam van Gheien Peter Rutseel soen ghelegghen aen die oestside Vrederic Gherijts Jonghen neve en Pauwels die Tolnaer aen die westside ende vier gherden lants ghelegghen aen die oestside Claes Bent ende aen die westside Jacob Scepelart en twe campe lants streckende van den oude cadijc aen die doneweteringhe ghelegghen aen die oestside Enghebrecht uten Weerde en aen die westside Claes Bent. Ende dit voirghenoemde lant hout inden hoofslach te samen vierentwintich marghen lants bi morghentale dese voirscreven pacht sal Peter jaerlix betalen op sinte martijns dach in den winter of viertien nacht daer na ombegrepen die een helft ende op sinte peters dach ad cathedram die ander helft of binnen vierthiendaghe daer na ombegrepen. Ende dit voirschr. lant sal Peter bewaren van diken van dammen en van allen commer die daer op comen mach over dese voirwaerden waren her Coenraet van Oesterwijn, Her Jan die Backer, Henric van Heinsberghe, Didderic die Rode en Pouwels die Tolnaer. Om dat wi willen dat dese voirschr. pacht mit alsulken punten alse hijr voirschr. sijn ghehouden warde Peter voerghenoemt en sinen nacomelinghe van ons en van onsen nacomelinghen so hebbe wi desen brief open bezeghelt met onsen zeghel ghegheven int jaer ons heren dusent driehondert vier en dertich op sente andries dach apostels.

f.180.

Jan van Henegouwen heer van Byaumont maken cond allen luden dat wi den erfpacht van allen den lande dat Peter Jacops sone van ons te hebben plach ghegheven hebben en gheven voer ons en voer onse nacomelinghen heer Jacop Claes sone parochipape van Slydrecht en sinen nacomelinghen te hebben en te houden om zulc ghelt alset Peter vorschr. ghepacht hadde en in alle diere manieren dat dese brief spreket daer dese doer ghesceken is en Peter voern. daer af van ons hadde sonder arghelist. Hier over waren her Reyneer Eggloy, her Jan van der Goude, her Jan die bastaert, ridders, Peter van Dobben, Gherte die Borgher en Philips Roetaerts sone. In orkonde desen brieve bezeghelt mit onsen zeghele ghegheven op onse borch tot Scoenhoven vijftien daghe in meye int jaer ons heren dusent driehondert drie ende vijftich.

f.180v.

Jan van Chastillon enz. doen kond allen luden dat in voortiden ghecomen is voor ons en voor onse manne heer Jan van Langherak, ridder, en Gherit den Borgher, knecht, Jan Berwouts soen ende droech ons op tot behoef joncfrou Sophien van Dalen sijns wijfs en hoorre erfnamen alsulc lant en goet als hi van ons houdende was ghelegghen tot Zaenderdamme alinghe wtgheset alsoe veel als hijns Janne Eggaert vercoft hadde die onsen brief daer of heeft. In sulker manieren dat joncfrou Sophien voirschr. al tander hebben soude en bruken van dier tijt voert meer hoir leven lanc. Ende een hoet ghersten uten thiende te Wormer en na hoorre doet te comen op hoor rechte erfnamen te houden van ons en van onsen nacomelinghen tot eenen rechten leene behouden Janne Berwouts soen sijn lijftochte an de helfte alsoe langhe als hi leeft. Waerom wi t' voirschr. lant en een hoet gherste verlyet hebben en verlyen in der

manieren voirsr. voor ons en voor onse nacomelinghen joncfrou Sophien en horen nacomelinghen te houden tot eenen rechten leene behouden eenen ygheliken sijns rechts en al te verstaen sonder arghelist. In orkonde enz. ghegheven xii daghe in februario int jaer lxxviii. Pres. Jan van Langherak, ridder, Dirc van der Goude. Jan Tolnaer, Godgriet van Brabant.

f.180v.

Jan van Chastillon enz. doen kond allen luden dat voor ons ghecomen is Mathijs Claes soen onse poerter ter Goude en heeft ons opghedraghen van sinen eyghene goede thien hond lands ghelegghen in de lande van Steyne in eene viertel der t'overscot Hein Aelwijns soen of toebehoert daer boven naestghelant is Willem Cutaert en beneden Hein Aelwijns soen voirsr. streckende van den IJssel an de Ree van welken thien hond lands Dirc van der Goude onse knaep en man eenen vrye eyghen ghenomen heeft t'onsen behoef voor den scout ende lands ghenooten uten lande van Steyne waerom wi de voirsr. thien hont lands daer Mathijs onse man of gheworden is voor ons en voor onse nacomelinghen verlyet hebben en verlyen Mathijs en sinen nacomelinghen tot enen onversterflichen erfleene te houden en te verheerghewaden alst versterft mit eenre halver jaerrente. Hier waren over onse ghetrouwe manne heer Jan van der Goude, ridder en Dirc Beinkin knaep. In orkonde desen brieve bezeghelt mit onsen zeghele ghegheven zestien daghe in februario int jaer lxxviii.

f.181.

Jan v.Chastillon enz. doen cont allen luden dat wi gheoerloeft hebben ende onsen consent daer toe ghedaen also verre alst an ons coemt voir ons ende voer onse nacomelinghen dat heer Jan Tolnaer Hughensoen onse capellaen wtgheven mach tot eenen ewelicken pacht t'meest orbaer te hoppen of anders enen camp lands alsoe als hi ghelegghen is bi den Vorenvliet streckende an Loepiker wech die behoert onser vrouwen autaer in onse kercke t'Scoenhoven ende of hi verloren ghelt daer of namen boven de pacht die daer op bleven sel dat ghelt ymmer wel te belegghen aen erve of aen erfrente tot des voirz. autaers behoef enz. enz. Ghegheven t'Scoenhoven 14 febr. 1378.

f.181v.

Jan van Chastillon enz. doen kond allen luden dat wi wt verzoeke van onsen goeden luden van der Tolne in Zeeland en om zonderlinghe gonste die wi hun toedraghen ende om goede dienste die zi ons ghedaen hebben ende noch doen zullen oec aenghesien den order ende mitscap die ons ende onser stede aldaer aen leghet ende in te baten comen mach hun ghegheven hebben ende gheven alzulke punten van rechte ende vryheden als hier na bescreven staen. Inden eersten dat so wie opene brieve heeft die zel binnen den eersten jare naden daghe van dier scout daer die brief of spreect recht mede nemen doet hijs niet so zel die brief doet wesen. Ende waert dat hi recht zochte binnen den eersten jare mit dien brieve ende hi gheen goet en vonde so zelmen die brief teykenen biden gherechte so dat hi daer mede namaels recht zoeken mach als hi goet waent vinden. Ende waer yemend buten slands dat kenlic ware die zel recht nemen binnen vi weken na dat hi binnen slands coemt ende des ghelijx van alre kennissen. Voert hebben wi ghegheven onsen voersr. luden van der Tolne voer ons ende voer onse nacomelinghen also verre alst an ons coemt ene vrye jaermarkt die ingaen zel jaerlix des maendaghes na st Jans daghe midzomer ende duerende achte daghen lanc binnen welcher markt ende daer toe achte daghen voer dat zi ingaet ende achte daghen na dat zi wtgaet wi gheven allen den ghenen die daer comen zellen een vry gheleyde van scouten en scade in onser voersr. stede ende doer onse lande in den voersr. markt te comen daer te dueren ende weder wt te trecken. Ende so wie binnen voersr. marctrechte mesdoet zelt twy scatte beteren ons ende den ghenen die hi mesdoet ende alle goet dat ter voersr. markt comen

zel vry wesen inden onsen ende dat nemen wi in onser bescermnisse wtghescede van ons zelfs zaken alle punten te verstaen sonder enighehande arghelist ende behouden onser heerlicheyd. In orkonde ghedaen t'Scoenhoven des donredaghes na valentini int jaer lxxviii.

f.182.

Jan van Chastillon enz. doen kond allen luden want wi meister Willem sonder Danc onsen gheminden knape om menighe goede dienst dien hi ons ghedaen heeft en noch doen sal ghegheven hebben enz. (zelfde als f.179)

f.183.

Florens van Adrichem.

Jan van Chastillon enz. doen cond allen luden dat wi om dienst dien ons her Florens van Adrichem onse ridder ghedaen heeft en dien ons Claes van Adrichem sijn soen noch doen sel ghegheven hebben en gheven Claise voirscr. xi lb. tsiaers sulc payment als men jaerlix nemen sel van onsen brueke in de Wijc daer Claes voirscr. onse man of gheworden is en houden sel van ons en van onsen nacomelinghen hi en sine nacomelinghen tot enen onversterflichen erfleen te verheerghewaden alst versterft mit enen rode havic welke rente voerscr. wi hem bewijst hebben en bewisen aen onse rente voerscr. in de Wijc alle jaer te betalen te bamisse daer die eerste termine of wesen sel te bamisse naestcomende en alsoe voert van jare te jare. Ende ombieden onse rentmeester in de Wijc die nu is of namaels wesen sel de voirscr. rente alle jare wt te reyken en te betalen ten termine en in der manieren voerscr. sonder ander ghebot daer oof te hebben weder nemende alle jare enen brief van quytanche voir ons mede te rekenen. In orkonde desen brieve bezeghelt mit onsen zeghele ghegheven op den vierden dach van maerte int jaer lxxviii.

f.183v.

Jan van Chastillon enz. doen kond allen luden want Pieret de maerscalc onse knecht van ons heeft voor sinen dienst wedden in onser herberghe viii franke van vrancric tsiaers daer wi him gracie an ghedaen hebben him die gheven tot sinen live durende alle jaer t'ontfaen op kerssavond. Soe hebben wi om dienst dien hi ons ghedaen heeft en noch doen sel him zulken gonste en gracie daer in bewijst dat wi de voirscr. viii franke ghegheven hebben en gheven voor ons en voor onse nacomelinghen Alyde sinen wive Wouters dochter van den Hove alsoe langhe als si leeft te ontfaen van onsen rentmeester van Scoenhoven en van der Goude alle jaer op den kerssavond na Pierets ons voirscr. maerscalc doet hoors mans ende ombieden onsen rentmeester van Scoenhoven en van der Goude die nu is of namaels wesen sal dat si Pieret en sine wive voerscr. die viii franke tsiaers of payment diere waerde wtreyken ende betalen alle jare op den kerssavond in der manieren voirscr. sonder anders enich ghebot van ons of van onsen nacomelinghen daer of te hebben en hier of te nemen tot elke termine brieve van quytanchen voor ons mede te rekenen. In orkonde ghegheven t'Scoenhoven op den eersten dach van maerte int jaer lxxviii.

f.183v.

Jan van Chastillon enz. doen kond allen luden dat wi ghegheven hebben en gheven voir ons en voir onse nacomelinghen Loyaert uten stalle onsen knecht om dienst wille dien hi ons ghedaen heeft en noch doen mach x lb. holl. tsiaers tot sinen live durende alsulc payments als ghenghe en gane wesen sel in elker tijt van betalinghe daer die eerste dach off wesen sel nu in kerssavond naest comende en alsoe voirt van jare te jare alsoe langhe als hi leeft die wi hem bewijst hebben en bewisen jaerlix tontfaen van onsen rentmeester van Scoenhoven en van der Goude enz. enz.

In orkonde ghegheven t'Scoenhoven op den darde dach van maerte int jaer lxxviii.

f.184.

Jan van Chastillon enz. doen kond allen luden dat wi verliet hebben en verliet Goede vaert Jans soen onsen dienre een viertel lands gheleghen in Streeflant ende belegghen hebben mit erve Hase Apers aen die oestzide en Voppe Vriesen soen aen die westzide te houden van ons en van onsen nacomelinghen hem en sinen nacomelinghen tot enen onversterflike erfleent te heerwaden alst versterft mit enen witte paer hantscoen. Hier waren over onse ghetrouwe manne ende raed Goodscalc van Brakel, Dirc Beinkin, Gherit den Wilde en anderen. In orkonde ghegheven t'Scoenhoven vier daghe in maerte int jaer lxxviii.

f.184v.

Jan van Schoonhoven de carmeliet.

Jan v.Bloys enz. doen cond dat wi ghegheven hebben broeder Jan v.Scoenhoven den Carmelite onser zoen een jaerrente tot zinen live des hi van ons openen brieve hadde bezeghelt die hem verbernden t'Scoenhoven in den lesten brande. Soe hebben wi hem noch die selve alsoe twintich pont holl. buersghelt tsaers ghegheven en gheven alsoe langhe als hi leeft die wi hem bewijst hebben en bewisen op onse rentmeesterscap van Scoenhoven en van der Goude alle jaer te heffen en tontfaen t'sinte jans misse te midzomer en ombieden onsen rentmeester van Scoenhoven en van der Goude enz. enz.

Ghegheven t'Scoenhoven tien daghe in october int jaer ons heren duseut driehondert neghen en tseventich.

f.184v.

Jan van Chastillon grave enz. doen cond allen luden dat wi verlyet hebben en verlyen Vrederic Claes Millen soen 6 ½ garden lants en vii mat maden gheleghen in onsen dorpe van Westzaenden alsoe als si gheleghen sijn te houden te leene van ons en van onsen nacomelinghen in sulken rechte alst sine ouders van onsen ouders ghehouden hebben ende brieve begripen die onse ouders daer of ghegheven hebben sonder argelist. Hier waren over onse manne heer Ghisebrecht van Langherak, ridder, Dirc van der Goude en Reygar Heinriz soen knapen. In orkonde desen brief bezeghelt mit onsen heymeliken zeghel ghegheven in de Wijc int jaer ons heren m ccc neghen en tseventich op st mathijs dach.

f.185.

Pelgrim Claes Pelgrims soens soen heeft inrfaen van minen heer dardalf deme lands gheleghen op Catwoude in Pelgrim Bizen soensveene ende half vene die gheleghen is bi der hyselder meer dat hem mijn heer verlyet heeft tot allen recht daer bi waren als manne Dirc van der Goude en Goodscalc van Brakel. Dit gheschiede t'Scoenhoven op onsen huse int jaer ons heren m ccc neghen en tseventich darthien daghe in february en dat heeft hi verheerwaert mit cc ouden scilden ten goeden besceyde.

f.185.

Wi Jan grave van Henegouwen heer van holl. en zeelant en heer van vrieslant maken cond allen luden dat voor ons quam Aelbrecht heer Achten soen en gaf ons op voor onse manne 6 ½ garden lants en zeven mat made die te Westzaenden gheleghen sijn en hi van ons plach te houden te leene welke lant en made wi Roderic den scout van Wtgheest verlyede van ons te houden te leene en dat ontfinc hi voor onse manne van ons in al den rechte en in al der manieren dat Aelbrecht voorn. van ons plach te houden. In orkonde desen brieve bezeghelt mit onsen zeghele. Ghegheven tot Alebrechts berghe int jaer ons heren m ccc ende drie des donredaghes voor st lourens dach.

f.185v.

Jan van Chastillon grave enz. doen cond allen luden dat wi wt vriendeliker begheerte en wt gratien verzoeken van onsen ghemeinden luden van Texel. Soe hebben wi allen onsen goeden luden van Texel ghemeenlic ghegheven hebben en gheven dese vryheit en privilegien inden manieren als hier na bescreven staet. Eerst waert dat enich man onder ons in Texel gheseten die sijn lijf en sijn goet ieghen ons verbuerde dat sijn ghetrouwede wijf dat halve goet behouden soude, voert soe hebben wi hem ghegheven waer dat enich man enen onnoselen vrede brake dat hi die beteren mach mit x ponde alsoe verre alsen de baeliu daer of verwint als recht is ende dese vryheit en sellen zi hebben en ghebruken tonsen wedersegghen. In orkonde desen brieve bezeghelt mit onsen zeghele. Ghegheven in den Wijc op den lesten dach van aprilie int jaer ons heren m ccc en tachtich.

f.185v.

Jan van Chastillon enz. doen cond allen luden dat Jan van Zaenden ghemaect heeft mit ons hant en bi onsen wille Wiborch sinen wive hoer lijftocht an de mijnre helfte van al sine lande dat hi van ons hout dat gheleghen op die Zaenden in den ban van Westzaenden en die minre helfte van den hoedt ghersten uten tyende van Alst ment naest maken mach in welker lijftochte voirsr. wi gheloven Wiborch voirsr. tot horen live te houden voir ons en voir onsen nacomelinghen na der ghewoente en costume van den lande. In orconde enz. (geen vervolg)

f.185v.

Jan van Chastillon enz. doen cond dat Dirc Jansz. Ons op ghedraghen heeft vier made lands gheleghen op Catwoude en Gherit Ridoert en belegghen en belegghen hebben mit erve Jan die Wael an de zuutzide Claes Pieters soen an de noertzide de welke 4 made lands voirsr. wi hem weder verleyet hebben en verlyen te houden van ons en van onsen nacomelinghen hem en sinen nacomelinghen tot enen onversterflichen erfleen. Ende waert sake dat Dirc voirsr. ghebrake se sal dit voirsr. lant comen en erven op Wouter sinen soen te houden van ons en van onsen nacomelinghen hem en sinen nacomelinghen in alre manieren als voirsr. is en also voort van grade te grade erflic. Hier waren over als manne onse lieve en ghetrouwe Goodscalc van Brakel, Jan van Zanen en anderen. In orconde desen brief bezeghelt mit onsen zeghele. Ghegheven in de Wijc op den lesten dach van aprilie int jaer ons heren m ccc en tachtich.

f.186.

Jan van Chastillon enz. doen cond allen luden dat wi verlyet hebben en verlyen meister Gherit den Visscher 4 garze lands gheleghen in spalen venne die belant hebben hoflants venne an de oestzide en coden venne an de westzide te houden van ons en van onsen nacomelinghen in der selver manieren dat se sijn vader van ons te houden plach. Hier waren over onse manne heer Florens van Adrichem en Goodscalc van Brakel. Ghedaen in de Wijc op den eersten dach van meye int jaer ons heren m ccc en tachtich.

f.186v. ledig.

f.187.

Jan van Bloys bider genaden gods enz. doen cont enz. want ons Jan Hughensoen onse baeliu in Dreyschier opghedraghen heeft van sinen eyghen goede 5 gemete lands gelegghen in onse lande van Dreyschier after sijn huus binnen desen lantgem..ken wi selve naest gelegen noort of de heerwech oostof Jan Hughen soen selve zuutof en Giellis Henrix soen westof so hebben wi daer om en om dienst dien ons die voirsr. Jan Gedaen heeft ghegheven en gheven voir ons en voir onser nacomelinghen Jan voirsr. den middeldijc van der oestpolre dien Jan en anderen van onsen luden an Dreyschier bedijct hebben also als der zeedijc vanden oostpolre

gaet of en an den voirscr. middeldijc inder manieren dat hier na volgt. Dat Jan voirscr. en sijn nacominghen die voirscr. 5 gemete en dien middeldijc houden sellen van ons en van onsen nacominghen tot eenen rechten leene na Jans doet voirscr. te comen op sinen sone dien hi heeft van joncfrou Heilwige sinen wive nu ter tijt of op die zonen die hi van hoor after laten sal ende waert dat hi van der voirscr. joncfrou Heilwich ghenen sone of zone en liete als hi storve te comen op sinen anderen sone die hi laten sal van ghetruwede bedde en te houden tot enen rechten leene als voirscr. is. In orconde deser brief bezeghelt mit onser seghel ghegheven t'Scoenhoven des woensdaghes na pinxterdach lxxii.

f.187.

Jan van Henegouwen heer van enz. maken cond allen luden dat Jan Hughen soen onse man worden is van 4 gemete lands ligghende in Dreyschier 2 ghemete ande noortdijc ende 2 ghemete anden oostdijc biden havene welke 4 gemete hi ons op droech en wi hem weder verlyet hebben tot enen erflene en daer toe so hebben wi hem gegeven en geven tscoerkin tussen bellaende ende biggensluyse van ons te houden t'ene rechten leene. Hier waren over alse onse manne die heer van Zenzellis en Aloud Jans zoen. In orconde ghegheven in onsen dorpe ter Tolne des woensdaghes na sente martijns dach in den winter int jaer vijftich.

f.188.

Doen cond allen luden dat wi ghegheven en gheven onsen goeden lude van Texel dat hem onse baeliu en scout die nu sijn of namaels worden sellen recht en vonnis doen sellen na horen hantveste en van betichten en donkeren saken die hem onse baeliu of scout tyen of aensegghen daer of sellen si goeden borghen setten te rechte te comen daer wi wel an ghehouden sijn en so wie (soe verborcht) dien en sel men niet vanghe noch stocke. Voert hebben wi onsen voirscr. luden ghegeven dat men gheenen eedt opnemen en sel. Voert soe wie den zoec coopt van eens anders goede die sellen daer wt brenghen mitten eersten rechtedat hi en daer wt brenghen mach en waer hi des niet en doet soe moghen wi den zoec van dien goede aentaste en hebben ofs ons ghenoecht en waert dat anders yemant an dien goede iet ghebrake dien soud men an dat goet rechten eer wi daer an quamen en dan en soude de ghene die dien zoec ghecoft hadde van sijnre scout niet hebben. Voert waert sake dat yemant enen anderen sijn goet onder settede ander lude van sijnre door mede te wisen ende hoor scout mede te ontvarren die ghene die tgoet onder namen en kenlic ware dat hi sine scout nit sine eede voor onsen scout en buere te voren niet goet ghe.... en hadde die verbuerde ieghens ons x lb. en voor sulke scout selmen setten twiscatte pande.

Voert alle scout die men verpleghen sel sel men verpleghen voor den scout en twee bueren dat goede wittachtighe knapen sijnen daer voor verslaen die somme van der scout waer of de scout roert en die dach van betalinghe en mit eeden goet maken dattet goede wittachtighen scout is.

Voert soe wie sijn erve vercoept die mach borghen daer of nemen van den ghenen diet coept alsoe groet als die somme van den ghelde draecht sijn ghelt te hebben tot sinen daghen en vielt dat men dat erve voert vercoft binnen dien daghen van den voorsten coep soe en mach dat erve niet vri worden van dier scout mit vercoepen noch mit versetten die eerste penninc en si betaelt mitten lesten.

Voert sel men nemen twee raedsluden die flant bewaren sellen bi rade der manne en der scepene en die selmen nemen teerste jaer den enen in de borchkerspel den anderen in de westkerspel en tander jaer enen ten oesten ende enen anderen ten wale ende alsoe sel mense alle jaer versetten elc in sijn kerspel en die sellen daer toe gheeedt wesen slands eer en orbaer

te doen en sl..ds goet in te nemen en wt te gheven datter nutste toe sijn ende daer of goede rekeninghe doen voor ons of voor onse baeliu mannen en scepene. Ende die xxx scepene sullen dese raetslude kiezen die hem daer alre beste toe dunken en elc raetsman sel hebben siaers twee oude scilde voer sinen cost en anders en selmen op tlant gheenen oncost binnen slands doen. Voert soe moghen onse lude van Texel visschen en voglen als si voormaels ghedaen hebben behoudelic ons onsen visscherie en voghelarie en alle poynten te verstaen sonder eenigherhande argelist behoudelic ons in allen poynten onser heerlicheit en dit sel ghedueren tot onser wedersegghen.

Wi Jan bi der goeds ghenaden abt van Egmonde maken cond ende kenlic allen luden dat wi hebben ghesien ende ghehoert eene letter eens edelen heer ende machtich haren Johans van Henegouwen sprekende van woerde te woerde als hier na ghescreven staet. Wi Jan van Henegouwen ridder ende heer van Byaumont maken cont allen den ghenen die dese lettere zullen sien iof horen lesen dat wi ghegheven hebben ende noch gheven Lisebeth Heyn Busen dochter twee ende viertich made lands luttel meer jof luttel min legghende inden ambocht van Zaenden ende een hoet gherste jaerlix uten tiende van Wormer die ons half op bestorven waren van haren soen. Ende datter helft was haer lijftocht van ons te houden te lene ende te erven op horen oudsten zoon. Waert dat si ghenen zoen en loenede te erven op hoorre oudsten dochter. Ende waert dat si noch zoen noch dochter en loevede dat het erven sel op den oudsten zoen van hare moeder weggen toe comende die Katerine Lisebetten zuster voerscr. loevede ende alsoe voert te rechte leene. In orkonde dese lettere ghezeghelt mit onsen zeghele int jaer ons heren derthienhondert ende elvene des vrydaghes na sinte jacobs dach. In orkonde der waerheyt soe hebben wi dit wtschrift beseghelt mit onsen zeghele inden jare ons heren m ccc ende xlvii des vridaghes na sinte jacobs dach.

Namenregister Inv.nr. 1.

Willem Vinc Willemssoen 98v
Andries die backer 128
Ade vrouw v. Coen v.Oosterwijk 5v
Adriaen v.Nuwenhave 125
Aechte Gherit Hals weduwe 26v
Aelbrecht die witbacker 39v, 82.
Aelbrecht heer Achtensoen 185
Aelbrecht hertogh 57v, 142v.
Aelbrecht v Meerten canonic ten Dom 110, 147, 150v.
Aelbrecht v.Beyeren 20v, 26.
Aelbrecht Willem Vyfaessoen 150
Aelbrecht Zoenekins 123v
Aernd v.Diest 146, 174.
Aernde Claes Aerntssoen 152
Aernde v.d.Hokelen 1
Aernoud Nannekijn 55v
Aernt Jan Neudensoen 119v, 121v.
Aernt Mathijssoen 48, 48v
Aernt Reyerssoen 119v
Aernt v.Herlaer heer v Ammersoyen 134v
Aernt v.Hokelen 56v
Aernt v.Randerode 17
Agyse dochter v.Coen v.Oosterwijk 5v
Alaerd v.Vouderic 155
Aleyd vrouw v.Beckevoert 3v
Aleyde zuster v.Jan v.d.Goude 61v
Aleyt Rasschen 1
Alfen 76, 83, 84.
Aliden Jans Jonghe dochter 146
Alijd Hoefthaerts 47v
Allaert Grebbe 169
Allaert Hughensoen 105v
Allaert v.Medenblic101
Allaertskerke 137v
Aloud Janssoen 11v, 96, 97, 108v, 153.
Alphaer v.d.Nesse 70
Alyde vr.v.Pieret de Maerscalc 183v
Amsterdam 118, 118v
Andries Claessoen 152
Ane Aernt Veimbrechtssoens wijf 48
Arent Sayerssoen 156v
Arkel Culenborch 121v
Arkel de heer 25v, 49, 142v.
Arnoldus v.Bubnaghel 105
Arnoud heer v.Steyne 55v
Arnout Beliensoen 65
Arnout v.IJselsteyne 46
Arnt Panneel Gherijtssoen 132

Asewijn v.Rijsoerde 39
Badeloge zuster v.Willem Vinke 98v
Baernt Pieter Meyerssoen 112, 121.
Barbenchon de heer 117
Bartholomeeus de Gouwer 149
Bartholomeeus uter Wijc 56v
Barthout Hasekinesoen 57, 86v.
Barwoud v.Stapel 26
Bastyaen die smit 40
Bauke uten Nesse 101
Beatrisen v.Rijsoerde dochter v.Florens v.d.Merwede 39
Beckevaerts poerte 103v
Beckevoert 3v.
Beernte Gryetezoen 71v
Bely vr.v.Poncyen Ghenensoen 120v
Belyen Brunaerts dochter 120v
Benthusen 41v
Bercoude 47v
Bercoude handvest 140v
Bergambacht 41v
Berthout Jan Hughensoen 94v
Beyerse Gouderac 41v
Beyersrode 41v
Beyne Roes kinderen 70
Blakenborch te Jaarsvelt 19, 69v.
Bloemendaal 41v
Bodegraven waterganc 27
Boelman Herinc 18, 18v.
Boudijn Spaken 4, 111.
Boudijn Willemssoen 93v, 94, 154.
Brandekijn Hughen 73v
Brederode de heer 112v
Broders de heer 76
Brunaert Grietensoen 32v
Brunen Gherijtssoen 86v
Bruninc Gribberssoen 147
Bryen Bryensoen 42v
Cabau 41v, 67.
Caems Jacopssoen 31
Campen 137v
Capelle in Duiveland 94
Carmelieten convent 106
Catwijk 92v
Claes Aelbertssoen 15v
Claes Amelgaersoen 155v, 160v.
Claes Anensoen 54v
Claes Benten 6, 180.
Claes Boykinssoen 31
Claes de Grubber 122v
Claes de Vischer 57v

Claes die Brune 31
Claes die Grebber Willemssoen 60
Claes Dordebout 152
Claes Dorrekijns 83
Claes Gherbertssoen 82v
Claes Gheritssoen 31
Claes Janssoen 100v, 177v.
Claes Kervinc v.Reymerswale 153v
Claes Mille Hughensoen 54v
Claes Morael 31, 147.
Claes Oem 43v
Claes Oemssoens 12
Claes Panneel 111v
Claes Pelegrijnssoen 90v, 111v.
Claes Pieterssoen 11v, 185v.
Claes Ponciaenssoen 40
Claes Riems dochter 68
Claes Scriveris wijf 93v
Claes Tesselaer 147
Claes uten Campe 119v, 121v.
Claes v.Adrichem 183
Claes v.Bueren 51v
Claes v.Cats, ridder 99
Claes Wouterssoen 76
Claes Ysacs kinderen 68
Claes Zeghers 95
Claes Zuetmont 78v
Clare Durcx 28v
Cloesterlant op Leckervelt te Lopik 23v
Cloud Poppensoen 152v
Coen Andriessoen 53
Coen die Cuysser v.Oosterwijc 88v
Coen die Emders 86v
Coen v.Oosterwijc 5v, 19, 23v, 68v, 69, 134, 178, 178v.
Colijn Janssoen 18v
Coppaert Janssoen 128
Coppede Tidensoen 56v
Coppert Hanne Loydensoen 31
Coppijn Hughen 62
Cortehoeve waterganc 27
Dader Koet 39v
Daem Ghisekijnssoen 28v, 95.
Daem Mattensoen 47v, 98v, 101, 101v.
Dalem polder 93
Damaes Byensoen 87v
Didderic die Grave 119v
Diedewi vr.v.Soyer Soyerssoen 82v
Dirck Beynkin 53, 159
Dirck Boey 56v
Dirck Boterman 166v

Dirc Coppelmanssoen 31
Dirc de Poorter 166v
Dirc de Witte Egbrechtssoen 171v
Dirc die Breede 106a versus
Dirc die Witte Enghebrechtssoen 129v
Dirc Dirxsoen Rielant 123v
Dirc Florensoen 57
Dirc Gale 109
Dirc Gilen 63
Dirc Hannekenssoen 31
Dirc Heinrixsoen 67
Dirc Jacobssoen 28v
Dirc Jacopssoen uit Lopik 95
Dirc Janssoen 11v, 185v.
Dirc Lauwaert 23
Dirc Loef heer v.Huerne 107v
Dirc Lottum Janssoen 157
Dirc Noudensoen 66v
Dirc Poppensoen 177v
Dirc Roelofssoen 164v
Dirc Scotelvoet 19
Dirc Soyerssoen 167v
Dirc uten Camp 132
Dirc uten Weerde 12v
Dirc v.Brederode 77, 173.
Dirc v.d.Goude 21, 73v, 74v, 96, 150v, 151, 159, 166v, 180v.
Dirc v.Dordrecht 56v
Dirc v.Heeswijk meyster 103
Dirc v.Pollanen 163v
Dirc v.Scoutenberch 128
Dirc Voppen 99v
Dirc Willems Wittensoen 66
Dirc Willemssoen 31, 76, 140, 150v, 164v.
Dirc Witgherssoen 49
Doede Teebbenssone 18
Dreyschier 17
Dreyschoor handvest 133
Dullaert 11
Edewaert v.Gelre joncheer 136
Eduwaert v.Ghelre 163v
Eenise vr.v.Jan v.Berkenrode 88v
Eggaerd Veneman 70
Eggaert Godevaertssoen 174
Eggaert v.d.Vlist 70, 120v, 158v.
Elsbeen Gherit Molen weduwe 163
Emelisse 137v
Enghe Gheerlofssoen 101
Enghebrecht Jonghe Pieterssoen 129v
Enghebrecht uten Weerde 180
Enghebrecht v.d.Woude 68

Ermhout Mathijssoen 119v
Ermgaert Jacobs dochter 93
Evert Janssoen 150
Feisen Gherijts Jonghe dochter 70
Floren Claessoen 122v
Floren de Jonghe 99v
Florens graaf 86v
Florens v.Adrichem 108, 150v, 179, 183.
Florens v.Borsele 33
Florens v.d.Boechorst 72v
Florens v.d.Boechorst 91
Florens v.Montfoert 70
Floris Hughesoen v.Oudewater 99v
Floris v.Scie Janssoen 106a versus
Floris Vranken 38v
Foyken Willemssoen 45v
Fye v.d.Hoeke vr.v.Beernte Gryetensoen 71v
Gapinghe 137v
Garbrant de Grubber 122v
Geerlof Lillensoen 42v, 43
Gelre de hertoghinne 121v
Gheerlof Dirxsoen 111v
Gheertrude vrouw v.Sander Borchman 25v
Gheien Peter Rutseel 180
Gherade Harden Willemssoen 156
Gheraert v.Herlaer 136
Gherbrant die Gruber 82v
Gherijt Borchman 15v
Gherijt de Borgher 48, 48v
Gherijt die roedragher 65
Gherijt Hals 26v
Gherijt Hughensoen 13, 19.
Gherijt Jacopssoen 128
Gherijt Janssoen 32v
Gherijt Lillensoen 10
Gherijt Thedemanssoen wijf 48
Gherijt v.Oosterwijn 48, 48v
Gherit Arntssoen 18
Gherit Barthoutssoen 106a versus
Gherit Borchman 6, 25
Gherit Claessoen 174
Gherit de Borgher 180v
Gherit de Wilde 8, 106v, 123v, 149
Gherit den Visscher meyster 186
Gherit Elcbyensoen 52v
Gherit Fouken deken v.Oudenmunster 85
Gherit Gheerlofssoen 73v
Gherit Jan Bakensoen 63
Gherit Janssoen 149
Gherit Melissoen 104

Gherit Mole 163
Gherit Naghel 119v
Gherit Ockerssoen 95v
Gherit Peridaens 88v
Gherit Pieterssoen uit Lopik 94v, 95
Gherit Ridoert 185v
Gherit v.d.Vliete 87v
Gherit v.Heemskerc 54v
Gherit v.Herlaer heer v.Poederoyen 107v, 150, 160
Gherit v.Oosterwijk 150v
Gherit v.Svoten 57
Gherit Wouterssoen 159
Gherolfsdijc 137v
Gheye Volprecht soen 106a versus
Ghijsbrecht Dullaert Dircssoen 96
Ghijsbrecht Jacops scrverssoen 103
Ghijsbrecht Kevelaerts 65, 65v
Ghijsbrecht Stomme cappelaan 64v
Ghijsbrecht v.Langherak 146v
Ghise de Vryer 101v
Ghise Gheerlofssoen 101v
Ghise v.d.Vliete 87v
Ghise Vrijer 19
Ghisebrecht Dirxsoen 132v
Ghisebrecht Dullaert Dircssoen 94v
Ghisebrecht heer v.Vyanen 135, 163v, 165.
Ghisebrecht Jacobssoen 128
Ghisebrecht Molnaerssoen 122
Ghisebrecht Neyse 119v
Ghisebrecht v.d.Boechorst 72v
Ghisebrecht v.IJselstein 66v, 79v, 87v
Ghisebrecht v.Langherak 75v
Ghisebrecht v.Tienhoven 106a versus
Ghisebrecht v.Vyanen 32v
Ghisekijns v.Ammers 96v
Gielis Heinrixsoen 125v, 187.
Gielis Janssoen 169
Gielis v.Windelsnesse 12, 19v, 35, 35v, 37v, 64v.
Gielis v.Windelsnesse heer Willemssoen 43v
Gilles Robbrecht 44
Godeciaen Jacopssoen 157v
Godevaert Claessoen 62
Godevaert Janssoen 184
Goes 33
Goes stad 22v
Goeswijn Oomssoen 52v
Goeyer Ghijsbrechtssoen 174
Goodscalc v.Brakel 121v, 149, 150v.
Gordelgeld 157
Gouda 36

Gouda bierbrouwen 114v, 115
Gouda de stad 16
Gouda handvest 148v
Goyer Ghisebrechtssoen 174
Goyer Soyerssoen 82
Graaf v.Holland 47
Gribbers 147
Griete Hughen 13, 19.
Grobbe Grobbesoen 153
Gulic de hertogh 161
Guy v.Chastillon 96
Haeskin Elyaes dochter 76
Haestrecht de joncfrouwe 171v
Han Nouwe 111
Hanne Cryoen 4v
Hanne Goedewille 152
Hanne Teding Rukebierssoen 31
Hannekijn v.d.Meer 36v
Harbaren Jacobssoen 40
Harbaren v Liesvelt 40, 97v.
Harbaren v.Akersloot 149v
Harbaren v.Foreest 76, 77
Hase Apers 184
Hase v.Montfoert vrouwe v.Ysendoorn en Huelesteyn 45
Hazertswoude 83, 84
Heerkin Zibrechtssoen 87
Hein Aelwijnssoen 180v
Hein de Jonghe 105
Hein Loet 152
Hein Voskijns 158v
Heinric Buffel 102v, 152.
Heinric Claessoen 123
Heinric Dircxsoen 24, 87v
Heinric Dirxzoens bastaerde 24
Heinric Han Nouwen 111v
Heinric Janssoen 96
Heinric Janssoen v.Reymerswale 153
Heinric Pieterssoen 128
Heinric v.d.Creke 152
Heinrik v.Zasse, de Poertier 102, 110v.
Hemine Mannesone 18
Henric Hughensoen v.Scakersloo 23
Henric Overwael 47v
Henric v.Lis 54v
Henric v.Vyanen 164
Henric v.Waes Herman Vinkensoen 177v
Henrik v.Hemsberch 65
Herbaren v.d.Brinchorst 51
Herbaren v.Foreest 12v
Herman de backer 164

Herman de barbier 63v
Herman Speytert 132v
Herman v.Heusden, de barbier 102v
Herman Vinke 104v, 175
Herman Vinke v.Branbenborch 175
Heyma Haecke 146v
Heyn Busint 122
Heyn die Jonghe 101v
Heyneman Janssoen 152
Heynric v.Montfoert 171v
Hilde Ghedden vrouw v.Hughe v.Zaenden 9v
Hildegont Brandsdochter 79v
Hillen Tonijssoen 6
Hubrecht v.Lopic 23v
Huelesteyn 44v
Huge v.d.Woude 155
Hughe de Beel 164v
Hughe Gheerlofssoen 73v
Hughe Heyn Rodensoen 54v
Hughe Pieterssoen 55v
Hughe Walichssoen 95, 140.
Hughen v.Vloeten 40
Hughen v.Zaenden 9v
Jacob Claessoen 123v
Jacob die scriver 103v
Jacob Duerwaerder 8v
Jacob Dukint 115v
Jacob Herman Oeghensoen 128
Jacob Jan Lyllensoen 60
Jacob Scepelart 180
Jacob Scriver 15v
Jacob v.d.Goude 157
Jacop Bokels 98v
Jacop Botterman 117
Jacop Coutmont 68
Jacop die Veer 68
Jacop Dirxsoen 24
Jacop Doedensoen 96
Jacop Hanne Demanssoen 31
Jacop Hildebrant 31
Jacop Hillensoen 31
Jacop Hughe Boeys 73v, 74v.
Jacop Lisensoen 45v, 55
Jacop Maes 128
Jacop Mouwen soen 111
Jacop Ryes 52
Jacop Stille 93
Jacop v.d.Damme 19
Jacop v.d.Goude 59, 90, 121
Jan Aelbrechtssoen 158v

Jan Aerntsoen vader v.Jan v.d.Goude 4v
Jan Appelij die Grebber 31
Jan Bake 63
Jan Berwoutssoen 53v, 54v, 94v, 99, 115v, 116, 123v, 157, 173, 180v
Jan Bienaertsoen 147
Jan Bloc 124v
Jan Boterman 10, 42v, 43
Jan Boterman Gheerlofssoen 53
Jan Boudijn 100v
Jan Breye 112, 121, 150v.
Jan Byenssoen 44v
Jan Cattenborn 117v
Jan Claes Symonssoen 31
Jan Claes Walensoen 31
Jan de Forier 93
Jan de Jonghe 105
Jan de Koc 164, 164v
Jan de Vlaminc 152
Jan den Bastaert zoon v.Jan v.Henegouwen 5
Jan den Blonde 38, 80, 80v, 93.
Jan den Hase 65, 65v
Jan Diddensoen 147
Jan die Wael 11v, 185v.
Jan Dirxsoen 132
Jan Eckensoen 171v
Jan Egbrechtssoen 173v
Jan Eggherde 60v
Jan heer v.Waerdenberch 136
Jan Hooghebroec 87v
Jan Hughensoen 7v, 11v, 57, 125v.
Jan Hughensoen baeliu in Dreyschier 187
Jan Janssoen 93v
Jan Korstiaens uit Lopik 91
Jan Libaert 177v
Jan Lijsbetssoen 174
Jan Loys 119v
Jan Maesdijc 54v
Jan Oieterssoen 122
Jan Philipssoen schout v.Noordwijk 24v
Jan Pieter Heynsoen 31
Jan Poertegael 128
Jan Quarlet 52, 131v
Jan Robbijn 111v
Jan Roese 128
Jan Rosensoen 166v
Jan Tidemanssoen 166v
Jan Tolnaer 119v, 150v.
Jan Tolnaer Hughensoen 181
Jan Tricen 9
Jan Trysen Spijc 178

Jan v.Barbenchon heer 20v, 58.
Jan v.Berkenrode 88v, 94v.
Jan v.Bloys 41v, 142v
Jan v.Brakel 150v, 174.
Jan v.Broechuzen 165v
Jan v.Bueren 46v, 51, 51v.
Jan v.Bueren Janssoen 44
Jan v.d.Goude 4v, 15v, 21v, 36, 38v, 39v, 61v, 67, 87v, 121
Jan v.d.Goude Dirxsoen 106a.
Jan v.d.Goude Jacobssoen 128
Jan v.d.Kovel 73
Jan v.d.Lecke 149v, 155v.
Jan v.d.Zile 96v
Jan v.Hemsberch 65
Jan v.Henegouwen 13v, 48, 49, 72v, 92v
Jan v.Herlaer 30, 136, 164.
Jan v.Hoesen 56v
Jan v.Langherak 40, 60v, 75, 75v, 99v, 146v, 147, 150v, 177v, 180v.
Jan v.Leiden bastaatdzoon v.Jan v.Bloys 131
Jan v.Petten 54v
Jan v.Poelgheest 29v, 122, 150v, 159.
Jan v.Pollanen 114, 149v.
Jan v.Pruyssen 54v
Jan v.Schoonhoven de carmeliet 184v
Jan v.Scie 52v
Jan v.Zaenden 185v
Jan v.Zanten 13, 19.
Jan Wijnensoen 52v
Jan Willemssoen 128
Jan Wissensoen 64v
Jan Wissensoen v.Hardinxvelt 3v
Jan Zontland 38v
Janne dochter v.Jan v.Henegouwen
Janne Ver Bettensoen 99
Jannes heer Symons grote Janssoen 108v
Jannes Janssoen v.d.Goude 67v
Jenette Ghisebrechtsdochter v.d.Vliete joncfrou 98v
Johan Barwoutssoen 173v
Johan Egghaertssoen 173v
Joyer de Cuper 21
Jutte Brunenweer 52v, 53
Jutte die Broeker 76
Jutte Peters 6
Katerine Jonghe Dirx 111
Katerine Lisebetten zuster 188
Katerine non ter Lee 137v, 163.
Katerine vr.v.Lubbrecht v.Rikele 63
Katerinen Jonghe Dyrxlant 4
Katrine van Aspen vrouwe v.Eemskerc 54v
Katrinen Dirc Sayen dochter 53v

Kempe Bolt 87
Kempen Kempensoen 122, 125.
Kerstine zuster v.Ghisebrecht v.IJselstein 66v
Kerstinen Willem Beckevoerts dochter 122v
Lambert v.Zierixe 99v
Lambrecht Lijsbettensoen 174
Lambrecht v.Rumonde 54v
Langheraek 40
Langherak mer vrouwe 174
Lauwe Vrowijnssoen 121
Lauwerijs Janssoen 101
Lecke de heer 94v
Leede t'klooster 16v, 94v.
Leen Lewwekijnssoen 18
Liesvelt 40
Lisebet Aechtendr. Cattenborns 117v
Lisebeth Heyn Busendochter 188
Lodewijn v.Blois 72v
Loef Henrick Buycssoen 28v, 95
Louwe Vrowijnssoen 112
Loyaert 183v
Lubbe Nannekijnssoen 87
Lubbrecht v.Rikele 61, 63, 149.
Ludolf Zybrantssoen 52v
Luutgen Dircs Bruunenssoen 96
Mabelie joncfrou uter Waerder 77
Mabelyen Willems wijf v.d.Woude 89v
Machteld Lambrechts Brabanderdochter 130
Machtelde Heinric Stalkaertsdochter vrouwe v.Willem v.d.Heul 53, 130v.
Machtelt Ricout joncfrou 119v
Magherhoeve 73, 106, 159.
Mans Florensoen 99v
Marcelijs v.Inghen 146v
Margareta vrouwe v.Symon v.Zaenden 11
Marghareta gravinne v.Henegouwen 91v
Margriet Florens 73v
Margriet Peters 24
Margriet v.d.Lippe vrouwe v.d.Lecke 149v
Margriet vrouwe v.Steyn 132v
Margriete vrouwe v. Arnoud v.Steyn 55v
Margriete vrouwe v.Jan Boterman 53
Margriete Wermboutsdochter v.d.Woude 68
Mathijs Claessoen 180v
Mathijs de Hamckiere 164v
Mathijs Dirxsoen 52v, 53
Mathijs Thonemanssoen 163v
Mechteld hertogin van Gelre 161
Mechtelt v.d.Zevender heer Symons dochter 78v
Melis Ghijsbrechtssoen 132v
Melis Maerensoen 82v

Merctvelt te Schoonhoven 119v
Meynse Coster wijf 18v
Montfoert de heer 147
Myen dochter v.Jan Hasen 65v
Nanne Hanninxsoen 123
Nanne Vrouwijnsdochter 63v
Nannekijn Hobbensoen 87
Nelle Clonkaerts 67
Ogier v.Cralinghe 101v
Ohilips Rotaerts 13
Oierter Russen 76
Olbout Mennensoen 18
Olmaer Wobichssoen 87
Osenbroec de heer 96
Ottten v.Ijselsteyn 79v
Oudecoop waterganc 27
Outgher Ghilensoen 166v
Ouwels Tolnaers 81
Pelgherijn Lisensoen 111v
Pelgrim Bizensoens 185
Pelgrim Claes Pelgrimssoen 185
Peter Emmeric 13, 19
Peter Jacopssoen 180
Peter Kuyinxsoen 2v
Peter Peterssoen v.Harderwijc 81v
Philips Rotartssoon 19
Philips v.Wassemaer 92v
Pieraerde v.Vilers 109v
Pieret de Maerscalc 104, 183v
Pieter Danen 152v
Pieter de Valkenaer 73
Pieter Enkebiers 31
Pieter Florensoen 54v
Pieter Hayekinssoen 99
Pieter Hayken 47v
Pieter Herman 174
Pieter Jacopssoen 180
Pieter Maertme 159v
Pieter Roelofssoen 31
Pieter Splinters Willemssoens 24
Pieter Valkenier 8
Ponciaen Poortenaerssoen 65
Ponciaen v.Lakervelt 101v, 105.
Ponciaen v.Lakervelt poorter te Sch.97v
Poncyen Ghenensoen 120v
Popkinborch 137v
Pouwels Hughe Spierinxsoen 100v
Pouwels Jacopssoen 31
Pouwels Tolnaer Pouwelssoen 90, 91, 128.
Quarlet 158v

Radewijn 15v
Raessen van Cruninghe heer 2v, 3
Reemond v.Meerlo 93
Reingher Heinrixsoen 147
Rengher Willemanssoen 152, 152v.
Reynaer Gherit Berthoutssoen 123v
Reynbout 128
Reynelt Heynen 24
Reynghaer Heinrixsoen 123v, 173v.
Reynier Claessoen 57v
Reynier Dener 123
Reynier Ghibendochter 52v
Reynout v.Brederode heer v.Ghennep 163v, 165v.
Reynout v.Ghelre 163v
Reynsborch de abdissen 76, 77, 77v
Rike Beymt 123
Robbrecht Engbrechtssoen 109v
Roderic den scout 185
Roelinc Ghisensoen 98
Roelof Duykint 26
Roelof Janssoen schout te Gouderac 44v
Roetart die nisman 38v
Rogghebroec 78v
Ruerich v.Hackenberch, broeder in het Carmelieten clooster 106
Rutgher Roitsen 59
Rutgher v.d.Poele, priester 179
Sander die Borgher 25, 49
Sarrasijn 64
Sasscher Barbier 39v
Scakersloe 34
Schoonhoven 34v, 35, 88v, 89, 89v, 112v
Screvel Robbrechtssoen 96
Sophien v.Dalem 115v, 180v
Splinter 38v
Staesken v.Brakel 174
Stavoren 119
Steyn 41v
Stolwijk handveste 138
Stolwijk 41v
Symon Claessoen 31
Symon Gale 109
Symon Jacopssoen 31
Symon Ockerssoen schout te Wijc 24v
Symon Oerkenssoen 123v
Symon Petrus Hallinxsoen 2v
Symon prochipape tot Scakerloe 96
Symon v.d.Scuur Ysebrantssoen 77v
Symon v.Zaenden 11
Symon Yntensoen 123v
Tentenborch aan de Zevender 65, 65v

Texel 37, 38, 41v, 50, 86v, 87, 112v, 113v, 123, 167v, 185v, 188.
Thetrode bij Haerlem 94v
Thonys Willemssoen 40
Tichman Janssoen coerbisschop t'Utrecht 47v
Tolen 34, 34v.
Traveys Claessoen 62
Trude Aernt Belyen soens dochter 47v, 101v, 105
Tyelman Lammekijnssoen 106a versus
Verbelyen polder 151v
Vlielant 41v
Voghel de cleermaker 52
Volpart Addensoen 18v
Volquin Willems 71v
Voppe Vriesensoen 184
Vrank v.Borssele 159v
Vranken Dirc Fayssoen v.d.Scuur 78
Vrederic Claes Millensoen 184v
Vrederic Dirc Grawartssoen 54v
Vrederic Gherit Jonghen 180
Vrederic heer v.Bare 136
Vrederic v.d.Zevender 78v, 150v, 164v, 169.
Vriese Herberensoen 52v
Walcheren 137v
Walich Willemssoen 95
Walraven v.Luxemborch 13v, 91v, 161, 162.
Walraven v.Valkenborch 161
Dideric v.Apeltern 162v
Wateringhe 112v
Welyserde vrouw v.Wissen uten Pole 7v
Wendelmoet Jacop Botermans dochter 42v
Wendelmoet Rondeels vr. v.Jan Eggherde 60v
Wendelmoet vrouw v.Gherit den Wilden 43, 117.
Wendelmoet vrouw van Aernt v Hokelen 1
Wessel v.Codijc 8v
Westzanen 33v
Wiborch vr.v.Jan v.Zaenden 185v
Wiite Henricksoen 101
Wijc op de Zee 29
Wilghenkerc 122v
Wilhelmus uten Campe 81, 159.
Wilkoer Koelmans 49
Willekijn Ever 94
Willekijn v.Retersbeec 112
Willem abt convent v.Egmond 3, 3v
Willem Alaertssoen 73v
Willem Aloudssoen 150v, 152
Willem Barbier 110v
Willem Blancnaertsoen 128
Willem Bottelgier 105, 123, 124v, 125.
Willem Botterman 90v

Willem Claes Backerssoen 166v
Willem Cutaert 180v
Willem die Witten 87v
Willem Dirx v.Valkenborch 108
Willem Eggaerts 174
Willem Enghebrechtsoen 101
Willem Florenssoen 94v
Willem Gherit Ockerssoen 95v
Willem Gielissoen baeliu te Tolen 125v
Willem Grubbers venne 60
Willem Heynenssoen 121
Willem Hont Wittelensoen 149
Willem Hughenssoen 109v
Willem Jan Egghaertssoen 173v
Willem Louwerenssoen 166v
Willem Oudevader 15v
Willem Pieterssoen 24
Willem Pouwelssoen 128
Willem Reynerssoen 119v
Willem Sonderdanc meyster 58v, 63, 109v, 121, 166, 179, 182.
Willem Spaen 177v
Willem Symanssoen 90
Willem v.Adrichem 116
Willem v.Beckevoert 3v
Willem v.Beyeren graaf 13v, 34v, 83, 84, 91v.
Willem v.d.Heul 171v
Willem v.d.Heul Dammaessoen 132
Willem v.d.Heule Gherijt Borgherssoen 52v, 53, 129v, 130v
Willem v.d.Woude 89v
Willem v.Dongen 114
Willem v.Duvenvoerde 114
Willem v.Haerlem Janssoen 116
Willem v.Montfoert 67
Willem v.Noord 96
Willem v.Thuyl 66v
Willem v.Windelsnesse Gillesz. 44
Willem vader v.Hughe v.Zaenden 9v
Willem Vinke 98
Willem Witten 12v, 76.
Willem Zonderlant 98v
Willem zoon v.Beckevoert 3v
Willen de Hont Wittelesoen 153v
Willen v.Scoten Willemssoen 56v
Willige kerken 26v
Wissekerke 137v
Wissen hofstede te Schoonhoven 164
Wittenkinderen 137v
Wolf Jan Aerntsoen 76
Wolfaert Janssoen 106a versus
Wolmarden vrouw v.Wissen uten Pole 11v

Wouter Edelinxsoen 4, 111.
Wouter Siers 91
Wouter v.d.Hove 183v
Wouter v.Hoemskerc 54v
Wouter v.langherak 40
Wouter v.Rijnen 10
Wouter v.Ysendoorn heer 44v, 45
Wouter Wilkoc 52
Wouter Willemssoen 65v
Wouter Witten 12v
Wouters uten Houte 89v
Wueraet Dirxsoen 39
Yen Lambrechtssoen 69v
Yewe Beenensoen 39v
Ysbrant v.d.Scuere 53v
Ysbrant v.Scoten Gherijtssoen 57, 149.
Ysebrant Dullaert 88v
Ysebrant Florissoen 128
Ysebrant Walichssoen 94v
Ysebrant zoon v.Gherijt de Borgher 48v
Zeeborch zuster v.Claes Pelegrijnssoen 90v
Zevender joncfrouwe van der 95
Ziburgh vrouw v. Gherijt de Borgher 48v
Zweder heer v.Montfoert 165v
Zweder v.Zuylen 78v
Zweder Volprechts 23v
Zyborch vrouw v.Gherit Borchman 25